


كتاب ابن عبد الباقي



آخر حدود

الجزء

00118328



Bibliotheca Alexandrina

سمير عبد الباقي

آخر حدود النزاع

الناشر: دار قباء

آخر حدود.. الزجل
على قد وسع المشاعر
جفت بحار الخجل
وايه فى وسعك يا شاعر
غير احتمال.. الأمل
فيه للألم.. آخِر

آخر جلود الزجل

الناشر: دار قباء للنشر

٥٨ شارع الحجاز - عمارة براج آمون

تليفون: ٠١٥/٣٦٢٧٢٧

المؤلف: سمير عبد الباقي

رقم الإيداع: ٩٩/١٤١٣٦

الترقيم الدولي: I.S.P.N 977/303/201/9

الغلاف: كامل جرافيك

المشرف الفني: محمد كامل

الجمع والتنفيذ الفني: عفت إبراهيم

الطبعة الأولى: ١٤٢٠هـ - ١٩٩٩م.

جميع الحقوق محفوظة

كلام بسيط في السيرة

من كتاب الشعر الأول

أدباتى..

أنا أديب مش أدباتى ب إيدية ولسانى باهاتى
كلماتى آهاتى.. سكاتى خرابيش على حيط الزنزان
من يوم نطقت لقيتنى ميدان لكل أحزان الإنسان
غنيوتى لليوم الآتى عصاية فى ايدين الغلبان
باحلم أموت كما عشت شريف.. وف يوم ح ييجى أديب م الريف
لبيب أريب ولسانه عفيف فى قلبه تلقى حكايتى مكان
يحس زى بحزن خفيف على كل شىء طيب ونضيف
فيفتكرنى ربيع وخريف ويقول خساره دا كان فنان
قصايدة سيف ولسانه حصان.١



أسبراكس

ياشعب سارقاك سكينه فوق يا أخينا
الهم كابس ع المينا اسطول اسطول
الكدايين قلبوا دماغك جابم داغك
لو رقعوا أم صداغك إنت المسئول
ع المش شقيان تتلوع تعمل مجدع
فجل وبصل. وبتتكرع من سوس الفول
الدنيا راكبه صاروخ نفاث ... فوق يا ابن الناس

زماننا ح يدوس الهلاس ده فصل القول
يا إما تسأل تتعلم ليه تتألم
ياتشوطها صرمه وتسلم فيحل الهول
والهول بقى مش ح يخلى ناس ترالالى
بالذل تقطر.. وتحلى. ومخها مسطول
وح نبقى لا حصلنا سودان ولا بسبستان
واحنا اللى كنا الأصل وكان شكلنا مقبول
فك اللجام ياما شديته ياما قاسيته
واللى خربها اخرب بيته.. الغمه تزول.



استغفار

يالا مستقله.. يادحريج وغله غيطانك ممة.. وصدرك حصير
محلل حرامه.. مدهوس حرامه مضيع مقامه الأمير.. والفقير
غناكى وبكاكى.. يشرع رضاكى تحاوطك سناكى النكير.. المكير
نهارك رمادى.. وليك معادى وتنسى ميعادى ف وعود الوزير
جنونك فنونك.. تخالف ظنونك يغمى عيونك.. نهيق الحمير..
وخيرك لغيرك.. حراميك غفيرك .. بنشقى وحميرك.. تمام فى الحرير
ربيعك ترابى .. خريفك مرابى وأنا يا خرابى.. ما بينهم أسير
أغنى واهاتى وأعصر حياتى للحظة مهاتى فى كاسك عصير

وفين القى منجا.. وارضك حلنجه إذ أزرعها منجه تثبت شعير
 زراعتى شقاره.. صناعتى خساره هلمه واداره.. ياسوء المصير
 ياغلبى المعبى.. عذابى أن ذنبى باحبك وحبى عليكى عسير
 لأنى ضعيفك.. فى مدنك وريفك ... مشرد فى صيفك وفى الزمهير
 وأن اتهد حيلك.. أنا اللى أجبى لك يابلدى واشيلك كأنى.. بعير
 عصابتك فى ضهرى.. لجامى وقهرى وحبك يا عمرى.. مرارى المرير
 إذا ما تتادينى.. لابد تلاقينى ولو تحدفينى ف سعيير الهجير
 حافظ لك مقامك.. حلالك حرامك ومن نار غرامك أنا باستجير.!



موال من بحر الصبر

الضعف شينه فى عرف الخالد الأزلى
 طاطى كتافك ياواطى للعويل يعلا
 إحنا العبيد من ميراث فرعون ولم نزل
 حرياً وسلماً عظامنا الفحم للشعلة
 مولانا يخطف ويلهف جحشتى وجملى
 وحقى ح يكون لى يوم ما يولدوا البقله.



شكشك شناكل

شكشك شناكل شكشوكة بجبّه موهير محبوبكه
نازل خطب عامل دوكة بـيرص كلام
شايفنا م الكفر نقاسى ... قال لك وماله: ابقى سياسى
أنا قيمتى أجدع م الفاسى حدا أونكل سـام
ساق الهبل ع البولتيكا وقال حرام المزيكا
وصلى يشكر أمريكا. على بال وسيكام
عربى لكن عشق الميلايين غلبان من اصحاب الملايين
وأن قلت له دى الناس جعانيين ح يقول يا حرام
ونعمل إيه ده قدر مكتوب إغسل إيدك م النّق وتوب
ما تعترضش كفاية ذنوب ده قدر ونظـام
ويخبى إن محمد مات لافات عزب ولا ساب عمارات
ولا وصى لاولاده امتيازات أو لقمـه حرام
ومكانش يقبل لاستغلال ده كان حبيب ياسر وبلال
وكانت له سنّه ف بيت المال عدل الأحكام
ياشيخ كبرت الله أكبر وف عيشة الخلق اتفكر
حتلاقى حزن وجوع أكثر والهـم أكـوام
المؤمن اللى ف قلبه الشوق ... يعمل حساب لحساب من فوق
ما يبيعش روحه عشان مخلوق مهـا ح ينضام

حلم العداله البشريه فى الجنه نفحه إلهية
الكل فيها سواسية حلم الأحلام
ما فيش نبى غير كان شغال ... بإيديه بيكسب لقمه حلال
كل الرسل كانوا عمال يحيا الإنسان
خليك مع الفكرة الراقية الدنيا دى زى الساقية
ولا عمرها على حال باقيه سيب الأوهام
الفقر أعتى شيطان خناس والظلم يبذل الإحساس
والدين أتى رحمه بالناس إقرأ القرآن..

شيلت الحمول ياما حبك كان عَكل ميلى
علمنى أنشد من الآهات مواويلى
وماترونيش إلا مية قَلتى النيلى
هिला بيلا هوِيّه.. هواك قواني ع الغريه
كل السكك صعبه شدى بالرضا حيلى



الدبلوماسية التكتيكية

ولأنه من الذى منه والدبلوماسية دى فنه
يخطب يخطف أفكارنا والكون يقف على سنّه
خبره فى فن البولتيكا والجبرى والمزيكا

ويحب قوى المستورد وخصوصا من أمريكا ..
تسأله ازاي الحاله ؟ ح يقول لك مُش بطاله ..
بس أن ماكانوش الفقرا مالىينها تراب وزياه ..
تسأله إيه اللي قتلنا؟ طبعا جهلنا وهبلنا
ضيّعنا بلدنا أونطه مع أننا كنا ف حالنا
كان مالنا ومال الحرب خدعونا أولاد الكلب
الشيوعيين الكفره سمموا أفكار الشعب
قال إيه وبنينا السد وفتحنا طريق المجد
ومن نقره لدحديره لحد ما حيلنا أتهد
جت لنا فرصتنا نروق نلحق وقتنا ونفوق
ننسى أوهامنا السوده ونعامل الدنيا بزوق
لك حق صحيح يابوتيكي يا حبيب هنرى الأمريكى
بس الفرصه الموعوده غرقت فى الإدارياتيكي
واللحمه كلتها الخطه وغازطنا ياقلل شطه
من كل بنوك الدنيا دايرين نشحت للقطه
ح تقول طبعا تضحيه تمن الرخا .. والحرية
بس أحنا خسرنا اولادنا وانتو لهفتوا التسقيه
كل ما بنجوع تهبنا وتعضنا لو ههبنا
ونقول لك كل ما تزعل وحياة ستك عذبنا

والمستقبل بالنيه رأسماكية اشتراليه
هيه الدنيا راح تحلى من غير شطار حرامية
يمولونا دماغنا أمانى يمكن فى الدور الثانى
نتجح يسمح مجموعنا وتبليغ فى الالمانى
ومادمت ملكت دماغنا رقع لنا أم صداغنا
على حالنا نيكى ونضحك طول ما إنت بتزغزغنا
غنى لنا بصوت مزازيكى وارهن غيطى وقباريكى
ما خلاص النيل المالح بيصب فى لاطلنتيكى١.



من مواويل الصبر

ليه عند باب الفقير الحظ يبيلم؟
بيسن سيف الزناتى وبرضه بيتلم
طول النهار تحت صهد الشمس ما طال شئ
ويسهر الليل يعد النجم ولا طل شئ
ياللى قسمت الحظوظ، إمتى تعدلها
بلد الحبايب قصادى ونفسى أعدى لها
طفوا قناديلها غصب وخفت اتكلم
مثل سمعناه من اللى عاش يعدلها
مهما تعلّم فى نفس ذليله.. ح تيلّم١.



أحلام انفتاحى صغير

قالوا انفتاح اقتصادى قلت خير يا اولاد، الاقى شقه لحماده وغفش لجل سعاد
وأروح لشغلى ف ميعادى واستريح بميعاد
أنا اللى شفت المرار يوم لانكسار نادر... أقيد صوابعى شموع لو رجعت الأمجاد

...

أصل اللى قضى حياته فى القرف مشاوير، وكمل الشهر شحّته أو سلف م الغير
عمره م يكره يعيش ويعم بلده الخير، يلاقى ساعة عشاء شوربه ونسيرة طير
ترم عضمه اللى نحلّه الفجل والجرجير، وتفكره باللى كان عزة الأجداد.

...

وانا ياما قضيت لياالى م الفزع مشلول، يا هلترى لو عييت والا اترميت مقتول
مين بعدى يضمن لأولادى الرغيف والقول
وعشان كده قلت.. لما فتحها ع البهلول، لايمنى ع الفكه شحّم مخنا المقفول
اللى اتبرى وصدى من تقفيلة الأنكاد!

...

وهكذا قلت رأبى فى العلى مش خوف، أنا اللى جيبى ما فيه ولا بكرة الحلوف
منذ النهارده ح يبقى اللعب المكشوف، إفتح ياسمسم وعبى ما عادش فيها كسوف
إنت وشطارتك ياخاطف تبقى يا مخطوف،واللى بيعلم يدق . يجهّز الأوتاد..
وصبحت أقرأ الجرايد كل يوم بنظام، وأرتب اللى انكتب.. واجمع الأرقام
واسرح وارسم جناين ورد فى الأحلام

وانام فى بطنى غيظان بطيخ وجرن كلام، أقوم على الصبح
أمصمص عضمة الأوهام حاسس فى نفسى شيندر بقالين بغداد

...

وزهقت.. قلت الوظيفة سر همك.. سيب وأنزل ميدان الكفاح الحر واعمل ديب
كام خبطه بالشنطه راح تقلب معاك وتجيب
عصر البدع يا جدع فيه الحظوظ يانصيب، إدفن ليالى قضيتها ف مخزن الكراكيب
وكأنى كاروا اتهلك.. لا فوطه ولاعداد!

...

أنا عمرى ضاع فى المكاتب.. قالها مخى وتف
يومياتى أسأل واطقّس ع الرسوب واتهف، وحياتى ضاعت وأنا باقرا الودع والكف
مستى ساعتي تحين أو أتركّن على الرف، ويبيعوا ورق الخدامه يقرطسوه لّف
وملف خيبتي فى شيبتي يشمّت الحساد

...

وحياتى راحت أهاتى شغل وشكاوى، وحقوقى ضاعت ما بين صايغ وغلاوى
إذ سيننا إيه للعيال غير هم وبلاوى
ضاع الكلام اللى قال العدل ح يساوى، قرشك وفيه الخلاص م الفقر ومداوى
ح يخللى ذكرك يمد لسابع الأحفاد

...

على طول رميت لاستقاله بيعت عفش البيت
وقعت نفسى إذا حظى غمز قبّيت، لفعت شنطه وع المنيا الجديد عديتْ

أول ما خطيت - يا خلق الله - أنا اتخضيت

دى حلمه يابا.. واكثر مما أنا اتمنيت، دى مدينه والا ملاهى.. وفنطزة أعياد..

...

هنا كل شىء ياجدع.. فوت.. خش.. واتفرج، ومصرح تكون كده لما ح نتفرنج

قرب تشوف تقنتع ياللى أنت بتهرج، يا حسود عايزنا نرك معاك.. ونعرج

برمج نافوخك وقب بدال ما تتدحرج، أن زهر القرع خللى.. مذهبك مداد

...

مديت يا عالم لجوه.. يا ااه على الزحمه، الكل فى الكل على قلبه الدولار وحّمه

زاحم ودوس اوعى ترجع إلا باللحمه، أهبر و كله بتمنه.. الشمعه والفحمه

وإن كنت بنت استبيننا - الهوى سداد

...

ودمع عينى جرى هز البكا سريرى، أشقى بطول النهار تطلع زرازيرى

كل الجوارح بتتف ريش عصافيرى

طول النهار فى نكد ما ارفعشى منا خيرى، والليل أقرص وانام.. لهف العسل غيرى

وماليه إلا بواقى الست - والأسباد

...

كل الفرص والبورص عجزت قصاد خيبتى

ضحكوا عليه وقالوا لى الوقت ده وقتى، بضربه واحده اكيد راح تتصلح حالتى

وأما ضربت انضريت وجيت على رقبتي، حتى الهوى كان يقع من خرم سيالتى

وفوق دماغى الحقيقة مطرقة حداد

فى كل شارع عماره تشب ما اسكنهاش، والف دكان هلمه تقب ما ادخلهاش

دولسى وبوزو تشيكين ألا بنده ما أدوقهاش

ويقولوا موضه أربى الشعر.. ما حلقناش، وعشان أروح أشعبط روحى فى القشاش

إن شفت لحمه انسعر وإن شفت عدس انكاد

...

ويوماتى أزحف مروح الرصيف مخنوق، بين دبش وغفار وطوب ومجارى قبه لفوق

تحدفنى حضره تطوحنى شقوق لشقوق، أنا والخلايق ما بين مقهور وبين محموق

بندوس على بعض زى المعز يوم السوق، وكإننا مش بشر.. ولا بلدنا.. بلاد

...

ركبت سنين فوق.. سنين والصبر بيظمط

واسأل.. يقولوا اللجان لساها بتخطط، ووصلنا عنق الزجاجة وهوب ح نلبط

فى المينا جبل الأموال مشموط ومتشعبط، وأنا العبيط اللى صدق هلف مستعبط

صبحت فى السوق بضاعة وعمرى رهن مزاد..

...

جرى لنا إيه؟ ما احنا طول العمر منفتحين، ملقف تجاره ومسئ لكافة السكاكين

من عصر خوفو لفوفو لعصر زفت الطين، وكل من كان نقشر له البصل والتين

يركبنا يتعبنا يرهبنا سداد للدين، ويقوتنا كهنه.. نمصمص عضمة الأمجاد..!



ح يخلف الفقري إيه م الجوع سوى غلبه
ويورث القهر إيه من خوفنا غير كدبه
ياقرد مين خلّفك؟ قالوا قرّد من صلبه
ويافار بتلعب فيران الرعب فى عبه
زرعنا كدب المواسم طرحت الأكاذيب
سبع السبوعه انقهر.. باع لبدته للديب
والكلب لما انسعر غفر الخروف ذنبه!



حلم الجعان

أمريكا أكيد ح تحقق الحلم لكل الناس
آمن يا حبيبي وصدق بالقلب وبالإحساس
واياك عقلك يتقلق د العقل ياواد وسواس
شد الحبل على القالب طبل وارقص واستبشر
حظك لو وسطك سايب لاتسأل ولا تستحمر
ويانا الدنيا بحالها حتى الفول الخناس
ح نعبي المال بالقفه وح نبقى اصحاب رسمال
وسنكتب شعر مقفى ونأمن ع العمال
نصدر مش ملوحه من بهجوره لبلقاس

وموانى بلدنا الحره. راح تبقى ألأجه وموضه
نعمل فوازير بالذره نرقص ديسكومن الروضه
نتظم صرف العمله وأصول زق الترياس
وح يبق الداخل طالع نازل شغال حلبسه
يلعب مع كل مصانع شبرا وحلوان البسه
ومادام خدنا بقى كوبرى نتحمل نبقى مداس
حنشوف الدنيا جنابن وزهور فل ورياحين
وحنبقى جميعا جمعاً من أصحاب الملايين
وح تسرح خالتك خضره بالفجل وعقد الماس
يوم ننسى الحقد ونبقى كما أهل الريف الكمل
نشرب م المر ونشقى نحفى . لكن راح نوصل
من بعد الجوع القارح راح نشبع لحمه راس
يابهاناه احلمى واتمنى وانتى بتتقى الدوده
للبيت الأبيض غنى تضحك لياليك السوداء
فى عز شقاكى وجوعك بتنامى بكل حماس
الدنيا ح تصبح بمبى ولاحد ح يبقى جعان
القهوه ح تقلب ويمبى والبغل ح يبقى حسان
وح تلقى حداك فى المقعد طبليله وزير وإياس

تشرى ميه بالسكر وكاكولا غسل ومغات
 وابنك يلبس لو يكبر برنيطه بجوز مرايات
 ويبقى عنده بزامة وتلاقى قميص ولباس
 بس انتى اياك تقرى على حد تقولى حداه
 الفقري مكتوب فقري يمكن يرحمه موله
 فارضى ح تدوم النعمه .. دا رضاكى علينا أساس
 انصحى شعبان يتدردح يعرف قيمة الرساميل
 السوق عايز الى مفتح فايق وسط المساطيل
 قولى له مالك بزمايك ... دوسهم قبل ما تتداس
 دى بضاعه تساوى تمنها لكل حصيده أوان
 احنا اللى شرينا هوانها حقنا ننسى الأحزان
 كاوبوى بيشد لجامها .. فافرح وارمح يا حصان.



عبده السردينه

عبده بن أمين.. مهدود وحزين..... علشان سخطوه.. سمكة سردين
 فى البحر لكين.. دايمًا عطشان..... غلبان مسكين.. مش لاقى أمان
 خايف م البلطى.. وم القراميط..... وبيمشى يوطى.. فى ضل المحيط
 مكروش ع الشغل.. ملان وسواس..... مرعوب مرهوب.. من كل الناس

بايت مقهور.. وعشاء تنغيص..... يصبح محشور.. جوه الأتوبيس
أمه السردينه؟ م الحال منقوطة... لاهى لاقيه طحينه.. ولا طايله القوطه
وح تحكى لمين؟ يامدلدل قصه..... عبده السردين.. طبخوه بالصلصله
أكلوه الساده.. والـرزق نصيب..... وانتم كالعاده.. ما قلتوش عيب
يوم شفتم عبده.. بيهتف للديب أو طالق دقته.. وعامل سراديب
من طين امبارح.. عماله تجيب..... يا مواطن صالح.. دمك على مين؟



استعباط

مسكين يابرعى ما حيلتك إلا كام فدان
قلبي ممزق عليك.. يا حسرة البكوات..
بقى دى أصول: ياللى جدك كان أغا السلطان
ومكانش فى البر مثله وفاق على الخواجات
بيجى الزمان اللى فيه الحافى والجريان
يرفع عينيه فى سيادته يا زمن جبانات
شوفوا كتابه ف يمينه ولا القمر فضاح
من صغر سنه وكان له فى الأصول وقفات
عنتر زمانه وطول عمره لسانه سلاح
حتى ولو كان ح يفتى ع التلات ورققات
زعم فى وش الملك.. فلاح انا فلاح

رقص عشانه وحيوا همته اللوردات
وعشان كده لما قالوا فى البلد إصلاح
مين زيه خبره بيّفهم لعبة الطبقات
عمل قانون عقر يمنع أن تهب رياح
ووزع السحت صدقة صدّقوا القفوات
يبقى انهارده نجازيه فى ابنه اللى متعتر
على سلم القطر بيّزاحم مع الألافات
عشان يا عين امه يلحق يمضى فى الدفتر
قبل المدير ما يشيله ويتهرى خصومات
م الأربعين أهيف العمى اللى مش أكثر
ماهيّه ما تسد حق البودره للسّات

يا خلق شرع العدالة تقدروا ظروفه
لكل شىء سبب والرزق اجتهدات
البية ده سيد الكرم نشهد له بضيوفه
ولا ينكر الفضل إلا الندل والشحات
من كل حى الجميع داق فضل معروفه
صحفى وشاعر ومخبر كله فى الدوسيهات
شهد الطابور اللى لولا قبض مصروفه
لا كان جرايد ولا مسرح ولا سينمات

وجايين تقولوا مزارع٦٠٠ قريبا وشوفوا
طباخه واقف بيشحت لحمه البطاقات
وجايين تعدوا البقر والمعز والأطيان
وتقروا ع القرع وتُقُوا على السهرات
آه

آه يا زمن كلب متقلب مالکش أمان
خليتي أخاف اللي جاى من حزننى ع اللي فات
طبعك عويل ندل لو أحكم عليك يا زمان
لاهرى على أم رأسك جزمة البشوات
واطلب من الباشا برعى عمنا الغلبان
يناولنى أتعاب دفاعى.. فوق دماغى.. شيكات



من مواويل الصبر

لو عزت صاحب عليك بالمتعب الشقيان
ساعة تعوزه تلاقيه زيك عليك قلقان
واياك من البرمجى تربية الأسواق
يدارى عيبه بجيبه ويفرقك أشواق
وان طال بيعك شكك.. ويفش فى الميزان..



استثمار

وسع يا عرفان شوارعك
الشرع جاى بيقى شرعك.. ثبت أساس العماره
وأصل يا باشا ومقاول
كيد الحسود والعوازل.. بإيدك عصرت الحجاره
حادى وراضى وهادى
رسَم الحدود الأعادى.. وانت رخيت الستاره
إياك يهمك وجوَز
غيظ الحسود المبوَز.. سعدك عشقت القماره
حبيل الوداد اللى وأصل
فاتح بيبان الحواصل.. الدنيا عايزه الشطاره
لف الخطوط الصريحه
واياك تخاف الفضيحة.. المكر أسّ التجاره
اللى يخاف مش ح يلعب
واللى ح يدفع ح يكسب.. لو حتى عقب السيجاره
شفل نافوخك وفتح
القرش رجّل المكسح.. كالبردعه للحماره
فارمى بياضك وناسب
السلطه أم المكاسب.. واقسم ماهياش خساره
تزين جميع المجالس
يقرروك ع المدارس.. تصفر عليك الوزاره

من مواويل الصبر

يا رايح السجن حر .. السجن للجدعان
ح تظل صاحب مزايا وأقوى م السجنان
حتى الحجر يا بشر .. ح يقوم مع المظلوم
دى القسمه لو حق كنا رضينا بالمقسوم
لكنه شينه يا ظالم .. وجائى لك فيه يوم
تفرق فى بحر الندم تصرخ ما تلقى ودان..



انفتاح

أتى يابيهه عليكى الزمان بأمر السما سره تحلى الحزام
وسيدنا (بيجن) .. عليه السلام يزورنا يوماتى ويفتح كلام
وهوبص يفعلص وفعلص يهوبص وبعدين يوافق يأمر الختام
بلاش الفضايح .. أعز النصايح إذا تفوح روايح عليك بالزكام ..
وخليك يامصرى .. مهذب وعصرى أنا ليه قصرى وليك الإمام
تخليك فى حالك .. ح يرزق عيالك تخاف من خيالك تعيش الف عام
كاسات السعاده ح تصبح زياده فى ظل القياده وعطف المدام
تشارك نبارك بلاش م القبارك ده خط الجمارك بيحلب تمام
يا فى البيض تفقش يا فى الأويما نقش ولطش وطقش تحوز الزمام
وعيش قد يومك وقيف هدومك وبلع همومك ح تصبح تمام

وبرطع يا داير فى كل الدواير ح نَرْخَى الستاير ويبدأ الفرام
سلام المقايضه منع أى فوضى ح نرضى المعارضة بحبال الكلام
وسيد الجيوش اللى طَلَع وحوش ملوك الكروش زَغَطوه الحمام
ح يبقى إدارى حراسة حوارى وينزح مجارى إدارة الترام
وموت يا (عرايى) يا حامى الطوابى حفيدك مرابى فى حالة انسجام
ياحسرة عيالى فى سود الليالى مسمم خيالى تاريخنا اللى نام
لا اقادر افسر ولا عارف اهنكر ومولانا (كارتر) فى ايده اللجام

ده كان فين مخبى.. سلامتك يا شعبى

يافرحة (اليمبى) و (فوكس) الجبان!



من أغنيات القلب الأخضر

افتحى قلبك يا شابه للى جاى
النهارده.. بكره يبقى ذكريات
افتحى قلبك لمن فى نهار ما مات
دمه كان نجمه تدلك ع الطريق
انفضى عن حلمك الهم اللى فات
اطردى الاحزان من القلب البرىء
قد نبيل الجرح كان جمر الحريق
فابدأى من الفرحة عمر الأغنيات!



استفتاء

مأماً مأماً مأماً مأماً.. كل ما مأماً مأماً ما اء
إحفظ كل كلامى وعيد.. اياك تنقص حرف تزيد
وطى وخطى ربك يعطى.. هيه وصيه عن الآباء..
لما يما مأماً مأماً

مأماً وما تغلطش تعارض.. يوم الزفه اياك تتمارض
عفر عكر اوعى تقصر.. مصر انفتحت والخير جاء
بس تما مأماً مأماً

اتعلم تخطب وتشجع.. تيجى الفرصه يبص ويسمع
يلاقيك زوق فتقب لفوق.. تكوى الضروه حدا الحلاق
اللى يما مأماً لك مأماً

كبر تخن إجلى قرونك.. ورى جميع الزعما فتونك
سلك صوتك إوعى تفوتك.. توصل له بكشف الأسماء!
حافظ مأماً مأماً

إسمع منى كلمة فى شرك.. فيه أنواع م اللت تضرك
سحلب دحلب إنعم والعب.. أصل الأزمة من الأخلاق
غيرك مأماً مأماً

خيراً شراً خليك واضح.. ما عيب الا الفعل الفاضح
اللى يضرك قوله ف شرك.. وافهم ما خلف الأشياء
لما تما مأماً مأماً

إزحف ما تدببش دبيب.. خليك واد طيب وأريب
أوعى تعكّر مية ديب.. واهتف مع كل استفتاء..
مأماً مأماً مأماً مأماً



إنطق

ملعوننا لزمن العاقر يولد أندال وخيانه
ملعون القلب الفاتر يجلد حلمه الهجانه
ملعون الوتر التاجر لوعنا بكلمة جبانه
وسقانا الهم أناجر رضعنا المر خوانه
سلمنا لإيد التاجر النيل أحزان جوانا
ياقلبي أنشق ببيادر صحن الخلق النعسانه
انطق بالكلمه خناجر اكشف لوع السجانه
انطق بالقول القادر بوس الايد العجانه
خدلك مع شعبك ساتر وإضريها فى المليانه
دى الكلمه الصدق قماير بكره والبشرى معانا
المجد لأرض الشاعر يوم ما تدمدم غضبانه.



حظ العوالم

(نيكسون) حبيبى وكان صاحبى.. وانا من سنة ستين صاحبه
من صفر سنّى سكن قلبى.. آمنت بيه وهويت لعبه
أسرنى لما وقف جنبى.. وشالنى على عيبى ف قلبه
عوّمت على عومه مراكبى.. وعطشت.. حمّانى بحبه
واكيد ح يكفينى متاعبى.. طول ماشفايفى فوق كعبه!
راجل ومن أصل ماصل.. زى المثل ما عرفنا صحيح
إبن الاكابر.. متقنصل.. عمره ما يعمل فعل قبيح
والقول يقوله ولو حنضل.. زى العسل ناعم وفصيح
عشان بيدفع بيحصل.. لبيب يفهم بالتلميح
وايش جاب لجاب بحر لمنصل.. فيه ناس دهب والباقي صفيح!!
يوم ما وعدنى بزيارته.. انا قلت له مصر بلادك
جمعت شعبى حذرتة.. ضرورى تحذر حسادك
حاقدين عشان ساب طيارته.. بيكرهوا الخير لاسيادك
تصوروا علشان جانا.. قاموا لفّـقـو له (الووتر جيت)
انا قلت له تعالى جـدانا.. وتكون رئيسنا لو حبيت
عيلتنا ما فيهاش خوانه.. صاحبنا ييقى صاحب البيت
خصوصى لو أن هوانا.. وافق هواه ولضمننا الخيط..
قام لما (فوردد) ركب بعده.. لقيته صاحبى اكثر واكثر
وحلف لى لما أروح عنده.. ح القى الدولار بحر وابحّر

وكان على بخله وعنده.. بيخصنى بقعر الأنجر
 حبيبي كنت اما أواعده.. يجيني لو حتى تمطر
 وصحبتى كانت سعدة.. سقط.. وأنا حبيت (كارتر)
 وده الغرام اللى سلبنى.. عقلى وسابنى أدوب م الشوق
 كان يتقمص.. فيدوينى.. ويتسم لى ارتاح وأروق
 فى (الكامب) ظرفه شقليبنى.. سحبنى فوق للناس الذوق
 آه من فراقه.. معذبنى.. لكن اعمل إيه ده حكم السوق
 البليه لعبت من تانى.. دعوة وليه لواد كفران
 حظ العوالم خلانى.. يوم الخساره اطلع كسبان
 نجح اللى تقنيه شجانى.. سجيع وانا غاوى الشجعان
 (ريجان) يا بلسم أحزانى.. فرقع يابمب وطير يا حصان
 (ما كارثى)؟ آه.. أنا (ألمانى).. وأعرف أمثل بالألوان
 وانا كنت غاوى فى زمانى.. فنان وجانى رئيس فنان.!



كله عند العرب.!

فى كل زاويه وكل ناصيه خد وهات
 ولاد بنات وفنانين وفنانات
 ورمش عين المسئولين لاربع جهات
 جوه اللجان الأردغان التصريحات
 وع المنصات فى الساحات أو فى البارات

من كل جنس وكل صنف وتركيبات
هروين مقالات إجتماعات اغنيات
تهويش حشيش تهبيش سكات..
عند العرب كله طرب.. مخدرات!!



استفسار

أنا الأديب من غير جايزه .. أزجالي سهله ومتمايزه
ح اقول ما دام الناس عايزه .. لكن راح اكوى على الجنبين
حتى تفوقوا.. يامصريين..

الهم ع الصدر مراوح.. والخيبه صار ليها جوارح
يا جرح فى القلب وناقح.. قول كلمه ابرك من سطرين
فى البر مقلوبه الأوضاع.. يامين يقول آه م الاوجاع
ح يبقى إيه لو وطنك ضاع.. فى دنيا بتدوس النايمين
إيه الحكاية يامحترمين؟.. يا للى لسانكم كان شبرين
مالكو النهارده كده تايهين.. لايصين ولا عارفين على فين
من بعد ما كنا الأسياد.. شفنا بلدنا عزال فى مزاد
باعوها ع الدفتر يافؤاد.. ورخصنا بين البنى آدمين
يامكروشين ع النص رغيف.. يا ملقحين على نص رصيف
نلبس هدوم الشتا فى الصيف.. ييجى الشتا يلقانا قالعين

الشحط منا قد الفيل.. عليه قفا يغطى البرازيل
ويميل مع الريح لما تميل.. ويقول يا عم آدينا عايشين
وهيه دى عيشه ياخيشة؟.. ياللى بقيت فى البيت طيشة
خموك بلقمه وتحشيشه.. وطلعوك تهتف لبيجن
ح تقول لى كنا وكانوا زمان.. جدودنا غيّرت الأزمان
جاك نيله يارباية الطفيان.. دى عيشه واحده ما هيش اتين
وح أقول لك السريا منكوب.. ياخلفة الزمن المعيوب
مادام صبح بوبى الحبوب.. ع القمة بيسن القوانين
ويبيع زبدها للخواجات.. البرمجيه المليونيرات
وابن البلد أصبح شحات.. وخيره يردم بحر الصين
رخوا الستاره وطفوا النور.. نفسين يادوب سطلوا المأمور
الحبل فك انفك الطور.. دهّوس أملنا زفت الطين
عنكب ركب دلدل رجليه.. صبح ملك اسم الله عليه
ونشفت البركة على أيديه.. ويقول ح تفرج عام ألفين
يصحى يوصى على الأخلاق.. وينام بايعها بكل إباء
بضاعة فى جميع الأسواق.. بشر وميه ورمل وطين
ياخلق د البغل فى لآبريق.. والخنقه عكمت ع المخاليق
وباقى هبة ريح وحريق.. ويهد موج النيل عابدين
أصل الحكاية وفصل القول.. شيل من نافوخك هبو الفول
شغل دماغك مره تقول.. دا العيب تعيش خايب وحزين

ما تشيلش هم الموت.. ح تعيش. ما تخافش من سجان وشاويش
 دى قبه خايخه وقلعة خيش.. وطور مريض طالب سكين!
 يا جيش عرابى.. النيل حزنان.. لا لاقى سيف ولا باقى حصان
 والطايبه سكنوها الغريان.. وريجان يعلمنا التنشين
 قوم ياللى ياما كسرتوا حديد.. نزل المطر فى يناير عيد
 بشرنا يمكن بكره أكيد.. نشوف جميع المصريين..
 فايقه.. وعارفه السكه منين . بكره؟
 واجيب ليه الصبر منين؟!



آخر خبر

ياترى يا امى سمعتى آخر الأنبياء
 اولادك صبحوا ف الأعيب البورصه خبراء
 وف ملاعيب الفرصه انتصروا على الأعداء
 فتح الله عليهم لحقوا العصر.. وف يوم ذكرى شهداء النصر
 كبيرهم سهران على شط النيل.. بترقه عنه راشيل..
 وهوه بيوشوشها بكافه أسماء الشعراء..!



استحمام

إشربها يافحل المدار.. يا أبو نص عقل وربع ديل
ح يخلوا نص الليل نهار.. وعز ضهر الشمس ليل
فى كل كفر يكون مطار.. الفيط تروح له ف مونوريل
وان كنت قط ح تبقى فار.. وشنب سيادتك يبقى حيل
الدار ياواد صارت عمار.. عيشتنا صبحت زنجبيل
أمريكا ح تفك الحصار.. أنهار مرّيه وطمى نيل
ولبان ومستيكه وفشار.. فتح نافوخك ياجميل
حلبت لنا لبن المحار.. قلبت قنالنا دردنيل
بوتيكات وبارات للقمار.. وحبوب لأطفال السبيل
ومكن عشان غزل السمار.. ذرة لتلقيح النخيل
إبر تريكوه بالچاكار.. أمواس عشان حلق النجيل
أدب الحضر حُسن الجوار.. لغسل وسخ مخك غسيل
لو باظ حدانا قطع غيار.. ما عادش بينا مستحيل
ح نسلحك آخر دمار.. تحمى معانا إسرائيل
فرفش بقى دا الدمع عار.. بلاش نكد دمك تقيل
بنرگبك فورد وياكار.. أصبحت قيمه يازيل خيل
ويمى تشيكن يا ابن الحمار.. وإنسى بقى المليون قتيل.١



آخر تقرير حالة

الى وعدنا بنصيبنا مافات لنا نايب
يكفاك مصايب إحنا مش قدها..
الحرب صعبه إذا صار الحزام سايب
فأن جنّحوا للسلم جنّح لها
ونام على ودانك وتتح لها
واسمع كلام اللى هتك سترها
وقدر بيعها بعد ماذلّها..
عايب وأثبت أنه قدها..
أوزيّها.. والخايبيه للخايب!



إغتيال جحا المصرى

عياق بلدنا لعتر خيرة لافتديه..... فى مره قالوا لجحا: الوالى فى بيتك
قال: وانا مش هناك الأمر يتدبر
قالوا له: إلحق عيالك! قال: نهاركو أغبر
دا الود ودى أقيد الشمع وأنور..... سكة والينا الملك وأدق وأزمر
ملك الملوك خش بيتى ح يعمله معسكر
قالوا له: عار يا جحا ده ناوى يتمسخر

زعق وقال: ياغجر ده قصر ديل يا ازعر... دلوقتى صار أمرى بيقدم وبيأخر!؟
 وعاركو طول عمره اكبر قدما انتو اكبر!؟ ... إنتو أساس البلاوى بطبعكو الأغبر
 تاريخكو يا أهل الكلام مكتوب ومتسطر
 من عصر خوفو لباب الخلق للأزهر
 وأى حاكم خليفه، والى أو قيصر..... تهللوا لطلعته حتى ولو بعجر
 وسحنته تعكر النهرين والكوثر... يصبح قمر فى نظركو حليوه ومفندر
 تسبجوا بحكمته لو يوم نسى وفكر
 أو يوم زهق من يمينه الصعب فاستيسر
 فتحفظوا كلمته لو قال: يا فجل أخضر..... وان مال تميلوا على ميله
 يجوز اكثر واقلامكو رهن الإشارة تزيطوا لو أشر
 تتلموا على طبلته وتشتوا لو زمر..... حسب أوامر سيادته تزوروا
 المحضر تبقوا تراب تحت كعبه بنفخه يتبعتر
 وتقولوا ما أكرمه حين يعطى ويفنجر..... وهو من دقنكو يفتل لكو بيعتر
 تعيشوا على وهم فضله تصبحوا أفقر
 وف ذل أبهته تبقوا يا بقر أبقر..... وهو زى الطاؤوس ع العرش يتفندر
 تكتسوا له السكك وتوسّعوا المنبر..... وترشوا ماء عقلكم قدامه
 يستحمر تتغزلوا ف خلقتة العكره فيستكبر
 أشرف ما فيكم يذله بعاره يتدحدر، يتباع على لقمته من غير ما يتسعر
 يظل من يوم ميلاده لخرجته مبعر
 م الطين إلى الطين وزى ما جيتوا ح تموتوا

مخدرين أهلكم بالكذب فى صوته، تحت المنصه تفوتوا يكمل المنظر
 يا خلق حالكم عجب جاينين تعايرونى..
 خافين على بيتى يا اصحابى وعليه؟ عجب!!
 من إمتى كان لى بيت وكنت حبيب؟
 طول عمرى فى وسطكم عايش يتيم وغريب
 إن جعت ما القى رغيـف.. وإن مت ما القى طبيب
 وإذا نطقت الكلام الحق تشوونى فى حر أبيب
 ولوخرست وكفيت شرى تعايرونى بعض الديب
 دلوقتى دلونى مين فىنا طلع أشطر
 اللى انتكس فاتوكس فاتبط ما اتكلم والا اللى شنبه انتتف علناً
 ولا اتألم ولا من دروس الزمان الندل إتعلم..... وسلّم الدقن راضى
 لسيده واتعنتر
 على الغلابه اللى زى لسانه فرقله... وهوّ طول عمره فى عُرف العيال أنجر!
 ياخلق فوقوا بقى البطيخ على المكسر
 والجحش لو كان نطق بالغصب كان زرزر
 د الصخر حتى الجماد الصخر يتقطر من آهة الحزن لما الدنيا بتمطر،
 والطفل يفضب إذا ما الرضعه تتأخر
 وانتم فى بحر الرضا ع النفس بتعموا... مستطعمين كالبغال الذل م العسكر
 وكل مادا عيشتكو المره ح تمرر
 ح يدبّل الكذب غيطانكم تجوعوا أكثر..... وكل من دب أو من هب ح يسمسر
 فى لحمكو الحى - من دم العيال يسكر..

وطب ساكت جحا من قهره ولافسر.... كان قصد إيه حكمته فى آخر حواديته
 إذ كَفَنُوهُ الغلابه يومها فى سكوته..... لحظة ما قلبه انفطرم القهر واتكسّر
 وحنّ ميت مغفل يا جحا المصرى..... قتلت نفسك غضب ولا حد بيقدّر
 الكل مصمم شفايفه وما رفع صوته
 وقال وهو بيضحك.. كان عليك بدرى
 وكل من كان فى وسّعه زَيْف المحضر.... ولا أفندى إلاجّه سكتا بنقوطه
 إذ يومها فرمان صدر يَنْعِيهِ رسمياً
 بسبب رضا السلطنه ليلتها عن بيته!



إستغاثت

فينك ياسيدنا (عمر) الظلم قام هامته
 أبو ذر مات يا (بلال) رتل لنا حكايته
 واندّه إمامنا (على) يجهز برجالته
 إولاد (أميه) بقوا بعد النبى حكام..

رجع الزمان اللى أصبح فيه ملوك ورعاع
 واتخفى وجه الرساله خلف ألف قناع
 ورجعنا تانى عبيد باللقمه للبياع
 اتحكم الندل فينا وصار (معاويه) إمام

آهين ياسيدنا (عمر) يا منصف الفقرا
حبست جوه المدينة العزوه والأمرا
جاء الزمان اللى فيه خرجوا من الصحرا
ركبوا الخيول الحديد سكروا بعرقى الشام

آهين ياسيدنا (عمر) يا حامى بيت المال
يا موزع الرزق لا محابى ولا ميال
جاء الزمان اللى فيه باسم الايمان اتقال
إن الرضا بالهوان والقهر م الإسلام

آهين يا سيدنا (عمر) يا مُسَهِّدَ الجفنين
من خوف إذا نمت ما تسمعش للمظالم
جاء الزمان اللى فيه اتقننت قوانين
تنهب حقوق الفقير للساده بالأحكام

آهين ياسيدنا (عمر) يا من عرفت الجوع
وانت الأمير اللى صوته فى الأمم مسموع
لكن مادام فيه جعان مفرد لابد تجوع
علشان ماتدى المثل لحاكمين يا إمام
وأهين يا سيدنا (عمر) يا طالع المنبر

لازينه ولا أبهه .. لابوق ولا عسكر
جاء الزمان اللى فيه الخلق تتكدر
لو يسهر الوالى يسكر أو عازت أمه تمام

جاء الزمان يا (عمر) اللى الخليفه فيه
يسكن قصور الترف حرس الشرف حواليه
ونام (يزيد) فوق سرير دم (الحسين) حواشيه
واتعبي كرش (الوليد) من فاكهة الأروام

آهين يا سيدنا (عمر) أفتح لنا قلبك
شريعة (غيلان) و (الفقارى) دليلنا على دربك
نشرع العدل ونستيد فقير شعبك
ونحق شرع العدالة .. جوهر الإيمان!



إستياء

يامصر كم فى جمالك قلت الحكم والأغانى
ونظمت فيك ما بدالك بمعنى ويغير معانى
خلّيت سوادك ينور شفتُ الهباب أرجوانى
غازلت لازرق بنيـله كأنه كان يرتقالى
واما بقيتى سفينه فى بحر عاصف شيطانى

قالوا لى الحق ح تغرق يا تبقى كانى ومانى
طاواعت ع الحب قلبى وفضلت مزروع مكانى
مع انى مفطور موزع حبك قهرنى وكوانى

يا أم المكاتب مصاطب يا أم اللجان أردغانى
يا للى مديرك مقاول عثمانلى مملوك شاهانى
وموظفينك سماسره سقونى من بير كيغانى

وفلاحينك غلابه فى ليل ملوكه غوانى
وعلى النواصى شبابك الملعب المعجبانى
ضايح فى سكه عسيره بين سيما كوره واغانى
وصحافه حره أسيره.. للحاسين الصوانى
لكنى يامصر حالف مهما عذابك أعانى
أنا اللى ألك حَسَرنى وبنار غرامك بلانى
جايز تشوفينى خايف لكن ما خنتش غيطانى
وان بذرتى فيك ماتت، ح ازرعها يا مصر تانى
وامشى طريقك لآخره.. أنزل بسيفك ميدانى
أحمل على كل فاجر من كل تاجر وزانى
بالشعر العلع بصوتى باللحن اشعشع اغانى
أهز صممتك وتصحى تركبىنى حصانى
تسنى قلمى وسيفى وتكرهينى ف أمانى

أمشى أخفف شقاكى يكبر فى قلبى إيمانى
ما أغنى الا غناكى حبك ينطق بيانى
ييشتر الشعب بكره بطلوع شمس الأمانى
دانا يا بلدى باحبك غيرك ماليش حد تانى
يا مصر مرّه اسمعنى والا ح اقطع لسانى.!



إستجداء

واللا زمان اشتقنا يا مصرى.. عدى زمان ما سمعناش صوتك
أعزف لحن الغضب الثورى.. أعاديننا طمِعوا فى سكوتك
زرعوا بيوت بيروت بالموت.. علشان بكوه يذلوا بيوتك
وف إيد غيرك يبقى مصيرك.. يبنى حياته بموتى وموتك
حبسوك غدر فى سجن رغيفك.. تخضع.. تتكفن بسقوطك
وانت يا مصرى كبير مش قلة.. ما قبلتش فى تاريخك.. ذلّه
أرفض واطلع بره تابوتك
دانا شفتك فى حوارى يناير.. زاحف زى البحر الهادر.
خايف الفجر الآتى يفوتك
دق ابوابه بشده ونادى رجع مجد (بلادى بلادى)
إفرض بالحرية شروطك.!

نصيحة بالعملية الصعبة

فى الصراع الرأسمالى.. المغانم لا تبالى بالمدايح
اللى مدبوح النهارده بكره دايح.. فاوعى تتسى درس واضح
أكَل الشبعمان دراعك.. يرحمك؟ والناس مصالح!!
المغفل.. وحده يغفل لحظه.. فى عش الجوارح
اللى قبلك لف حبلك حتى لو من ضمن أهلك . ضيع قارج
راح يقابلك بابتسامه.. وعلى ريش النعامه .. ينهشك فى ود واضح!



استبصار

يا ما نفسى أغنى فى محرابك صلاة تراويح
وافرد كيانى فى رحابك مغفره وتسايح
أنا ياللى جاعلنى همك منكسر وجريح
همى جارحنى.. سامحنى يا منبع الأحزان
قرئت كتابك عرفت الحق م الباطل
حسيت عذابك قهرنى صبرك القاتل
قلبي الضعيف انفطر والكف مش طایل
فين يوم حسابك ياشعبى يزلزل البهتان
من يوم تمنّنا شر الماضى ليوم آتى..
عطشان بشوق الأمل صّبرت اخواتى

شِعْمَرى اللى كان زقزقه مرّر بأهاتى
ليه كل ما انده (يناير) تبعد الأيام؟

ويا إما عيني كليله يابقيت نساى
يا هتلرى انت رايح والا صابح جاي
بِرِّكِ الجمل ضعف مستسلم لكر عداه
أسير شباك لاختلاف ومرارة الأوهام

قالوله بحر السلام م الغرب ح يوافى
تعوم وتسى الهموم تشرب عسل صافى
صدقنا حتى اتسرقنا ولهونا الخافى
لاهيئا والجرح نازف والرجال ايتام

ما دمنا صدقنا لابن الهرمه لو بسْمَل
وهتفنا للى لهفها وفاتنا نتحنجل
على أرض مره سراب امخاخنا بيقفل
شفنا غراب الخراب قلنا له .. خير يا حمام

آهين وكم للدجى يا حبايى ح تشوفوا
يصير غناكم بكا متجرّحه حروفه
ترضوا بذهب المعز.. تموتوا بسيوفه

والعدل حبل المشانق والحقوق أحلام
بكره لاحتلاقوا كسر العيش ولا غموسه
وتهتفوا بالهبل لأبو جهل ولصوصه
وتحمده ع الرضا وتوطوا وتبوسوا
يدوسكو ويسوقكو قريانه لأونكل سام!!



قدر

الشمس لا تخشى السفر.. ولا الجبل يخشى الغيوم
الأرض ما شبت شجر.. والليل ما ينشأ النجوم
الموت ما هوش لعنة قدر.. إن كنت ويا الناس تكون
مادام معاهم فى الخطر.. يحموك من الخوف والظنون
قالو لنا مالناش فى القتال.. وأبويا كل شوك الجبال
وشال حمول فوق لاحتمال. وسيفه كان سيف القدر
لا امريكان ولا أى كان.. يكتب على أولادنا الهوان
ولا بالسجون ولا الهموم.. تقرض على الأرض امتهان
حتى ولو حكموا التتر

قبل التاريخ واحنا هنا.. الأرض دى اخضرت بنا
يوم بعد يوم سنه سنه.. نحرت صخورها بعضنا

بحسنا تدفى تقوم.. نرويها بسيول دمننا
نفرشها تتغطى بنا.. تختار لنا اسم ابننا..
تحكى لن بلسان أمننا.. حكايات وصايا جدنا
تعيش معنا للأبد.. وتكون بنا أولا تكون
دا الأرض من سلو البشر.!!



سلت ملت

حرّه بلدنا واكم فيها بشر حرّين
وان كنت ما انتش مصدق..
انظر وحقق.. تلاقينا يسار ويمين
متزيطين زبط فوق الخط شرعيين..
إثبت حداك اننا من دون جميع الناس
نقدر نخطى بقدم.. يا نطع الاتين
حرين هتاف نهتفوا.. يانسقوا بكفين
ويجوز نبصيص بعين واحده يا يالعينتين
دى بلدنا حره واحنا من الأزل حرين
أنا حر انام سلت ملت.. يا إما أنام لابس
أفتح شبابيكي أو أقفلها بترابس
وأن سييت شبرا على كيفى أروح عابدين

دی بلدنا حره.. واحنا بعزمها حرین
حرین نسمی عیالنا زی ما عایزین
إن كنا م القبط ح نسمی موريس یاحنین
وان كنا م المسلمین نختار حسن یاحسین
ومادام صالحننا ولاد العم یاخالی
نقدر نسمی إذا عزنا شاریت وکوهین
دی بلدنا حره.. واحنا بمجدها حرین

عندك أنا حر ابرم شنبی لو عایز
وان عزت اخلف قبيله كل شی جایز
انا لیه شرعا قانونا أربعة نساوین
دی بلدنا حره.. واحنا بشرعها حرین
ح نحب جایز سعاد حسنی یا یحیی شاهین
ونفنی أهل الهوى یمكن أو اشکی لمین
ونشجع الأهلی أو نبقی زملمهیین
علشان دی حره بلدنا واهلها حرین
واللی ح یزهق من الحریه بیسافر
وان عاز یهاجر یلم عزاله ویهاجر
وانا حرح أفضل عشان أخزی الفلس والعین
علشان ما تفضل بلدنا وأهلها حربین.

حره بلدنا ما دام فوق راسها راجل حر
ح ينقل البحر بالغريال بدون ما يخر
كل اللي ينفعنا عارفه وعارف اللي يضر
ومزاجه ما احلا مزاجه وقُرياللى تقرر
الكل دايمًا معاه لا تقول يسار ويمين
واسأل؟ وقولّى بقى مين زينا حرين؟
مش راح تلاقى دى حتى الحره أمريكا
شهدت لنا إننا مخزن بوليتيكا
وشهد رئيسهم ودق الطبل مزيكا..
وقال كفى من الجفا وصبحت لنا شريكه
وبيعت لنا الخرده (إف الخمسه) فى عينيك
وحتى لو خرده؟ ايه ح يضر يا ويكا
داحنا دهنا الهوى فى الكامب شيكا بيكا
صبحنا راسنا براسهم.. يضحكوا على مين؟
الخيطة فى أيدهم صحيح والخيّه رجلينا
لكن إرادتنا حره.. واحنا يا حدق حرين
من دقة الباب بنعرف اللي خبط مين!



مكلمة

كلام كثير كثير.. كثير وهرش مخ مستدير
كله سمع.. كله إستمع.. الميكرفون ويا الوزير
والناس سكوت فى الكلمة زى اللى جوه المحكمة
لَمْ الكلام سوق العبط واعمل حساب رأى المدير
حلل وفسر يا غبى واعصر عجين مخك عصير
لو مش ح تفهم النقطة اطلب كلام ورق كثير
لازم نراجع ما سبق ونلف تانى ونستدير
وان عزت خصمك يتقطع وتهرى قلب الواد سمير
قوم جرجره يقول الفلظ وانفخ وزمر فى النفير
اصرخ وقول.. هما كده بيعطلوا سير المسير
ساقوا الهباله على العبط سقونا من لبن الحمير
أما إذا الوضع إختلف والجو شميته خطير
سيبه بيعبع يتحمق.. جوه اللجان شىء لا يضير
لكن علشان تاكل النبق.. خليك ديمقراطى وامير
خدمهم على حجر الحنان بالإبتسامات الحرير
يدخلوك من جهلهم فى الجبهة حتى لو غفير
ادخلها والحس ما خفى.. السمن على وش الفطير
واكتب بفن ومعلمة.. تقريرك السرى الخطير..!



حد الفروق

ما فيش وطن أعظم من التانى
كل البلاد فى عرف أهلها عظيمة
كل البلاد جميلة فى الأغانى
ولا فرق بينها فى البحور ولا فى الحجارة..
ولا فى شوارع المدن ولا المباني
الفرق بس ف وجهها الإنسانى
وحده يحدد الفروق
كالسيف ما بين الكتب ودفاتر التجارة..
بين العروش والعروق.. وحده
يميز الأوطان عن الأوطان..
يميز الحقيقة من الظنون..
هذا وطن على الخريطة سياسة وعماره وسوق
هذا وطن حيطان..
وده وطن إنسان
عليه زى ما له عند أولاده يا بلدى حقوق
فكن يا بلدى لو حبيت تكون وطن..
أعظم واخلد ع المدى من الزمن..
يكتب تاريخك ابنك البسيط..

ح بيتسم حتى فى لحظة استشهاده
ما يحسش إنه دمه راح هدر
أو إنه عاش سدى.. أو راح ضحية القدر.
أو إن عمره اتسرق - من.. ولس جلاده.



تبدلات

كبرت بلدنا على الأطفال ياخساره
ولا حد عاد عارف الشارع من الحارة
ولا ضحكة اللؤم من ترحيبة الجارة
أدى ساحة اللعب صبحت بنك وتجارة
وشجرة الورد طرحت فجل وبصارة
شابت قلوب الصغار واتمرمرت أحزان..
فين إبتسامتك يا نن القلب ياسماره
ياللى أنت كنت البرنجى لعب وشطاره
فين ضحكك ع الجسور الخضر والأجران
يلقضا مثل اليمام صبيان وعذارى
فين زعقتك فى ساحات اللعب كالفرسان
يتلموا على غنوتك شطار وبحارة
فين جيشك اللى غزا البحر الصغير والتوت

يرجع بأسرى الترع مشكوكه فى الصنارة
يزين النصر صفصافةً بيبان لبيوت
تطلق النار فى سبت النور ببشارة
الترعة جفت خلاص، التوت فرط ورقة
والولد راهنتهم الفريه على خسارة
ولا حد حاسس بأيام عمره بيتسرقوا
الكل بايع وراجع منها شقاره!!



مثقفين الحصار

ياللى لويتو الكلام تبرير لخدلانكم
يا مزيفين التاريخ ومبدلين القول
يا أسرى زنازين ذواتكم.. أسرى أحزانكم
يا أهل النقار والشجار ع القهوة والصالونات
يا عاشقين الشهرة واللذات.. ياشعرا يا مرايات
اتغيرت لاحوال.. ومنين يجيكم نوم وراحة بال
بيروت بقت جمره

والحبر صار بالدم.. وسكرتم بلا خمرة
كشف الخطر عن خداع ما كنتو بتخبوه
ومنين أجيب ناس لمعانة الكلام يتلوه!.

ياكدايين يا لبط
صوت الحقيقة أتبع.. وانتم عمد ما سمعتموه
وأمس لو كنتم فهمتموا الغلط
كنتوا انهارده اكتشفتموا الصح . وعرفتوهم..



الديمقراطية

الديمقراطية. جميلة وحلوه . وليها ملاعب مومس
ليها مخالب لبوه ومقاليب شهنذر تونس
ترقد جنب ابواب المدن المفتوحة للفيران
تودع المهاجرين الهريانيين زهق
من زفة لامتهان ولهفة القلق.. بكل الاحترام
وتوقع الغلبة يخفه فى برائن القانون
تنوع الفنون جنون وتوزع الجنون بكافة الفنون
سفالة أو ظنون تسكن العفار.. وتلزمه الصحارى والقفار
وتكنس الحوارى من مخاطر الحوار
تسكن الأمانى فوق شفايف الصغار
وتتفرص الأفكار للعرض والطلب بترينه للتجارة
وبالإهانة فى سوامر الهزار.. تشجع الترع على البحار
وفى مهابة تقلب الصراع شجار.. والموت محبة للوطن هبل.. أو انتحار!!

وتعلّى صوت الطبل فوق مواجع الأوتار
تعمم الإدانة، تأمم الخيانة.. تكرّم الجبّانة والزمار
فيلزم الثوار خرايط لانتظار - حوائط المهانة - أو هوامش الحصار..
وفى مكاتب الأمن الوثيرة فى الموانى والجمارك
وفى المكاتب المكيفة، المجالس المثقفة
فى البنك فى الفبارك.. تشعل المعارك
وفى رحاب الجامعة تستغفر الدستور
وتستبيح العرف ألف مرة كى تقتل النقابة
عشان على صدور القادة والمشايخ المهابة
أو فى دهاليز الصحافة الحرة.. أو مصاطب الغلابة..
تخلع ملابس التحشم المرقعة.. تتفتّح المدارك.. وتبدأ الواقعة!



عرض حال

على باب سيادتك ح أمزع شكايتى لأننى لغير الاله ما اشتكيت
(تعالى) لوحدة اللى عالم بعالتى وعارفك عديم المروه.. افتريت
تسكّت لسانى وتسسرق جرايتى ومن خير بواقى كتافى اتمليت
وعليت مكانك على حساب مكانتى ولما طالبتك بكسره اتلويت..
إذا البند يسمح ح تسمع روايتى وإذا اللجنة رأفت ح تصرف لى زيت
ولما ح تفضى تصدق حكايتى وتقرأ قصيدتى إذا - يوم فضيت

ولما ح ترضى ح ترأف بحالتى وتعطف عليه إذا ما ارتضيت
أحط بأيدى فى حبلك رقبتي وبالى رسمته لحدودى رضيت
واخط برعايتك بداية نهايتى بكامل إرادتى لأنى اختشيت
فعفوا - إذا كنت ضيعت وقتك - ووقتى... أنا اللى بكتافى وحافى اكتفيت
نفختك بضعفى وجهلى الحويط ونخيت ياريتتى ما كنت اختشيت
فعذرا ح الملم بواقى كرامتى وحيلى الضعيف الخجول البسيط
من الوقتى يلعن مزارك سيادتى ... أنا أن كنت خايب لكن مش عبيط.!



الشاعر

فى ساحة الشعر أنا فارس ومالى مثل..
ومهرتى فرسه حره من كرام الخيل
الشعر عندى ما هواش نزوه ومفالطة..
الشعر هو الحياة - الحب - صبر النيل!!
الشعر فورة غضب أو عشق أو إحساس..
مجنون يلسوع مشاعرك يحكمك بحماس..
مش نحت بارد رخام ولا نشره دورية
يوم الفرح تبقى طيلة وفى السجون ترياس
يا أيها الشعر عفوا إننى محتار
وما كنت يوم أويمجى.. بيصنفر الأفكار

ولا كنت عطار بيوزن قوله بالوقه..
ولا عمرى ح ابقى.. مع أن جدى كان زمان نجار..
الشعر صحبة كلام الناس ومشاعرهم..
حتى أمرؤ القيس لَحَنَ بأغانى سامرهم
فياللى عايز يكون فتك.. نغم وحياة
عبّر عن الخلق صح.. ح تبقى شاعرهم.!



منك لله

أنا مش مظلوم هواية.. أو لحكمة تاريخية
ولا شارب المرطوعاً أو غواية، د الزمن وانتم عليه..
تهت أيوه إحترت يا ماكثير ولكن.. عمر ألا عيبكم ما خالت يوم عليه
النويه دى أنت الذى اخترت النهاية العبقريه
كل ما فكرت قلت إنك قاصدها فيه ميه
ع المنصة بإيديك أنت.. لا بعمر ولا بسنية
زى شكة إبره فرقعت القضية.. وكل بالونات بهية الوطنية
اللى نفختها عشان زفّتها ع الجبهة الفتية
ألف رحمة ونور عليك يا ديمقراطية ليكى أنياب بس مسنونه عليه
ألف رحمة ونور عليكى وميت عوافى..
تقلّ المرحوم بموته هموم حياته فوق كتافى.. حزن وافى

وانا ورتّ لحرس شد اللجام يالهو خافى..
إنكسر خاطر الملايين ع القطام يالبن من حزن صافى
الخرس رجعنا خلفاً.. درنا بيجى ألف عام..
بعدهما كدنا تحررنا.. أغانى الشيخ إمام!!
ومشاريع المدام والست قافى
وليالى عيد ميلاد الموعودين، م المناضلين القوافى
مقصوفين العمر غدر
ومقصوفين الرقبة حراس الأمان القومى والأمن الثقافى
اللى ورثوا الحزب والحكمة وحكم الشعب من بدء السنين
واللى ضاعوا فى زحام الدنيا ما بين البينين
لا يسار عايزين ولا قادرين يمين!

.....

مش باقول لك
يا مليح الطلعة كنت قاصدنى ميه.. لميه ميه
أيوه.. كنت قاصدنى أنا وحياء سنيه
طب ما موتش ليه بقى موة ملوك؟ زى أمك زى أبوك
ليه كما عيال الحواديت يفتالوك..
ليه وتفضحنى تفرّق شعرى ف برك الشكوك
(فرصتى ضاعت سأمطر فوق قبرك لعنتى!)

إذ أنا كنت انتويت أنى أغير خطى وأقلب خطتى..
 وأبدل سكتى واحرّر طلعتى.. من هموم كاسكيتتى..
 لجل انكش قُصتى الكالحة واعملها كانيش
 وارقص غنوتى رقص الديوك.. أو أقرقص كلمتى
 لجل ابقى الشاعر النكته الفاجومى إبن حنت حتى
 إبن كلب وقافيتى عضه بدم ف ليّتى
 تغسل العار والألم بنفّس حشيش
 خطوتى ف لاربعة جهات تطرح يا ميش
 قد ما تريح قصايدى قلب صناع الذنوب وضحايا الأكل عيش
 لما أئين سهرة أصحاب البنوك.. وأخلى النصب بالمزىكة من حسن السلوك
 ألهمط اللقمة الطرية عمله صعبة.. وتذاكر طيارات شيكات صكوك..
 من على بطون العوانس والأرامل والبنات
 واسلى بشعرى أصحاب الحاجات.. من مشايخ النفط بدو وخواجهات
 عريجه وثورجية وتنظيمات منظمات.. شحاتين وشحاتات
 ليه تفوتتى غدر ليه فجأة تموت؟ حلمى بعدك ضاع ومات
 طلعت البيضة بدون كتكوت ومات.. وهتافاتنا بقت سكات
 اختفى العمده إنما شيخ الغفر صار أخطبوط
 حوت مكير رجعى أسكر فى البيوت.. فى الطل ابات
 ربنا يجازيك بذنبى.. وبداية غلبى بعدك ياسادات!



سبع هموم

● آاه

لو كان يقطع سيفك مره.. بين الحق وبين الزور
بين الضلمه وبين النور.. بين الشاعر والمأمور
بين الوردة وبين السور
كان ح يكون لنا فيكى جدور
فكره صغيرة قد شعيره.. عودها يفتح ناس وزهور



● ياااه

إذا الكذب صار حجة لجل الوصول
فشكا ح تقلق وبالحق تشرق فى ساعة تقول..
وحتما ح تخرس.. فلا تحط منطق ياذل القبول..
ح تفرق فى بحر الرضا والسكوت..
فإن لم تزعق بما غلطته سراً
فقهرراً وجهراً.. أكيد راح تموت..



● ييه

دود الفساد.. خوخ جدور القسايد وسمم الأندال رغيف لاولاد
صاب المرض كافة.. جميع العباد

بحثاً عن اللقمة أو بحثاً عن الأمجاد
 طبال وقراد وشيخ منسر أغانى وزاد
 حمار وكداب مجرّح جبهته السجاد
 زمار مخبى دقنته بالكاد .. وكتب لاحس عضمة الأسياد
 ينبج على العصافير وع الأوغاد ويطارد الأطفال بكل عناد
 يقطع طريق الفن بالأجناد (وكأنه) الفرعون ذى الأوتاد
 قارح وخرئها بكل اجتهاد وقعد على تلها يفاخرنا بالأجداد
 ولو مشى الحال معاه .. يجاملنا فى الأعياد
 ويجدد العهد تانى برقصة فى الأستاذ!



● يخيبه

راهنت ويا الملوك توصل على حماره
 تحق دعوة أبوك فى كرسى..... وإدارة
 مضغت شوك الهالوك وشرت..... بعكارة
 غفرت للى سقوك المر..... قطارة
 ولعبت ع اللى اشتروك حين بعث..... بخساره
 وغفلت يا صعلوك فى دنيا..... دواره
 لا أخوك أخوك.. ولا أبوك.. السوق دى..... غداره
 ما تبيعش للى باعوك..... طبله بزماره
 سقت الفتاكة فاتوك تفرق..... فى خزاره..
 عصروك لمونه ورموك..... وكنت عصاره!

● هيببيه

ياللى طمعان فى الإماره..... طاطى واستتى الإشارة
بكره راح تيجى البشارة..... اللى ضاع عمرك عليها..
إمسح الجوخ والبلاطى..... المعاطى مش اعتباطى
لارتباطى لانضباطى..... كل ما يعلا يطايطها..
وعشان تتلم بحتر..... يا عديم الضهر وأحذر
بيع رخيص للساده تكبر..... بيعها بكره أنت شارها
كل ما تخسر تحصل..... عيبك المخفى يأصل
زى ما توصل توصل..... واللى ضاعت ح تلاقىها
أو يجوز هيه تلاقىك..... قبل ما الحظ يجافىك
واللى دُستّه يدوس عليك..... الفرص انت ادرى بيها



● يـووه

فى عصر سيادة الشقلوب..... إنطق بالقول المحسوب
إكتب إسمك بالمقلوب..... يتكشف ليك المحجوب
سيما هبش بم بم هيش..... كوما برجر شد حشيش
تتخن كل قفاك ما يدوب..... فى طابور المجد المقلوب
جايه أيام ياعيون الماما..... أسود من قرن الخروب
سسخس واتمخمس ياما.. ياما.. ح ترخرخ وتعيش مركوب
الماشطه اللى زادتھا دمامه.. زيتھا فى دقيقنا بيدوب
وح تشبع ما دمت حمامه..... دوخها عشق التعلوب

● هـوووه

مزع ثياب الضحية واطلع من تاريخك الأليم
من ويل سجونك الغبيه ليل ملوكك الدميم
إطلق خيول احلامك الصبية
أجمع شتات اولادك الضحية وشق صدر ضعفك القديم..
عمره ما كان وطن ولا .. يكون وطن عظيم
إلا وداق الموت على المتراس..
وكره يدوق اللقمة من أيدين الواهب الكريم..
المحتمى بغناجر الحراس
فاخرج مبرأ من جراحك العصية واحتمى بالناس..
وعلم اولادك مع التضحية:
إمتى هدير البندقية يرقق الاحساس!!



وهج الحقيقة

يا صلب حلوان مدنى وللحقايق.. ردى
الحزن صار له زمان زمان والخوف جبان
شارخ فى قلبى اللى انكسر
قهرنى قهر اللى عبر وكفوفه ماتت ع الحجر..
لأنه حالف ما يخون . ولا ينتنى..

يا عاصر النار والحديد . ندهتني أخشع على قبر الشهيد . ابكيتني
فاوهبني قدره على النشيد هز الشوارع عزني وبقوة الناس مدني..
طال السكات وكسرتني.. شد الوتر.. دانت الذي خلقتني
عوّدتني على الفنا.. عثمتني بزمان سعيد
كان نبضه في ضلوعي أكيد.. دايمًا جديد
لو كنت في قرن الحقيقة صهرتني!!
كان نبضي في قلب الوطن ح يكون أشد من الحديد!



خط سير الانحناء

يا هتلى.. ربوك على نبوت غفير
وف يوم سبوعك بخروك بعرق حمير
(فطموك من لبن القروود فحصنوك من الخجل!)
وعودوك خيبة الأمل..
تشرب بحور المر من غير ارتواء.. (على عجل..
يا هتلى يا ابن المره
الست والدّة حضرتك عشقت طوابير الجنود
فاتوحت مع الحبل.. على كعب جزمة والى أو باشا أمير
صبحت مدمن خط سير الانحناء . زحف وسجود
حيرني تاريخ السيادة يا بطل

حيرنى اعجاز خبرتك فى الذل وف فقر الخيال..
 وانا من طفولتى الحائرة حتى كهولتى الماكِرة..
 كانت مصيبتى فى عجزى عن كشف اللى جاى
 وخيبتى فقد الذاكرة..
 ولذاكَ باسأل.. رغم أن الأمر مش محتاج سؤال
 هل صح قال الداية ساعة شدتك
 تقلت فى وجه حضرتك خوف الحسد
 صيرت المثال.. صيرت المثل..
 (ونموذج العبد المنخّس فى الحقيقة والخيال!)
 لكل عابر للكراسى على (حبالٍ من مَسَد)
 ولكل تاجر باع وسمسر حتى فى علوم الجمال!..
 ...

صدقنا كدبك فصبح الكذب أصدقنا
 أنت اللى سمك غسل متخفى فى مرقنا
 ضاريت فى البروصه ع السكسوكه والدقنه
 الله بلانا بكم وسع فى أرزاقنا
 (نفط وقحط واديان وأدلجة!)
 وفوق رصيف الشحاته الكبرى فرقنا...
 ...

سرقتنا حقوقنا في بيت المال . فسرقنا
بين مهرجه وبهرجه ضيَّعت ارزاق العيال
سلمتنا وسلمت ست الكل مصر للعدا والرأسمال
كدبتنا مسخّرت أحلام الرجال..
كدبتنا بعضاً ببعض الأرض حلفت بالحرام على الحلال
وعلى جميع المنافى بفضلك اتفرقنا
اصبحنا فرجه لجميع الخلق ع السبحة تهزأنا..
وما بين صناديق الفلوس والانتخاب ضاعت جميع القمص..
يبلعننى هم اولادى من هم الوطن
اللى إنت فارقتة غصباً يوم ما فرقته
كدرته، حلمه صفر، لما أنت صفرته
ووهبته لا سيادك على دفعات.. فى ساحات البورص
دولية ومحليه وديابة ونمور بوتيكات..
يرقصوك فى البارات ويمزوا باولادك ولاد وبنات
غلابه بيحنطوهم فوق حبال الزمن.. فى عزه ومهابه..
يوم بعد يوم يصعب على اللغز الجواب
يشرق لسانى بالسؤال.. وتضيق على رقبتى الحبال



الصيحة

حط إيديك فى ايدين أصعابك حقك شرعى.. بحق عذابك
دوس توارىخ الخوف باكعابك دوق من قمح العزمه.. منابك
لوح تقيد النار بشبابك يوسع للحرية ميدان
فجر قلب اليأس بفرحه صيحة تشق الضلمه الجارحة
تزلزل صمت الأرض المالحة يصحو الشهدا.. يخفوا الجرحى
جسد الوطن الميت يصحى يطلع ويمزع.. الأكفان.!



حاميتها حراميتها

حلمت بليالى النعيم اللى جايه فى يوم يبقى لص المدينة حاميتها
فتصبح جميع المسالك خفيه.. وتطفح جميع الممالك عليها
وتطرح غيطانها بلاوى عصيه. فضايح تمرى الخفايا الكريهة
تضيّع عقول المدينة الذكية. فتصبح ضحية لعقولها السفيهه
وينشق قلب الولاد الفتية.. فى إيد الجهول اللى قطع أيديها
(فبعجر) يفسر غموض القضية. يرقص حواجه عشان يفتى فيها
(ومبعر) يخطط خطط عبقرية. يبيع لحم أهله اللى يمشى عليها
عميل العدو يضربوا له التحية. ولص الخزن يبقى حارس عليها
يموت الأمل فى قلوب الرعية.. وتورم قلوبها وتعمى عينيها
ولاصطبل يصبح دواير سنيه.. حمير الحساوى تفتش عليها

بغالها تفنى لحياتها الهنيه.. عيالها تبيعها لمين يشتريها..
يشيب الرضيع جوه بطن الوليه. يضيع الشهيد اللي راح يفتديها
يا بخته اللي قال كلمته العبقريه. عقول الحمير لا تراهن عليها
وجحش أما يعلا النهاية جليه. يدك الزرايب على ساكنيها!



صرخة

درب الكفاح ما أطوله.. وحلمنا.. ما أعدله
ياشوق فلسطين للوجود سطر أساطير الخلود
غدر العدا فاق الحدود
لكن فى صور.. وفى الدامور.. فى حد سيفه مقتله!



زعيم مملكة بهجاتوس

سعادة زعيم مملكة بهجاتوس. وصاحب السيادة صحافة وفلوس
بيمعن فطيرة التاريخ الذيدة.. بقمحة أمريكا ولبن التيوس
نياشينه فوق صدره طوله وعرضه. ذهب م الى باسه صفيح م الى عضه
وسام م الى ورْد ضفادع لأرضه وشال م الى فوق رجله وطى ييوس
على كل حيطه يكبر فى صورته فى عشرين خريطة بتحكى مسيرته
ويسقى الخلايق شفاشق سبرتو فتخلط ما بين البطل والجاسوس

مع الصبح يبدأ غسيل الدماغ ويملى بكروشه وجيوشه الفراغ
وفى كل خطبه يرقع صداغ.. مجالس تجالس توالس جاموس
على الشاشه يسهر يحلل ويفتى يعصر سحاب الفتاكة فيشتى
تسهل جميع العصابه (الكليفتى) وتحلب بزايذ القلابه فلوس
معلم سياسه وغاوى اقتصاد وهاوى يلحن غناوى الولاد
ويفتى فى بيض الديوك بالرقاد ويملى بلاده مكن (روب سوس)
خبير فى حوار الشمال والجنوب مدكن فى خزنه سويسرا جيوب
بقد الديون والبنوك والذنوب وعدد السحالى فى مصرف فاقوس
على كل ناصيه بفضل مجالس رزم عمله صعبة، جلب للمحابس
واحزاب فى أيدها الفرش والمكانس بادويك تنفض قاعات الجلوس
ولوحب يفطر يشد الطوارىء وترفع فى ساعة غداء البيارق
وأثناء حمومه يطخوا البنادق يهشوا برصاصها العرس والناموس
يحب اللى هتفوا له يوم البيان نهار ما سعادته فى غفلة زمان
قلب ع اللى قبله وركب الحصان وولع على جبينه شمس الشموس
ألو، يا أشر البقرع المرابط فى كافة تاريخ فى جميع الخرايط
على قدما فرقتم عبايط شبه بعض زى النياب والضروس
بلادكم غنيه بغاباتها ونباتها ومليانه من كل شىء لحاجاتها
إذا يوم ح تصحى تفوق من سباتها ح ترمى أكيد من كتافها الكابوس
وقادر يارب أنت أولى بضيافته خدّه وريح الشعب من داء هيافته

وخرّب بيوت اللي بالكذب أفتوا بأن الرغبة أحلى لو كان بسوس
وتقدر وأنت السميع العليم تعالى مقامة إليك يا كريم
وتحكم بعدلك فى كافة زعيم على قلب بلده الفقيره يدوس
وانا أن كان لى ريشتى ولية القصور يوماتى راح ارسم ابوه كاركاتور
واصارعه بقلمى مصارع لتور أضحك عليه حتى بغل الشموس
وأخلى التاريخ يستعد بمزابلة عشان يبلعه زى من كانوا قبله
واحنا نرفهه على دق طبله عشان نشفى كل الجراح والنفوس



فعل أمر

فعل أمر إسمع.. أسمع الكلام
فعل أمر إخضع إخضع للنظام
فعل أمر أخشع إقبل باللجام
العدو قام والمغنى نام
وامتطى حمارته للسلام وعام..

...

فعل أمر.. إمتى.. ترفض فعل أمر
تمسك الحقيقة لو.. ح تبقى جمر
نص خطوه تبقى.. خطوه للأمام!



نشيد للحريّة

على راياتك يا حريّة هزيها بقوة على فوق
يا مصر يا غايتي وعينيّه فى قلوبنا ينابيع الشوق
أحلامنا فى الخطوه الجايه أولادك شبوا عن الطوق
غنينا على قد بكينا واحترنا لكن مانسينا
ياسفينه وشراعها فى سينا.. شدى أيادينا لأيدينا
خلينا من اليأس نفوق
الضلمه تعشش فى سكوتنا والعدل ينور على صوتنا
ياحروف الدم يا قصتنا.. عزيمتنا لحن لغنوتنا
أوتارنا فى الأصل عروق
أنا خارج من ليل احزاني وبأثبت ع الأرض مكانى
وح اسابق خطوك يازمانى أنا عيني شافت من تانى
وحاطلع م الضمله شروق



إصحى يا نيل

لو يهدموا كل البيوت نبنيها تانى بعضهمنا
لو قطعوا جذور الشجر بكره ح يحييه كفنا
لو ضلموا وش القمر أرواحنا بتقيد شمسنا
دى أرضنا.. وشرب ترابها دمنا

ومستحيل ننسى اللي كان إصحنى يانيل يابتاع زمان
ضم الكفوف على الحجر زيح اللي خان..
عن عركتك زيح الجبان
علشان يموت ليل السكوت. وتحق ساعة نصرنا!



الدوره التليفزيونية

اليوم شفت السادات على كافة الموجات
بيشقلب المعانى..... ويرجع الساعات
أنا قلت دا كان توفى..... قالوا لى أيوه راح
لكن راجع بزفه..... بيهندس لا نفتاح
كان وحده وجاى فى زحمة..... رايح وكأنه راجع
ما طلبش نور ورحمة..... وعصر جرح المواجه
لبلب بلسان فصيح..... حين يفتى فى السياسة
على صدره نيشان صفيح..... نص التاريخ نجاسه
على قورته لمحت نجمه..... سداسيه لكن شياكه
وقال لى خدها حكمة..... (السلطة ولا الحياكه)
تقدر بنص إبره..... ترقع الخروم
طول عمر مصر حلوه..... ما تحبش الهموم
ويتعشق الهيافة..... خصوصى فى الثقافة
وان قالوا لك مسارح..... يكفى قصر الضيافه

ولو نحن اكتفينا..... وسلكنا المجرى
الخير يفيض علينا..... وتكثر المصارى
صناعة إيه ياخاب..... ما فى اكسب م الزراب
تسمّن حتى أهلك..... وتشبرق ع القراب
ذاك لأن الزراعة..... كان لايقه على الجدود
وأن حلت المجاعة..... حينقذنا اليهود
أصل الخواجه فاهم..... وسكته مسالك
واحنا أصلا بهائم..... وشعوب أكثرها هالك
زى الغنم ح نرعى..... وهمه يدلعونا..
ويدون ألم ح نوعى..... ونقسم المعونة
نتصدر !! حد طایل..... كم للسفر منافع
يرجع حمارنا شایل..... حائل كل المشاكل
خرست نكر سكوتى..... واستغرب حين شكرته
وقلت بعلو صوتى..... لك حق إحنا سكرتو
لأننا بيك رضىنا..... ونسينا معاك ماضينا
وجميع مثقفينا..... ختموا على مسيرته
فصحصحوا اللي مات..... رجع شباب واجدع
ناصر وأبو السادات..... الكل قام يفلسع
باللا جمّع عساكرك..... وزوق المدينة
الكل قطع تذاكرك..... واتشعبط فى السفينة
والجوراق صفالك..... واعرضت القفالك

عملوها الثورجية..... شطفوها فى كنالك
والجد قلب هزار..... عملوا للأزمة زار
مجلس عرب يحزم..... وسطك يوم لانتصار !



الفار تفرعن

فى مصر لسه ح تشوف عجائب..... من ناس شوارب وناس جوارب
ح ناكلها أفرادنا وازواجنا..... ونقول ده كان كله بمزاجنا
وكم ح ترمى طيورها مصايب..
لاهيل عقل أصبح مجنون..... يدق فيه فول فى الهون..
يركبنا قط نقول له يا فيل..... زلوم سيادتك لينا دليل..
والفار تفرعن بقى فرعون
فى السوق خطفنا غول سراق..... ركبنا نمله وقال دى براق..
جانى الخواجه مراته معاه..... لخبطنا بين قدام ووراه
وحمـدنا ربك ع الأرزاق..
العمده لما يكون مهياص..... يبقى اللصوص همه الحراس..
والكسـتبان يصبح طرطور..... والعبد يلقي ميت مأمور..
.. يمزوا بيه على لحمة رأس
وازيد أنا واعيد فى أبو زيد..... وكل عيد البس له جديد
وارضى بنصيبي هموم وسكات..... أشحت بشعرى من الأموات
وأحسد اللى خازوقه حديد !

أبو الذهب

ميتّم صفارنا .. معتم نهارنا .. وفايت ديارنا .. زريبة خرابه
وينبجّ صوتنا .. رهانة سكوتنا .. يقطع لموتنا .. حبال القرابه
ويهرب بخيرنا .. وخميرنا لغيرنا .. نلاقى مصيرنا فى حجر الديابه
وايـــــــــه الفـــــــــرابـــــــــة ١٩٩٥ ..

شربنا الهوان يوم قرار الخيابه فلا كسبنا سينا ولا خسرنا طابا ..
ح تفضل شطوط الجزاير شراقى .. برغم الترع والبدع والسواقى
واسأل سليم أو الشيخ عراقى يقولوا اللى باقى .. ياعين أم بابا
نمصمص نقرقش بواقى البواقى . لأنه سيادته ح ياكل العتاقي
ويركب حصان الزمان البراقى . ويلضمننا يمنى وشامى وعراقى
نـدور فى سـواقى مدينه الملاهى .. تقب الدواهى
نبهرج نمهرج نهـرّج تـلاهى ..

أوامر نواهى تاريخ المذله .. بتبدأ بخطبه وقرار أو مجله .
تزيّف تاريخ جوعنا شبرا المحلة

طفينا شموعنا ونكرنا الأدله . رقصنا نسينا القرابه الكتابه ..
تكون فرصه يقلبها بورصه وغابه ..
ويعكمها دماً ورغماً وغماً زعيم العصابه ..

طب احنا اعترفنا بإنّا قلّه .. تفسر بإيه إمتثالكم يا علّه ..
وانتوا الجهابذه تلامذه واساتذّه .. خدعتوا الفلابه

فزادوا المبله .. مواكب بتهتف باسم الديابه
يحلوا الدكك للى بيشخللوا .. وانتم على القــــد بتحللوا
تموتوا برضا الذلة وتهللوا .. وتبدوا الندم للى خانكم صبابه ..!



وصايا الفقير للغنى الأمير

إبسط يا واد يابرعى..... ياولد الشيخ معين
راح تقعد ويا مرعى..... وتصاحب المسئولين
بلدنا جمهورية..... أساسها إيمان ودين
شعارها الجلابيه..... والساعة بالكتين
على عمه عثمانية..... أو طربوش ع الجبين
دى الموميا يا ابنى صحيت..... ورجعت السنين
ولا باقى حد عارف..... شماله م اليمين
عشان كده أما تتوى..... أدخل جامد متين
فى كل هايفه زعق..... واخطب فى القبتين
وكل جمعة صلى..... فى لازهر يا الحسين
واطلع انتقض وضوك..... فى سوق الدالين
ح تلقى القرعجية..... نخاسه وهباشين
م السراديب الخفيه..... ع القبه منفدين
من بركة لازيكية..... دوغرى لرأس التين

وم الإسماعيلية..... على قصر اسماعين
جوارى أولاد غوانى..... على فلع مخلطين
ماهى دى ديمقراطية..... بلاد المسلمين
كلتنا رأى واحد..... وأن كنا منوعين
نسكت وإذا إختلفنا..... نقول على طول آمين
حدانا مافيش أذيه..... إلا من كل حين
خلاص مافيش قضية..... ولا فيه مزمزأين
وحدانا الوعى واجب..... لا يسار ولا يمين
سيبك ربح دماغك..... وخش ع السمين
تفرح أمك تفيده..... ويهيص أبوك معين
إعمل لك كتف جاهز..... وقول مين يأكله مين
إحنا الكرم وأصله..... أخلاق الفلاحين
همة أصحاب الحمولة..... وهمة الحمالين
لا يحبوا يعيشوا عالة..... ولا كانوا كسلانين
ولاح نعيش عوالة..... ولانعمل فعل شين
إبدأ ولو بباله..... خميرة للعجين..
فرصة ح تتول مرادك..... تعوض السنين
والمرالى أنت شفته..... ح يدوقه العطشانين
سلو الحضارة يسرى..... ع الواطى وع التخين
إعمل وكيل تجارى..... يا وكيل للفنانين

ومن بايع لشارى..... ح تصير م الموعودين
وعارفك واد ارارى..... من جنس معفرتين
تقهمها وهيه طايره..... مع أن قفاك تخين
لكن على طول ح تقهم..... تمام فى حضن مين
ما فيش بضاعة بايره..... فى سوق الخطافين
ومادام فيه ناس ح تركب..... محتاجه مركوبين
دأمرها ياابنى بايع..... ولاقى مشترين
اللى داخل معدى..... مين سألّه جاي منين
ويافا بنت شبرا..... وحيفا خال شبين
ومادام خارج مسدد..... نصيب الحسابين
مادام تقسم تقاسم..... الليل مالوش عينين
لكن فتح يابرى..... وكون أنت بألف عين
السوق يدى اللى حبّه..... لو حتى كان غشيم
يا ما خلق أقل منك..... وعبوا بالايدين
والموج علا فقبوا..... وكانوا مقشفين
عينى عينك ما استخبوا..... ولا خبوا مكسوفين
مادام لهم يابرى..... ضهر حماية ومتين
سبقوك وكانونا زيك..... بلاطة وعدمانيين
لكن مع الشطارة..... لموا بواقى الخزين..
واتودكو بمهارة..... ع الطين والدكاكين

ركبوا خيول التجارة..... وحازوا البساتين
تقنوا فنون الإدارة..... حلبوا بز الروتين
ما بين سُمبر وقماره..... وبيض مثل العجين
إرخی يا واد الستاره..... أخزى يا واد العينين
ييقوا رهن الإشارة..... لجميع المندوبين
ح تعكم الوزارة..... وتصيرم المسئولين
تكتب فوق العمارة..... أول سورة ياسين
فاهم ياواد يابرعى؟..... والا أنت مخ شين
أوعى تقول للى قصدك..... ياعم أجيب منين
مد ذراعك وحوود..... والبَدَ على اليمين
أضرب قفا القصير..... ودوس على التخين
لو خفت يقولوا خيخه..... قوم أمشى ع العجين
أهجم هلضم وهابر..... وصاحب المسئولين
ما تخافش من المخاطر..... صار لك مركز متين
على عين أمك ياتاجر..... خزن سمسر وعين
ألف بيه التجارة..... دفاتر كدابين
وألف بيه المسالك..... ترش شمال يمين
داكله يا برعى هالك..... الخلق محتاجين
موظفين مناظر..... بدل ومفلسين
بهوات على المكاتب..... فى بيوتهم مكسورين

فاجبر مكسور خاطرهم..... ح تبلى التخين
دول معمولين قناطر..... للفقير مندورين
يعدوا كل شاطر..... ويموتوا مقهورين
وأنت الحظ اللى عابر..... عشان الموعودين
تأشر الأشاير..... وهمه الخدامين
بس تصحصح يابرعى..... للباشا البيه معين
البحر موجه عالى..... والسوق فيه قتالين
يمكن يضحك فى وشك..... وعيونه غشاشين
فاضحك مع اللى غشك..... دا سلو البياعين
حين تغفل راح يدشك..... زومبه ف أول كمين
وتقشه يا يقشك..... ما فيش يا أمه ارحمين
ونصيحة ياواد يابرعى..... خلق فى ودنتين
إياك تسأل بهيه..... ع اللى قتل ياسين
فاهمنى ولا أفسر..... ونخش ف سين وجيم
كله صحيح يابرعى..... ما أحناش م الشكاكين
نقلب ابيضها أسود..... وتغلى قمرها طين
أحنا ما عدناش صعايده..... ولا عدنا فلاحين
دخلنا البورصة رسمى..... ما أحناش متخلفين
ياسين مالوهش دية..... والتار ده فعل شين
اللى وقع ما يخفى..... مين اللى وزه مين

ليه ح يشيلنا همّه كنا ناقصينه فين
 يخفى وتخفى سيرته زنازينها مفتوحتين
 سمى واقطع رقبتة ياسين ودير ياسين
 إحنا ما صدقنا فوقنا عايزين نعيش يومين
 نعمر الطبالي وندعى الطبالين
 خلىنا نفوق لحالنا ويروق بالنا الحزين
 حروب يا ما حاربنا وعبرنا نصر زين
 كفايانا خلاص تعبنا وبقينا شحاتين
 والصلح خير وخيره والجار جدار متين
 إسند على حيطه ربح تلاقيه صديق معين
 وأهى راجعة لينا سينا ع المهل تروح لفين
 ماهى قاعده يعنى طارت ليه إحنا مسريعين
 وألف نور ورحمة ع الشهدا الموعودين
 فى الجنة واهمه كسبوا دنيا وكسبوا دين
 خلىنا فى اللى عايش عشان يشوف يومين
 ويكون لاولاد عمومنا جيران متحضرين
 دا الفالح اللى واعى بيسلم بالايدين
 آيه يعنى شبر ولأ فدان أو فدانين
 برارى هوّ واسعه يامين ياخذها مين
 ممكن تحن تسوى وتجيب شوال طحين

دى العقلية اليهودى..... وفلوس المسلمين
يخلوا الأرض جنة..... واسأل موسى وكوهين
أو اسأل سيدنا يوسف..... من أيام السجين
عمل شادر ومخزن..... ونجاها سنين
إسعى فى الحق تكسب..... كلتنا موحدين
فأسبق ياواد وسقف..... واهتف للمذكورين
واضرب سلام مربع..... ويطقوا الملحين
قوم بشر المصاروه..... أن اليهود راجعين
نفتح صفحة جديدة..... ونكون متمدين
والخير ح يهل يجرى..... نودى يا ابنى فين
دولارات خضرا وحمرا..... ريالات بالملايين
بس أنت إبقى بحبح..... هات لأمك طرحتين
وهات لأبوك كارتته..... أو شوف له فدانين
وإبقى زورنا بسرعة..... جاهزين الهاتفين
كافة كل التذاكر..... على أسمك مكتوبين
فتح مخك وفتح..... واجهز بأرنبيين
الدوره الجايه أنقح..... لقمته ح تبقى زين
الموج فيها ح يرمى..... يعطيلك لجنتين
ع البنك الدولى رأسا..... يافرعة فى أورشليم!!



صرخة ثانية

يا شط نيل الكادحين.. (صيدا) تتاديك.. لبي النداء
إسمع لصوت الصامتين.. تعرف منين.. ييجوا العدا
والبد فى حضن الفلاحين.. ح تلمح الفجر.. أن بدا
يا مصر يانبض السنين.. ع الظالمين قومتك.. قضا
سنى سيوف الشقيانين.. قومی أنزعى.. توب الرضا
هزى قصور المتخمين.. غنايا لجياك صدى!



رجال الضل

قياله مش قياه تحت الضل نتفلّى
جنب الحيطان القديمة ننام ونتسلى
نفتى ونحكى ونتحدث بألف لسان
كنا زمان إحنا من أهل الزمان الماضى
القاضى منا ما كانش من التهم فاضى..
داحنا اللى كنا . وأكم . كان لينا كم ياما كان
كنا رجال الشدايد . راحه ما ارتحنا ..
حتى فضايحنا كانت زين . تفرحنا ..
أصبحنا نبكى ونشكى لبعض كالنسوان
ودفنّا عمداً ودوسنا ضعف أحزاناً

قدامنا كان حلمنا بيبرق ولا الجنه
أتاريه سراب من غناوى أكذب الألحان
بعنا اللى حيلتنا إيه يسوى الشرف فى السوق
قاضى الفرام حين شكيت له قال مالکش حقوق
أصل اللى رفع القضية غير العنوان
إحنا الرجال اللى كنا نسوى ونساوى
أرواحنا كانت فداوى لعدل وتسَاوى
السوق دهمنا فضعنا وباعنا للفاوى..
والحلم أصبح خيال الضل فى الأحزان!..



ما قاله الفلاح الفصيح فى التشريفه يوم راحت الست تواسيهم فى ضحايا السيل

ياست الكل يا جاهزة يا فايضة بكل شىء عايزاه. يا فرحة قلبى يوم جيتى، وزى النسمه طليتى علينا تخفضى جوعنا، واوجاعنا.. ياست الناس أنا ندمان، عشان ما عدش باقى لى جدار. واقف ولا دكان، لكنت فرشت بـرموشى الطريق للبيت، وجهزت العشا فى الدار.. ولو حكمت رغيف ناشف وحبة زيت.

لكنه السيل سبق قطرك وقشطنا، وفاتنا وباطنا وش الريح تشحططنا. ولكن لأ. مادام جيتى ياست الناس. قلبتى حالنا فقلبنا تباريح البلد تقارح وزقططنا، وكان الكفر خارج لك بيهتف لك بكل حماس. ويدعى ربنا يخليكى لبلدنا غطا ولباس ويفضل للأبد جوزك.. أراجوزك.. ليوم العوزه بنعوزه وبنعوزك مثل لنباهة النسوان ورمز لعزة الأوطان، وآدى إحنا بندعى للرحمن.

. عمار يا مصر،.. مكتوب العمار ليكى على أيديهم، ومكتوب القبول لينا ليوم الدين. يكحلنا تراب رجلين فراعنه اتحكموا فينا سنين ملايين.. ياريت ياست كنتوا معنا ليلة السيل، لكنتى ارتحتى وارتحنا من الوقفة فى نقح الشمس، نسقف لك واحنا قلبنا بيبكى...

شبعنا كلام لكن قولى.. كمان وكمان.. كلام هاشبع اللى جمان، ويملى خزنة الفلसान.. ويحقن شربه فى العيان.. سكتنا معاكى للصبيحه راح نسمع وما نشبع، جميعنا ياست اسكت هس علشانك بقينا ودان.. سكوت الموت فى حوارينا مخلينا بنسمع موت.!

فعلى صوتك العسلى يونسنا .. نشف جازنا فى فونيسنا . وعلى الصوت كمان على، وعلى جتت الولاد صلى .. خدى عيالنا اللى خدها السيل معاكى لجنة الملكوت.١

أهو أنتى وليه مبروكة ودعا كل الولايا مجاب. زيارتك بركة عند المولى محسوبة، وليها ثواب ومكتوبه .. ورينا لجل بركتها ح يكتب لك سبع حجات، سبع حسنات، سبع مقاصير أو استراحات .. من العامريه للقنايات..١

وما يهكمش أن احنا سنين وسنين نبات جعانين، فى هراييدنا ومش ساكتين .. لكن رأى المثل بيقول .. مهم القلب من جوه!١

وانتى ياست ما دمتى على دماغنا . بلاد الدنيا ح تحاول تجيب داغنا . لكن إحنا فراعنه قدام .. ودغدغنا الحجر أهرام .. معابد ضخمة ومسلات كما الخوازيق .. ونصبح كل يوم ع الريق .. وع الجلاوين .. بعود اللفت تتقضى وتتدبر ..

وتكفى ضحكك لنا تشبعنا، ورنه خطوتك بينا تشجعنا، كفاية أيدك الناعمة .. بتلمس كتفنا الجريوع تطيب مر أوجاعنا كفاية علينا رمش عينيك يدهينا .. كفاية علينا طلتكم تداوينا رضاكو كفاية داخنا بخيركوا طقينا .

وشوفنا النجم ساعة الظهر ما شكينا .. ومهما نشوف تحملنا .. تجميلنا ورضعنا حليب الصبر لعيالنا.١

لفير المولى ولغيركو ما ذلينا .. ده أنتم ضله فوق الأرض، إيه يعنى .. جميع المؤمنين تنصاب، وخد الله .. وأله جاب .. ، وراح مالنا وأكل

السيل أراضينا .. ولاشكينا .. وضاعوا أولادنا قدامنا فى غمضة عين ولا
بكينا .. عشان أنتم يا مولاتى بقيتم ع الزمن لينا .!

جريتوا جيتولنا لما سمعتم ببالوينا .. يا قدم الخير دى خطوطكم على
دماغنا، عزيزة حتخلى الحياة أحلى! وم الوحله ح ترفعنا، لعين الشمس
ح تطهرنا فى جهنم تدفيننا عشان على همكو ربينا .. وشيلناكم على
كتافنا .. شعبنا بحافنا ورضينا ..!

يا قدم السعد للفلبان، يشق قميصه من قهره .. وللفرقان يزيد فقره،
وللميت بلا أكفان. يضيع قبره .. وع الفرقان يتوه أثره، فى طوفان الفرق
والموت .. وع البيت اللى صار بلا سقف أو حيطان يجيله السيل وينهى
من الوجود أمره .!

ولكن برضه جيتولنا، عشان قلبك رهيف طيب، وجوزك شهيم
وقريب .. يا قادره، وشاطره، ياتاجرهم، وعارفه القرش رايح فين ويجى
منين، وكيف الصحرا تتخضر تصير بساتين موتيل للسائحين، وبيسين،
وكيف البور بيتعمر يصير عمارات، وكيف تحلب أرابيز الوطن
دولارات... يا بركاتك دعا الوالدين، تمدى ايديكى ع اللقمة تصير
رغيفين .. وع المليم يضير ملايين، وع القشه تصير ميلامين، وع الشنطه
الأونطه تمد فى الشارع ألوف دكاكين،

وبركاتكم يأهل البيت .. ياتجار الآثار والزيت .. ألا أونا ألا دوا ..
حدانا من جميع الصنف لو عزتم تبيعونا .. عيال جاهلين بنات عمشه ..
ونسأ عفشين .. بيوت جاهزين على التقسيم، بأسعار ما تلاقيش منها
ولا ف بهتيم، تمدوا خط لليموزين، وتكتب كافة الجرانين .. وح تناشدوا
جميع الحكما والأحرار، فى أمريكا وبلجيكا وراس التين .. حتىجى

مراكب الدنيا ملانه بالذى منه، تجاره سهله مضمونه.. تخبوا دفتر
الشونه، داتمن الأكل والبطاطين يجيب ملايين، ولا من شاف ولا أهل
البلد داريين.!

لكن برضه إحنا رجالتك، وموتنا كان سبب هذا النعيم كله، فلا
تسوا.. وتسونا، ويكفى علينا موت البقره وخراب الدار، زكاه ع الصحه
والعافيه، بلاش م الولس والخونه.. وساعة القسمة تعطونا.. ولو حتى
بلاقافيه صباع معبار دا موسم حش ياويله... واخوكى حمار!!.



عالم ثالث

يا مبحر فى النيل على طنطا ليه خدت القشاش على دشنا
مهايشنا شمتوا ف شاوشيسكو .. يا صلاة الزين على شاوشيشنا
حرافيشنا صابحه بتتفلى تتسلى بملاعيب خفافيشنا
القرد خرج ساحب سيده والجحش اترقى بقى شاوشيشنا
والساهى اللى حسبته قريبي اتفرعن وهبش تحويشنا
واكلها الفالح أجوازاً واستفرد سوسهم بدشيشنا
نتمهرج نسكر نتبهرج ونهرج على طبله جيشنا
التايه بين حانا ومانا بيسن اسنانه تخريشنا
من خوفنا ف بعض بنتكعبل الجين معفن نخاخيشنا
يخدعنا اللى بيعرف يقرا ويبيعنا اللى نام على ريشنا
يا معلم ليه قلمك صدى متكلبش ليه بتهوشنا

الشيخ مش طایل يتوضى طمع الشهبندر فى قريشنا
 زغللنا الشاعر بالفضه سهبلنا قصقص خرايشنا
 إن قلنا الحق مع العمده يلهف على نيه عرايشنا
 وإن قلنا الحق على العمده تطلع عفاريته تلَبِّشنا
 نسرق له عجین الفلاحه سراديبه تبلع دراویشنا
 ندعى له يطول عمر الراحه وبحسه تعمر محاشيشنا
 نتمزع بين نايبه وخايبه تسريع على لقمة عيشنا ..
 لا تقول لى عدالتك وعدالتى ما دمنا على العرش فرشنا
 دى السلطه جنون لوصاب خالتى بإيدين الهون ح تدشدشنا
 ومادام الفرسان اتقاولوا الدود ما حيرحم قراقيشنا
 آدى حالنا .. إزيت حالكو؟! يا ملعلع بالكذب داوشنا
 شاوشيشنا والا شاوشيشكو. ! تراهنى؟ ...ح تقدم لو عشنا ..



إنت فين..

إنت فين؟.. يا فارس الحلم اللى طال فيه لانتظار
 إنت فين؟.. يا لى وياك الليالى أكيد تبشر بالنهار
 إنت فين؟ جوہ فى قلوبنا الأمانى قايده نار
 إنت فين؟.. اشتقنا لايام أنتصار المهورين..
 إنت فين والناس غناهم فى ليالى الجوع نحيب؟

إنت فين والشمس غابت والصباح مهزوم غريب؟
الولاد العاشقين تايهين وما بين السكك متبعترين.
وإنت فين؟

إنت فين علشان ما يعرف كل من كان سكته
إنت فين؟ علشان ما تشنق كل من خان القضية عملته
إنت فين؟ لجل ترجع للى قتله الحزن والخوف ضحكتة
والشهيد اللى نساء الأهل يعرف قبره فين؟
إنت فين؟

وليه سكوتك؟ ياللى صوتك فيه غنا الشعب الفقير
ياللى قلبك دقته ونبضه شقا العرق الأجير إنت فين..
ياللى زندك عافية الأيد اللى تتحدى الهجير
زلزل الوطن الأسير إرفع رايات الكادحين..
إنت فين.. أنزع الخوف والخيانة.. والأكاذيب والأنين..
إنت فين؟ مزع الليل اللى غاشى ع البصاير والعينين
إنت فين؟

إرفع الراية وخطى.. قلب هذا الشعب متفجر حنين
إنت فين؟.. جمّع العشاق يزفوا كل مين كانت بهيه..
وياخدوا تارها من جميع قتال ياسين.. إنت فين؟
سمع الدنيا اللى نسيت صرخة المستضعفين
آهة الفجر اللى خابت فى انتظار وعده.. السنين!.



درس التاريخ

إياكو تنسوا عبيرة امبارح..
دى مصر عاشت سنين الحزن والحسره
عشمانه فى بكره.. والوعد كدّب ما جاش..
إياكو تنسوا.. تجنح مراكيكو فى بحور العدا وترسوا..
إياكو.. والشوف طشاش.. على بعضكم تقسوا..
سيف الصحاب جارج.. جرح الصحاب دباح..
والخطوه فى الهوؤ.. سوؤ.. خطيّه ماتسواش..
الجاي ما يتبعاش بالرايح
والليل ح يرحل أكيد.. إمتى النهار اتحاش..
دى الأرض دواره وضرورى راح يشق صباح
إياكو تنسوا ياخلق واتذكروا..
لما يحل الظلام على كلنا اتدبروا واتفكروا فكروا
الى يسالم رفيقه ع الطريق يسلم
واللى يسلم صديقه فى الغضب يندم
والبادى أظلم.. وضل سبيله حين أجرم
السيف مسلط على رقاب الجميع دباح..
وعدوكم تلعب مكير سفاح.. فى حقه ما اتوصاش
قاعد على قلبكم عن غله ما اتخلاش

من بعد ما اصطادكو جمعاً فى الشبك ببلاش ولا بقاش..

المدسوسين أسفروا .. الخوانين دبّروا

والخوافين أدبروا ... يارفقتى اتذكروا ..

دا الفافى ما أخسره ياصحبتى اتغيروا ..

اتدبروا . قدّروا دى حرب ع الكل .. كانسه الكل

حابسه الكل .. قاتله الكل .. ما ترحم ولا تهداش ..

واتفكروا .. فكروا

بايع صحابه فى ساعة زنقته خايب

واللى يبيعهم فى ساعة فرحته .. خاين

وبيت أساسه الخلاف ... طول عمره ما حيعلاش !!



أراجيز الأول

من كتاب الشعر الأول

فرجة

اتفرج يا سلام..... اتفرج يا جدع

مسرشنا مش أونطة..... ولا فتننا بدع

إحنا أصل الفنون والمشي على الحبال

أما نقول.. يكون ما نعرفش المحال..

اتفرجى يا صبية اتفرج يا صبي

عمرك مالersh ذيه لو كان قلبك غبي

إفتح عنيك وفتح وصحصح للمسائل

يفتح علينا ريك وتبعد المشاكل

إتفرج يا ابن عمى تعا اتفرج يا خال

مهما عجزت رفرف طير بجناح الخيال..

وتعالى نقول نفنى ونشبع العجول

أنا الجعان وفنى مش سندوتش فول

أنا فنى شئ عجيب يدخل قلبك بهزه

لو ما قدر يصيب الشر.. بيستقره

يضحك م القلب.. لكن .. معاك ومش عليك

يحرّك كل ساكن وانت الباقي عليك

أنا عندى كلام واجعنى جلدنى بيه زمانك
سقف لى لو سامعنى وطرطق لى ودانك..
دى الدنيا تبقى نيله لو ياساً راح نموت
بالفن عملنا حيلة وجنون ضد السكوت!



فرجت

يالل فرجة الليلة فُرجت.. هيا يا غاوى.. تفرج
الى صاين العيش يجى لنا دا اللي خانه راح تفرنج..
هَزْ وسطو سيسكو ديسكو.. ومشى فى الكون يعرّج..
شق قلبى عمل مسقف.. من عبل ليام تخفف وكما الحلزون تموج..
إيد لوحدها كيف تسقف؟
بالايدين لاتنين نشيلها .. الدنيا مقطّف..
بالدراع لازم حتمشى أكيد ولازمأ .. بكرة تفرج..
هيا فرجه تعا تفرّج..
صلى ع الهادى وصحصح.. فنجل الودنين .. وفتح
فيه كلام عاقل بيجرج.. إنما صدّقه يفرّج..
وكلام تانى مُزّيلح.. يطعنك بالضحكة يدبّح..
ويقول لك لأ.. با هرج..
وأنا مش بكاش يا صاحبى.. علشان اكذب وأخبى..

إسأل المرحومة أمى راح تقول لك.. همى يا ابنى هو همك..
ما تداريش ضحكك فى كمك..
الجبان من بخ يجرى..
ويا ما صاحب مال وفقرى..
أن رضيت بالظلم مره .. ح يطاطيك ويصفى دمك
هيه واضحه ليه بتخرج... هيه فرجه تما تفرج
كلمة دوغرى مافيش ملاوعه.. ومن الكدابه إوعى
الحقيقة ليها شكة .. تبقى أهون بالمشاركة
الشرر لازمما يصهرج
واللى ح يشاركنا ينفخ.. لما يسمع
واللى لأ.. عليه يفلسع
هكذا أو إلا... سيخرج
ياللا قـرب .. فرجه مكسب.. يا بلاش..
بالحنان م الفرجه واشرب الحياة ما بدهاش..
على كتف الفنوه ربح .. م الفنون عب استريح..
ياللى طول العمر تنهج.. أهى فرجت.. ياللا صحصح
اللى يتفرج يفتح!! واللى ييفتح.. ح يفلح!
ح حتى لو ما شى يعرج!!



شنطح

عمك شنطح طالع واكل عمال ينطح نازل واكل
على كيفه داير يتصرمح زى الدوده مألّهش مشاكل
بايت طالع نازل واكل صابح نازل طالع واكل
لو يتششوق للنسوان يتجوز من بنت الباشا
لو يوم حر وقال عطشان بيطرى البلعوم بيفاشه
وان زرجن غضبان زعلان يحكو له نكت الحشاشه
وان برطم او كان تعبان يتدلك ولا وحش الشاشه
وان قلت له خليك إنسان يضرب بوز ولا جدو عماشه
وان قلت له كده ليه بخلان دى الدنيا ما تسواش قشقاشه
طلع قرش لواد غلبان ح يشد القرش بكماشه
والكون متكد تعبان وليلاتى يصهل فى بشاشه
ولا مرة شففناه جوعان ولا عريان ابن البكاشه
مع انه فى البيت والغيط أيامه مربوطة بخيط
على كيفه طالع ع الحيط لو يفلت ح نشيله بماشه..!



قراقوش

قراقوش قرقيش قرقيش قراقيش من خشب الورد عملت الشيش
من حب القمح خبزت العيش وبنيت عليت غنيت بشویش
ومشيت ع الحيط من غير ما امشيش عديت البحر.. ولا اتبليش

طيرت السما سما من غير ولاريش وفرحت عشان وياكو باعيش
 وازعل فى ساعات من غير ما البكيش لو شفت القرد نازل تلطيش
 والشمس بتطلع ما تدفيش والمطره بتنزل ما بتسقيش
 والشجرة بتطرح ولا تعطيش والديب نازل فى الناس تهويش
 والنملة تحوش ولا تلقيش علشان النمس نازل تكويش
 أقرصه فى ودانه ولا تحوشنيش دانا م العصافير مش م الخفافيش
 للحب أروح للشر ما أجيش طيب وأمير من غير خرابيش
 فنان أراجوز من قطن وخيش وفصيح وصريح من غير تهويش
 وياحب الناس من غير تبكيش شبعان دفيان وإن كان معيش
 أصحابي كثير قوى ما تعديش لولاهم.. أنا ما أقدرش أعيش
 ولا أقرقش قيش قراقوش قرقيش!



على وأخوه

أنا على وده أخـــوه ده على وأنا أخـــوه..
 أنا أخوه اللي انتو ياما سمعتوه وأنا على ياما كنتو هنا وشفتوه
 بيقول أنا على وأنا على وده أخـــوه..
 ده على وأنا أخـــوه اللي انتو عشان على ياما نسيتوه
 مع انكو دايما لو شفتوه بتقولوا ده على مع أنه أخوه..
 لأ.. على غير أخـــوه مش يشـبه أخـــوه
 على قد أخوه أنا على وأنا أخـــوه
 مش على ولا أخوه

أنا على ده اللي انتو ياما عرفتوه مش أحسن قوى أبداً من أخوه
أنا على ده اللي انتو لو شفتوه ح تقولوا ده أخوه
أبدا.. أنا على ده متكلف وأنا باكل كل ما أتقريف
أنا أحب الشتا .. وأنا مصيف وأنا صاحب البالطو المتقيف
وأنا صاحب عيأ أصلى رهيف أنا على ... أنا أخوه..
أنا أصلى كبرت تاتا ف تاتا وأنا شبر ونصين ف ثلاثه
والأرض إذا لزمتها حرته أزرعها كفافه وشيكولاته
- ينسون أحسن علشان تتسوه..
مين؟ على . أبدا.. ده أخوه..
.....

لخبطنا لكن ما اتلخبطنا زيطنا واحيان بططنا..
وغلطنا قد ما خططنا ناكرو ونكير زى ما شفتوه
خدتوه جيبته مين فينا شوفتوه وقريتوا الدرس ياترى نسيته
والا فهمتوه لما سمعتوه واللى عرفتوه تانى يوم فوتوه
- علشان مش على ولا إنت أخوه..
.....

- أنا على وأنا أخوه ولا على . ولا أخوه
يقدرنا يكرهوا شىء بتحبوه أو ينكروا فضل انتو عملتوه
أو يقلعوا زرع انتو زرعته أو يخطفوا وطن إنتو تحبوه
دأنا على وأخوه من غير ما نكون مع بعض نتوه..
شفتونى شفتوه ده على وأنا أخوه وأنا على مش أخوه..
.....

إحنا الاتنين على ويا أخوه ح نغنى اللحن اللى عملتوه..
وأن قتلوا ده على.. أو قتلوا أخوه .. مش راح تتكروا على والا أخوه..



دكتور فنان

القرد دق الكعب.. واتغندر البهلوان رص الخلايق رَص
عشان يفوت الجحش متكبر يفرض شريعة الجهالة بالحوافر رفَص
يا من عليك الحزن متقدر الصبر علّه.. وعلاته الشعور بالنقص
إذا المغنى ح يلبس بدلة العسكر ح يفضل العسكر تياب الرقص!



الأراجوز النوزى

أنا الأراجوز النوزى لا منتهز ولا مهزوزى
أنا الذى يوم العوزه تلاقينى مطرح ما تعوزى
لو عزتى قمره أقطفها لك لو بينى وما بينها مهالك
عفيف أنا ومش متخفف من الهموم اللى ف بالك
وضحكك فيها كفايتى وقلبي على طرف عصايتى
نكدى صحيح لكنى شريف ويطنى على قد جرايتى
أنا المتيم من يومى مش ابن حنّت ولا فاجومى
بادق على طبل الأودان لتنعسى وتنسى تقومى
جاي لك على لحمه بطنى وهبت لك شاشى وقطنى

لو تأمرني ف حيك أموت ولا اللصوص تستعبطني
قومي أنفضي لحاف الوحمة إتحزري من دى اللخمة
الكون ييلعب بالصواريخ وغرقتي فى الكدبه الفخمة
خفى مع العصر تعومي دانا اللى فاقسك من يومى
بتزورى برغيف الزور ولما بتجوعى تصومي
صعيديه والا دقهليه النيل سقاك دم ومية
والويل رماك على سود ليام تكفيكى لقمة وجلابية
والبأف يطلع بيها والعة ييلعها نازلة أو طالعة
وانتى اللى بتقيدى الكوانين وتبنى لعساكره القلعة
عشان كده جيت بعصايتى على الدماغ لو ما فهمتى
دى دمعتك غالية عليه وضحكة أولادك غايتى..
وأغلى منها أن تقوى دانا شويت قلبى ف شوقى
مستنى مع بعض تخطى ألبسك توب على زوقى
وأن ما عجبشى أنا مش زعلان ... رجب أكيد سابق شعبان
فاختارى خيرتك على كيفك بشرط ما نبيعش الفدان..
ولانندين لزعيط ومعيط وللملاهى نبيع الفيظ
دا الحلم يامه سهل بسيط وطن.. على قده وإنسان.



غابۃ

فی شوارع المدینة وحوش لکن بشر
فوق الشفايف بسمه لکن القلوب حجر
خنزیر عیونه بارده ماشی بیشم ورده
والسبع أبو سیف ولیده مرعوب من الخطر
ودیب بصیت فی وشه حسیت غدره وغشه
کرشه مش قد قرشه ولاف عینیه نظر
وجحش برغم حزنه واخذ فقره فی حضنه
یرقص فرحان وینهق ویشیل مهما انکسر
وکلب دایس زمیلہ ولاراضی بقلیلہ
رکع بیہز دیلہ لفحل من البقر
دا طالع ابن بایع وواکل ابن بالع
عمال یخلق مشاكل حتی للی أنقبر
ونمر بدون ضوافر لکن خریوشه کافر
لایرحم المسافر ولا الجای م السفر
مساخیط نازلین فی بعض نتشُ هبشُ وعَض
السبت مالہش حد ولا عن بکره خبر..
والشمس لمین حَ تحکی وقعت فی نہر یشکی
لبقر عطشان بیکی علشان ما فیش قمر..!



كحمار يحمل أسفارا

شيلنى ح أشيل

أنا قلبى عليل والجهد قليل..... مش فاهم حاجة وهى تقيل
شايلى كتبات ملايين حكايات والتعلب فات شِعمر وتمثيل
النمر أحتار جت له الأخبار ضحكت الفار إتخض الفيل..
سقراط بقراط عفريت نطايط يضحك بعياط قناطر أساطير
أحصنه بتطير وهروب وحروب وكلام محسوب على إيه يا أمير
إحنا الشاييلين حكايات روايات قراطيس أحلام
ما شيين نايمين فى أيام أوهام بتهد الجيل..
عمى وشايفين طرش وسامعين خرس وينقول
واهه كله كلام ونقول فاهمين من قصر ديول
وشمال فى يمين ويمين فى شمال إزاي الحال؟
إمتى يا عايبين كان شمس بتطلع نص الليل؟
وأنا قلت كتير وسكت كتير وما قلتش آه ارحم يا غفير
وعرفت خلاصة السرف بير الحرف بيقتل مين يقراه
واللى ما يعرف تفسير معناه بيطب قتيل
فالأحس موت قبل ما تحتار ما بنيات الأحرف والسكات
قبل ما تضطر أنك تختار ما بنيات الكلمة والحركات
وأهو جدك مات لاعرف أفكار ولا قال أشمار..

ولأنه حمار كان عمره طويل
ركبة السلطان قبل الخواجات .. مع ذلك فات لك كم أثارات..
إفهم يا جميل!

موت يا حمار

يا خسارة مخ بلدنا اتجنن شيخ أسيدنا
وقعدنا نفسر هبله أثارينا ما قعدناش
أثارينا قعدنا عقدنا تتحلّى أزاى ياعقدنا
رقدنا فى بير السلم فى الضلمه ما تفرقناش
ويا عالم بالأحواش كان فيها أو مافيهاش
العضمه اللى رمى هالنا قال لنا ما نقرقشهاش
وجمعنا فى سهرة خلائق وطلع بالوش الرايق
اتبجح فيها ومخمخ ومللنا دماغنا بلاش
عبي لنا بخيره وداناً طلع شمسين علشاننا
واحد تتر ليا لينا بفلوس والتانية بلاش
وف عز الحرح تشتى مادام فى أمورنا بيقتى
ع الأبرة تصبح مدره أو قدره.. ما تفرقهاش
ومحفظ طالع نازل بإشاره يحل مشاكل
لكن بخصوص أرزاقنا هزقنا عشان مالقاش
لكن فى الخطبة الجاية ح نعو على وش الميه
لو أخذ البيعة مؤيد فمؤكد تلقى معاش

شهود الزور

بوجوه كئيبة وجهامة.. يبشروا بالقيامة.. والعدل يوم النشور
من بعد مش ويصل.. راح تفرقوا فى العسل.. وتشمّوا ريحة زهور
مادام ضميركم سليم.. ورضيتوا بالملايم.. ح تهيصوا وسط الحور
يابختكم يا غلابه.. لأن كل الديابه.. ح تدوق عذاب القبور
لأنها دنيا فانيه.. غروره زايله وخاينة.. والآخرة بيت السرور
وانتو اقتنعتم بذاكا.. أكلتوا باقى الفراكه.. ولهفوا همه العشور
سكتوا يالالى العلالى.. واصلوا النهار فى الليالى.. وصلوا الفدا بالسحور
يا أبنى الايمان والشطارة.. همة سلاح التجارة.. فى السوق جواز المرور
(يزيد) بملكه انتشى.. (بعجر) حماه وارتشى.. وشهد معاه ع الزور
مالىء جميع من حكم.. نافق ما حسش ندم.. على دمن المهدور
أنطق بيقطع إيديه.. وأشوف يخزق عينيه.. وعليه سيف مسرور
والسنّ مع اللى سرق.. وفاتنى لابس خلق.. ساكن عشش وجحور
وأفتى أن السبب.. عدم إلزام الأدب.. والجراهم المستور
دى الجنه للموعودين.. اللى يقولوا آمين.. ويكتموا فى الصدور
أما اللى زنى وخبيث.. خلط القديم بالحديث.. وقلبه مليان شرور
لأنه قال الحياة.. نعمة وهبها الإله.. لعنوه ليوم النشور
ويتسألوا بابكى ليه؟.. (أميه) ع البر.. بيه.. (وابو ذر) مات محسور..



تنظيره بعجريه

إحنا اللي هزمنّا الحنجورى وفَتَشْنَا جميع الأسرار
وقانوناً شرعى ودستورى رَسَيْنَا شريعة الأحرار
ولذا حقق ياشيخ بعجر من بعد ما شلت الأسوار
تبعتنا على سوق البندر وتبيعنا حسب الأسعار
.....

أنت؟.. يعمل منك كفته وأنت؟ ح يدقك ممبار
وأنتى حيسرح بك ف العتبه يفرش بك ع التلتوار
وأنت لدورك يلزم خطه دى الخزنه محتاجه دولار
ويابطه انتى يادقن القطه ما نيكان حدا خضر العطار..
وانت عليك تفرق فى الفته تبرم لنا حبل الأفكار
وتكمل صَبِغ النظرية وتنشرها على سطح الدار..
فسر خصاصيها المصرية قَلَّبَهَا على جمر النار
حمصّها.. وأوعى الحرامية ابعتها لمسييه جيسكار
يديرها ضمن الدولية وح يفهم وح يبقى حمار
اشرح له كيف ابدعناها فرشحناها يمينها يسار
إحنا الطبقة اللي لولاها كان مصر اخدها التيار
إحنا بفلوسنا حميناها طهرناها من الأفكار
بالقوانين شرعى ودستورى ويحكم شطارة التجار..

فاحزر يا ولد ابن بهانة من أى زعيقٍ وشعار
 نفسك تقاسمنا فى عشانا فبتشتمنا على الأوتار
 ياخى بُعدك الشعب معانا بكوات كسيبّة وأنفار
 بعد ما جوعتم أطفاله إتعلّم ازاي يختار
 واختارنا بداله ح نفكر وح نفتش كل الأسرار
 ح نخلى الشيخ بعجر يقدر م القطعة يستولد فار..
 بالقوانين شرعى ودستورى وحسب فواتير الأسعار
 على إيدِه ح يبيض الديك والميّه ح تجمد ع النار
 يا سعدك يوم يرضى عليك ويحطك تحت الأنظار
 ديك ساعته ديك ح يصيخ مبروك نسمح لك يا يسار
 على شرط تكون بلدى مملّح ح نكمل بيك المشوار
 انت ان ما نفعتش للسترة لجاكيّة تتفع كزرار
 تریاس للباب أو للأكره أو نجمة لكتف حكمدار
 وح تتفع فى أيام الأزمة علاقاتنا العامة يا سمسار
 نوهب لك لجنة يا مجلة تتمرس وتجيب أخبار
 ويميناً يا يسار يا يمينى على قدك راح نبقى يسار
 دا قانوناً شرعى ودستورى وبفضل النفط... يا شطار!



زئطط

عمك شئطط.. شئطط افندى جأى لك ينطط هئدى لاوندى
جأى بصحافة . زوق ولطافة تلوى رقبتى وتقع كبـدى
غصبن عنى ترجع مجدى وتحملنى سبب بلاوىة
قلت له مرحب شئطط باشا بلدك زى ما عمرها بلدى
كان م الفرحة يحمى عليه وضحك ضحكة ولا الحشاشة إتلما الهبشة عليه
مسك العممة بطرف الماشة..... واتصدر على عرض الشاشة
وفتل دقنه بطرف ايديه وحلف لى بأمة البكاشة
ح يفضها من النقاشة وح يدهنها.. دوكو.. لأكيه
ترجع شط النيل الكوثر زى ما كان البر عليه
أيام جـده أنا بلمت ما حظيت منطق
فسأل : ليه؟ مالك .. إنطق
قلت له لأ ماتاخش ف بالك قال لى/ أنا عارف عيبك إيه؟..
ثلاثين سنة يشطفوا فى دماغك لحد ما تهت وجايم داغك باشتراكىة وابصر إيه؟
وأنا جدى حكمها بطربوش بعصايا وفلكة وفئتوش
عارف ليه؟ علشان إحنا بلاد شرقية
وانت احترت مع النظرية اللى قرئته ما فهمتوش
واللى كتمته ما سمعتوش والى صاحبتة يا حسرة عليه
المستعجل مش مكروش والمستهل مش مروتوش

والمستغنى مش مهروش واحنا عملنا الفرق يا بيه

جدى ورثها بست قروش

كان بالكروش والكلبوش ويشنبه اللي تخافه وحوش

يأمر.. تتزلزل له جيوش ويشاور.. تنزل له عروش

قلت جدك.. كان قراقوش سرق الحلة.. مانتمشوش

سكن القصر سكنا الحوش

باعنا للخواجات جوعنا وطلع القلعة طلعلنا فاشوش

يستفحنا على سخن وبارد نسفح له الفول المدشوش

قال المجدع ما يهموش واللى يفوته ما يبكى عليه

جدى فايت لك سعده ومجده قصوره قبـــــوره

وأنا من بعده حافظ دوره

جاي اعمل لك قيمة وسيما مصـــــرى عصـــــرى

من غير باشا من غير بيه اتبرعت لشعبى بقصـــــرى

ويقيت زيك سَلَطَح مَلَطَح..

يمكن زيك ح اشحت بكرة أو ابيع كشرى فى سوق المديح

زيك ح انجح وتعلمنى الألف البيه..

دانت الكورة وأنا المضرب أنت القمحة وأنا البانسيه

ح تعمرها وتخضرها.. ونطورها ونغيرها والواطى فيها نعلته

قلت له بس.. يا شنطح باشا

كف سيادتك مش حرارة ولا عجانة.. ولا بطاطة

ولا طحانة ولا خراطة ولا قرابة ولا خطاطة.. ولا شيالة ولا حطاطة
ولا فرازة ولا خلاطة ولا حلاقة ولا مشاطة
ولا نقاخة. ولا شفاطة ولا مساحة ولا قراطة ولا سواقة ولا قماطة
ولا حلابة ولا قشاطة ولا طبالة ولا صوارة ولا حتى قطاعة شراطة..
ولا نقاشة ولا صرافة ولا شقاطة ولا لقاطة ولا سقاطة..
لا ترمس باعت ويطاطا ولا كبريتة ولا شطاطة
نعمل إيه؟..

واللى ماطالش اللقمة بعرقه بيعيش عمره خيال فى مآته..
ح تسوق ليه على عقلى عباطة هو أنا ناقصك يا ابن الإيه؟
ترقص بلدى تقول مرسيه وتحسرنى على اللى أنا فيه..
فايت قبرك عايز إيه؟ قال بقلاطة بتشخط ليه؟
تاكيت إيزى بكل بساطة

إحنا اصحاب وأخوات وقراب من أيام ما كانت اعشاش
عين الحاجب مابتعلاش والمية مالهاش فى العالى
جداك كان الفلح وجدى كان الجندى وكان الباش
ما غلطناش

ياما عملوا أمور وعجائب سوا سواسية غيط ووسّيه
عيشة مرية ملت البر آثار وخرايب
هدى اللعب معايا يا خايب ترجع تانى اصحاب ونسايب
أنت الشابة وأنا الشايب أنت الآلى وأنا التّايب جاى وجايب

وانت اللى ح تقدر ع الغايبة وأنا لحد الموت النايب
وح اقسامك فى المال السايب فيفتى فيفتى
قلت له عمرك شايب عايب فول وكليفتى
حتى وانت بتركع تايب مايتنساش تطلع بالنايب
قلت له لأه.. قال لأ.. ليه؟ قلت ح تشطح تانى يا بيه
إنت فاكـرنى نسيـت الماضى يا بن الإيه؟
جهلى ومرضى وفقـرى وقهرى
خـنقوا بإيدك رقبة عمرى لحد الـيوم
الطربوش بقى عمة وحتة والبدلة اتقلبـت كاسـكيتة
وبالطو عـن ع الجـة

وانت زما انت فى كل بحـور الناس بـتـعموم
امتى كنت خلعت البدلة والا نزلت وسيبت الكرسى
كل يومين تطلع م العلبة تشطح تشطح تسفح تروح
ضحكة سنك بتجرّحنى فنك واطى ويبشـر شـحنى..
على حالها شمالها فى يمينها وحيال جهلك بـتمـرجـحنى
وكإنك فى اللوح الأزلى مكتوب انك مـعمول شـنطـح
مخصوص لجل ما تشطح تشطح تبطح عقلى وتسـطـحنى
قلـبى تدوسـه بكعب فلوسـك وتزلـطـحنى..



كلام حزين في الفن

من كتاب الشعر الأول

قبل الستارة

شوية قصايد يجوز طيبين عن الصحفية وعن فتانين
وعن قرعجية وناس مخبرين وكتاب وشعرا لكن كدايين
وحكام جبابرة على المحكومين دواهي فنونهم لكن مهروشين
وح تخيب ظنونهم في وهم اليمين ... إذا كان كلامي ح يلقى المعين
في جيش الصنایعية والفلاحين ويوصل لأهله من الشقيانين
عشان يبقى مونة في ايد بنايين يا نسمة يا لقمة يا حبة عجين
يا إما لمونة دوا العيانين يا ضحكة وبسمة ليائس حزين
ما يعرفش لسه اللي قاتل ياسين..!



سمك لبن

جری إيه يا مصر يا ست الناس صبحت أمورك ترا لا للى
عيشتى فى وهم اشتراكية مملوكى بينها لا ظوغللى
ورفعتى راية حرية تمر ولبن وسمك مقلى
سكتى ع اللى نحل وبرك وفتح موانيك ع البهلى
أمنّتى من سبب فقرك على خزنة البنك الأهلى
رضيتى يملوا جرانينك بكل تافه هبل لو للى
سكرتى وف سينا عدوك زنهارة وحالف ما يخللى
وكتير ولاد راحوا خوانة فداكى يا حبى وذلى..

وبعد ما فتى السبعين بترطنى بالعثمانلى..
وف آخر الليل تنهزى ع الواحدة وأمان يالا لالى
لمحت دمعك على خدك ما قدرت أقول لك تستاهلى
عاجز لسانى وقلبى حزين يا عزوتى وخيبتى وأملى
يكفاك ألم خلفتى لينين طلع لينين لكن - رمل!



حيرة

ساداتى أودواتى كله خيبة.. ح يورث داهية إيه إلا مصيبة
محيرنى يا أرض النيل سؤالى.. زرعنا القمح ليه يطلع دنيبة!
وليه فى كل مطلع أو مدحدر ولاد الهرمة ساعة الغرف تكثر
ومن عهد الفراعنة لم تَغير.. قليل الأصل يهرب فى الصعوبة
وأنا اللى عمرى يوم ما كنت يائس.. لقيتتى بابكى واكتب شعر بئس
وخفت وكان فى قلبى ألف فارس.. فاتونى وتاهوا فى السكك الغريبة!



مسالك

إيشى من إيشى.... كله بيترشى
الى عايز عشاه.... وسهره شفتشى
واللى غاية مناه..... سيجارة وتتخشى
واللى عشان المعاملة... يلحس ما يختشى

واللى بيرقص مجاملة... أو يسكر ينتشى
ومادمت ف حاجة عاجلة
لا بوقصّة مشمشى
إمشى على مزاجه.... تلقى الورق مشى!



سكرة فكرة

يا مصر ياوش القمره دمك بينزف من عودى
باحلم تفوقى من السكره ولسكة الشعرا تعودى
دانتى الى نطقتى الحجرة وانتى سبب أصل وجودى
باحلف بمرقص والبقرة بالهمشرى والمسهودى
بالشعر من عصر وهيبة لعصر سامى بن بارودى
بكل سايب بلا قافية ويكل منظوم وعمودى
لو السكك عنك خافية أدفع حياتى ومجهودى
وأجنبك لو بالعافية ليل الطريق الكمبودى
لما العميل جت له الكافية لا نفعه شاعر ولا كودى
بادعى لصاحبى يفوق ويعود يرتاح فى طريتنا جدودى
بيرم حزين وقصايد شهود والناس على أولاده شهودى
حين خافوا من عبدالجبار وغنوا فى السهرة سهودى
وداقوا لحم شيخ التجار وهمة عارفين مقصودى

صبحوا فى طبق المزة خيار ورقصوا فى السهرة قرودى
واترصوا فى كشف الأسعار يا ست بالالحاليج جودى..
....

آه الألم فى القلب تلؤل لكنى ملزم بحـدودى
سمعتها فى دلح بتقول خد جرب الصنف يا مودى
دول ثورية ورق مبلول بيموتوا فى ورد خدودى
صرخت وأنا محسور مقتول والنار بتاكل فى زنودى
يا ميت خسارة يا عرض ف طول فى قلبى حسرة يا ابنودى



الدكتووور

مزىكة.. اسمه ولا القصيدة وتشوفوا رسمه يشبه حميده
سألت عنه.. قالوا بعيده أراضيه.. وفته؟ موضه.. جديدة..
قرئت منه وقرأت عنه كتب عديده.. موعنى طعمه زى العصيدة
أنا قلت أحسن.. بالفن امارسه

فحضرت درسه.. لقيت مدارسه نيتها سودة!!
نطقه محفلط.. لبسه مقلط.. جلده مزفلط.. وعينية بليده..
منديله سالفه.. من طرف كمه.. وسايب سوافه.. بيقلد أمه..
مسرح يمسر.. وصحافة يصحف.. باليانكى يشرح.. م البنك يغرف..
غاوى يآلف فى مينا هاوس.. دراما تقرف ولا ميكى ماوس
عارف تمللى امتى ح يسكت وامتى يلدع وامتى يلبد.. وامتى يشفط

وامنتى يحسرت ولا يخلى

وامنتى لما تروق يخلى.. ويروح يصلى على إس الـيـوت

....

دكتور لويسنا.. أحسن تسافر.. مادام فارسنا.. زينة المجالس
دكتور وتاجر.. ع الفن كابس.. ع الحجر لابد.. يكتم نفسنا
والدنيا ضلمة.. والعصر قارح الجهل نعمة والبأف فالح
الوقت وقته.. دستور سيادته.. قفل المسارح
إلا اللى تهتف.. من دقنه تنتف.. بدل الفضايح
وشقنا حورس.. فى وسط كورس.. بالفجل سارج
تاكيتها ايزى.. على إيه تعاند.. وليه نكابد
أنا ناوى أرجع ارعى معيزى.. أززع وادفع دمي ضرايب
أنا يابا جاهل بالانجليزى لا حضنى لين.. ولا وسطى سايب
ولا عندى عزوة.. مرفت وزيزى.. وازاى ينوينى من حبه جانب
لابد ح اطلع.. متهوم وعايب البعثة طارت وطلعت خايب

رغم الشهايد باردون عزيزى

خالتك سميحة.. قالت نصيحة.. كلام لذىذى..
أبو عين صريحة.. نواياه قبيحة.. ومالوش حبايب
تعالى نلعب.. بليز.. بليزى.. صحصح لتتعب
نسهر ونشرب.. هُهبْ نبىذى.. نخب ف حياته
وقول معاند.. بنغم بارىزى

يعيش عميدنا .. ماركة لبلادنا .. بفبركاته
وترجماته .. ويبحث ذاته .. وفناناته ..
عامة وفصيحة .. تسمع آهاته من قهقهاته ..
تلقى سماته .. صبغت حياته حتى مماته .. لون الفضيحة
....

ع القرن جدى .. مسح دموعه .. ختم فى حسرة والم صلاته
الراديو داير يذيع يبيع له قصة حياته
وخالى للم باقى حكاياته
وأوى طهقت م القهر شهقت .. زعقت وقالت:
مين فات قديمة جديدة فاته ..
سارق كتيهره ح يخون فتاته
فإن كنت شاطر .. خليك تمللى فاكر مذاكر ..
إن اللى خـزيوا ف بلدنا .. ماتوا ..
وإن كنت شاعر .. إياك تغنى بحس فاتر ..
ولا تسامحشى اللى قلبه فاجر دا الحريا ابنى .. موته سكاته !



بيان

مش من حـقك .. تفتح بـقك وتقول لأه .. لقه تلقك ..
يوم ما ح تكتب .. لازم تحسب فنك إنك .. تعرف تكذب
واما ح تعرف .. امتى تسقف فين تتشعبط تبقى مثقف ..

ربع أدب.. سحلب.. دحلب فنك تثبت إنك ملعب
 ح يروج سوقك لما بذوقك تختار مبعر يركب فوقك
 اكسر قلمك.. تثبت أدبك وإن كان يحبك يعنى ويلزم
 احلق شنبك!



بغل الشموس

يا للى انت مخك جمبرى وعضمك طرى
 يا جهول غشيم ويتفترى لازم لجام
 فاطهر وبان يابتاع زمان يا ألعبان
 دى وحمة مش زلة لسان ح تقول كمان
 يا كبير ذوات الأربعة يا مصفعة
 يا ابو اسم نص بردعة ودل حصان
 استاذك اللى انزاح وراح قال النجاح
 فى الضهر تطعن بالسلاح مش باللسان
 مش برضه ياد تعمل حساب رد الجواب
 ترد باب.. وتزق باب وبلاش تبان
 راهنت كام ع البنتاجون يا ابو ألف لون
 مابقاش حدا العرب صابون ولازيت كمان
 امسك جميع كل الخيوط جوة البيوت
 بنفّس نبوتك تموت عُرف الزمان

واللى انتزعته بالألم يكفيك ندم
لما يفوتوك عدمان عدم زى اللى كان
الفر خدمتهم خطر ليه البطر
مين الى يأمن للتتر سيدك جبان
فاعمل حساب أيام جايين مافيهاش أمين
يتقام ميزان فى الميادين ومافيش ضمان..



عتاب

لا سلامة ولا سلام.. الحمام فى البرج نام
ينتظر مصر اللى ضايعة.. وطالعة تنفض ليل وطن
.....

يا حبيبى خوف قهرنى.. وبسيوف الزيف كسرنى
هاتف الاخلاص امرنى.. بالعتاب والقدرة فين
بالودان لسة بتسمع.. الحمامة البيضاء تسجع
جوعك وازاى حتشبع.. مصر حنية وحنين
.....

يا دموع صاحبي الإيراني.. كنت بابكيه حين بكانى
قطّعوا أوتار كمانى.. والشهيد بايت حزين
يا فؤاد الوطنية.. يا رفيق قلبى الصديق
فى عينيك المصرية.. شفت احزان النديم

وانت عارف لا تعرف. قلبى على قهرك تشحتف

حين بكيت وسألنى أشرف.. مين رماك ع الهم مين!

....

قلت يا ابنى الفجر ناسى.. وخلف صاحبى ميعاده

شفته بيرص الكراسى.. شفته خايف من ولاده

مع انه حكيم وراسى.. حرقته من نار بلاده

لما تاهت به المراسى.. غدرت بيه السنين!



تباديل وتوافيق

فيه شاعر.. كان كرشه يمين

فى هوجة خمسين.. ستين.. لبسه عفريت لاشتراكيين

فكتب أشعار.. أهرام.. أخبار.. أفلام.. أنهار

اتفنطز صار الكل اصفار.. اتبرم انتشى وانتشا واندار

زار موسكو وزار.. هليود احتار.. بين دلهى وبين.. مكة ويكيين

اتحسد اتدحدردر فى الطين أصبح خوجة ف كتاب جاكلين

اتشعبط فى حبالها الدايبين اكتب انتحب اتكدر.. دار

البحر عكار الويل غدار

اترد الشيش على حمل حشيش قوم احمى الثورة من الثوار

إحنا ح نفتحها على السبعين

فانفتح الشاعر بالأشواق عايز يرضى جميع الأزواق

شلفط لخبط خلط الأوراق يشتم فى ميدان ويعيط يتدم فى زقاق
أصل الفلاح حين جه يختار اتلغم احتار بين زر الكوسة وزر خيار
ومرار الصبر الذل يا بوى حرق الدكان
زمن الكونكان.. علمنا يا خال.. إن كنت حزين.. روح للعطار
العافية هزار.. القافية مرار.. اسكر ما فيهاشى كسوف ولا عار
مالكل اندار.. اتصهين لف العمه وزار
وجهارى نهار.. ماعدش الليل ينفع ستار
الحرب ضرورس.. يلزمها تروس
ياما خدت دروس.. بالذرة تحارب أو بالطوب
ما فيهاش غالب.. ولا فيه مغلوب
المخ مادام أصبح معطوب.. والقفا مقلوب
والضارب صار مأزوم مضروب..
خليك أخبار على كل أفيش
دى السهرة بتحلا بالتحشيش
خلينا نعيش مالناش فى الجوع
ياما شبننا هموم وسجون ودموع
سرقوا الصندوق وفاتوا المفتاح
البمبى مقفل الموضوع
والشعر بدون سعر بينباع
السوق يا حبيبي مالوش فى الشوق

الدنيا ربيع وإن ضاع منا فرق الأسعار.. نرجع جرابيع
يا ابو مخ حمار الدنيا براح.. سردين بولوبيف برّجر تقاح
فى الغابة لايد تكون تمساح وتعموم فى المد مع التيار
تنزل تلطيش تعريش تحويش تجريس تطنيش
من كل خزينة حتاكل عيش

قوم شد السلخ عشم وهزار سلخ أولادنا بألف شعار
قوم حط الطين فوق راس الشعر ابو التفانين
ح تلاقى عنين تططق وتقول.. باسم الشهداء الوطنين
وتلاقى أعزاز.. وتبيع لنا «حكمة» بن أليزار

....

أهين.. وأهين.. لهلبنى شرار الفعل الشين يا ابو مخ تخين
فكرت صحيح ولا انت عدلت عن التفكير
بعد التصحيح يا اريب يا لبيب يا ابو التدابير يا أمير وفصيح
ما طلعتش انت المتمكن «إلياهو» طلع امكن منك..
قلب الشورية على حجر أمك..
ولا حتى طلعت المتمدن.. «إلياهو» طلع امدن منك..
دا طلع من اودة النوم خمّمك.

الريحة فضيحة فاحت فى الدار مدت بالذلل لسابع جار
برفان سيشوار مايزيلوا العار

تَقْطُس وتَقْب ف ست بحارح يظل العيب مكسوف منك..
ويا ادور لك أنا عن أعذار! يا أنجس دمي من دمك!.

الكومبارس

مكتوب عليه آشوفه كل يوم أتغم
على كل شاشة بيطلع لى يصيبني الهم
ساعة ما بيقول وتنطق ع الهوا حروفه..
ثواني ويقلب الدنيا ودبان البلد يتلم

....

عليه خلقه مصديه.. يشوفها القرد يستغفر
نكد وحقوق وفلسنجى وع المخاليق بيتشفخر
مفيش واحد وقف جنبه.. فى ساعة الزنقة إلا رماه..
إذا فرجت وجت وياه..

ويسرح بينا يتباهى بأخلاصه.. ويعمل فى الفرح عنتر..
صاحب مجلس وعقباننا.. صبح له ديوان وسهرايه
وسته زمان كانت دايه.. تبيع الرايحه للجايه
ومن دا فانله وده حله.. وده جرافته وزاكنه
لحد ما قب وانتجر صبح حدوته وحكايه

....

محفظ والنبي حارسه.. يفهم كل شئ مقلوب
وكان طول عمره وسطهم.. كماله.. وصدفه صار محسوب
قالوا لك سيرته تشهدله.. تاريخ باهر مافيهش عيوب
وكافة عيلته يوم موته.. ح تهري القبر بالمركوب

بتاع كله وكان نفسه زمان يطلع بتاع تمثيل
ورب العرش له حكمه .. ورزق الهبل ع المخاليل
هداه فاستولى ع الخشبه فى مسرح كله متودّك على التطبيل

شكيت لابنى كثير منه فزم شفافية واتمسكن
وقال لى خلاص خريتوها ..
حكمكوا الندل فنسيتوا بان الواطى بيماين فيتمكن

داريت خيبتى ورا سكاتى ورأسى م الندم لفت
وروحى م الألم شفت
دعيت من قلبى ياربى يتوكس وكسه ما يلحق حتى يتلفت
فى كل ما يبجى يكحلها بيعميها .. فتزفت
خياله يسقط الحامل .. فعالة توكس الوالده ..
وريعه كربه كما انجر .. جميع الخلق فيه تفت
وح اعمل إيه وأنا غلبان .. وكفى عن قفاه .. عفت



ججش السباح

إكتب ياعم .. يامين قرا دى الذاكرة
ماتت من أيام انقره والأردغان
مين راح يحاسبك ع السطور الجهل نور

الأرض بور على قرن طور..... فى الكستبان
حيوان بتتطق بالمونى..... ركوبة غنى
ومنتى دايمما منحنى..... لجل الأمان
إكتب وقول روسيا السبب..... جابت الجرب
وضيعت مجد العرب..... جوه اللجان
هيه ابتلتا باليهود..... وبالسودود
وغرقتنا فى الوعود..... من غير ضمان
وهيه خلت اسرائيل..... فرات ونيل
زعيمها كان أكبر عميل..... اسمه ترومان..
مش غرقتنا ف السلف..... أصل التلف
وعودتنا على العلف..... وعلى اللبان
اكتب ولا يهملك وقول..... تقبض تتول
العقل ضاع فى هبو فول..... كان اللى كان

....

لكن وحق اللى جرى..... من مسخره
عمر التاريخ مارجع ورا..... يابتاع زمان
ولاميت عمود راح ترفعك..... أو تتفكك
الأبجدية ح تصفك..... يا أفعوان
ومسيره من نجأ البلاد..... من غير ميعاد
يكتسكو نيل فيضان ولاد..... زى الطوفان



موتيا حمار

يا خساره يا مخ اولادنا .. إتجنن شيخ أسيدانا
وقعدنا نفسر هبله .. أتاينا ما قعدناش
أتاينا قعدنا عقدنا .. اتخريط حبل عقدنا
فرقدنا فى بير السلم .. فى الضلمه ما تفرقناش
ويا عالم بالأحواش .. مليانه أو ما فيهاش
العضمه اللى رموها لنا .. مصمصها ما قرقشهاش
السهره بتشفى خلايق .. عكرت الجو الرايق ..
ولوحدته هوّ يمخمخ .. ولسن ولا حشاش
الشمس عشانه بتشتى .. على كيفه يفبرك يفتى
والابره زى المدره .. أو قدره ما يفرقهاش
فرقع لوز البكاش .. قال جاى أكيد ولا جاش
كان ح يوسع أرزاقنا .. صدقتا فروحنا بلاش ..
رضا منه أخذ أموالنا .. ع البركه رضينا بحالنا
فى الجنه أكيد ببقى لنا .. لو عشنا ح نلقى معاش



جاهل حريف

عصامى فات فقره وأهله .. وصبح أفندى أبو العريف
يوم ما اتولد جهله نده له .. تقل دماغه بكل خفيف
ولأنه جاهل .. ويجهله .. فرحان صبح جاهل حريف

ينزل ويطلع على مهله يعب من بند المصاريف
أهبل صحيح لكن هبله من صنف متحضر وظيف

فى الفن ياما حداه أفكار.. فى الواقعيه الطعميه
وفى السياسه وتر زمار ولا شيخ غفر لا سماعيليه
ولأنه أمى بمخ حمار.. وصحفجى فى الداخليه
يقول كلام وكأنه هزار.. وبيقصده ميه الميه!!

(أدب اليونان ده أدب عفاريت).. والفلسفه لعبة حاوى
دراما إيه ما بلاش تزفيت.. ده كله غزو أوروبوى
إحنا كده حلوين كتاكت.. شى الله ياسيدى الحجاوى
إحنا اللى أبدعنا التكت.. وكل ناس غيرنا بلاوى
مين زى جدى كان غاوى.. مين زى ستى قال حواديت

ولأنه غاوى ومن صغره.. صبح أديب رسمى بجايزه
وهج طفشان من فقره.. إختار له سكه متمايزه
حير جميع الناس أمره حتى المحايدة المتحايزة
علشان تمللى ساند ضهره أكيد على الحيطه الفايزه

ياما له كتابات لماحه.. عن كل ما بهم حياتنا
عن الزهور الفواحه.. فى ليل قرافة امواتنا
وعن العيون اللماحه.. لرقاصاتنا وملكاتنا

علشان كده الفرصه متاحه.. دايمًا وظرفه بيواتى
سيف فى الإيدى السفاحه.. وفاشى شكله ديمقراطى
وتملأ بيقى فى الساحه مخبر خبير أو أدباتى
يعجن عجينة الفلاحه.. لو سيده أصبح قرداتى

يكتب كثير ولا يقرأشى.. صفحات هلمه ما تفهمشى
إن كان عجر والا غباشى.. والا بليد والا شبكىشى
روايات مقالات هباشى.. أهه كله ماشى ماتفرقشى
سمسار هيافه ماخلاشى.. على كل لون زى الطرشى
فى الشعر غلب النقرأشى.. وفى الأدب سبق الدوتشى
شى الله يا سيدى القردانى.. يا فاهم الدور والأزمه
إقلب على الوش التانى.. ما كل (تش) وله لازمه
يلزمننا برضه كوميدىانى.. يخف من همنا حزمه
يا جنس ما سح برانى.. لاف عرقه دم ولا بلازما
حلفت ما اقرالك تانى.. إلا وأنا ف ايدى الجزمه.!



سيرك الدراما

سيرك الموالد فتح صبح الفرع دوكة
وأتى زمن ندل صار الفن بعكوكه
اتربع القرعجى واتلمع أبو توكه

واتقدم البغل صار للساحه فارسها
 فى وزارة بالزمبلك سوستها مفكوكه
 جبرت فتون السياحه والفنون يانصيب
 أرقص على البهلى ولا ترخى ستاير العيب
 وفارقنا ياللى فالقنا الباب يفوت ديب
 الفن فى عرفنا طبله وزماره..
 سيك من القومى واحبس دمهم فى الجيب
 داحنا اللى كلنا الزلط واللعبه فاقسينها
 ح تقول (يامصر) إحنا ياما شرينا من طينها
 عموم جميع البدع عاجنينها خابزينها
 ميت قل على عشره افتحها ياعب فتاح
 على أقل من جهلك أفتى فى تقانينها
 ملك السياحه اللى كان فى السيرك مستوظف
 قلع الطرايطير وفرق الشعر وانتظف
 وصار على الفن مفتى يقول ويتعطف
 له حق صرف القوافى لكافة الأشعار
 وصرف أسعار خلاصة الفكر بالمقطف..
 مسرحنا إحنا كده واياك تقرب له
 واللى ح يحتج نجومات السما أقرب له

بلدنا على كيفنا ح نفنن نجرب له
تقول أرسطو برختو والا ما برختش
إحنا اللي فكينا رأس الفن من حبله
ايشى رقص لعب وصبايا كلها مزازيك
ولجان خبيره تجيب لو عزنا بيض الديك
حبسنا جن الدراما وكن لحنأذيك
أمن الفنون شغلنا والمسئولين عارفين
ودارى يا مبتلى همك فى آه بلاويك..

وخلص يا شعب اطمئن الفن له فرسان
راكبين حمير السَّبَخ وكبيرهم الفنان
اللى بلانا بكتابه فى لعبة الكونكان
وسقانا كأس المرار يا شعب لكياعانا
علشان تصهين تفرفش أو تموت قرفان.!



مخرج مخبر

لهلويه الحبوب..... ابو قصه الدحلوب
مخبر مخرج مسوح..... فى الزمن الشقلوب
ناعم زى الزيده..... وخفيف قوى ع المعده
أى رئيس راح يركب..... يتبردع له النوع ده
تسهل أشغاله..... تتعدل أحواله

ويقذف فى الفته..... بيمينه وشماله
 وبيان إنه مثقف..... على طول لما يسقف
 ولاهوش فاهم حاجه..... زى ودان المقطف
 بيقول لك ع المسرح..... سبويه ولا بتفلح
 الأنقح لو خبطه..... م الجمر ك نستفتح
 أن كنت عايز تكبر..... لازم تصغر أكثر
 وتوطى لرياحها..... لما الموج يتعكر
 لازم تثبت إنك..... فاهم ملاعيب فتك
 جاهز ساعة العوزه..... ماح يستغنوش عنك
 ترضى جميع القوم..... وتدوخ طول اليوم
 زى وليه تعيط..... لو بعثوك لوم
 همك يعصر قلبك..... غلبك يغلب كدبك
 بين عارك ومراك..... نارك حاميه بذبك
 لعبه ومش قديها..... إتحمل بلاويها..
 عايز تبلع خيرها..... وما تشمش مجاريها
 عايز لكن خايف..... يا أعمى وعامل شايف
 بتدور فى الضلمه..... ع الكدبه أم شفايف
 دا للى مسحت مداسه..... خلحك زى لباسه
 ورمالك زى الخرقه..... ولا غيرش حماسه!



رقيص تحرير

مبروك عليك قوى ياسى حوده صار يحسدك.. قاسم جوده
بقيت ياعم (رقيص) تحرير.... تحته العواميد مفروده
قصقص بقى بإيدك شطب.. أشخط كده وامشى مقطب
بس أوعى دا لمشمش عطب والقطن ما خلاش م الدوده
عبدالمعين اللى يعينك رفدك عليه.. كما تعينك
فاخلط يسارك بيمينك.. دى خيرة ايامنا السوده
ولاوجه غير ريك دايم.. ومن قعد.. يصبح قايم
محجوب ولد عبد الدايم.. جاهز ورا باب الأوده
ح يعود.. مع الموجه وتفرق.. وتفبرك الكذب تصدق
وأياك لاتزهق.. وتحمرق.. دالمزه لازمه.. مع الصودا
فكون مع الرايجه.. ياشاطر.. زمن (الحوان) كله مخاطر
حتى البقر.. فيه بيذاكر.. ويهز ديله على الموضه!



ناقم فنى

الواد (شحاته) بن (زكيه)..... بعد الشهاده الفنيه
عطوا له صفحه نقديه..... الهبله مسكت زماره
والحظ ده حسبه ونئه..... (عثمان) بدأ ع الطبله
يادوب بمقطف وشيكاوه

وصاحبنا (شحته) عشان مهموم.. إهتم بهموم المسرح
واكمنه صاحب عيا مسموم... بقى واد فلاتى واتدردح
نهار وليل ما يدوقش النوم... طلوقة فى السوق ببشبح
قبيت ياواد علمنى العوم..... أنا برضه ملسن ومفتح
والولعه محتاجه شراره

الشعب غاوى التسليه..... والدنيا تحتاج لإثارة
زى البصل ع التسقيه..... هو اللى يعطيها حراره
فتانة الشعب عطيه..... بتخاف تطير فى الطياره
لكن عشان الوطنيه..... قالت زيارة بتجاره
والكونت مدحت عدويه..... طوّر فنون أهل الحاره
وشعاره دعم الميزانية..... من النقوط جاب عباره
وللفنون الشعبيه..... جاب م اليابان طبله وطاره
وسى عمر فتان النيل..... دخل مسابقه فى البوكر
عشان خاطرنا سهر الليل..... ولف من كندا لطوكر
كان للعروبه خير دليل..... ولمجدنا ماركه مسوكر
خلأ أمريكا تلين وتميل..... ودى بقى معاها الجوكر
ونشوى رقاصه الملايين..... شدت بحيلها طبلتنا
هزتنا يا ابنى يسار ويمين..... بالرقص فكّت أزمنا
غزت بلاد الغربيين..... شهدوا بعدل قضيتنا
ولما سألّم كنتم فين..... شرحت بهمه حكايتنا

شالوها هوبه ف نين العين.. وراحوا باصمين ورقتنا
صبلح غسل الله أكبر..... الفن صار فى ايدينا سلاح
العصر ياخلق اتغير..... برم شناب عبد الفتاح
وخلا لزيخه وبعجر..... مزاج يعيشونا تفاح
ابو دراع بيه اتغندر..... وراح باريس وعمل فلاح
زعيط معيط المتغتر..... تاب واشتغل بلبل صداح
فكيهه بقلاوه تهنكر..... وتسب قوانين الاصلاح
وسنيه بعكوكه تفسر..... قالت خلاص بدنا نرتاح
ياما كافحنا وينقدر..... كل المكافحين السياح
صباح غسل يا أهل البندر.. الى انكسر عايز اصلاح
والفن أيوه بيتأثر..... لكن الضمير واسع وبراخ
وشحته أفتدى بيحلل..... ويفتى فى كرامات الجاز
منين ما يقبض يتحنجل... ويسب فى شرف الاستاذ
ونصيحته للى عايز يكبر.. يطاطى بيقى أكيد مشهور
يتعلم العربى مكسر..... ويلف شاله على الطرطور
حتبقى ناقد متبحر..... مادام حبكت تقنت الدور
تتشدع المنفاخ تكبر..... تدور حسب ما الكرسي يدور
العالمه جوزها بيستوزر..... مادام شيخ المنسر مأمور..



حبظلم بن بظاظله

كان عنده قصور ووسيه..... وجناينيه وفسقيه
ويلم الفلحش ياكلوا..... فتافيت عدس الطبلية
وأيامه لفت دارت..... القصر حيطانه انهارت
لما الاشئاب اتحلقت..... واتفك الطور الفالت
صاحبنا اختار يلامها..... يتشعلق فى مقاديمها
ولبس جلد الحريايه..... واتصدر فى عزايها
نافق على قد مارافق..... وصبح م الحزب العايق
داق طعم الاشتراكيه..... وشرب م الكاس الرايق
وسليل النسب الخليل..... أصبح م الشعب العامل
اتهزيا وز اتطوح..... مع حزب الريح المايل
وانفلت البغل السايب..... فى حبل الأدب الدايب
برم شنيات العمده..... وصبح فى المجلس نايب
سى حبظلم بن بظاظله..... أبو ببرونه وبزازه
لسه بيرضع م الحسره..... شارخين قلبه بقزازه
ماشى بكرباجه يطرقع..... يشتم يكتم ويبعبع
كبده وارم من غله..... وياذله لحين ما يفرقع..
بالسان الكذب المالح..... جايبين وزمانك رايح
إجمد ياقمع السكر.. ح تدوب فى النطره يافالح!



شيخ منسرا الصحفيه

قومي اصرخي ع (الشهيد) الفحل ياشابه
على حبيب الملوك الفلح والعاريه
طول عمره لجل الفلايه من غوازي حريم
باع الجوارى نخاسه بكر أو عازيه

لحسن بلاط السرايه أيام فاروق وابوه
وعشان يراعى الأمانة شتمه يوم قلبوه
أبدع فى فن العوج هوه وفاضى اخوه
قدروا يخلوا البيبان مقفوله ومواريه

بليلة القدر صار مثل الكرم والجود
مش عمه عثمان وأمه مرضعة عبود
يا اهل الكرم يا برم الجوده بالموجود
من دقنه واقتل له لخبيط شانه يتربى

رى تلامذه أكم.. من كل صنف ولون
لهم فى لضم الخيطان الأمريكانى.. فنون
يطلعوك بعد ما تقرا المقال.. بقرون
ويعكننوا الشعب حبه.. يزغزغوه حبه

وايام ما كانت دمانا تسيل وتزف غدر
بايتين فى ليل المرار.. نحلم بطلعة فجر

كان هوہ عمال بیفتل فی حبال الفدر
يعطى الجريح اسبرينه .. والشهيد شريه
عصرَ هموم البلد .. تاجر بأحزانها
على الرغيف السلف سمسر بها وخانها
وقلمه عاش طول حياته .. يسم وجدانها
عايزها تدعى لأميركا ستا القحبة!.



سمسم سمين

على لسان شاعر رجعى .. من طرح طين المحروسة
ح اعزف على لحن مواجعى أرجوزه من بحر الكوسه
عشق ومناغشه لامر .. كان

يامرحبايك فى بلدنا ياعم سام يا حبيب الكل
من ضى نورك أولادنا طالع نهارهم زى الفل
ظبطنا ياما مواعيدنا واشتقنا واستتينا تطل
عيب ياسماسم تعاندينا .. داحنا فى بعدك شفتنا الذل
ياشيك لأمر وبنك حنان

إيه يا حبيبنا أخبارك؟ يامجدع أنت ياعتره وزوق
ياما حلمنا بدولارك يجرى فى ايدينا نقب لفوق
فا اكشف عن الغيب أستارك . خلى الأمم تصحى وتقوق

إحنا أملنا استغفارك .. وح نرضى لو تدينا خازوق

مغرى أو ناشف سيان

إنت اللى فيهم يافارسنا بس أنت بصباeck خبط

أبعت رجالك تآنسنا وأبعت بناتك نتلمببط

وهات أساطيل تحرسنا بيوت مالمه نتشعبط

وسيماعشان متاعيسنا ... تموت ياتتسى ياتتلخبط

ياتعيش، لكن زى الخرفان

سمسم سماسم سمسومه .. دقت قلوبنا لخطاويكم

أأمر نصحى لك . ثومه تغنى هلت ليالكم

داحنا بأمرك نتأمرك ونبقى خاتم فى ايديكم

تشد خيطنا فنتحرك..... ونقول يبارك لنا فيكم

عشان نزيل أثر العدوان

شرم برم أهو كله صابون .. إقلب بضاعة فى بضاعة

إنت فى دنيانا الأفيون ويوم الحساب انت شفاعه

ولايئسى فضلك غير مجنون.. ياشيوعى عايزها مجاعه

يا ابن حقد عميل مأفون عامل المشاكل شماعه

عشان يشعلل مصر نيران

تعوزكبح نألف لك وشعرا ياما قوافى جاهزين

وصحفجيه ح تهتف لك تلفزياعيه.. بالملايين

لو حتى (تخر..) نسقف لك .. ونبيع فضايك فى البتارين
وشو تريد راح نتنف لك كله سيمكن بالقوانين
ومصر تبقى أجـدع دكان

إياك يهـمك م الأنصار كفار حـمـل مالهم ديه
بالبلطجه عملوا أحرار وهمه ناقصين تربيـه
عاملين لى فيها يمين ويسار .. مقاومه قال على فدائيـه
عيال خدوا على لعب النار حاقدين وجهله وأميـه
لو كانوا فهموا مين الثوار يلاقوك أساس الحرـيه
بس أنت جرب رشه دولار نمدهم ع الطبلـيه
تمز لو ما كنت جـعـان

آهين وآه ياليل وياعين.. أنا فى الحقيقه ما انيش فرحان
عشان نطقـت على لسانه سيادته قبانى الأوزان
سميـن فى قلبه ووجدانه ... كم ياما زيه ف كل زمان
خدام وشعرا أخوانه حيزفوا مصر لعمك سام
ويحـوجوها لاحسانه ياكلها والعـه بكل امان
والشعب ياكل أحزانه وينسى إن الفانتوم كان
سيف اللى دبح شبانه..!

يا حسرة على ذكرى الشبان



الشاطر ربع التمن

قصير وقزعه.. وفرق يالوز
وعنده فصاحة ومكر العجوز
ومبسوط تمللى ما يضريش بوز
فى عز المصايب بيحسب يفوز
يعبّط يربط فى صاحب نفوذ
يشبط يشعبط كما الدور يعوز
يعبى المحيط لجل خاطره فى كوز
ويمشى ف حضوره على قشر موز
تقول هوه ثورى؟ يقول يعلم الله؟
تقول له انت دورى؟ يقول لك يجوز.!



نقاشين

أيها النحات مت قهراً لوحدك أكتم الحزن الدفين
أكسر الأزميل فمين للصخر بعدك.... التراب ح يصير لطين
كنت فى عصور الأساطير الخوالى.... صانع الخلد اللى ما يطويه خيال
تضرب الأزميل يسيل صخر الليالى.... يستحيل ويشف عن روح الجمال
يجعل المتعب خفيف الذنب خالى.... والغرور يشمخ بأنصاف الرجال
دارت الأيام لكل زمان رجاله.... ماتوا أحلام الجنون الفنانين

شَحت القدرة الزمن مَرَّس عياله .. الجرانيت شاخ .. قصاد هم السنين
والحجر لما إنفطر حزناً لحاله .. قال ده عصر البوية . هاتوا النقاشين.١



كل الأسامي غنوة فى قلبى

ما أحلاك يامصر أما وجهك ييضحك.... وتعلأ إيتسامتك رايات فى البلاد
ويحصد ولادك بشاير تعبهم.... على قد ما يشقوا يلقوا الحصاد
مع الحق يتبادلوا نبضة قلوبهم.... ويتجادلوا فى حده أو فى وداد
يزيحوا الغشلوله اللى غطت عيونهم.... عيونك دليلهم لأحلام جداد
يمدوا الخطاوى وفوق كف أيدهم.... حيلتهم فداكى . وليكى إمتداد
ولادك حشا القلب دول فتانينك.... تزينك تعينك قلوبهم شداد
بموال بغنوة بصوره بحكاية.... يفيلم بروايه بوقفه عناد
مع الحق والعدل والإنسانية.... فى حرية يختاروا وقت الجهاد
إذا الكلمة ضلت إذا الصورة غامت.... إذا الكذب فرّخ وضلل وساد
وإذا من حجور الظلام البليده.... رجع تانى طاغى ومن قبره عاد
ولادك يامصر اللى رفضوا الهزيمة.... ورفضوا تكونى بضاعة فى مزاد
من اليوم ح يبقوا ليوم انتصارك.... سلاحك، وبينك وبينهم ميعاد
أنا مش بارص الكلام للأغانى.... ولا لجل أفرّج بشمرى الفؤاد
لكن قلبى عصفور يرفرف فى صدرى.... ونفسه يغنى لكل الولاد..
لفاضل لأحمد لمجدى ليوسف.... لخيرى لخالد لعلوه.. لعماد..

لعبده لعمدى لتوفيق لأردش.... لكافة أسامى جلال أو رشاد
لعمك حسين اللى صاين لسانه.... لهاشم ولبشير لمرعى لفؤاد
لجبريل ليحيى لمحمود لرأفت.... لهمام لشلبى لحسام ول - وداد
لفاطمه لفايظه لدرش لمحمد.... لسامى لسيد - فريد وليلاد
لكل معانى آثار أو معالى.... لفردوس لعابده لتحيه لسعاد
لكل اللى اسمه نطق فوق لسانى.... وللى نقص اسمه منى - فزاد
فعفواً يا أجمل ما خلف بلدنا.... ومن غير فتون تسوى إيه البلاد
مسحتم عرق كل متعب فى أرضه.... وحرکتو حتى قلوب الجماد
فمبروك - ولكن على السطح واحد.... وغيره مئات راقده تحت الرماد
جيوش التعابين إذا الشمس طلعت.... تدارى سموها ف خبيث الرقاد
فكونوا على ما ارتضيتم سهارى.... جموع زى مانتو ما تبقوش آحاد
واوعوا يفرقوا غدر الكراسى.... ويفتنكوا وعد الصعود بالقعاد
مازال الفراغنه على كل ناصية.... بيستتوا غفله ينولوا المراد
عزب يوهبوها لميت الف وهبه.... يشدوا اللجام لو حكم والزناد
فلو كئتوا قد الأمل والأمانى.... فسيروا طريقكم صمود واجتهاد
ما فيش حد غيركم يحدد خطاها.... وتكفى سيريتكو ف قلوب العباد
شموس الحضاره وابداع فتونها.... بتصل على شط ليها الجياد
ولايجيبها إلا جموع فتانيتها.... إذا مره حسوا بنبض البلاد.



ليله اتحاد الفنانين

يا مغريل الرمل جنب لى حجر مسنون
من صخر مصر القديم الطاهر المكنون
واقرا عليه م الآيات البينات فتون
وطهره فى العرق والدم لجل يكون
فيه الخلاص يا وطن م المرعب المجنون
المرعب اللى جعل قلبك ماهوش جواك
وبلاك بضغفك وذلك لجل تلقى عشاك
وأدبك بالخديعة وع الحرام ريباك
خلاك وانت الذى رب الفنون سواك
على صورته تصبح عديم المرجله مافون
المرعب اللى جعل فنان يصير مخبر
وملك المخبرين ناصية رقاب الفن
وخلى زيد بن عمر الفوريجى المحضر
يملك بسوء النوايا يسود بسوء الظن
ويورث السرقة شرعا للصوص بقانون
الحاج (رشوان) وصل طلبوا له سجاده
وقدر يصلى بحكم السن والمعاده
وقام يشارك فى طبخ الكدبه بزياده

ولما عينه التقت بعينيّه يا سّاده
 ما قدرش ينطق دعيت له يجوز يشوف النوم
 (وحمدي غيث) اللي كان ع الخشب يملأ الشوف
 زلزل بلاط الملوك ياما وهز ألوف
 ع الحلّه شفته فى ايده المفرفه والخوف
 يدوق يلاقى مراره يبص لى مكسوف
 صرخت ليه ياوطن على خلفتك بتهون
 والشيخ (رشاد) اللي فكرنى بولاد (عثمان)
 أيام ما كانت ولايه وشيخها كان سجان
 وكل شىء له تمن أو فردّه أو حلّوان
 أنا قلت جايز طموحه زى سلفه (ريجان)
 مش كان لو رتبه ف نقابة بصاصين وقتون
 (وفهمى خولى) اللي كان يصعب على التشكيل
 لمحته مايل على حسب الهوى ما يميل
 وكنت ظنيته عارف ليه ضرور النيل
 بتجف من كتر ما قتل الفواحش خيل
 أتاريه حسبها لقى بكره ما هوش مضمون
 أما البواقى فكانوا بحكم وظايفهم
 خربوها من بدرى وباعوها بمصاريفهم
 وقعدوا على تلها ماسكين مناشفهم

الساده لو أبجونا نبيع تخاريفهم
واحيينى يابا النهارده السيما ليها شئون.١
تقو لى ديمقراطيه أقول لك الحسها
إسمع آهات الرضا يا كاتم انفاسها
من اين لك هذا وانت كنت وسواسها
زيفت احساسها ذليتها لنحاسها
وصاروا ناسها بفضلك إحتمال وظنون
صاروا احتمال فى زمان الشعب بقى سيدها
كوريا وموريا بتقطع حبل قيدها
والانسانية صحت تحسب مواعيدها
بتتادى بكره عشان تضمن لأولادها
حق الوجود والشرف أو تندفن ماتكون
عمرك ما حتذلنى انت الذليل جواك
يانص موهوب وواقف صدقه ع الشباك
تقطع تذاكر مرور للنورى والهمباك
وتبيع صكوك الأمان حين تتزنق وتخون
وكنت عامل بطل يوم البطولة بلاش
لكن النهارده كشفت العوره ياهباش
ومسحت بالدقن طين ونجاسة الأحواش
من عهد خالتك بديعه بالعها والعه بلاش
بكره زمان ييجى تدفع والحساب مديون.

مثقف

حزر.. فزر.. مثقف.. بدماغ شبه الحمار
مالوش ودان ويسمع.. النملة فى الكرار
ومالوش لسان ويفتى.. فى الجد والهزار
غاوى أدب وخُلّقه.. من قَلْتَه إستجار
لما لعبت حظوظه.. لَمْ لِم بوزه وطار
طلع نط السلالم.. اتربع ع الجدار
صبح وكيل وزاره.. والكوسه ام لخيار
مادام ليه فى الثقافه.. وخاله فى البازار
ح يصدر الكنافه.. يستورد الفشار
ويحل كل أزمه.. بطلعه ع المطار
واكمن العمر واحد.. ولغز سنين قصار
والدنيا بحر مالح.. بعد المد انحسار
المنصب مش يهمه.. ح يبقى مستشار
ح تحزر أو تفزر.. ح يطول بك لانتظار
لكن شوف فى المراهيه.. وقول غلب الحمار
ح تشوف أقرع واسمه.. من شعره مستعار



صباح الخير يا حريّة

صباح الخير يا حريه يا حلم الكل.. تحيه ليكى مصريه صباح الفل..
صباح نادى على بلادى بدايه السير
فى خطوه واحده مع بعضينا تصبح فى الحساب ميه
وقلبك يا وطن يكبر يساعينا سواسيه
ندوق الحلو والمره.. عشان أرضك تعيش حره
ولاترضى بهوان أو ذل.. صباح الخير يا حريه صباح الفل..
قاسينا وياما قاسى الشعب مر وضاع
شرب لهاليب من الأحزان وم الأوجاع
وكان ياما كان.. على الأزمان.. جمل حمال
صبور إن شال.. شجاع إن قال..
يمد إقباله للأيام ويستتى.. ويوم غنى وصل صوته جميع لاسماع
عشان الفجر من أحزانه ع الشهدا شמוש بتطل
صباح الخير يا حريه صباح الفل..
إذا ما إيدينا تتلاقى.. بتفتح فى الجدار طاقه
وكلمتنا ما تبقاش همس.. وخطاونا لعين الشمس
معانا مصر مشتاقه لفجر جديد وحريه لكل الناس
وفن يفيض أمل وحماس يخضر سينا والوادى جنود عمال
وفلاحين من اولادى البشر رسمال
وقتناين بتتلاقى على سكه تساعى الكل

صباح الخير يا حرية صباح الفل
صباح يامصر ياغفيه ياتوت ويمام وبنيه
وأولاد شهدا كان ليهم على طول التاريخ غيه
بدم القلب يرووكى.. وبينوكى ويحموكى من الراحه وم الجايه
سهرنا كثير صبرنا اكثر.. سلاحنا وحلمنا سينا يانيل يااسمر
عبرنالها ومصر بصوتنا بتكبر رسمنالها بروح الكلمه والصوره
نغير باهت الألحان .. نبدل بارد الألوان
نصحى ف قلبنا الإنسان.. ونخرس كلمه مقهوره
وعلى باب الصباح لأخضر
نشوف سينا رايات ونجوم على المينا.. تدق الباب فى حرية
تقنى الغنوه عربيه ومصريه لاسلون ولا تصغر.. بنكبر بيها مش ح نقل
صباح الخير يا حرية صباح الفل..



دكتور مسعود

الدكتور ميم ميم مسعود متأدب بخيال محدود
يتسغرب على مشى النمله يستعجب من مش الدود
(ألا مود) فى أولها ادكثر وطلع ع الموجه واستيسر
من بعد مازندق استقفر واستحضر عفاريت بالعود
من رعبه ف تسعه وخمسين أتبرأ م الشيوعيين
واتعطى بعباية الدين الركعه حولها سجود

يتدرد ح يمدح مين لهُ يتشرشح يشتم حتى أمه
فى قصور مشايخها سفح دمه اختاره الرب المعبود
على جهل العلماء استأثذ وف علم الجهلاء اتلفز
واتمسلم جدا واتهنذ بيحضر للأخره شهود
وف سوق الحقبه النفطيه والنزعه الاسلاماتانجيه
إتميز فى الكلامنجيه أصبح م الصفوه ومعدود
اتلمع وسط الساداتيه والأعور للعمى هديه
دا بيّفهم حتى العبريه والسهره يلزمها قرود
يستشيخ والقلب خواجه يستلبخ على حسب الحاجة
ولبسها خياطة وسراجّه على حسب الفهم المحدود
والعمر سمح كبر جيشهم شدوك ع السلك المشدود
وحشوك بزياله ملاطيشهم... وبقيت من قادة الأضيّشهم
اتغير حالك واتطور واتباع المخ على المكسر
اتهرس الوطن المتأخر وما عادش لأوطاننا حدود
وسيادتك فزت بيانصيبها .. خدرت معيزها عشان ديبها
ورھنت لشيخك كراكيبها أصبحت كاهنها الموعود
أموالك فى بنوك الدنيا بتأكد لنا أنها فانيه
رجلك مديتها فين الثانية؟ نسيّتها حدا أهل الجودلا
على قد الفتوى ما تلهبها وعروق الجهل تلهبها
من مكة لبورما تلهبها أفلام وبرامج وعقود

والميه بتشرب «إيفيان» والعيش من عند الطليان
والدم ف تفاح لبنان والمزح على حسب «المود»
اتباهى بنعايم ريك واكنزها قناطير على قلبك
إنصح من حسدك على غلبك ياكل على قد الموجود
واصرخ باى باى يا اشتراكية برلين عبرت للحرية
والخير فى الأيام الجاية مادام للرساميل جنود
طول عمرك تختار الرايعة وتعدى ما بين هادية وهايجه
والناس ع الآخر مش «طايجة» وانت بتبرر فى برود
كان قصدك وإلا ما قصدكشى راح أقولك زى ما أقولكشى
إيه يعنى لو ما سامحتكشى ح يسامحك رب التلمود



ابن الفيل

هو ابن فيل ربما وانت «ابن لبوه» أكيد
يا ريبب عصور الجوارى يا خلفه المناكيد
ح تروح عليكم نهار ما تنفض السجاجيد
وتطيروا زى/العفن والعتة والهراييد
يا رباية المخبرين «ياتش» حرباية
يا مرايه فى كل وش وانت سلاية
تشتم فتقبض وتقبض والعلل غاية
شتام هوايه فى حماية السادة والأجاويد

مش عيب عليك يا عجوز الزفة يا مخلع
تبقى زروب فى المجارى وتشتم المجدع..
اللى فى حب الوطن والحق كم بدع
ولا مال مع المائلة حتى لما راح فى حديد
يا عدو نفسك يا خاين اللقمة والصحبة
يا بالع السهل جهل وبائع القرى
أمك نهار الوحم طلبت لبن كلبة
فطلعت قِلَّة ذليل غاوى تبوس الإيد..
فى كل يوم لك فضيحة الجبر مش نساى
بكره ح تلقى اللى رايح بالفضايح جاى
زمن القحايب بلى بلادنا بأمثالك
وخسارة فيك الملامة يا خروف العيد
على فكرة لا إحنا عليك أبداً ولاويك..
لو كنت تفهم سياسة كنا ناقشناك..
ولو أنت صاحب أدب كنا اختلفنا معاك
ما انت الالهفية علّتك حارقاك
تكتب مقاله فتبرد.. حرقتك... فتزيدا.



كرسى فى الأوبرا

مبروك عليك يا ولد خالتى بهانة يا راضى بجميع الملوك الاهانة
وقابل فى عشق البلد دى تقاسى جميع اعلانات النكد والمهانة
ولجل الولاد اللى جم غصب عنك بتمشى فى ضل الحيطان الجبانة
تبوس الإيدين اللى سرقت فطارك وتدعى لها لما تشاركنا غدانا
خلاص يا ابن خالتى الزمن قد تبسم وح نلاقى فرصة نكمل عشاننا
جميع الفلوس اللى راحت على أمك ح ترجع وفوقها فواتير شقانا
فلا يكون بلاجرا ولا بلهارسيا ولا حصوة تقربى جوه المثانة
جميع الخروم فى الملابس ترقع وكل المدارس ح تاخذ اعانة
عشان البنات اللى مش لاقية تخته تلاقى ويدخل عيالنا الحضانة
ولا الزحمة تقرف على أمك عيشتها ... ح يبقى ويبقى لها الأكابر مكانه ..
أهى الأوبرا فتحت وباضت فى ايدنا ... ورقصوا عشانها جدودنا الحزانى
جميع البيبان العصية ح تفتح .. يا سمسم!!.. خصوصاً وزارة الخزانة!!



إبداع

قول يا مغنى الحى فى الأصحاب وزيد الغنا
حتى فى عز الحرب يحلا البنا
ما أحلى شركا الكرب ملح ومى ..
والموت محاصر كافة الأبواب

لكن من اللى مضى.. يتخلق اللى جاى..
وف ساحه الفن يُخلق كل شئ حى..
تسهل خيول الحقيقه ولو على الألسنه..
●

الحريايه

قريت النهارده على الريق مقاله عميقة وتشبه لدعوى الإحالة
كاتبها الصحافى عريض القوافى اللى عايش وميت على السلطة عاله
بدأها بأنه: على طول مسيرته بيخضع وظيفته لواجب رسالته
لذا راح يشارك المباحث فى حيرته كسابق عوايد وحكم الزمالة
على فكرة طول عمره ويا السراية واصبح جمنهورى غية وغاية
ومن ثم صار اشتراكى الهواية وهب دم قلمه ف سبيل العدالة
وهم البلد شاله دايمًا فى كرشه وقال للى أعمى يا أعور فى وشه
وبرّد وسخن على قد قرشه وياما جمع فى المواكب حثالة
وبعدين حلف بالوطن ان هوّ لا بيهمه بره ولا يهمه جوه
مادام استندع الحقيقة بقوة ما يرحمش عمه ولا بنت خاله
وكان عشقه دايمًا بلدنا الأمين وداؤه وعداؤه اليسار واليمين
من الغلاوية وم الحاقدين سبب كل أزمة غلاء أو بطاله
لأن اليسار الشيوعى المغامر عدو السلام والمدام والمتاجر
أكيد كان مدبّر خيانة يناير وأصل السبب فى خراب الوكالة
لأن الشيوعى الخبير فى الصياغة عايزنا عرايا غلابة جواعة..
معاه نصحى نخريها تبقى مجاعه فيركبها أهل المرض والجهاله

وذاك اليمين إلى راجع يغلس عايز يقفلها سيما ومجلس
ويمنع نهلس سوى بالمدمس لأن الحديث ماذكرش البقالة
وح يجيب ضرفها صيانة لشرفها ... ويحبسها خوف م الحضارة ف قرفها
بيحترها شرعاً على رمل خوفها ويقطع لسانها اتقاء السفالة
فا أهل مصر العزيزة ورجالها نساها شبابها بناتها عيالها
ورثاكو شروه بهمومها وعبلها فقوموا عليهم بهمه وبسالة
فاحنا الذين على طول ماضينا بكل المهالك وخوفها رضينا
وشيلنا حمولك على اكتافنا زينه ح نسكر بأمجادنا حتى الثمالة..
ولن ننسى كيف لإنجليز مرطونا ما بين السفير والسفر دوخونا
ولولا المعاهدة ما كانوا سابونا ولا حتى فضل وبواقى النخالة

يا خلق افهموا داحنا لينا تجارب وعارفين طريقنا ومن فينا حارب
فهيا نصلى لشمس المغارب صلاة السلام فى رزانة ونباله
عشان نبنى دولتنا ديمقراطية ما نسمحش فيها بأفكار خفية
وقله تبّوظ علينا القضية وسابقه فى سوق السياسة الهبالة
حرام لو نقضّى يوماتى فى مساخر ... لمجنون ومغرض وقوال وشاعر
يألب علينا فتفضل تناقر ولا نربى فرخة ولا نبنى صالة
يا أسيادنا عيب لما نشد لغيرنا فتنطق بكلمة ما ترضيش كبيرنا
ونحشر عيالنا ف قضايا مصيرنا وتنسى بأن المقام له مقاله
وانهى صاحبنا مقالته الفريدة بدعوة قديمة لأخلاق جديدة
وواعدنا بكره ح تلقى الحديد إذا البنك وافق وبعث الحوالة

وده صعب طبعا لكن افهمونا بلدنا فى ايدنا أمانة مصونه
وبكره حننده عليكو تجونا عشان تدفعوا للبنوك الكفالة..
مافات يا ما يا ما اللى باقى قليل ... ح تنعس ونحلم من الخير نكيل
ونشبع ونختم عشانا المنيل بتكريعه فيها صمود الأصالة..



السؤال الصعب

فن البشر والحكمة والفلسفة، وحضارة الإنسان
وكل ما ابدعه فى رحلة الأيام... من فكر أو أحلام..
كانت فى ليل العجز والأحزان بتدله على بكره وعلى قدام
ماتت جميعها فى الحصار الأليم.. عجزت قصدا تكشيريه استقهام..
على وجه طفل ف ساعة الفارة.. لمح على وجه أمه ارتعاشة غضب
خفيته عنها لأن خافت تقول له.. ليه ظهرها مكشوف وعمرها مخطوف..
وليه خانوها جميع ولاد العرب!!



ليلة المسحراتى

مستعفى كفى من حيلك قطرت دمايا ف قنديلك
ونقشت أيامى ف منديلك أصفرنا يحبى لك يكبر..
فى مقامك ح يصلى يكبر يتعطر بروايح جيلك
قلبى يسمع لك يستبشر يستقدم خطوة المتأخر

يتجمع حيلى المتبعتر وابشر بقوادم خيلك
يا بشوش الوجه أما تقطب يا حنون الكف اللى تطبطب
يا دوا لزمانى المتعطب متعصب أنا مع مواويلك
فى التوهه اقرالك تجاوينى اتصالح مع أحلام ابنى
تاخذنى بحورك وتجيبنى عطشان.. تروينى من نيلك
فسرترك حدوته خالتى ورسمتك شباك زنزانتى
وكشفت عيوبى فى مرايتى لو سابع بحر أعدى لك..
فرطت سنابل على كفى فرقت على اليتما رغيفى
ووصلت ما بين حضرى وريفى مستهدى بقلبى لسبيلك
عشمتى بالفجر رسمته ع النور اللى ف وجهك سمته
قسماً برغيغ لجلى قسمته ... لا ستوفى نهارى من ليك
فافرلى جناحات «العاقصة» .. علمها على الخطوة الناقصة
تكمل مع فرودس الرقصة ميادين العالم توسع لك
مع طبله قلبك نتصعلك وكثيرنا بيشهد لقلبك..



المنافيش

الجتت المنافيش الفشة المنفوخة البالونة الهشه
سافين الأخضر والقشة..
فى الأزمة يعملوا رجاله
ويقولوا عن الشعب قواله
وإن حكى للحق فى مرة.. يكسنوا ضمائرهم بمقشة

هليبه وكسيبه ومشاهير مديرين كوالين مخ حمير
مدامات مقامات من صوف وحرير
وينصّ لسان وسست وخيوط ... يتعبوا م المشى أن كان مزبوط
ويطاوعوا مادام يحكم رقاص.. سوا كان زعبوط يا رئيس تحرير
على حسب الريح حسب النية كتيبة وتلفزيعية
على كل الألوان يا باطسته
صيّته وشعرا وآلاتيه كتبه ونقاد تحليلالتيه
كافة لا حوال دنيا ألسطه
على حسب ما تهوى ح تتدبر.. ونبرر فوازيها نفسر
كلمتا فصيحة وع المكسر.. لا يقه على مين يدفع أكثر
ح نهرج له.. نتمهرج له.. وان عجزح نجيب له الماشطة
داخنا اللى دهنا الهوا دوكو.. مكيجنا كيسنجر وشكوكو
زيّتنا مفاصل مكوكه.. فسّرنّا وطمنّا شكوكه
م القمّه رجع شادد حيله..
ومعاه جايب ديب من ديله..
فرقصنا ونوّرنا البسطة..
وفرشنا الورد على الجنبيين عيطنا شمال زيتنا يمين
ورجعنا من المولد خاييين ... كارهين العلم إن جه م الصين
نقطنا قمحنا مخنا بطيخ يعمل صواريخ مولد طنطا..!



حضور الغياب

وخمسين سنة تحس انك محاصر
وانك غريب عن تساريخ الوطن ده ومن عصر آخر
ما فيش ليك مكان فى حوارى البلد دى..
فلا عرفت تاخذ ولا قدرت تدى..
لأنك عديم المرونة.. ما خدتش
وما عطيتش خوف من جحود الأفندى.. موظف وجندى..
ومن دى لعندى.. لا خُوفت غولة.. ولا فهمت فوله..
وكل الأمور زى ما هى لا وندى..
إذا كان «سيادته» ابتسم لك ح تفلح
وتأخدها وهبّه.. ثقافة القصور
وتبقى المدير القدير المسلّح تسلى صيامك بيدر البدور
وتكتب يحل الهنسا والسرور
على خطوط دواير جميع الفنون مؤكّد ح تنجح
تمزيّع تتلفز تسنّير تقطع.. مسلسل بطولة.. مادام واد مدرّج..
مسارح مهولة.. بتقفّل وتفتح.. يا نسبة وعمولة.. فى شغل السلاح
يتم السرور باعتماد المقالولة
تشوف أكل عيشك.. جنّاين فراولة..
مزاجك ياميشك.. مسكر مهلح..

●

مواويل البال الطويل
من كتاب الشعر الأول

أنا عشت بيكى سليم القصد ورهيف
أعطيك واغيتك بروحى م الهوى الجارح
حل الزمان الكذوب بالسلم متزيف
فضلتى عنى عديم الأصل والقارح
لكن برغم أنى فى قهرى ومتكتف
لو تحتاجينى تلاقينى كإننا امبارح!



يرنخ اللوز فى بستانك؛ وزهره يهيف
ويهيح خضارك ولكن فى الحصاد بيجيف
قومى احرتيها غضب..
خللى الخيول ترمح فى شمس الصيف



ياشاعر الفقرا غنى نبه الحرات
قول له يراعى الأدب يتذكر الأموات
كلام سمعناه من اللى قبلنا قالوا
ساعة شقا زيادة جايز تقلب الآية
مافيش نهاية ما هيش محكومة ببداية
قلقيله مخفية لازماً.. تكسر المحرات!



ديما الشريف عاليه رأسه وديما فى العالى
كما شواشى النخيل ما هى ديمى فى العالى
بيعطى ثمرة ولو ترميه دواب الأرض
ويجود بخيره لغيره.. ولو ييات خالى.!



حكم زمان البدع لا ندال بتتخالى..
طلعوا الكلاب السطوح فرسان وخياله
أخوك ما عدشى أخوك ولا عمه ولا خالة
والسبع فى السوق باعوه بالسحت دلالة
قلعوا ثياب الشرف لبسوا من البالة
ياحر ليه انخدعت فى كلمة بطالة
أنت اللى كنت المزية كلمتكم آيات
أكم كشفت اللوع لستت ع الحالة
هشيت دياب الفلا عن لقمة الإخوات
قوم مد أيدك لايدى نرجع اللى فات
نشوف على ضيه أيام بالفرح جايات
معها حلم الوطن حرية وعدالة



الديب سرح خد براحه وعط فى الغيطان
ومن شقوقه خرج يتغندر التعبان

ليه ياطبيبها المداوى لَفِيَت على لَحْناش
ورضيت تَأْمَن دياب الغابة ع الأحواش
وبعد ليل الدفا فى الشمس ليه بردان
يلزم لأرضك ولد يجمع فوارسها
يفك قيد أسرها ويهد محابسها
خطفوا العروسة وعليك المهر يا عريسها
تقطع قيود قهرها تحررها م الأحران
إرخى لجام مهرتك أزرع شطوطها حماس
لو كنت حافظ مقامها أحفظ مقام الناس
أرض الفراغة يا ولدى ضعفها الوسواس
يوم تقتل الخوف حَ ينطق صخرها الصوان



(اللى بنا مصر كان فى الأصل حلوانى..)
والى نهب خيرها والس غيرها.. خوانى
الحر فيها إنكتب قهره على جبينه
والفقر علة وأهل العلة ناكرينه
مش جهل لكن عما.. ياتقل أحزانى
فرعون بنا السجن؟ لا... احنا اللى بانينيه
دا قبر مفحوت لنا.. واحنا اللى فاحتينه
سـيوفه من صنعنا والحبل فاتلينه

مين اللى كان فرعك ع البر يا فرعون!

قال عرشى شايف وخايخ وانتو ساندينه!



أنا سبعى مات يا صبايا اتشردوا عيالى
كان عزوة الدار وكان شجره فرع على
وكان ابويا وحبيبى وجوزى وعيالى
ياخنجر الغدر يا مخفى فى جراب لاندال
سنيت ضوافرى سيوف على صخور لجبال
ويحمر دمعى ندرته شموع لقنديله
ولحد ما يشق صبح الحزن من ليله
ح اداوى بالصبر مرى واغنى للأطفال
المهر شارد مازال... فاكبر... يا خيالى!



احنا اللى سكر التاريخ من دمهم طينه
يوم دقوا طبل السلام الهم مادرينا
فشربنا كأس الهوان طوعا وغنينا
وأما صحينا التقينا الملح فى عنينا
والحبل شادد على رقابنا ورجلينا
نسينا من يأسنا يا سينا مين احنا
واللى دبنا أتى سكران يعزينا!



طلعت عالى الجبل وبنيت عليه عشى
 كما نسر عاتى وحيد عايش بلا خلان
 سكرنى لحن البرارى البكرى، والوحشى
 كمثّل سبع الفلا إستفردت بالفزلان
 لكنه صوتك غسل م الوحشة أضلاعى
 أنا كنت أعمى أخذت الدنيا بدراعى
 نطقّت اسمى على لسانك رجع لى الشوف
 فى بحر أهلك نزلت ف حضنهم أمشى
 ليه مهما أمتنى خوفى قلقي ما ينامشى
 ملعون ياداء العروش من علة النقصان



لو يوم ح تمسك عصاية الحق يا فلاح
 لا ظلم راح يهزمك مهما تهب رباح
 أنت نشيت البرارى جنة مصرية
 ولا بغير العدل والحرية راح ترتاح!



كان قلبى مرعوب تجينا أيام تتسينا
 يقتلنا فيها رغيف العيش ويحيينا
 وف وهم حلم السلام تسرقنا سكينه
 غنيت لحد الفزع حزنا على سينا

وجت ليالى علينا سهينا يا شعراء
نسينا كم فى بطون الأرض من شهداء
شغلنا ما يشغل السريحة فى الأسواق
دبينا ع الأرض مثل الدابة فى الظلماء
نلم باقى البواقى فى شمم واباء
وننام ندامى حيارى سكرانين بالداء
صبحت خايف نهار ما تحل ساعتنا
يلعن مزارنا التراب.. يرفض يتاونيا.!



مليت وما عادشى عندى يا رفاقة صبر
صبرت ع المر وشريت المرار فى الصبر
وزرعت بستان أمل طرح الحسك والصبر
ركبني فكر الهموم وجزر حشايا جزر
وكنت فايض وزايد صرت خايف الجزر
يادنية الشوم ياموجه ف بحر مد وجزر
فينها القواصف تعدينى بحور الصبر



راحت ليالى الأمل واليأس ما فرجها
إمتى بيان النهار.. ياليل وتقرجها
رحلوا السبوعة وفاتوا الكلب فرجها

يامين يقول للحبايب.. خلکم وافى
ياخذ فى وشه قصور الندل ويوافى
والهم وافى متى يافرح تفرجها!



يادنيا مالهاش أمان غدارة بالصاحب
فى أيام هنايا جميع الخلق بتصاحب
واما جفانى الزمان ما عاد لى بيت صاحب
لا تصاحب اللى فى يوم الحوجة بيولى
صاحبى اللى فى عزتى وف ذلى بيوالى
القاه تملى فى جنبى وقلبى ميت صاحب..



إياك تقاوح ياقلبى حين تهب الريح
للعشق حدوته وانت م الحكاوى جريح
كابرته حتى كبرت وشابته الأحزان
اتعودت خطوتك تهرب من الفرحة
وكان الحبايب تجاوب ع المحبة نذاك
على دروب الهوى ويفنوا مواويلك
قمرک يكحل عيونهم عشهم ليك
وطيف خيالك يصاحب كل نور شباك
كافة سطوح البلد كانت شطوط نيلك
تتصت لهمسك وتتونس بحسن خطاك
وتقيد فى ليل غريتك للفجر قنديلك

وفوق غيطان القمر تفرد لك الطرحة
كتر البكا عودك ع النوح هموم جارحه
رحل جنون الصبا بأشواقه للنسيان
صبحت جميع الأمانى فى الغرام أحزان
وفرحة الابتسامة ع الشفاء تباريح..



احفظ الأرض إلى شريت دم أبوك
م اللى ربيوا على كتافك ويخونوك
شم فى ترابها عذابك..
دم جرحك من مصابها
لما طاطيت للى قصودوا يدفتوك..
احتمى م الخوف بناسك..
سن فاسك فى عذابها
الخلاص فى العشق زهرة نار وشوك..



ياحضره البطل اللى مات قلبه
إفتح بطون الحوامل . اسجن الشهداء
يخجل من ايه اللى سيفه فى ضهور شعبه
وأمام عيون الأرامل صافح الأعداء
النيل تناسى ويرر فى خجل ذنبه
هرم الخلود اتبنى من جمجم الضعفاء..



طفولتى كانت ذكريات ونسيتها
وشبابى لمحّة هوى فتحت ما لقيتها
والشيب حروف بهتانين وكأنى ما قريتها
ويكره عاتى جهول والشوف ما هوش جاييه
جهلى طعننى وفقرى قهرنى فى معاييه
واللى امتلك قلبى. غيرى بيمتلك قلبه
إيه باقى حلم لكهولتى يخف عتمتها.



تاجرنا سمسرنا يابن الخاينة وسرقنا
بيعنا أعز الحبايب لأعدى اعداءنا..
كدبنا على بعض حتى الكدبة . صدقنا
وراهنا فى البورصة ع السكسوكة والدقنة
ريك بلانا وووسع يا مـا أرزاقنا
على نواصى الشحاتة الكبرى فرقنا
صبحنا فرجة لعباد الله تهزأنا
ويفضل همة سعادتك فى بنوك الناس
سمحنا بحماس لكل الخلق تسرقنا..



كما حد سيف الحقيقة كلمتك تقطع
تقلع يامصرى جذور الظلم . لو تزرع
بذرة تفرع عدالة وخير وحرية
تجمّع الشمل صحبة ووحدة وطنية
وديمقراطية تخلق الجبارين تخشع



الـقـرد دق الكعب واتغنـدر
البـهلوان رص الخـلايق رص
ولـمـا مـات الجـحش مـتـعـنـتر
فرض شريعة الجهالة بالحوافر رفض
يـا مـن عـلـيـك الحـزـن مـتـقـدر
الصبر علة وعلاته شعور بالنقص
لبس المغنى المرائى بدلة العسكر
فاختارت العسكر تياب الرقص.!



من صفر سنى وقلبى طيبه وسماحة
قاطع فى حر الصحارى قبلتى الواحة
أحب لحظة لقـا الإنسان مع الإنسان
تفجر المية وسط القفر والصوان
وتغلى طعم المـرار فى الدومة تفاحة..
ليه صرت وسط الزحام وف صرة الساحة
وحدانى.. يامصر لا صعبة ولا راحة
سامع أغانى الخديعة البهجة ألوان
ثقافة بورصة وفلح وفن وسياحة
وعنيكى متكحلة تهرب من الأحزان
بيات فؤادى عليكى م القلق مـليان..
ضحك الجبان فى ودانى آهة دباحة.!



أموت يا بلدى وتبقى ساحة الانصاف
باحلم ما ييقاش جبان ولا باكى ولا خواف
واعيش حياتى اللى جاية موجة فى نيلك
أو كلمة حرة بسيطة فى مواويلك
ياورقة خضرا على ترعة فى عود صفصاف..



على فداً اسمي

حكاوى وغناوى عن الشطار والحواديت
والوز الاشتراكى اللى آخر زمرة طيط
من كتاب الشعر الثانى

الموعودين

اللى انضرب بالشعر من جنونته .. ما يشفأش
لعتبة القبر متغرب وإذا تهرب فما بيسلاش
حتى ولو فى بحور الشعر راح ماله وعياله . بلاش

الشعر للمبتلين العاشقين . الوطن
والعاشقين للشعر أهل وسكن
ويحق من صدقه . فن وهَم . جمعنا
الأمر يا أهل الهوى والفن ما بيغلاش..
لو حط ع الدنيا ليل وزمان مالوش معنى
جعل قلوب البشر مكوّنة باللعنه
بين زحمة السوق وهَم اللقمة مش معنا
فاحنا معاهها وبها يحلو إبداعنا
خوفها يفزعنا أحزانها تجمعنا
لأننا المضروبين بالشعر أجمعنا
مهما الغباء الجهالة غل لوعنا
عن دهشة الفرحه بالإنسان
إذا لاوطان تسمعنا ما نستغناش



شاطر الحواديت

مكتوب عليك يا شاطر الحواديت..... تعيش غريب فوق السكك رجال
حرمت عليك الراحة ضل البيت م الغيه ترجع.. بيتدى الترحال
مكتوب ح تعطش فى الهوى وتجوع ولا أحد ح يحس أوجاعك
تبشر التايهين بشط رجوع وانت رياح الشك فى شرايك
عصفور على شجر الوطن قلقان مجبور على العاتى من العاتى
فى القلب جمرة خمرة الفنان مسفوحه رهْن الأمس للآتى
قلبك بنار العشق متوهج ملسوعاك كراييج تباريحه
عايش فى آخر الصبر متلوهج تعب الهوى زوَاد مجاريحه
مذنب برىء يا وعدك المستحيل مجنون وليلى قلبها لغيرك
سقيتها شهد العمر نيل ورا نيل عقدت حبال الغدر لمصيرك
تشوف خطوط الحل متوازيه باع عنتره أحلامه فى فارس
سيف اليزل ساوم على الجازيه ... وحسن على بنوك الدينار حارس
فلو الجتت غفرت لقاتلها كانت عيونك كشفت الدخان
العركة لسه يادوب فى أولها وشريت كأس النصر فى الأحزان
غنيت لمصرف قصر ما هولك حين تهت بين الحلم والأوهام
رضيت يكون فعلك خصيم قولك..... رجعت للخلف أنكرت الفرح قدام

لا حد شلرى دارى بغيليك ولا حد مستظر خطاك فى البيت
ما فى غير سكات القبر أولى بك ... إفسح لغيرك.. تكمل الحواديت!



كا الطير بترقص

ومازلت بخير قادر تكتب وتغنى وكإنك طير
ولف على عشه وكان تايه فى بحور الغير..

مازلت بخير قلبك إنسان
فرحان وف نبضه بيخضر شجر الأحزان..
هيمن بين درب التبانة وطينة أسوان
ريانه جدوره بدموعك حين نشف البير
ومازلت بخير قادر تكتب وتغنى وكإنك طير..
ناسى الحدايه وبيزقزق وسط العصافير..

ومازلت بخير طالع م الطين
سكرو الصبيان الآلاتيه على قبر لينين
برميل الفودكا صبح كعبةً بترول الدين
رقصوا النسوان عواجيز ديسكو فى ميدان بوشكين
وطلايع الفجر الثوريه لبست طراطير
ومازلت بخير قادر تكتب وتغنى وكإنك طير
مدبوح بيرهرف من يأسه لناكر ونكير

ومازلت بخير.. ولا شجرة توت..

وصلّت زمايلك لقبورهم ورجعت تموت
متأكد أن اليوم أزمة بكره وح تقوت..
والفاجر بالسيف والجزمه وبغصن التوت
خلانا بالخوف انجزنا وخبزنا فطير
ومازلت بخير قادر تكتب وتغنى وكإنك طير
فرحان بالشمس لكن قلبه مليان مسامير

ومازلت بخير.. لك شوقه يا حاج
فى عالم مقسوم بيقسّم.. العالم وجّ
فى نار الخدعة البردانه.. رنخ و اعرج
ملح فى جروحي ولا اتألم أو حتى أحتج
وكأنى لهزيمتى مؤيد ميلاد ومصير..
ومازلت بخير قادر تكتب وتغنى وكإنك طير
لقّوه عشاقه بسلاسل من حبل حرير
ومازلت بخير.. هلّوله وجاه

القاضى سكر بفلوس فالصو.. والشيخ أفتاه..
القرد غزاله ف عين أمه وعيون مولاه..
اتحكم عمّه وياع دمه المهدور بهواه
واحنا اللى حلمنا فى جنازته بالجثه تطير

ومازلت بخير قادر تكتب وتغنى وكأنك طير
تايه بين حانا وبين مانا والشَّيب مقادير
ومازلت بخير..

شاطر لو قادر بقصايدده يحل الفوازير
كان نفسه يكحلها .. عماها بيّعها قدامها وراها
أفسدها عشمه وأفساها ..

رقصها بالأجره فى مسرح وزاحمها على نص المطرح ..
خادعها بجلابية ولاسه .. وبلفها بأشعار وسياسه ..
دبحها وقال لنا أحياها ..
اقتنعا لو خير فى سلامة فسلامة بخير
ومازلت بخير قادر تكتب وتغنى وكأنك طير
نتفولك ريشك وقالوا لك .. على كيفك طير..!



اشتراكى بدل السفر

سلام يا صاحبى يا أربع عينين لاتنين شمال والّا ك يمينا؟
باتنين بتغمز للطماعين فى مصر تخرج من المقابر
تسمع مغنى .. تفرح بشاعر يفك حبسة يأس السنين
كان ليّه أسطى بتلات بزاز إثنين أونطه .. واتنين عجاز
طول عمره متربى فى الجهاز يسارى نفسه فى رضا الحجاز

يكفى يا عم اللي شفته منك..... يا ما خدت منى ما حُشت عنك
إبعد كإنك.. وافرض كإنى..... حجر فى ايدى.. بيتك قزاز..
أنا كان عيوني الشمال شمال..... وكان دراعى اليمين.. يمين
باحلم بنجدة عبد المعين..... أتاريه مخضرم ما بين وبين
أخذ بإيدى وطلع بى سلم..... وأنا كنت ناوى انزل أسلم
عطانى بمبه.. ولد معلم..... سرق رغيفى اللي كان عجين..

قال مين ما خدشى فى يوم ما عاز..... خرم قلوبنا سيف لانتهاز
وآديك قريت لك كتابين لذاذ..... عن بابلو لوركا والشيخ معاذ
وتهدت ما فهمتش المجاز..... مادريتش أمك قتلها مين؟
ما أنا أصلى عيشتك غبيط حمار..... مشموط على رفرف اليسار
منقووط . ادافع عن القرار..... بـأرد وقلبى بيوجّ نار
وجد حتى يوم الهزار..... أهتف لروسو وصدام حسين!!
آه.. يا اشتراكية الغفر..... صبح اشتراكى بدّل السفر..
سحابه سوده ومافيش مطر..... زعيمنا أصبح يادوب نفر..
سمسر بدقنه ف سوق البقر..... يجمعنا لته ساعة الخطر..
نملا بزعيقتنا حوش المقرّ..... كما الطحالب فى طمى طين..
يكون فى عونك من دى الرزيه..... الجهل جابها درف القضية
نسينا موتة شهدى عطيه..... وفرحنا بالفرجه ع الوسية
شمت تاريخنا حاضر فينا..... شرّخ صريخنا وسط المدينة..

يادوب دى سهره على وفق نيئه..... أناشيد وزينه
وسندويشات عسل طحينه..... واقعد يا رفعت على عرش مينا..
جت الحزينه مسكينه تفرح..... ما لقيتش مطرح.. العنه فينا..
يوم ما اكتفينا بمحمود أمين

سلفنا للأوبرا سيف عرابي

الجحشه فلتت من الزرابي..... والتهمة ضاعت شطب حسابي
لما المرابي طبع كتابي..... والأمن كوش على الطوابي..
الغن أصبح لعنة عذابي..... فيا من تجيني لجل تواسيني..
إنسى مصابي..... وف خبث اسألنى عن منابي..
شى الله خرابي..... يا محسنين !!



التين عايم التبريفرق

كلام ساكت عديم المفهوميه..... بينضح من لسان عدم الهويه
بحار الحبر أفتتها المحابر..... وسن أقلامه مغروز فى عينيه
قرت حتى اتلهيت والجهل نعمه... يا ريتى ما كان عرفت الأبجديه
دى ناس مرووشه والا مخ فاضى..... مؤامره والا متقاولين عليه
تاريخنا ما فيش الا ابن القديمه..... سلاطين الزيادى وبيت أميه
ما فيش جغرافيا غير معز الجزيره.. خريطه دمنافى بحورها ميه
ويجر الشعر بركه ونهر ماسخ..... وامسخ منه سيرتنا الذاتيه

روايات كالنميه على القهاوى قصص عشق اللبط والعرجيه
أدب بالوييه قلته كانت احسن مسارج همبكه من غير قضيه
وسيم كل سقطه لها جوايز وحاطه ف كل لقطه سخام عليه
كإنه المجتمع ده مالersh صاحب ولا فيهشى أثر م الإنسانية
ثقافة إيه بلا نيله ارحمونا يا أمى صوتى وقرئى عليّه
وقولى لللى وحلان فى غيطانها ممزع بين ايدين البورمجيّه
وللى شاكوشه بيدقدق صباعه وللى فرشته ألوان صبيه
وللى ف ورشته ليلا نهاراً تعينه طبطبة إيد الوليه
وللى لسه شايف الجامعة شمه وللى حلمه لسه ف ثوره جايّة
وللى واكلها لسه لقم شريفه وللى بالعرق طهر بهيّه
وللى غناه حزين من كتر ما به وغاسل ودنه م الغنوه الغبيه
قولى له أنك مازلتى ولسه صاحيه .. وانك رغم طول الليل ده .. حيّه
وحلمك غنوه تشفى من مرضها ترجع ليها خطوتها العفيه
فلا يهمه الملقق والمفأفأ ولا الساكت كلامه ولا الهفيه
قولى له أن بكره .. تنفضيها من العته وفيران الكوبانيه
ياخذها من كتاب النيل نصيحه ... وحكمه لاتموت وتعيش وصيّه
كذوب القلب دايم صوته عالى وعموم التبن فوق الميه غيّه ..
لكين موج القرار فيضنه مواسم يزيح عن وجهها الغبره الرديه ...!



ديمقراطية كده.. يا بلاش

قال لك خلاص بعد مشوره نلفى الكورة
إديها ما نشيت وصورة وفض الإشكال
حبة عيال أخذوا علينا شمتُم فينا
مسا وصباح خلوا نادينا حزب العمال
ده بعدهم مين راح يرضى نبقي معارضه
طول عمرنا ريسا. وأعضا والباقي عيال
طلع مظاهرات دوريه للقومية
تشهد لروحنا الرياضية أم الأبطال
ديمقراطيه كده يابلاش بيت التناش
واطى وعمره ما ح يعلاش من غير اموال
واحنا اللي طول عمرنا احرار أسياد الدار
حتى فى عهد الاستعمار فى أحسن حال
ما احناش غجر ولا ناس غوغاء .. نعمل ضوضاء
وندى فرصة للأعداء تعملنا مثال
على قد ما قدرنا حافظنا على محافظنا
يمكن وزيرنا محافظنا يقلب بقال
فيه حد هنا ضامن روحه فين ح نروحوا
دا شعب عايش بجروحه زى الموال
فارهن على الزيت أراضينا إحنا راضينا

آدى السلام رجّع سينا ويطلنا قتال
لكن بقى ياخذوا الدورى لأ يا جواهرى
لو حتى نعمل جيش ثورى يشعلها نضال
ما كفاكوش الكاس تاخدوه خلانا نتوه
اتلخبطت شبرا فى دموه واتوقّف الحال
إيه اللى باقى ف دفاتركم خلف ساتركم
اهى عتّمت من جرايركم وكّسوها عيال
بدال ما يلعبوا كوره شراب ويذاكروا حساب
بزلط وطوب دشوا الابواب كسروا الاقفال..
وبعد ما عقدنا مفاوضة وبقينا أعضاء
فى البورصة نرجع للفوضى من دى الأفعال؟

● يلزم لصبرك كام زلزال

يا مصر من ضربة زلزال انكشف الحال
اتاريكى عايزه ياما قتال فى الحاره الريف
ظهر أساسك متسوس معوج قوّس
والمخ معطوب متلوّث ياما بتخاريف
وإذا كل شعب ف مزناقّه تبان أخلاقه
فاللى الحرام طال ارزاقه محتاج تنضيف
ورّم الفساد سارخ شارخ كنه بطارخ

دود الفسيخ يا ضمير خليخ تعمله بولوبيف؟
إبنك وإحنا صرفنا عليه ورسمناه بيه
قدر يبيع شرفك بجنيه ويقول مصاريف
بيه محترم قلنا له باشا لله حاشا
أتابيه فى نقر الحشاشه يبيع الكيف
وأفتدى من صغره مسؤول راكب على طول
الشاي ينصصه قشرة فول ضرية حريف
أبو ذمه ناقصة فى مزايده يعلى الفايدة
ومهرجان حلمى وعايده باعه لمعاريف
والحاج له قلب يصلى عمدان مللى
تصبح قبور ما بتخلّى نصاب وشريف
واللى بلا مله ومقام باسم الإسلام
لهف كسر لُقَم الأيتام قال إيه توظيف
هذا خلط مونه بكسبه وده خد نسبه
وده لهف نص الحسبه ويند التكاليف
وده كل خطوه بمكافأة ويقول زقه
وان ما صرفش يقول لأه وكأنه عفيف
وده باع لنا السمك الجايف كفته قطايف
ومن حساب رينا خايف قال ذنبه خفيف
أما اللى تاب دخل المجلس بعد ما فلس

كرشه انتفخ جيبه انكيس بقى خُرج مخيف
 آه لما بنشوف جلساتهم واجتماعاتهم
 قلبت دماغنا هتافاتهم نصبح مهافيف
 الجهل باينه.. طبيعه والا شريعه
 حطوا الثقافه على البيعه فى نص رغيه
 اذ نصهم شايلى نصه خوف ليقصّه
 يرمو لنا زعزوع قنمصّه راضيين الليف
 طبيخ وريحته بقت فايحه ديدان قارحه
 سارحه ومش عايزه مقاوحه ... وربيها خريف
 وجّع القلوب لفّ وجالى يقلب حالى
 ماعدتش نافعه وانا مالى يا أبو العريف
 هموم على قلبى مراوح تعمل ناصح
 ح تلبسك تهمة يافالح شعر وتأليف
 قال لك فلوسنا بننهبها إحنا اصحابها
 فسيب كلابها .. لديابها أو للحلايف
 واللى ضربها بالزلزال عالم بالحال
 فى ايده تبديل الاحوال من شتا للصيف
 مساح وحيد وميتين خراى يلاحقها ازاي
 اللى يروح يفتح للجاي بقى فيلم سخيف
 الشاشه كلها حراميه حرفه وغيه

ولا أمل فى داوريه تظهر يا شريف
فاسند بضهرك على حيطك إلزم بيتك
ويا تقبل العقده ف خيطك ياتسن السيف!



إرعى الدقون وابرم لاشناب

قوى البسى الطرحه السوده وردى الأبواب
واتبشنى بحجاب موده ودقون واشناب
ياللى قتلتى فرج فوده ريق العناب
حالفين عليكى لتتشنى بشريعة الغاب
ياخروك فلا تترقى فى زمن قلاب
ويضيع فى ليل جهلك حقى بين ضفر وناب
طبع الخوانه مش طبعك ولس الأغراب
جرى لك إيه غير طابعك الغل خراب
انتى اللى كان دقة طبعك لمة أصحاب
يا مصر قوى اصحى وفوقى وارجمى للحق
خوفى عليك شل عروقى والقلب انشق
سموا الرغيف اوعى تدوقى قولى لهم لأ
إنتى اللى قلتى إله واحد لجميع الناس
فنون ودين وتاريخ شاهد والعلم أساس

قومي انفضى الجهل الجاحد أسّ الوسواس
 على طول تاريخك موعوده كفاياكى عذاب
 زحى غيام أيام سوده وليالى خراب
 انتى على النيل محسوده وكأنه حساب
 تاريخ طويل كنتى عروسه بابك مفتوح
 لى يراعيكى يامحروسه يارّد الروح
 أما اللى قلبه فيه سوسه ح يموت مفضوح..
 ياللا أقلعى الطرحه ونادى عشاق جاهزين
 أنا مصر والكل اولادى يا مصريين
 حين تشدوا بلادى بلادى يقسمكم مين؟!



عشق العيون المصرية

محلا العيون المصرية بسّمتْ هّيه
 كحيله والا عسليه الهوى الوان
 منصورى أنا ودقهاوى مجنون غاوى
 يا أم طرحه محلاوى رمشك فتان
 فتنتى يا اسكندرانىة بُرّقع غيّه
 تَقَلّتْ ياسى المرسى عليه بُعت الدكان
 الأسوانىة أسرتنى حين غوُتنى
 سمرا بقمره سحرتنى فوق الخزان
 ياسيوطية عارف حدى مين هنا قدى

لخبطتى ليه جَزرى ف مدّى خُفّت النقصان
عديت مَراته يامفندر ريقك سكر
المر أثاره متقدر حظ الغلبان
رسينا على شط الجيزه الحلوه عزيزة
هجرتنى تحت الجميزه ناح السسبان
مصر القديمة أم الأوية حطّت بويه
ياما حذرت أمى ابويا كيد النسوان
وانا عمر قلبى طير طاير يا أمّ ضفاير
روّحى وانا لستّه مهاجر والبیت بستان
يا محنى ديل العصفوره هوا ... دهوره
طوحنى ریح طَبَع وصورة ونقشة فستان
الدمياطية خطفتنى عين وصابتنى
من صفر سنى سرقتنى والعشق جنان
للعشق ناس جَد ودوغرى ملكت أمرى
الشرقاويه خدت عمرى وانا الكسبان
وبنت بلطيم لجروحي رهنّت روحى
وكان أمل لَوْح تبوحى اصبر عثمان
محلاكى طرحه وجلابيه يا شلابيه
يا معبودانى الحنيه إرمى الأحزان..
ع الحزن دوسى افرحى تانى مهما أعانى
بادوس على الشوك حلوانى وافضل إنسان..

على قد إسمى..!

يا مصر أنا عشت أتمنى حضنك جنّه
وهواكى ياتمر الحنّه طيب وعليل
أنا اللي م الصحرا نشيتك علّيت بيتك
وع التاريخ أنا خليتك للعز دليل
بدراعى شقيت مراويكى دمي راويكى
وعرقى لما طَمَر فيكى جرى مية نيل
مرّغت خدى ف أعتابك شلت عذابك
المركلته ف عتابك كان دمي يسيل
حلمت وياكى بيكره حلم الشعرا
فضلتى خصيان الأمرا ف زار المساطيل
رمونى غدر ف زنزانك ولاخوانك
وانا اللي عاقل بجنانك شعر ومواويل
طول عمرى زنهارة على شطك ... حافظ خطك
يحط بيّه اللي يحطك أنا أشيلك شيل
رايدك ومش طمعان فيكى فاملى إيديكى
قليلى بيزيد... بيكى وان ظل قليل
إياك تظنيني طمعان فى جاه كان
دانا اللي علّمنى الحرمان سهلة الخيل
باقدر على ضعفى المة واكسر سمّه

واللى رضع من بز أمه حَ يَتَّه أصيل
 اسمى سمير عبد الباقي أَلْفِي وَيَأْنِي
 طرح الوطن على أوراقى فلفل ونخيل
 شاعر وكاتب وسياسى سر حماسى
 إنى ما خنتش عيش ناسى فى ميت سلسيل
 شَعَرْتُ فَقَصَصْتُ رَسْمْتُ وتَبَسَّمْتُ
 مع إننى ف قلبى حَمَلْتُ أحزان الجيل
 وهبت فنى لعراقى وعَبَّد الباقي
 طمِعَ الفجر فى اشلائى دَبَّان الخيل
 رجعت لقلوب الأطفال شاطر خيال
 عشت ف عقولهم حلم خيال حكايات مواويل
 بدَّعْتُ فى الشعر العامى على شوق أُمى
 عُمْتُ وسقيت خالى وعمى كان قلبى سبيل
 عملت أراجوز فى المسرح أفضح وأجرح
 بضحكى وشومتى أدبج خاين ودخيل
 حلمت للفقراً بجنه قمع وحنه
 رَقَصَ لها شعرى وغنى مشدود الحيل
 كافّة سجون مصر آوتنى كان بيغيتنى
 شعب بتاريخه مكَلَّفَتْنِي ولا عنه أميل
 أكم غلطت وكان عُذْرِي إن انا قَدَرِي

ريفى وقع فى شبك حضرى على حبل غسيل
 حين سيبت غيرى يفكر لى عقلى شخرلى
 قال إوعى من عيش ترالالى أو رأى ذليل
 قال لى وكون بالفن إله دالفن حياة
 هوه لوحدة العز الجاه ومالهش بديل
 إياك من الفن الكوبرى نطه وتجبرى
 خليك على طبعك دوغرى إوعى التساهيل
 إياك من الفن البايث صايص فايث
 ولاترضى بالقول الفالت يرضى الدلايل
 حذارى من لبط الساسه لؤم كياسه
 من همبكه بويه حماسه كذب وتضليل
 حسك ما تمشيش فى الرايجه .. هاديه وهايجه
 دى موضه زيطة ألافرنجه .. ما ح تشفى غليل
 وعيش تمللى عيشة أهلك دوس على مهلك
 وخاف فى صعبك من سهلك يابو حمل تقيل
 بعزة النفس استغنى تصبح أغنى
 الشعر مش رقص ومغنى هنك وتهليل
 عوم بس فى بحر بلادك كون فى ميعادك
 جاهز عشان تحمى أولادك تشعل قنديل
 وهكذا رضيت عن نفسى حافظ درسى

ما خَجَلش يومى من أمسى ولا كنت ذليل
شريت روح حسن بن فؤاد وفؤاد حداد
الفن وعَدَى جنان معتاد حراق وجميل
مع الصغار أراجوز جوزى طفل عجوزى
لكن على الكداب بوزى زلومة فيل
لأنى إبن أم الدنيا مش ألومونيا
فلاحه طراحه وبانيه وابويا النيل
عشت غيطها وحواديتها وأهل حاراتها
أنا اللى باسنانى حارتها من ألفين جيل
ونفسى أورث أولادى روح أجدادى
يشعشعوا النور فى الوادى ما يحطش ليل
لذا قلبى على كفى هديه للحرية..
يا مصر لو تطلبى ديه أنا دى دليل
ويا أهلها لو تعوزونى لا تأخذونى
دوغرى أنا مش حلزونى ولسانى طويل
حقك وحقى اتحملنى لا تجاملنى
أن اتعوجت أنت إعدلى لو كنت أميل
عن فن للشقيان ضلّه قلّه وقُلّه
وشومه علّه وفرّقه على كل عويل..



الشغل فى الأزرق

صحصح ضمير القبيله يا شاعر المساكين يا وتر ربابه الأمل فى الأزمة والمزلق
وهبتها العمر ما سألتش حقوقك فين..... طمعت ديابها وخريها غرابها واترستق
أصبح رقيق الغنا.. بيعكر الرايقين..... واللى رماه الهوى.. فى نفسه متخندق
فا جلدھا بالحق بتجامل بصمتك مين؟..... ياما طال سكاكتا وصوت العاشقين أصدق
إحنا اللى ما خونا هونا يا ماع الخائنين واللى رضى بذلته.. باع علته اتشبرق
آه من لهيب قهرتى فين مهرتى يا حسين..... لجامها عاقد حزام بالهم متحزق
إحنا اللى كنا على رغيـف الرضا حالـفين..... غُربه وكربه ولوح نكل.. ما نزهق
تعبنا ياما ودارينا همونا م اليائسين..... حلمنا بالوهم سيف الحق ح يشقشق
أتاريه بلا ملح عيشنا ماخمرش عجـين..... م الجهل صيرنا قبائل عقلها مغلق
مزعنا توب بعض واتوزعنا ع البتارين..... وكان ضميرنا فى قطره من خجل يفرق
كل اللى كذبوا علينا كذبوا بإسم لينين..... وكل من حكموا ـ عكموا جملة ومفرق
باعونا فى كل بورصه واحتموا بالدين..... اللى سبق رتبوا السارق لما يسرق
الكذب اكتع ويعطى.. الكدابين رجلين..... يسرسب العمر غدر الشغل فى الأزرق
وسكت ترضى غشَم حين جرّحوك قاصدين.... وتبكى ع اللى نسوك والتمر بيتفرق
إصحى يا شاعر وفوق اتوحدت برلين..... واحنا دول أو ملل بالوحده نتخوزق
حطونا ع البند لكن والبنوك قافلين..... وكلبشونا ف ديول العصر نتحمرق
إذ عشمونا أن بكره ح تحلا بالسلاطين..... حين نمشى ع الحبل لانغرب ولانشرق
نختار بدال دقن ماركس أحلى دقن خومين... على عرش أجرودى لا يبرئى ولا يخلق
يعصرنا عصر اللـمونه والبصل والتين..... ويمزوا بينا.. فلا نلـسع ولانحرق
سابق عليك الغلابه يا شاعر المساكين..... إرجع ليوم ما رماك الشعر ع المقرق
فانشق بالعشق قلبك بين يسار ويمين..... كما طفل مولود طرى العود بيتخلق

قاومت ضعفك وصنت القلب قبل العين..... ما كنتش اعمى فى ضى الشمس بتبعلق
 لزق بقوة زمان يا شاعر المجانين..... إحذر خداع الصور والكلمه فتصدق
 إن الحدادى ح ترمى رغيها للجعانين..... أو أن جمره غباوة الأهل ما تحرق
 اللى وكسنا ونكسنا أخ من إثنين..... كذاب أخوك اللى هابش خيرها ومحلّق
 وأخوك كذاب اللى متعلّق على حبلين..... جهلٌ وجوع بهم عرقويه متشعلق
 والحامض العقل عايب يلزمه قلمين..... وشوم يدشدش دماغه دَش لو شلّق..!



تلغرافات تعازى لمصر

(يوم موت جمال حمدان)

- عاقر يا حضن الأمير.. بس انتى.. خلّفتى ... ربيتى يا أمأى كثير.. وقسيتى هملىتى
- بكره ح بيكوا عليك.. بدل الدموع الدم..... يشموا بستان إيديك.. ما يقطفوا غير.. هم
- الشمس كاسره الستاير.. خجلانه ع العتبات . مين صمته هز المنابر. مات فى برارى السكات
- دق الحبيب ع الباب.. تارى العجز قوه العاشقين أغراب.. والفاصبين.. جوه
- نيلك ترع فى القلب.. صحاريك رمال الروح.. أسهل دروبك صعب.. أصل الطبيب مجروح
- الليل غبى وجهول.. ح تقول ومين يسمع يوم ما يحق القول.. ما حد فيك يشفع
- سقم العذاب والآ ناره.. حيشفى غل التراب.. طولتى يا أمه انتظاره.. غسل مرار الغياب
- حب الوطن عقرب.. تحت الضلوع لابد حرص إذا تقرب.. ياتموت يا ح تكابد
- رهن آمون لبيدته.. باع الملك تاجهواللى خبز لقمته.. عاش عمره محتاجه
- علك تكون أرتحت.. وعشت آخر أمل... أنا قد خوفا اندبحت.. عبره أنت والامثل؟

- هوج الليالى الجهوله.. سيف اللثيم جاحد .. بعث نيرانه الفوله .. وكأنه كان قاصد
- طويل ياعمّر الوطن.. من عمر آخر شهيد ... أليم ياغدر الزمن.. قديم يا حزن جديد
- بسيط كما المعجزه.. عشقك كما زهره ... يا مصر يا مَلْغَزه.. ليه قِرْفَتك مرّه
- براد قديم للشّاي.. ومرتبّه سفرى اتاريه تاريخ نساى.. ومدى نغيل حجرى
- عفواً أنا ما بعدتش لكن البلاد أجهدتى... تعبت.. آه.. ما كرهتش فكرتها انكرتى..
- هذا البراح الاتّسع.. ضميمته فى حضنى ... ياحمل م الأوجاع.. كَفْنى فى حزنى..



طرابيش تناطح عمم

ليه بتلومونى عشان شبشبّت فوق راسكم لوموا اللى افتى وكمم بالفتوى انفاسكم
اللى ختم عقلكم بالجهل يا مساكين .. على حد سكين شحنكو (يقين) واخرسكم
كذبوا عليكم وقالوا دى مصالحكم وكان كَتَم الألم بالذل صالحكم
ودسوا غدر ف دماغكو رجول كراسيهم وساوموا أردى كلاب الأرض بجروحكم

يوم يطلعوا القمه قيمه تقل قيمتكم طرابيش تناطح عم بتشل همتمكم
أمتكو صارت أمم عدد الرمال أمرا وشعرا قد النمال بتهد قوتكم
صار كل من كان يدوسكم دوسة المحمل ياللى انتو كانت بلادنا بحسكم أجمل
الخيبه صبحت لبانه الكل يمضغها وكان فى ايدكم تدلوا الدنيا ع الأعدل

ليه اتوكستم فى عصر العلم والذره وباع شرفكو اللى باعكو للبنوك بره
بعد المواطنة ارتضيتوا ترجعوا قطعان معيز وخرفان تبادلوا الحارّه بالمرة
برأسماله هبله الشرع يحرسها (ليزيه وباسيه) فوارسها وجواسيسها
السوق مالوش فن لا مزيكه لا مسرح ويا إما تلحق تدوس بنتك يا تحبسها

يا خلق آن الأوان عن جهلكوا تتوبوا ... سايبين تاريخكم بيدفن عجزه في ذنوبه
والجهل دابح في قلب اولادكو أحلامها لما ارتضيتوا الغريب يدهسكو بكعوبه
لكتى مش ح انكسر ابدأ.. بكسرتكم ولا ح ارضى أبقي شهيد واموت بحسرتكم
مازال في ايدى لبيكره فاسى وشاكوشى ... وقلم كما "سيف ح يفضح سر خيبتكم

راجع ورافع جببنى عمرى ما ح اطاطى أنا مش مفيه ولا أنا حيطكم الواطى
ياللى سرقتم حياتى وذكرى أمواتى وراكو حتى تغوروا انتم واحباطى
نا ياطى والريح صحيح رسمائى فى درعى عديس به شبر نعصور فلاح صبرر واعى
ما جعت لا فى زناكو الكذب يكدب نوضر حبكم زيدتم فى أربابى

واللى رفاضى وحمائى أملى وأيمانى وحلم عيوسا بغدر راح اعيشه من تانى
عالميه فصحنى صليب وهلال أحرره رضى فقير ربنا اكنه إنسانى
يمك زمام نفسه لا تابع ولا مهزوم حاكم بآمنه حقوق العدل مش مأزوم
نعيشه سواسيه ألوان كنا أو أديان لا اظلم اخويا ولا أرضى أبآت مظلوم

دا الأصل إحنا وانفاس الغيطان ريحنا والقطن والقمح والكتاب روايحنا
عرّفنا سر الحياة ودموعنا فيض النيل وطمئيه لما احتيا شكل ملامحنا
فقومى يا أرض فزى اشرحى له الدين انتى اللى ابدعتى للروح والحساب ملكين
فى الأرض جنّه وكنانة الرب حارسها يا رحمة فى الآخرة لولادك الصابرين

مش باقى إلا هزيع على شمسك الطالعة أدى زهرة الجمر فى الطين القديم والعة
نهر الحقيقة ف ميعاده يفيض ويزلزل ..عرش اللى عاش يحتمى بالجهل والقلعة
والعفو يا جرح أنا فرحى مالوش مواعيد.....عجزت ايوه ومت وعُدت تانى وليد
دى معجزة نيلنا سيدكافة الصحراءبالخضرة قدره بتحيينا لعمر جديد..



الفاعل.. مجهول..!

ولأن القاضى المشـفـول بالأزمة.. يبرى عجل..
على عينه الشاعر بقى تاجر فالفاعل اصبح مجهول
والقاضى صار المسئول..

عن عبره تاريخ الحكمة ورا خبرة تدميس الفول
ومادام العاقل معتوه فالقاتل دائماً معقول
المقلوب وحده المعدول والعاشق أهله غلبوه
دقوا عرقوبه ف مركوبه حسبوا له ذنوبه وساقوه
فى موكب للحزن الوطنى

فى عيد الثورة المهزومة على شجرة مريم شنقوه
باعوه فى مزاد الحرية للى بكرىاجهم سلخوه..
لندن بتصيف فى طموه ويارىس بتشتى فى مشتول..
وواشنطن نازله البقلية بتفرق ع الشهدا جاتوه..
وسمعه ف قبره يحاسبوه فاستجد باسم اللى خانوه
واستشهد باللى عصروه يا لمونة لامونا وشقوه..
اتفرق فى موسكو كادوه ماطالشى بواقى اللى خدوه..
ولا داق العز اللى شافوه..

مين عرف السر اللى خفوه يوم تهموا الميت فى أبوه
دوارة يا دنيا لخمتنا نداهه الأسلاف ندهتنا
لمستنا الفتة فخيلتنا وفانتنا بعد ما خيلتنا

لزم من حسرته مخبول عريفة وشريفة جهول
عشمان فى الباب المقبول فى غول من دمنا سكروه
خدعوك فقالوا .. مجهول ذبحوك وقالوا .. هزموه..!



آخر الزمر.. طيط

يا مصر فَرَدْنَا جناحاتنا على قد ما طالت دراعاتنا
وحارتنا .. رَدَّتْ غنوتنا كان عيش بلا ملح فجاملتنا ..
سمعتنا على زوق سُمعتنا أثارها ما فهمت قصتنا
صابحة بتحكى مُش حواديتنا ليلب تنطق مُش كلمتنا
احتارت ولا جت سألنا اختارت .. ليه مش سكتنا
لما سألناها ما جاوبتنا ولا حسست لمسة رعشتنا ..
فيه شئ فاتها وكثير فاتنا على قد الفلة ما سرقنا
اتبج على المفرق صوتنا صوتنا سكتنا ما فهمنا
راهنت من غلبها على موتنا
يا ترى كان شلت عافيتنا وإلا كان شئ من عفنا
عصافير أحلامنا .. ما رفعتنا فيه شئ فاتنا ..
على بال ما المال اتلفتنا فى حظ حظيط خوف حطتنا ..
على شط شطيط احنا شططنا من جهلنا أهلنا لخبطنا
على الواطى غطسنا وغوطنا العالى شَخَطْنَا فزعطنا
حزناً على الخيبة زيطنا فرحاً للعبية - زقططنا
مزعنا الحبل اللى ربطنا على كيف ما أمرنا ظباطنا

زبطنا كثير ما اتظبطنا لخبطنا رخصنا .. وفرطنا ..
صفرنا لغيرنا .. اتحيطنا كرهنا العفة وفرطنا ..
من قعر القفة اتفرطنا والرزق يحب الخفية
سوق بحر ومحتاج رزقية وقفلت دكاكين لاشتراكية ..
فاختار سيوبة محلية يا تلف بطاسة طعمية ..
يا تشوف لك صفحة أدبية والتايهة تجيب المخفية ..
إمشى على الخيط .. يا ابو النطيط .. إسند ع الحيطه الشعبية ..
شرقية صبحت غربية فالأحسن تبقى دقهلية ..
حسب النية ..

الزمر ييبتى من طيط والرقص الحنجلة تبطيط
انحلت عقد التريط
من بعد ما كنا زبطنا كل اللى ما يقبل تزريط ..
راح تكتب إيه ؟ ..

لساك كداب يا سعادة البيه لساك شكلك قيمة وسيمة
وقصايدك ناعمين قطايط فى دنيا غدارة لئيمة ..
صحصح يا حويط العيب غويط ..
لا تاريخ نافع ولا علم ح يشفع لك يا عبيط
الشعر ده غية وغواية من أيام ليلى أم غبيط
والشعرا هوالك مساخيط ..

خليك سوستة يا عراق يا كويت بريمة فى حقول الزيت ..
ورق ابيض واجهز فى البيت ما عادتشى حتفتعنا يا ريت ..
تستسلم من غير ما تسلم أو تتطق من غير تتكلم .

وتخطى من غير ما تعلم وتبلم كل ما تتعلم..
حكمة أسيادنا المساخيط احسبها ساعة التريبط
يا زعيط يا معيط..
ده هادى غضبان متألم وده هادى ساكت متكلم..
لاثنين عايزينك متمدين مهزوم بمزاجك متبسم..
مأزوم لكنك متفهم لو سمح الظرف تتط الحيط..
وإن حبكت يوم ما تتأزم على واحدة ونص.. وتتحزم..
ودماغك طيلة طرمبيط..!



وصايا حكيم النضوج السياسى

إذا حوشت عنى.. أعينك عليهم ومن غير مؤاخذه راح اكسر
عينيهم وح احفظ جميلك على أم راسى ولو كان مقاسك ما
هواش مقاسى ح اطول معاك لجل اقصر ايديهم يزيديا ف
غلطهم.. نلخبط خططهم عبطهم لبطهم يخسر بايعهم فيشرب
شاريهم حليب المأسى.. ويهرب قاريهم..! وتبدأ طريق النضوج
السياسى..!

....

إذا ما تطاو عنى أبسك عليهم ... فنون السياسة ماهيش بحر طامى
لكين غدر موجهها يحب المبادرة .. وعائز كياسه.. ما هوش شعر عامى
خفيف قلبه يفرح قوى بالمصادرة
لذا لما تنوى تصنفر نافوخك تمحّر شروخك بجبسين وبودرة
فتترك لجامك لمالك زمامك إمامك يحدد مراتب مقامك..

نفر وإلا طابية.. حصان وإلا فودره.. منشة فى إيد الزعيم وإلا
أوكره.. منافض لزوم اجتماع الدكاترة، شبك استراحة. رسوم
للمغادرة، تهوهو تتونو حسب كل فترة.. مالوش لازمة ألزم عن
الأزمة تقرا.. فتبرى لسانك لزوم المخاطرة. حبيب النهاردة
عدوك لبكرة. مادمننا كشفنا اكتشفنا المؤامرة..

أنا كنت زيك فى أيام شبابى ... عبيط الكلام..
دمايا بتغلى فى ساعة الصدام ... وباهتف وازعق فى يوم المظاهرة..
واحلف أزلزل جدور النظام..

أنا كنت زيك مراهق كبير.. أقول راى فى الججهون باحترام وقلة أدب
فى حضور الوزير قانون الشوارع وشرع الحواري وسلو اليسار
حمامة السلام فى خضم الحروب وسيف جد ساعة يسود الهزار

ولو كان حمار اللى ذل الشعوب مادام ريج مواتى أكون له الغبارألهب قلوب
الشمال بالجنوب مادمننا لفقنا الشروق بالغروب.. وزيتنا ف دقيقة.. فى
حضنه أدوب بشير للتقدم.. واغفر له كافة ما برطع ذنوب..!

أنا كنت زيك.. وأصرح إذا الليل تمسى وإذا الصبح أصبح تشوفنى ألوح
واشوح وأفضح.. وما كنت أرضى ولا كنت أفهم بأن اللى يعقل ييهدى
وينعم وهو اللى يقدر بحكم الهداية فيمسك وينسج خيوط الرواية..

تسالم ح تسلم على طول وتغنم ح تحلم بغير اللى سارى ح تتدم..

لأنه لو البادى بالظلم أظلم، مُحال أن يبقى لمظلوم بداية.. عشان
كل آية.. لها حكمه تنزل لها حد غاية.. وفى كل سن، المراحل

هواية.. ومن كان زراعته رياح الهوازع..
ح يحصد راياح... من.. هوا.. فى النهاية..
ورتبها إحسبها إعدلها إقلبها..

تلاقى القوالب على زوق طالبها وللراعى دايمًا خروفيه المفضل وحسب
الحيطان الستاير تعدل وبكرة مش أفضل إذا الحظ ضارب مادام
القانون الأساسى تبدل..

تاريخك تبهدل.. وخالك تسول..
وكونك سياسى فلا بد تقبل بما لا يضر بجلال العزومة.
وتبقى أنت لاهبل

فى سوق كل ما فيه سداح المداح. وغيطك وزيتك وبيتك مباح.. وأعلى
ما تعلق ركوبك متاح.. أصابنا انفتاح المصالح فى مقتل.. صبحنا
تخاصمنى أصالح.. فتنقل

فيا تقضها سيرة عيرة وتخجل يا تبدأ مسيرة الوقار المعدل.. على الزيرو
تخجل معزز مبجل، وتاخذ فى حضن الحكومة البراح متاح.. بالحوار
المتبّل..!

طوبه في المعطوبه

أزجال ومساخر عن الخيبة العيبة
ما بين خراب السامر وسراب الهناجر
من كتاب الشعر الثاني

ثقافة الوسط

يا واد يا أبو الوسط السايب يا لبن رايب
يحق لك فى زمان خايب قلبها بوتيک
ثقافة إيه ما لهاش لازمه إحنا ف أزمة
بقى الكتاب والا الجزمه لو عزت اهديك
أبرم مع البليه الماشيه خش الحاشيه
دغميشه سياحية وغاشيه رقص ومزازيك
باريس تبوسك على خدك فيميس قدك
بنفخه ح تزيد عن حدك وکإنك ديك
فى روما تعمل سوبرمان حظ النسوان
دايين فى دبایب الطليان الفجر الشيك
تلحس عقولهم هلاهيلك تبرم ديلك
ملا الأناجر دلاديلك فته وفريك
ما إحنا ف زمان الخباصه عيال رقاصه
شلة حناثر مهياصه هزه الهزازيك
تشریفه دقة واحدة ونص يوم ما بتقص
يا دوب نهار اللجنة تبص اسم الله عليك..

والبيت خرع ولا على بالك مين داعيه لك..
الى ابتلانا بأفعالك بكره ح ييليك..
وح تبقى بيعه برسمالها تروح بعيلها
تدفنها سرأ تدعى لها ما حدا يعزيك..).



والسنطة مع الاسطا..!

الهم ولى فأبسط يا عم حظك ضرب والفرط اتلم
البنك أصبح بيك مهتم عملك صبي ورقى الأسطى
ح يرضوا عنك.. ويكرموك فى درجة أولى يركبوك
وإياك تبرطع يلجموك أو يفردوك خيش على بسطه
طبل بقوة شمال.. يمين جم لافتتاح متأنتكين
واما الحرامى حلف اليمين قالوا لك الوضع ألسطة..
والسر عايز ميت ألف بير حسب مقامك غفير وزير
مادام مزاجك مع الحمير يصبح لها حق الواسطة
إحنا انفتحنا وحصل نجاح فى كل يوم حفلة وافتتاح
صندوق ولجنة سداح مداح والكيف كما البورى مباسطه..
وقرن تانى تصبر يا نيل يومك حيبقى بطوله ليل
تشم ترقص تقع.. قتيل ذكراك ح تحيها . الأسطا!!



عتاب على ورقة بضره

يا دكتور فين هو كتابى؟ يا ريتى طبعته على حسابى
رحت أسأل عنه فقالولى العقدة من عصر عرابى
والدنيا لها طبع تغلس ع الشاعر وتحبه مفلس
قلت ارجع لقديمى أدعيس زغدونى الحجاب فى جنبى
نفسى أشوف لى كتاب مطبوع من غير ما يدشدش لى ضلوع
أو يركنى فى المنوع على سكة تشقق لى كعابى
مش كنا ذات يوم أصحاب سواسيه من غير حجاب
جيت ازورك قال لى البواب اللجنة مش عاملة حسابى
ولقيتهم داخلين الشلة أبو قوره العورة المنفله
والعله القله وابو فلة وقليل الهمة المتصابى
ضحكوك واتراهنوا عليك قالوا مين للبحر يوديك
عطشان ترجع ولا يسقيك فيبان لك لازرق عنابى
ولا فيهم غير صاحب إنه كداب فى التوير والسنه
بيزيدك بالكذب مظهره ويقول لك حكامها صحابى
نسوك الأم الفلاحة زرعت.. ما كلت التفاحة
ولا سامعه قصيدتى الرداحه ولا عايزه من الفقر كتابى
فطبعته والا.. طبعتش أولاد الهرمه ما بيعروش
الحرف اتبدل بقروش وأنا صعب.. أبدل أصحابى..



المعبي م المستخبي

يا لى معايرنى بجميلك قوم هز عاقر نخيلك
إيه ذنبه يا عم نيلك يخيب بين الأنهار
البرتقان مات ببذره والموز معطن بجذره
وكل من كان بعذره بيقلب.. الأفكار
فكرة تجيب عمله صعبة فكرة تخيب سهلة صعبة
فكرة تعيش موته صعبة ولا موة الأشجار
وعشتوا عاملين حسابكم سارقين بواقى منابكم
الكذب شارخ جنايبكم قالب جنونكم هزار
يا مثقفين نص لبة خلفه زخانيق أوروبا
زراير فى توب الغريّة بتبـدلوا.. الأدوات
أبودقن يلبس بكينى والصينى يرطن خمينى
غدينى وانسى تلاقينى بقى دينى فرق الدولار
راعى التقدم يسلف وأبوجهل يفتى يكلف
الحيزيونه.. تألف أصول دراما الخيار
لصوص كتابة وقراءة قاسموا الفقير الجراية
دبحوه فى آخر الرواية وزغزغوه ع الفطار
صلّوح يصالح مصلح عريان يعاير مصلح
يقلب زرايبها مسرح مسرحها سوق للخضار
مكران ولاهف مغانم غريب وتايه ونايم

فاكرينا خرفان بهائم سايقينها فوق المدار
مهّرج وبهّرج وهلّل أوروبا غاوية المخلل
شرع الحداثة تحلل أوبرا الدريس للحمار
إذ كل ما تبقى شعبي ح تعبى م المستخبي
تقب تلعب يلبي وسطك ندا الفانفار
وف لفنة التنوره تتجئن البندورة
فتفتح المقصورة للبقبان - الحوار
فى منعطفكو التاريخى على قدى أرضى بطبيخى
لا ورد ريحته فسيخى ولاقرده زانها الخمار



لكل زيرن.. نوايه

إحنا الرجال المطايا على بوابات السرايا
متبردعين بالعطايا متلجمين.. للى يركب
فيّنا الحساوى اللى عادى مركوب بكيفه الإرادى
وفيّنا فاجر معادى حسب الأوامر يرطب
ومنا ضاحك.. وباكى فى الحوسه يطلب رضاكى
فى الكوسة كان اشتراكى ورسموه لما عطب
نقاد مسارح وسيما شعراء وكتاب وقيمة
أول ما تظهر غنيمه يصارع السبع ارنب
وعشان مايبرد طبيخك بيّضوا لك.. تاريخك

قرعك يعسل فسيخك ... تصبح على الحجر واقرب
 ترطن بكل الغناوى حكاكه والا رغاوى
 النقص فن اللى غاوى والرقص صنعه يا ملعب
 تستر معايب اللى فوقك تخضع مزاجه لزوقك
 تهمص أكيد راح يدوقك لو المسائل تعقرب
 ويا حبذا لو بتعرف فى البغيان المثقف
 فى حضوره تصغر يا مقطف ... تكبر فى غيبته تتخرب
 فاقلع دماغك وشمر ... مادام بتعرف تزمز
 تلقى فانوسك ينور وتبقى كرسى فى مكتب
 تزحف لفوق سنة سنة وتعضع العضمة سنة
 وف صدفه قلب يا إنه تلاقيك يا مركوب بتركب
 تلوف عليك الجحوش فارمى جنيهاك قروش
 يهدوا ولا يقمصوش حتى لو البند شطب
 هذا قانون الركائب على قد ما تشيل يا خايب
 نايبك ح ببقى نوايب طول ما انت كاتم مقطب
 لعب بديلك وبصيص اياك ضميرك يقمص
 الجحش لو مره فلفص من اللجام فين ح يهرب
 واوعى تفكر تهبل دى حسبه حنجل ومنجل
 دايره ملفلفها جلجل عنكب يوطى فيركب
 لذاك ما احناش ضحايا علتنا أصلاً هوايه

كسرنا بدرى المراه ودرسنا رعب المجرب
فياللى ما بقيتش هو براك خصيم اللى جوه
إن مات زمان المروة القرعة ح تحب لا جرب



شايب عايب

شايب وعايب وله سحنة غفير وشاويش
ضاعت ملامحه زمان فى محاكم التفتيش
وعجز على الأرصفة يطلع بدل.. فاقده..
فلبس على اللحم توب الزاهد الدرويش
ولما حاصره التاريخ - الوقت - والمسافات
وغلّو سمر قزازته.. ورغيفه..
وعجز شيبته فى حضرة الستات
وغل من كرهوه فى مدينته وف ريفه..
مع حيرته بين ذاته وأكل العيش
حين لهفته المكسوفة ع البقشيش
وخوفه يختم حياته فى الخيام والخيش
باع للزمان نص كدبه واتفن التحشيش
إذ ذكريات الطفولة الهبلة ما تكفيش
كتكوت بلا ريش رضع أحزان تخاريفه
طلع له تاج هدهدى لكن بمنقار بط

على صدر أمه لحتى فك الخط..
عملت له زار من تراث شعبي على كيفه
حب ما بين المكاتب لما صوته اخشن
ما يبطل الزن إلا أن كن فى الزنزان
فضى وعبى مياه البحر بالغريال .. صبح فتان
لحد ما حطه حظه ف قفه ليها ودان مع التحايش
فمط نفسه زرق فى زوارق الثورة هتف للجيش..
م الهيئة للقومى لطليعه القوى الحرة
وفق خلافه لكل مدارس التهويش
اتعلم الزن حتى لو مافيش أزهار
وغنى للورد فى خراباته ليل ونهار
لعب كما القرد فى الحارة وخلف الشيش
عشق التزام الزوايا وحرفة التفتيش
يراقب الأدوار ويرتب السهرة ولا يقول لأ..
يعرف الريح طريق النخل والأشجار
يخلط ربيعه بخريفه محبة للأمطار
يكتب رياضة وعمره ما نفخ كورة
ولازم القهوة مع أنه ماهوش كيف
ولا عمره فنت ورق ولا عد شيش من بيش
ولا نقل عسكرى على رقعة الشطرنج

شرب السجاير وهو بيكره الدخان
ولا يوم مزاجه اعتكر خرمان ولا اتقلق
درس تاريخ مصر لجل ما يدهش الافرنج
موهوب تمللى يخللى الضحكة تسترزق
يوصف بلاد السواق ولا راحهـاش
يحكى فى أدب العرب والسيرة ما سمعـاش
كان نفسه يزرع غيط ولو ينسون
يدق ميه ف هون.. يقول الحق..
يصيبه مس الجنون بالشعر والمسرح..
يكتب ولو فصل من ليلى أو المجنون..
يحك فرشـة رسم فى الألوان
يخط حادثه فى جريدة لو جريدة حيـط
يمد خيط من قطن غزل المحلة..
ينشر صورته فى مجلة..
ينقى غلت القمح م الغلة أو يخلل زتون
يفرق أصيل المثل عن نم تزييفه
فيفاخر الدنيا بأصول ريفه..
حين يتمسك فى مظاهره ويتحبس كام يوم
بذنب أو مظالم غشـم أو زق
عشان يطهر نفسه من عجزه وم الذلة..

اللى بتديح عزة القلّة من الحرمان..
لكنه فضل يوم سروح الغيط
ينام فى ضل الحيط . يتفلّى
وفى الكلام الغلط يفتى ويتسلى
فيضرب أمه عشان نقصت له مصروفه
وإما زمانه جرح العشاق
بين احتمال الذنب والأشواق
وانفتحت الأخلاق على الأسواق
وحط غيم الحقيقة غيم الأوراق
كان نفسه يا خذه جدار السجن م القهوة..
لكنه يومها عن الأصحاب نكر نفسه
وحزن فى سره وأخفى غله بمهارة..
يخلط الأشياء على الأسماء
يخرج من القهوة على سهوة راكب بغله
شاهر على الخلق سيفه يلعن الجهلة
ويعلن الانحناء للريح على كيفه
إذ كل فعل بظروفه .. دُرْنكه ودقهله..
وكل فاعل وله فى الصعوبة والسهولة
وكل مفعول وله فى البند مصروفه..
لكن النهارة فى الظروف اللببط

حين كل شئ اختلط واتحط ع الطاولة..
الـحـب أصبح عبط والشعر صار طيلة..
والـفـن صاروا يـحـسـبـوه بالنقط..
الصـح أصبح ما يساويش الغلط
أعز من كنت تهوى بيـحـدـفـك بالزلط..
الشـرـق غـرـب على أوـله..
والـغـرب أصبح فى التاريخ أغرب
وعشان تحب الوطن غنى له واتهرب
ما عادش شئ فى الدنيا أو فى الخلق مستغرب
نـزـف القلم ألمه فضحكنا
واتعذب القلب من ندمه تمحنا
من طول معاركنا ع الهايفة وع الهيلة..
من إيزافيتش لقهوة البستان
شفته كسير النفس لكنه ما هوش خجلان.
فارش عل الأرضفة أوراقه وأقلامه..
قارش فى كل اللجان بارك على الحلة..
هارش هموم الوطن..
قافش مسار الزمن فى وسائل الإعلام
شاعر وناقد وعاقـد ندوة ومجلة
حاقـد وقـلة.. وناقـص عزة الفنان!.



لما اليسار كلته الأزمة

اللى ح تغلب به العب به واللى يقمص بك.. لبة
نقى الكبير خش ف عبه وفهمه لو عقله تخين
يشمل شويه.. وييمن عشان مع الأزمة يأمن
خون أخوك ولا تستأمن الشك فى الأيام دى يقين
ما هو اليسار كلته الأزمة ما عدش له عندنا لازمة
طول عمرنا بلاد منهزمة مافرقش فيها يسار ويمين
هات الثقافة اللى تريح أبو مخ معطوب ومقبح
تلت تعجن وتسبح سمن ف ميلامين
واختار لها مسئول واعر يا حبذا لو كان شاعر
مزيوط على الوتر الساير فى الخصخصة بتاع التأمين
يعرف منين لما يفاصل يخللى حبلنا متواصل
يشيل معاك هم الحاصل ويلخبط العلم على الدين
وف كل أزمة يلاقى مخرج فيخترع كيف يتمهرج
فى الجد لو عزنا نبهرج حتى ونص الناس جعانين
فيقلب السكر حامض أو يفتى أن الداء عارض
وأن المريض كان متهارض دالبند فايبض يغزى العين
ديور وشملول ومدرج فى السيمة واللون والمسرح
يفتى ويخطب ويشوح فيقنع الخلق الجاهلين
مهمة صعبة ويوماتية عاوزه ابن حنت وجنيه

دى بلادنا أصلها أميه جاهله ما تقراش الجرائين
 ولازم له بقى طقم معاون يشد يرخى ويتهاون
 لكن حويط دقدق هاون يفتحها لو غفلقها حسين
 وكيل تقيل راسى وفاهم غويط مصحصح لو نايم
 خسارتها يحسبها غنايم وحريص على أصغر مليم
 يربط حبال المستعجل ويعقل اللى ح يستهبل
 يبدل بدال المستبدل بذكر الحضور يعمله بدلين
 ما يقولش مهما تعوز لأه ويجنبك هم الزنقة
 يقلب لك المكتب شقة والبدلة لو تحتاجها كليم
 ومستشار اختار هايف من القلق يبيان خايف
 لكن حداه بعض معارف لو الميزان احتاج تقبين
 يلزم كمان للرقص خبير له فى الثبات له فى التغيير
 شرانى له فى الخير مشاوير ... وفى السهر خبرة نساوين
 ومدير عموم ملعب قارح يعمل لنا الطريقة مسارح
 لو حتى جاى تلقاه رايع أكمن له فى القفا عينتين..
 لو يستلم كودى الخزنة يحل فى الحال الأزمة
 بطريقة عوجه متزنة لو شعره يطلع منها عجين
 ويقسم الخارطة مواسم للخير على الوسع عواصم
 حاسم فى ساعة نتقاسم لما العهد تقبل تكهين
 يقدر يزيط فواتيرك ويعدلك فى خطوط سيرك

ويطوى ع السر سريرك خمسة وخمسة ويغزى العين
 فى الحر يلزمننا نصيف بيغى الشتا نعوز نتكيف
 فى العيد نضحى بخريّف ... معلوف ومترى فى شبين
 ومن العريش تحابيش رمضان وفول سودانى من أسوان
 ملوحة من أسيوط ولبان من القويرى ف رأس التين
 ومن الواحات بيعت رومى ما أحلى الديوك الفيومى
 يا بورسعيد طقم هدومى من سنغافورة أو م الصين
 هنا أو هناك أرض تخصص قانونيه مش هبش تلصص
 لو عين حقوده ح تبص بص نقول دى ورث عن السابقين
 اللى كلوها زمان والعة وعبوا خيرها بالزلعة
 أيام ما كان أهل الجامعة ... بالحرب مشغولة يا مساجين
 والباقى بقى دقة قديمة موظفين نية سليمة
 يقولوا ع المسرح سيما والفيلم يقرأ حروفه فليم
 واهى تبقى هيبة ووظايف تركيبه ولا حشو قطايف
 الختم عهده مع الخايف تضمن ورق محكوم وسليم
 على طوق وخش الكانى مانى تبيعها انقاض ومبانى
 لو تترفد ترجع تانى مادام عرفت تأكلها منين
 ومادام بنود الميزانية متوزعة حسب النية
 لو ميت عصابة حراميه ما ح يفهموش سر التنظيم
 تعمل شريف تطلع متهوم لأنك انت حقوق مأزوم

تبلغ معاناً خفيف ح عموم..... يرجع ملفك صاغة سليم
بالعكس يمكن تترقى..... وشوف عطية أو السقا
الى شفت قرية بيلقى..... فى أيام فاروق كل التكریم



طوبى فى المعطوبة

كل ما احذف طوبة ... معدولة .. مقلوبه
تضرب فى المعطوبة... وكأنها محسوبة
قولى ليه يا بلدنا سوّست الخروبة
أنا لو أعرف بأقرف.... وإذا مش بأعرف.. أقرف
أجى افكر.. اخرف ... يا أخطف يا اتطرف..
يا إما ابقى مثقف.... يا موظف أعجوبة..
ليه يا شارينى ناسينى.... فطمنى.. رسينى
سايب الجهل عامينى..
واما اغلط تستظرف.... وتقول لى أهى نوبة
إيه.. مالك يا بلدنا..
يا بلدنا.. إيه مالك.... متشقلبة أحوالك..
يا عديمة أحوالك..
سرق الخوف رسمالك..... صدقتى الأكذوبة..
فاكره الدنيا جايه لك ... ولا بكره على بالك..
الشوطة فى عيالك..

بياع الشيك بـم بـم..... بيلحن موالك..
ومراهن على زويـه..
وأبونفس ومكسورة متقدم فى الصورة..
بخدوده البندورة.... وزيببته على القورة
ما بيـقـبلش التـوية..
ومعاه السنيورة ... ترقص بالتنورة..
لف معاها الملعـب ... زى بتوع الكورة..
من قبل المنصورة.. حتى أواخر النوبة..
كلت المخ بارومة.. بومه والا حكومة..
ولا نافعة معاه شافعه.. ولا شفاعة فيه طوبة..
يا بلدنا يا منكوبه.. يا قديمه يا أروبه..
ليه ساييه المعطوية..
تتعفرت وتتخرب.... تضرب فى العرقوبة..
انتفخت فانفشخت.. البطن اللى انتفخت..
حمل جوازه كذوبة... ح تخلف كركوبة..!



يا واخذ القرد

أول ما طالها انهطل مال وانعوج حاله
وظن نفسه البطل..... يوم ما ضرب خاله
ودش فحل البصل..... حرد شرد باله

شعره الجعیدی اتحل..... من کتر ما جرى له
حسره ومراره وزعل..... على رأى مين قالوا
الى يبيع بالزجل..... إيه فصحنى تبقي له؟

أنا كنت عارفة زمان..... فلاح ومنوفية
فارس ومن غير حصان..... عاشق ملان غيه
يلبس تياب زهران..... ويفنى.. لبهيه..
كلام بحق وحقيق..... مش نيه ملوية
حين شت بيه المكان..... والعله مخيفة
أكل الرغيف المهان..... قبل العوض ديه
حبل الحقيقة قتل..... فى الحلق مواله..
قبن ميزانة الدجل..... قبت به أحواله
دار به لفوق الهبل..... راهن برسماله..
فحق فيه المثل..... ع القرد ووصاله
ساعة ما يلغوا البدل..... القرد يبقى له..!



الاراجوز الأدبأتى

أنا أراجوز وأدبأتى..... ما نيش جهول ولا قردأتى
بلسان ونص وحكواتى..... من سالف أيام الأجداد
وحبكم هو حياتى..

خلفت ياما ماليش أولاد..... ولا ليه بعد بلادى بلاد
 وقد عقلى ما طق عناد..... روحى رقيق كما خلجاتى
 محتار أنا ف أحوال الناس..... لذا جيت لكم مليون إحساس
 من بعد أكل الفول بحماس..... بتقطع القول غنواتى
 على بال ما يسخن دور الشاى..... نكون لحقنا العصر الجاى
 ما هو إن خالفنا نعيش ازاي..... والعصر شكله ديمقراطى
 اللى أقوله تسمع ليه..... ما انتش معلم هنا ولا بيه
 حتى لو التذكرة بجنيه..... أنا بس حاسب حساباتى
 أنت هنا تسمع وتبص..... تنح لى، بكره تزيد النص
 أنا وحدى الت أعجن وأرض..... وعليك تسقف وتهاتى
 وإن كانش عاجبك هوينا... اشمعنى هنا جاى ترازينا
 عملت إيه من يوم مينا..... خلاك بنيت قبر ذواتى
 وسخرك سخره لليوم..... من تصحى حتى تروح فى النوم
 جاى لى هنا تحملنى اللوم..... هم اللى راح غم الآتى..
 سمع.. وتخرس لما أقول..... ح أخلى عرضك يصبح طول
 لحد ما أزيح هبو الفول..... واخرم نافوخك بآلاتى
 وإن كنت مش عاجبك سامح.. يا خى زى ما سامحت القارح
 يوم رحى وياه للمالح..... ورجّعك عطشان خاطى
 فافهمنى ياللى حداك العيب..... اصرف علينا ما فى الجيب
 يأتىك رزماً ما فى الغيب..... وتشحتوا زى حالاتى

الوزلاشتراكى

يا أرض بايره ليه حظى عاثر..... فن المسائرة ماجبرش خاطر
ريحت بالى وبقيت فى حالى..... داير فى ساقية من غير حوافر
راقدا يا قاعد حتى أما اسافر..... تشرخ ضلوعى هموم كوافر
الى دبحنى سكين صديقى..... شوشر لى لحنى.. ولا بل ريقى
بادل بقلبى بغل الخواجة..... وللبنوك باعنى سد حاجة
وأما بشاير القحط هلت..... نفطه بلانى بزمان مفتت
يدبح تاريخى يعمل عزومه..... ويفوز بجايزه من الحكومة
قلب حياتى حظه المواتى..... زورّت حتى بأهات سكاتى..
له كل جولة بدل خنادق..... وف كل دولة سويت فنادق
نغم حماسة شعبى وراقى..... خلا السياسة ترطن عراقى
رتب وجيعتى حسب الأوامر..... ولد كليفتى له قلب شاعر
فى الأزمة نُونُو شمال يمينى..... وغنى ماركس بلسان خومينى
كتابة ملسن ملك وصوره..... قايس قصايدى على المازورة
ركب البريمو وعاش فلاتى..... صندوق مشاعر صعلوك ذواتى
له بيت فى لندن وبيت فى بارى..... ويحب يدن ربح الحوارى
يا عم حظك عميانى ضارب..... بقيت هلمك والدار خرايب
عديت يا هايص وفايتى لايص..... والفن أصبح محتاج مجانص
فى دنيا راحت على القوالب..... انصاصها برمت لنا الشوارب
أحزاب بسوسته سبعة فى أوضه..... شبابها بوسنة نسوانها موضه

وفنانيتها سارقين خزينها رقصوا لها بلدى فى يوم حزينها
يعموض الله ما طلعت شورية روسيا بتفتح صالات أوروبا ..
وز اشتراكى م الجوع يكاكى حين نتفوا ريشة لقوة .. غربة ..!!



فزورة

شاعر باع امبارح لليوم وقال يا بكرة نسينا الدم
قال جعت ياما قلت أصوم فعشت أفطرهم وغم
سألته طب على إيه مهموم قام قال لى أصل الشعر أهم
طب ليه اكلت العيش مسموم قال حين نكرنى الخال والعم
وأنا ملتزم بالناس متهموم طول عمرى بالأوطان مهتم
عشان كده راح أورى القوم مين اللى فرط الأصل ولم
وح يشهدوا إن المعلوم كان حق عرقى ومش متهم
أنا اللى قلت بكيفى أعوم مع الأهم أكون أهمم!!



جحا وأبوالنواس

جحا من طينة أبوالنواس وش وقفنا حاييس محتاس
لو واحد يوم قلع الجزمة يلبسها التانى فى الراس
جحا لو نام والدنيا نهار أبونواس يسهر زنهار
وأبونواس لو كنّ ورنخ جحا يشعلها نضال وحماس
الأول لو بقى صراماتى تلقى التانى ارستقراطى

وان جحا أصبح يوم قرداتي..... أبونواس يبقى النسناس
العكس المعكوس العاكس..... الهادى بالعند يشاكس
عادى متأدب ييباكس..... لو فكر تلاقيه ترياس..
احترنا بين جحا وزميله..... النكدى تضحك مواويله
والمضحك توهنا ف ليلة..... كومبارس بقينا بنجحتاس
دا يعبى عصافير فى قزازة..... وده لهف اللقمة الممتازة
ليه تتصر ذاك على هذا..... العتة كلت الإحساس
ح تشوفهم لما بيتزلقوا..... جسدين فى زكية بيتفقا
وشين لقفاهم يتلرقوا..... دماغين وحدهم وسواس..



فتاوى السكون الصراعى

فى هذا الزمان القليل المدارك..... تباركت يا من رهنّت الفبارك
وحددت سعر الجميع.. من مشارك..... لشاهد.. لشارى مناضل.. لشاعر
ح يضرب طبنجة تحمى المعارك..... فنقطع يمين اليسار المغامر
ونوصل يسار اليمين الى سالك..... ونخرس فصيح اللسان والمشاعر
ندارى الصريح والقبيح واللى واعر..... نداور تناور نسالم نعارك
عشان يبقى كله كما كان تمام..!

تشكل لكل المدايح لجان..... ح تشرح بكل الحماس والتواطؤ
بكل التباطؤ نطلع بيان..... بكافة ما يسمح به طول اللسان

نفسر بما قد تيسر وسائل..... صمود الطفولة.. وبطولة المدام..
ومجد الجدود العظام الأوائل..... فى شتل الفراولة وعصر الموالح
وبيع المسارح ومضغ اللبان..
وتعويد ولادنا يحبوا السلامة..... بحكم التأنى فى عبور الميدان..
وشد اللجام لجل شد المفاصل..... لرصد اللى حاصل بكل اهتمام..
لنفخر بأن التاريخ المواصل..... مازال فى الزقق والعطوف والحوارى..
على طول شطوطنا بيملا الحواصل..... فتنعس نشخر ونرتاح تنام
وندفن فى رملتنا رؤوس النعام
يزيد اهتمامنا بمزيد الفضايح..... فنصبح فلاسفة من أهل الكلام
نساوم على فعل غيرنا نقاوح..... ونشتاق لقبض التمن بانتظام..
ونرضى برغم الخلاف والخصام
ناكد أصول السلام الاجتماعى..... نأصل فصول الوصول الشراعى..
بخبرة وضوح الخمول الجماعى..... بحكم اختيار الجمود المجاعى..
نقش الهوامش.. ويفتى الإمام..
يدش ف فنون السكون الصراعى..... وللجرحى يشرح مزايا السلام
وللمقتولين اعتياد المذابح..... يفسر مقامات نواح الحمام
ورقص الصبايا فى حدود الالتزام..
ونقص العباطة ف عموم الزمام..... لسر الوليد اللى قطع من أمه
وعشى أبوه لحمها بالبطاطا..... ورتب جنازته بكل البساطة..
وروح يسوق القلاطة احترام..

وليه الفقير باع لشيخ القبائل..... بناته بحواله وصندوق إدام
وإيه الدواعى... وفيين البدايل..... ورا كل تلك الجموع الزحام
لكى لا تخيفنا الدوافع نتوه..... ولجلن ما نفهمش عمق الفوارق..
ما بين الفوارس وبين البنوك..... وسر انعدام احترام العلايق
ما بين الدقون والدخوف والDRAM..... وسر الجنون التجلى الفصام..
فى عهد التأمل بأكل اللسان..... وميزة التجميل بنفى الحقايق
ورش الحــــــــرايق بماء الكلام..

وامتى نفسر اصيل الخوارق..... بدور المسايح فى حفظ النظام..
فتبصم لفرعون ونسمح يساوم..... على ضفيرة أمه وعمه أبوه..
بيبع الشطوط لجل ما يفك أزمة..... ويهدى الهرم للخواجة كادوه..
فتغرس حصيرة الصهاينة ممانه.. على سطوح طماى الزهايرة ودموه..
نقف فى المواكب بكل احترام..... لشاذ الطبيعة اللى حظه مهاوده
فعاش عز سعه مؤهل لمجده..... لأنه ابتلانا بألفين وجيعه
سقانا خمور الثقافة الرفيعة..... من أيام بديعة.. لعصر الوديعه
وحضن الخليعة اللى ما بدهاش..... ولا بعدهاش إلا بند المعاش
يمصمص بكل اهتمام عضم أخوه..... تهل العوالم على كل لون..
يدقوله عشرة ساعة ما يشوفوه..... بيحجل ويزجل ولا قض فوه..
ما يسكرش لكن ح يضرب طناش

ما يلدعش لكن يرى الحناش

لحد أما ح يكت بره.. يفلسع..... كما فص ملح وفى الميه باش
معطر بدم الغلابة المقطر..... مصطقى ف عيونكم لهيب الاندهاش
تعيشوا تموتوا بلا أى حسرة..... وتانى وتالت تموتوا بلاش
على رأى خالتى اللى عاشها عواله... خسارة فى عمره الكلام والقوالة
وحسرة آهات القرف.. واش يا واش..
فما دام دا كله.. بيثبىه ل كله
وجوز زى فرد.. الزعيم زى ضله
ما حدش ح يقدر فى عصر أذله..... يعلق جرس فى رقبتة يقول له
يا سعدده اللى عاش بالحرام ما اتلهاش
لأن اللى مات بالحلال ما لتقاش..
فما حلّه الفرع فالأصل مال له..... وما توهه الصدق فالكذب دلّه
ومن كرمه الحب فالقرش ذله.....
وما استحملة الصبر فالقههر ملّه..
وما استحرمه القلب فالجوع أحله
ومن حلوا.. ضلوا.. يا حاللوا.. يا حاللوا..
ومن ضلوا.. ذلوا..
ومن ذلوا.. قلو
ومن قلو.. فلو..
ما عاد شئ إشى من أساسه فى محله.
فهذا زمان انعدام البصيرة..... بقرعَ المداود بشرع الحصيرة..

بيستحلوا رعب الخطر يُستذلوا ... إذا زادوا قتلوا ولو شالوا .. كلوا ..
بيحكم مصيرهم ديول الحناش
وكذب الذى كان وعدهم ماجاش فاكلوا بواقى الموائد بلاش ..
فحاشا وحاش ومرحب ياسن البلوغ للمعاش
وأهلاً وسهلاً يا حضن القهاوى ..
أسلم دماغى مع العهدة أسلم أموت مستريح فى دفء الفراش .)



هوا الهناجر.. دوا الحناجر

يوم الثقافة محدث النعمة رباية ال .. خواجات ..
زى الضفادع فرحانين بالضلمة
زايطين فى ليل المستنقعات الطويل ..
ما بين كيما الدبش والخرابات وسويقة التجار
بيقسموا المواويل على الفواتير
يعشموا التراحيل بالأوبرا والفانفار ..
..

قصر الثقافة ليه كئيب ومضلم ؟
قال لك سعادة البيه قليل الهمة هذى طبيعة هذه الأمة ..
مالهاش فى نور العلم ولا فى النعمة ..
مالهاش غير الضلمة وعدم الذمة ..

إذ أنها فى النذل بتبدع..... تاكل وتتكرع..
شجرتها فطرية وبتفرع..... بالبركة شيطانى ولا تتقلم..
ودى خلاصة خبرة الخبرا... مهما تعلم فى الجهول ببيلم..
ومهما تجلى فى الصدا بيتلم..... ربح دماغك وسلم..
لو يصحوا فلاحينها ح تجيب داغك..
قمل التباتة يدب فوق اصداغك..
فأى باب ح تهب منه الريح..... بالدبش سدة أو.. هده كى تستريح..
...

هذى النصيحة خلاصة خبرة الأسطى..
أبو الجاكتة كاروه وروب كشمير..
وورده ع الكرافة
النص كم ف طوبة وف أمشير..... الناعم المتكلم بصوته الخير..
طبال جميع النوت ومرفص السلم..... اللى الياقات تجرح قفاه الحرير..
مهندس البت ف جميع اللجان..... م الفت للتطبيع..
صاحب عيا وستوديو وتجارة..
أستاذ قانونى بدبوره وخمس نجمات..... سيع دكاترة وجائزة
وزيية نبقه..... وسابقة..... فى دراسة الجدوى وفى المشاريع..
كل اللجان فى أى فرع لجانه..... معارفه قد الهم فى الوزارات..
متوزعة صبيانة ع المسافات..
تدرس له كافة يشتهى وجدانه..... إدارات ومهرجانات..

ممارسة ومناقصات..... تلم له الغلة فى آخر الليل..
كتير كتير وقليل..... تسدد الفواتير ولاستثمارات..
بطونها تحمض من حكاك الحلة..... ترتب السهرات
ترش له سكر على النسوان..... لو حب يفرد جسمه أو يتسلى
تدش له الحكمة حروف ولسان..... فيتجلى..
لو راح لجان الاستماع يتكلم..... أو طلبوا رأى سيادته فى السياسات..
...

يا رب.. يا مطول فى أعمارهم.. طولت صبرنا ليه.. ما أكثرهم..
ما عايش نافعة نعدل الموازين.. جرينا كافة ما اتعرف قوانين..
لكن الكلام فوق السطور بيقبّ.. والآه من كتم النفس بتتن..
فتحس أنك قليل الأنسة أو نكدى.. حزين ورزين..
يا ريتها دامت غنوة المساكين.. أيام بلدنا ما كانت فارشة طرحتها..
على شط بكره.. وع الزنازين تصبرهم..
والآتى متسند على اللى راح يفكرهم..
مسيح له شمس لقمه عيش لأفقرهم..
ناعر اللى كره همسه عشم نفسه بقرهم
قالق منام الغز والماليك يكدرهم..
...

دلوقتى تويك نجس..صوتك كليل وانحبس..
أدى المسارح بتتعى هم بانينها وانكرت كل الصور.. راسمينها..

وكل من كان بقى له رأى شرعى ودين..
 انكر على الفقرا شم النسمة كفرهم..
 ييشق قلب النخل مصريين
 والعب مساخر.. يا قرد يا تاجر..
 هوا الهناجر.. بيسكر ملوى لباريس..
 حَبَّر كشوفها بحبر فاجر..
 فتوى الخناجر.. عورة وكشفها حيص ابن بيص..
 كى يستبين البدو والأفغان.. على سنة الرحمن - عمم وعساكر
 كى ترقص الغريبان وابو القردان..
 ما بين شجرة الدر والسامر..!



مثلث الرعب وسط المدينة

الشاعر لما ييفقد وعيه
 يستبدل مكتوبة بتويه ... يتصالح ويا ذنوبه..
 يتباهى على خلق الله بعيوبه.. يصبح أنجس من كلبة عيوشه
 يختل لو اتبل ييوش.. زى العيش الفينو والفل المدشوش..
 يفرح للصدفة ويتمط كما الأستك..
 يعبى جروحـه فى بلاستيك..
 يحن لأيام الطربوش يتعذب.. يسحره عز البرنيطة فيتمذهب.

لكن أول ما بتأمره شنبات العسكر يلبد فى جرايرهم ويلوش..
ريشه فى الريح اللى مواتى.. زبلة وعايمة مع التيار الآتى..
يتلقى الحكمة من اللوطى والبمبوطى السمسار
هنكار ويتحرق قلبه بعض الأفكار
يصبح ولا بالونه مجنونة.. على شكة خريوش
يقضى يومه العادى معادى ورمادى..
يعتبر حزن الناس العادى فى قصايد الشعر العادى
يدادى اللبث العادى ويستغفر للغلط غير العادى..
ويطلب منى أكون راضى وأكمل مشاويرى..
الحق بميعادى ماليش دعوة بغيرى.. امشى اتسند على مناخيرى..
اتعزز الكام ملطوش..
...

لما الشاعر يفقد وعيه.. يصبح اتفه من برغوت الجوع..
تحكم أحاسيسه حوايت القحط تسبب ترايسه اللى اتقفلت شحط
يخلط بين الذاتى والموضوعى المحط
يخيب أملة ف حلمه المشروع البات.. من أساطير الزمن الجريوع..
يطلق عياره الفالت.. يفرح لوقوع الفاس فى الرأس الموجوع
ووقوع زمالاته من قعر القفه اللى من غير ودان
يشطح بالقول الفلتان ينطح فى الوهم الوطنى غصب إرادته
يوفق وقته وحاجته مع الأوضاع

يرقص فى الزفة الخائلة الكدابة مع الانطاع
يعزف ع الوتر السايب.. يتحزم بالمقطوع والعايب
يطبل فى المتطبل.. زى حلتجى على الحيلة المائلة..
فلسنجى فى بيت الطماع.. يتخايل بالسيف البوص..
يخيل له.. بما إن المكسور النفس ع الاكتاف مرفوع
والمضموم القلة منفله فى الشلة ومصنوع
يبقى لابد وهو المطبوع ح يصيبه الدور
يأمر فيطاع ... أو يؤجر لىباع..
متعلق فى ديل الاتباع.. تابع فى سوق الأطماع.. بليوص..!

...

لما الشاعر يفقد وعيه
يتبعزق خوفاً على رصفان الرعب
يتخوزق فى ميدان سليمان.. أو فى كريم الدولة..
أو على قهوة زهر البستان ع الكرسي الخزان
عريان لا قوة.. لا حوله..
فاستعوض فيه ربنا خير..
خسارة عمارتك فى خرابات الغير..
طيرك متعلق فى رقبتك.. ولكل بهيم سعية..
حتى لو فاقد وعيه.. أو فهمان مجنون..
عدد الشعرا يالمون..

القفا صبحت مليانة عيون..
المستودع مش أروع من مستقع.. والجريون مش أوجع م الأوديون..
«وما ابدع أن تشرب حتى تتكرع.. فالالكتع صار هو الأرفع والانفع..!».
والأجدع انك عارف مين اللي خرب الدكان..
وانت ف وعيك.. لكن سكران..!



أزجال منشورة في
مجموعات شعرية

فى حب مصر(*)

يا مصر نفسى أشكى لك .. كافيّة ولادّ يوم خَلَفْتى
من اللى عَكّروا ماء نيلك .. للى فاتوكى اتخَلَفْتى
وم اللى نَسُوا يَعْدِلُوا مِيلِك .. للى باعوكى اتسَلَفْتى
سَجَنْتُ رُوحى فَاَ مواويلك .. كلّ اللى حيلتى اشْتِمِ .. وافْتِى ..
وبرضه اتهجّى الأسماء ..

ما فَرَقْتُ مين حبك بغياء .. ولا مين بلاكى بِسِمِ الداء ..
ولا اللى رَعَبَكَ وَزَمَاكى .. بعلته .. ما لُحِقْتِ العَصْرَ !



إعتزال

آن الأوان ترمى حمولك .. ولا تشغل باللى ماهو لك ..
شَلّت الهموم أحمال أجيال .. ووقفت فى الأزمة بطولك ..
آن الأوان ترتاح .. رَيْحٌ .. جَرَحَكَ مَجُوهَرٌ .. وَمَمْلَحٌ ..
لو كان مقدّر لك تَفْرَحَ .. كان الحزين صدّق قولك !



طموح

راعيت ياماً يا أبُو الهم الأصول
وساعة القُول عَمَاك الخوف تقول ..
طرمت سن قَلَمِكَ .. وَخَرَسْتَ حِسَّ أَلَمِكَ ..
صبح وجودك علّه أشبه بعدمك

(*) من دقاتر العامية «دفتر تمانيه» متر الوطن بكلم

عشمتك رضا إنك فى يوم ح تنول..
جايز يجوز بكره تحقق أملك..
لو يوم قدرت وشفت وذن حلمك..
ساعتها ممكن يسمحو .. ويسامحو..
ويسيبوا إيدك لجل مرة تطول!

● خيرة همّ

يا عم أفهم الأمر واضح .. الكذب أفصح من أى ناصح
والصدق أصبح .. كما فعل فاضح ..
فاقبل هواهم ما دام معاهم .. اللى بلونا بزم فضايح
قبوا النهارده ورمونا أرضاً. نهرب يا نشرب من بير هوانا
على هوانا
فيا إمّا تعطش ألم معانا .. يا تروح تعب الندم .. صفائح..

● للضرورة أحكام

كل الطيور هجت م العش
صبح الغرام له طعم المش
وح تعمل إيه؟ يا طير عشاق
حتى اللقا فيه طعم فراق
تموت من الحرمان مشتاق
وتبتسم من باب الغش !

عالم ثالث

رضا العويل بشروط

يا تعيش معاه ذليل ووراه تكون له ديل

يا حدوة كعب خيل يا عروسة بالخياط..

مافيش سواه - دليل..

إلا أن لقيت بديل - قتيل هواه تموت !



خير غمّ

موهُوب؟ .. ح يَلَوَّعُوك شَرِيف؟! يجَوِّعك ..

ويقولوا الحاله أزمّة شِعْرِك مالْهش لازمة

لكن - لو تبقى جزمة يمكن يلْمَعُوك!



كل برغوت على قد دمه

فى عصرٍ عَدَمَ الْحَسَاسَةِ .. خَطِيئَةُ مَوَالِكْ ..

الكذب أصبح موضحة - عَقَبِيْ لَكَ ..

قول ما بدالك .. أَخْرَتَكَ سُودَة ..

طالت النجاسة خيالك يا عديم خالك!

والجودة بالموجودة باقية لك .. هَنِيْاً لَكَ ..



بناء فوقى

غَدرك زمان الديابة الكدابين ألوان..
الصدق يادوب سحابة وبخبخة دخان
بين كدبه تسم البدن ..
وكدبة تملا بالخيابة ديوان!.



القضية ..

باتيه القصيدة مخشبة ف زورى
الخوف ملبشنى بين أحزانى وسرورى
كلّ القضايا بَقَّتْ فى السَّوق .. بِخُمْسٍ وَسُدُسٍ..
والقُدس!؟.. ما بقاش لها غَيْر شِعْر حَنْجورى..
وجريدة ريسها أشول .. عقله بعجورى!
وملك جمنهورى.



تاريخ

يا لهو قلبى عليك يا مصر.. يا برة أى نظام وعصر
علم خيالك الكون بحاله .. وإننى عبده . حدا كل قصر
جوه الزريبة .. فى لاستباليه .. فى عشه واطية أو قبه عالية..
يمصوا دمك .. ويعصروكى فى الهم عصر
ويوم الخيانة ياخذوا الميدالية.. ويشربوكى الهزيمة .. نصر!.

قعر الحلة

إيه لسة فيه الجراب يا حاوى؟
مخبى إيه لسه م البلاوى..
البركة نشفت وطينها شقف
إبن الحكومة الخبير مثقف
حسب أوامر الغفر يسقف
فى الاوبرا سنتر .. أو ع القهاوى!



هَبْل

زعق الحرامى.. سرقونى .. كدبت من رعبى ظنونى ..
والشك زود لى شجونى .. أنا - اللى وقع لى سنونى
هموم لها عمر سجونى .. خليتنى عاقل بجنونى..
حمار .. وماقدرتش أصدق ... طلعت من جُبِّ اتحقّق
العسكر اللى يتحلّق .. طفوا الحريقه .. وتهمونى!



حب أعمى

غنيت له بكل حماسه .. هوّنت عليه الليل..
ماقبلتش غيره رياسة .. وملّيت عَصْرَه مواويل ..
كان شعرى غذاه اليومى .. كان دمي فى سكه دليل
لكن ملاءيب الساسة .. وأباطيل التضليل

عايزينى بكل حساسة .. وبدون أيتها حساسة
من أجل رضا / برضايا .. فى قفاه أتركب .. ديل.!

سياسة

لبوه .. وح تعمل إيه فى فيل مفترى ..
برطع يدهوس فى النجيل الطرى ..
يضرب بزلومته النخيل يقتله ..
فى حين جرى السبع فلسع .. فى احترام عبقرى ..

خيانات

إدبحه فى السر وقول دا . نفق
وإن خفت تقرر إعمل له . نفق
القتل يجوز من أجل تعيش ..
دا قانون الجيش .. لو يأكل عيش
أحلى من الحب الشرعى .. رفق.!

حراشيف

أنونة تحفة وحيزيون الدهر
أهل الروتين سلطنوها تمضى طوال الشهر
بالاستمارة تصلى

ترتل الأراشيف

وناوية للقبر تاخذ الكرسي وش وضهر!

مثقفين

مثلت الرعب فى وسط المدينة تاريخ
تلاقية فى لندن وبكره نشوفه فى المريح
مثقفين نص ليه - غبارة .. شبورة..
بنفس مكسورة ترضى بقشرة البطيخ!

حظوظ

ليه يا بنفسج حزين؟
قال لك من الباشا
من مدعى بالنبوه وهو أمباشى
جعل الفنون فرض قوة ووهم حشاشه
وجعل قليل المروة أبو ضحكة مسمومة
مستعرض الشاشة -
شرف الحكومة - وخالته الغولة، هباشة !

بعد نظر

ما دام دراعك عسكرى طاوعه
الميرى وياه متين شرعى وله سلطان
من غير ما يطلبها منك ع الملا بايعه
إياك يا أبو الشوف تلاوعه
.. نخ يا غلبان..

من صغرنا، العسكرى طبعنا لطبايعه
عشنا ف حماه ملطشة للخوف وللحرمان!



متواليات

مادمت فهمك دون وعلى قدك
عايش سليم النيه مش عايب
خليك أمير وإلزم حدود حدك
أكيد ينوبك م الرضا جانب
وإذا حظ أمك ضرب.. وصبحت شيخ للعرب
فأعقلها يا خايب..

وأطلع بنايب ولا تحارب ظهور سعدك..
لو بيت أبوك اتخرب ما تفوتش فيه قالب..
ملعون أبوه اللى راح يركبها من بعدك..!



جوايز

حمار من اللى ثقافته محبكه ع القد
مهروش بتفضح كتابته جهل فآق الحد
السبع كرم سيادته .. زوقه ركوبة..
نهق بياهى بخيبته .. اللى ماهيش على حد.



فقر

أقرع ونزهى وشاعر من منازلهم
حالف يدغدغ جميع من سبقوا ويزيلهم
طلع بطبله وزمارة على لآبواب..
يشتم سياده وإذا عشوه يفازلهم.



إستنزاف

العسكر..

همه أصل العله والأوهام والجهل..
فقر الأحلام وجفاف الروح والعقل
همه اللى قطعوا فيك الخلفه.. يا بغل
حرموك لبن الأم .. وخرسوا كلمات العشق العدل
حكّموا فيك الواطى والخاطى والنندل..

طحنوك بين اسنان الحوجة والأيام..
لا إتمعت بهوجة الحرب
ولاعمت معاهم ع الموجه اتنهيت بسلام.



عنوست ثقافية

القطر.. فات الوليه الهيلة زى العسل..
فاستقطعت..

تعجن تلت الكلام اللي ما يعرف خجل
إن قرعت برطعت.. وأن سرسعت سمعت
لكن إذا ما حرقها العشق زحلقتها..
أشواقها تحسب قرش أرزاقها
ترهن حلقها تفك خنّاقتها
وإذا فرقعت لعبت فى أزرقها
وتقول لك إتسرعت حبا فى خيبة الأمل.!



الزمار

سرك.. بير.. بيرك سر .. يالى عملت الملعوب.. قر
كُنت يسارى قرارى حويط .. إشتطيت لما استصغرت..
إتبطيت حين استكترت .. يا اتدكترت يا اتدسترت..
وبعد خراب الفيظ والبیت .. إستبصرت !!

فاتحدرت قوى اتحررت.. نطيت فى العالى اتبعترت..
ياتسمرت بقيت.. مانشيت..
قُمت قلعت الوشّ العيرة.. فاتدحدرت بفعل البيرة
واتسترت ما جيبتش سيرة..
لكن أول ما اتلطيت..
البير فاض واتفضح السر.. فوق يا جعر..
زمرك كله أونطه يعر .. آخرته زى الأول - طيط.!



سلام

كفايه يا عم يا مهبوش.. هو إنت واخدنا مقاوله..
دماغ جهول أمى ومرووش.. واحنا على فيض المولى..
بتبنى فى بيوت ما ح يعلوش..
حيطك خرع . قطرّه وح ييوش.. لا حول ولا حتى محاولة
بتفش حتى فى الطاولة.. وتنكشف تلبس طربوش..
وتجرى على أمن الدولة.. الخرده ح تبيعها بقروش..
يا إما ترميها على أوله.. كافور يسملها لقراقوش..
يدبحها من أول جوله.. ولاعاد خشا ولا خوف.. مابقوش..
ولا للقانون صوله وجوله..
جيوش هاموش فى حرب فاشوش.. سارحه ببطيخ وفرولة.!



حظ الحمير

حمار ولى النعم .. يتباهى بعصايته..
فرحان بيمضغ لجامه .. ماشافش فيه عيبة..
حتى يوم الكنسه برطع شوق لجزرته
ونهب يلوم البشر عل الحزن والخيبة
فى الزفة تبّت لسيده الوالى بردعته..
نفر وقال / يا بقر.. يا غجر وهليبه..
الحظ فرصة وشاطر من لحق وقته..
كُتّر الحمير نعمة بس تلاقى ركيبة.!



كاتب سابق

لو كان باقى لك نفس تكتب.. لكان ألفت
زمان عملت البدع وأنت فى عز الشّيفت
حشيت دماغنا خدع بالحقنة أو بالجفت
بلوك أمين الثقافة

من قوص لكوم الشقافة العصمة فى يدك
لحد ما أنت تلفت
أصبحت كاتب آلى بالزميلك..

إن جفت البيره تتفوك بماء اللفت
إن هجت الحيزيون هجيت لأقرب بنت

فتنام مبلّغ عشان تتسى أوامر (الزفت)
تصحى تجمعج فى الميدان اليسارى
وأنت سـوارى فى ديوان الملك..
حراسة سايرة فى ليلة (ما تغنى الست.!).

● نهايات طبيعيت

على فين يا فسّل رايح .. بتكترّم الفضايح..
مُش كنت خبير قرارى.. فى الشعر وفى المجارى
رفعك قرار إدارى .. حسب العرف اللى سارى..
ونسيت إنك يسارى .. ولا تفهمش اللوايح..
غلطة شاطر يا فالح.. فاختر يايدىك نهايتك
نسوان..؟ وإلا مصارى؟!

● تايه فى الزفه

الكون كإنه كُستبان فاضى..
زنة زوابع من زمن ماضى..
زحام بهائم فى سوق
تجارها دود المش أَكَلَة حقوق
وأنا زى لاطرش م الأدب والزوق
أخرس وأعمى م الفزع والشّوق

محاصرني سُوم المفتري.. والفنجرى وأبو قرش..
واما طلبت التراضى وقلت أنا المحقوق..
حَبَسْتِنِي ف علتي يا حَضْرَة القاضى..
وَسَفَحْتَ دَمِي عشان تَرْضَى الزَّعِيم أبو كرّش!.



خريشه فى القلب

الفنونه بتفرفر بطول اليوم على لسانى
كل اللى شايفه بيفرى كبد وجدانى..
واكلنى قلبى على أولادى وأوطانى..
وأنت ولا أنت هنا..

...

كنا زمان ع الفرح والحزن متوافقين
خافت كلاب السكك منا شمال ويمين
صبح الفَجْر والبقر والعِرَّة متفقين
واحنا اختلف وفَقَّنا

...

فرقنا صاحب الغرض والا العرض والمال..
والا الحرام المرض هو اللى قلب الحال..
والا كبرنا وخرفنا وكنا عيال
عمر وقَلَّتْ منّا..

...

الآه بتحرق فؤاد اللي ما ينطقهاش
وكلمة الحق حره الندل ما يطيقهاش
وح أعمل إيه؟ واللصوص اتحاموا فى الأومباش
اتقاسموا فى لحمنا

...

حرفت ليه المعانى نسيت أمانى الوطن
وبقيت تصدق حكاوى كل حاوى رطن
خيبت فيك ظننا

...

إبدأ بنفسك وفوق.. القلب مستنى
ممكّن تزيع الغمام اللي عمّاك عنى..
تعلم القلب يعشق تانى ويغنى
حسب وصايا امنا ..

...

اللى باعوها سبايا ف كل سوق حرّه
وهيه ست الصبايا الطيبه الحرّة..
مين علمتنا تقاسمنا الحلوه والمرّة..
وعطتنا لون دمنّا.!



حبّ.. بلا قيمة.!

(يا زهرة العشق قد شاخّت أمانينا)

وحُرمة الشوق ماهيش قادرة تواسينا

(أَسْرِي إِلَى بَابِكُمْ أَسْفَاً عَلَى قَلْبِي)
 مِنْ كَثَرِ مَا لَطَمْتَنِي الدُّنْيَا فِي حَبِي
 (أَنَا لَسْتُ ذَاكَ الْفَتَى الْعَذْرَى يَا لَيْلَى)
 دَانَا لَعَبْتِي الْعَشَقُ بِسِ الْأَيْدِ مَا هَيْشَ طَائِلَةَ
 (وَإِنْ قَنَعْتُ بِحَبْرِ الشَّعْرِ يُسْكِرْنِي)
 فَايَاكَ أَشَوْفَكَ بَتَمَلَى كَاسِ يَفْكِرْنِي
 (لَا تَذْكُرِي الْحُبَّ بَعْدَ الْيَوْمِ أَوْ تَحْكِي)
 لِأَنْتِي حِ امْشِي أَقُولُهَا وَلَا أَبْكِي وَلَا أَشْكِي
 (الْحُبُّ مِيرَاثُ أَوْهَامِ الْأَسَاطِيرِ)
 إِلَّا الْغَرَامُ الْغَبِي الَّلِي كَسَرَ مَنَاخِيرِي..
 (لَأَنْتِي لَمْ أَعُدْ ذَاكَ الَّذِي كَانَا)
 وَأَنَا كُنْتُ فَصَ اللَّمُونِ فِي مَدِينَةِ عَيَانَةِ
 (لَكِنَّهَا دَوْرَةُ الْأَفْلَاكِ تَرْمِينَا)
 مَهْمَا نَعْصَلُجْ وَلَا نَلْقَى الَّلِي يَبْكِينَا..



كِيكَا بُولِيْتِيكَا

آه يَا زَمَانَ الْأَنْتِيكِيَّةِ.. فِي الْبُولْتِيكَا
 شَيْخُ الْيَسَارِ زَارَ أَمْرِيكَا .. وَرَجَعَ مَخْتُومٌ...
 صَبَحَ زَعِيمُ بَسْكَرْتَارِيهِ .. وَحَسَابَاتُ جَارِيَةِ

ونسى تاريخ البروتارية وأوردى الفيوم
بقى صورته تنزل فى المانشيت.. ولا ووترجيت
يا ابن الأنيته لحقت نسيت .. حق المظلوم..
وحَيَّلَتنا براح الدكتور .. (رجع) الدكتور
وسيبتنا نحلل فى التور .. على عومة نعوم
فى الشورى تفتى وفى الأمة .. زينة هلمه
خبرة فى تبرير الغمة .. وأنت المتهم
من يوم ماحلَّيتوا لباسها .. وسيتوه لباسها
ركبكو وكَتَمَ أنفاسها .. راحت فى النوم



خَرس

وكأننى قط بميت لسان مسنون....
بانط وأزعق وأغنى فرحان بحالة الجنون..
يا خلق هوووو .. إسمعونى.. والا ردوا عليه..
ليه مصر ملهيه خرسا فى إحتدام الكون ...



فيروس

دا فيروس إيه .. اللى خلاّ الخلق راضية تعيش
وليل نهار عامية .. بتضبَّش ولا الخفافيش
ورا لقمة العيش بتلَّهد .. والعيال أحمال..
بكبد بطلال مرارته .. ف قبضتك يا شاويش



الحمير

م القاهرة...من الصعيد.. من كل صالة رقص..
حفظنا وِرْد الهجايص .. فيه تمام النقص
وايه يعيبهم حمير .. عبدت قطط وعجول..
ويوم ركبهم مفلول .. نسيوا فنون الرقص..
●

مبايعت

الجن لو قالوا أيوه بعدكم لها حق
والنمل والطير واسراب الجراد والبق
تقولشى سيدنا سليمان .. وربنا اللي عطاء..
من كل زوج بهيم.. عمره ما ينطق.. لأ..
●

الزعيم(*)

لايق عليك الهبل .. تركب عجل مقلوب
ياللى ابتديت بالخجل.. ليه انتهيت مكلوب
بيك السقوط اكتمل .. وكمل بك الملعوب
قمحتنا من غير سبل .. فرحتنا ذل ذنوب
على رأى ستنّ المثل .. لاعيبه من معيوب

(*) من دفاتر (دفتر سبعة) الف، لام.. لام الف.

باع الوطن بالأجل .. ظالم يبان مغلوب
غَيَّب شَموس الأمل .. غيمة غمام فى غروب
والخيبة تركب جمل .. والذنب ع المركوب
يفطر بجَر الشكل .. يتغدى دبش وطوب
يتعشى شعر وزجل .. من ميت لسان مسحوب
عبرة فنون الدجل .. خبرة خبير موهوب
نساك بإن البدل .. جاهز وراك محسوب
ح يعدى شهر العسل .. قدرك ما منه هروب
بقرار عمل تنزيل .. كما تقلة الخروب



المغنواتى

● يا مغنواتى يا مطبلاتى..
طبله ودابر حسب اللى ساير
لو كنت شاطر حسب كلامك..
هات المساطر وهات قلامك
إحسب وفسر قلة مقامك
أصلى بافكر.. محتار محيّر
إذ فزوراتى صعبت عليّه
الفجر طالع دَغَمَش عينيّه
والا دى ولعه وضى شَمعة

ضلّمه الشوارع والشمس طالعه
وناس بتضحك واكله كوارع
وناس فى جوعها سايقه الأيامة
تلبس قناعها ضل ابتسامة
تدارى يابا سلسال دموعها
وأنت اللي ماشى .. بأقصى سرعة
عارف طريقك وإلا أنت ناسى
تبل ريقك .. وواكلها والعة..
وإلا أنت خايف خاين صديقك
على الشفايف الضحكة ساقعة
سامع أغانى وما قلتها شى
ويوم تقولها ما سمعتهاشى
حيرت قلبى بين المعانى .. مافهمتهاشى..
عجز لسانك عن الأمانى .. محسسستهاشى..
أنا مكانى وكإنى تايه .. وأنت مراكبك
حافضة خرايط كل الموانى .. وماصنتهاشى..
ح اقول يا خيبتك والا يا بختك
سيبنى لشيبتى دلوقتى وقتك
قادر تطاطى وبرضه طالع .. دايس فى أهلك
إيه الموانع .. يا تور بجـهلك..

طول عمرك أعمى والحق ساطع
غناك يقلّب فـينا المـواجه..
وأدينى راجع.. على قـل مهلك..
لوحدى باعرج والم جرحى .. كاتم أهاتى
ساكت وقلبي ألم يهاتى..
علشان زعيقك ودق طبلك..
خـرم ودانى وغلب سكاتى..



الجمال

عبد الفتاح .. ابن الفلاح..
أسطى معلم كان حضنه براح
علمنا كثير .. شعراء شعارير
طـيرنا نطير ويُنص جناح..
نفضب ونروق .. على قد الشوق
ما فى حرْ بطوق.. ولا خالى جراح
أدبه الغلاب .. رَعَب الكداب
فى عصر عذاب.. أكاذيبه سلاح
شمروخ وأصيل .. يا لسان يا طويل
من سنط النيل وغنا الملاح
ألفه وعريف .. له ضل خفيف
فى مدينة وريف.. نبقتة تفاح

لا كان طماع .. ولا صاحب باع
لا احتذى بقناع .. ولا جنى أرباح
عاش عمره يا خال .. مشغول البال
لجميع لأقوال .. عنده المفتاح
كان زى النيل .. مش قلبه - قليل
فى الليل الويل .. قلبه المصباح ..
ساحر وطبيب .. ولبيب وأريب
لذا غلبه الديب أبو ناب سفاح ..



الديمقراطية

ما دمت مش ح تباصى لى .. مضطر ألعب لوحدى
ح اغضب واشفى غلىلى .. ولو ما جيببت اجوان
مش قلنا بطل مداوره .. يحلا الوفاق بالمحاوره
لو كنت فعلا خلىلى .. يساعينا أضيق مكان
لبستنى ثوب فريقك .. جرجرتنى فوق طريقك
أخذت كدبك دلىلى .. ضعفت فى الكيان
ياما شلت عنك بلاوى .. يا محترف نص هاوى
ضيعت بالخوف سبىلى .. عشمان أعيش فى أمان
فكفاية عك وغتاته .. لا أنت الوحيد فى التباته
ولا قمر نص لىلى .. ولا حتى كابتن زمان
إعتدت تلعب لوحذك .. زى اللى قبلك وبعذك

عايزنى أهزّ لكو ديلي .. حمار وألبس حصان
لذا راح العب لوحدي .. يمكن راح أكسب واعدّى
حقى أكبّر قليلى .. أفك عَقَد اللسان..
وبدال ما تلعب فى راسى .. إخزى شيطانك وباصى
لعب الفاجومى الجهولى .. مايليقش غير ع الجبان



الشعر

● الشعر عمره ما كانش دواء
ولا حرفته للحزن شفاء
الشعر أصلا هم وداء
واقروا الفواتير بالأسماء
متقسمة حسب التقارير.. مرضى وشعراء
فيما اللي مضروب حد الموت
واللى انطرد بُه من الملكوت
وفيما كام كان ندل وشرموط
ياما اتحسب شيخ للأدباء .. ذلّه وغباء
وأنا اللي سنّدت زمايلى
دلعتهم تحت خمايلى
ليه قطعوا كشف جمايلى
جلدونى بحبال الأشواق .. حرمونى الماء

جرحى انفتح ما اعرفش إزاي
ملخوم عن الراح بالجاي
بادلت وعده باللى معاي
رجعت باطى وألف سماء .. سلو العشاق

أنا فى العزب ياما شيلتك شيل
وف أوردى أبو زعبل بالليل
طا طيت لروحك عاصى الخيل
فلتنا من أسر الأعداء .. حتى الشهداء

ألف وبراء اسمع منى
أنا ما اشتكيش اللي هاممنى
يوم شففت نابك كل منى
حسيت منابك بحر دماء .. وده أصل الداء

الآ آه على حروفي فى مجاريح
أعمى ومليت الكون مصابيح
والسكة بتوسّع للريح
لذا ما اتحسبتش م الشهداء .. ولا م الأعداء

هدم التاريخ الجغرافيا
يا بليد وفرحان بالعافية
جيبنا لنا أيه غير الكافيه
ونقعت قلبى ف طشت غياب .. عندى الأسماء

فكرت عمري ح يشفع لى..
وان القتييل راح يسمح لى
والعسكرى ح يوسع لى
ضيّق عليه باب الأرزق .. الزرعة هباء
وقعت من فوق سطح الغُول
جمل وطالع نخله يقول
سيفى ح ابادله بقدره فول
الشعر ما عادلوش ترياق .. غير ألف باء
لكن ح ازك واكمل بيه..
يجوز شايل لى شىء ح الاقيه
وان مالقيتش اتكفن بيه
وأعيش به حجه على الأحياء .. علّه ودواء



الشهيندر

ح تفكر .. تتكدر .. ومزاجك يتعكر
فالأجدر أن تحذر .. تحلم أو .. تتذكر..
هذى بلاد خرفانة .. قرفانة وجعانه
لو باتت شعبانه .. ع الجوع راح تتحسر
ضاربه المخ طبنجة .. شايفة المشمش منجة
عقلها ولا اسفنجة .. واتعصرت فاتحجر

على قد ما تديها .. بتشوطك رجليها
وإن طبطبت عليها .. ح تبيحك ع المكسر
الخوف خوَّخ راسها .. دوَّخها فى وسواسها
واللى كتم انفاسها .. تحمد له .. وتكبر
كدابه باصدقها .. على عيبها وباعشقتها
وإن كان نفسى احرقها .. يمكن ليها .. ينور
وتفوق م اللى هابلها .. وع الهايفة مبللها
ومحرَّوق قنديلها .. ومشخبط فى المنظر
حامياها ال .. حرامياها .. اللى مغمى عينيها
وبكيفها بيرميها .. تحت كعوب العسكر..
وبترفع له الرايه .. حدوته بلا نهاية
ميت لون الحرية .. فى عباية شيخ منسر



العشرة

ليك ذكرياتى .. وحدود حياتى ..
وإن كان شويه، ليك اللى آتى..
يا أصيل وطيب .. هواك قرَّيب
يوم إن تغيب، رضاك مواتى
فى بحور غرامك .. أفرد قلوعى
عسل كلامك، حجَّة رجوعى

يا ابن الأكابر .. حَقَّكَ عَلَيْهِ ..
حرام تكابر، دموع عينيهِ
مشوار سنيننا .. كان ودَّ واصل
جمعَ ما بيننا رغم اللي حاصل ..
فى دنيا صعبه .. حلاوتها حيك
باسم المحبة افتح لى قلبك ..
وانسى الأسيه .. أنا جيت لبابك
أوهب عينية وقلبي لشبابك ..
فى دنيا فضى .. برضاك راح ارضى
مين ليَّه غيرك .. ويا ريت ح ترضى
بذكرياتى .. وحدود حياتى ..
وإن كان شويه ليك اللي آتى ..!



الفاكس المضاد

(ملحق لتأكيد الإستقالة لا يصلح حزنه لبرودة أجهزة الفاكس)

أبكى عليكم وإلا على نفسى
ياللى انتو يومكم من جراح أمسى .. النار تخلف رماد
إيه المدى اللي انتو ارتجفتُم فيه؟
وأنا عارى زى الشمس كيف ح اخفيه
سقطت جميع البلاد
كل الرايات ما وقفتش النزيف
كل البنات اتحججت بالرغيف .. والسوق شحيح الزاد

ميين فينا يملك صك حرّيته٩.
 يقدر يقرّى ع الملاء عّته.. يكسر بخاطر الولاد
 الغدر واحد صدّق والا شكوك
 خزنة رصاص تحميها خزنة بنوك حبل النجاه صياد..
 فى خمسة يونية الدّبح له وقفه
 نبض الحياة أرخص من الشقفة الشعر صار جلاد..
 الحزن كان له وقت فى المواويل
 صبح الصباح والذاكرة والنيل الحلم مش قواد
 عشرين سنة خمسين سنة يونية
 ما عدتش تفرق سينا من سونيا قفلوا ببيان لاجتهاد
 أدى لحمى خبز ودمى فى شعرى
 يا من حبيتوا العمر فوق حجرى.. حلّت سنين الجراد.
 يا مفطومين ع النّى هيا انهشوا
 من مدة ماتوا اللى ارتشوا واختشوا زعيمكو بدأ المزاد
 فاختاروا ما شئتم من الأيام
 واتمرغوا فى الوحل.. بالأحلام راجعة الهزيمة بميعاد..
 كان خمسة يونية وكنا عز الضهر
 والعهر سايق الملعنة ع الطهر والخسة طعم الوداد
 فاكفى ماجور يا شعرع السّيرة
 يكفى رغاوى المر فى البيرة والحسرة فى الأكباد.
 ما تنتظرش العدل من معوج
 ولا صياح الفجر من فرّوج .. أمره بإيد لاسياد..

الهلوسترم العيا الأخير!!

يا طبيب .. أنا قلبى مش مُتعب .. أنا مدبوح..
بیر الكراهةً طفح طالب دمی المسفوح..
وح يعمل ایه قلب فركه العصر فى كفوفه
وشمت فى خيبة هواه اللی عماه خوفه
فاستسهل الغدر واستهبل على قلبی
قلبی اللی ساكنه البشر بالحب.. حوش وسطوح!
موالی باکی وأنا لا شاکی.. ولا مكسور
أنا اللی ما ذلّنی منفی کرهه ولا سور
عطيت ما خدتش، عبيط ويَعْبِطى باتباهی
داريت عيوب العويل والواطى والعاهه
علشان رباية الأصول أيام ما كانت أصول
يشهد لى (باب توما) بوصول الأمانة لـ (صور)!.
أنا الرسول اللی كان قرآنه عشق الوطن
فى حب مصر اللی لستّه لم نساء الزمن
سینا شراع السفينة - قریبة یا أحلام
حبیت رنین الكنایس والأذان والعرق
نجم الأمانی برّق.. عُمِر الأغانى انسرق
غاب الأمل وانطفأ .. على إيد رفاق المحن!!
فأمانة یا قاتلی.. لا تمشى فى جنازتی..

هَوْنٌ عَلَيْكَ حَسْرَتِكَ أَنَا ذَنْبِي فِي رَقَبَتِي
هَانَتْ عَلَيْهِ حَيَاتِي .. هُنْتُ عِ الْأَنْدَالِ
عَمَلْتِ مِ الْلِيَّ قَلِيلَ الْأَصْلِ عَمِ وَخَالِ ..
أَوَّلَ مَا فَتَحُوا مَزَادَ الْبَيْعِ نَهَشَ لَحْمِي ..
حَيَّ وَدَبَحْنِي .. فِدَا .. لِلنَّاكِرِينَ آيْتِي ..

يَا حَسْرَةَ الْأَنْبِيَا فِي مَتَاهَةِ التَّفْكِيرِ
تَقْطَعُ لِسَانَكَ وَتَنْطِقُ بِاسْمِي تَبْقَى أَمِيرُ
حَبِيبِكَ الْإِلَى تَحِبُّهُ دِهْ وَهَمَّ مِ الْمَاضِي
إِذْ كُلُّ مَهْزُومٍ بِحَزْنِهِ قَاضِي مِشْ قَاضِي
وَكُلُّ مَا زُومٍ فِيهِمْ مَا تَفْرُضُهُ اللَّعْبَةُ ..
مَخْبِيٍّ مَا أَرْزَمَهُ فِي مَرَايْتِهِ وَاتَّخَبِي ..
لِحَدِّ مَا أَنْ تَمْلِكِ رَقَبَةَ الْحَسْبَةِ ..
وَرَمَيْتِ جُرُوحَ الْحَقِيقَةِ فِي سَكَةِ التَّكْفِيرِ ..
فَاخْرَسَ وَمُوتَ يَا سَمِيرَ - بَابُ الْجَحِيمِ مَفْتُوحُ !



العبرة

مَنْعِينَ أَجِيبَ نَاسٍ لِمَعْنَاهِ الْكَلَامِ يَتْلُوهُ ..
يَا لِي قَرِيتُوا سَلَافَةَ شَعْرِي مَا فَهَمْتُوهُ
أَنَا كَتَبْتُ اسْتَقَالَتِي مَنَكُو دَمِي ...
عَبَّرْتُ عَمَّا ضَنَّانِي حَسْرَتِي وَهَمِي ...

لا جرحت حدّ ف إيمانه ولا غدرت بعدّ
وكان كلامى احترامى للسنين الجدّ..
ساويتو بينه وبين اللى فى غباوه باعوه..
منين أجيب ناس لمعناه الكلام يتلوه
عايزين قتيل الهوى يغفر لمن قتلوه!!
يشهد عليه صحابكو ف سوريا وف لبنان
لا كنت بيعاً هوا ولا صبى فى دكان..
كان حزيكم يستريح فى الغُريّه على فتىّ
أنا اللى تحت الحصار كان باسمكو يغنى
وتقولوا (شخصية) لأ ده رغيفكو وخبزتوه..
ومنين أجيب ناس لمعناه الكلام يتلوه..
تاريخ وبالدّم كاتبه، بالخبل تساووه..
فلا عيش ولا ملح ما دام التاريخ نسيته!!



ندى الحرية(*)

باحب البحر فى عيونك .. وليل الصبر فى ضفايرك..
أقول للريح على لونك .. يسكرنى عبير زهرك..
خدينى أحضن الشطين .. وأشرب بالحفان نيلك
أبوس أرضك هرم وحسين .. وأغنى أحلى مواويلك..
وأبكى كل من هجرك ..

يا ليل يا عين .. طريقك فين .. وضلك إمتى أوصل له..
أميل ميلك .. وأشيل شيلك .. واقيد النور لمين ضلوا..
يلاقونى ف مسا .. قمرك ..

يا حلم وفى القلوب صاحى .. معاكى قرئت صعيب خطه
وفجر اسهر له صباحى .. واريح راسى على شطه..
يعوض بالفرح صبرك ..

راح ارمى الحزن عن كتفى .. واحوش عنك رياح الموت
واجى لك روحى فوق كفى .. واكون يا جنة الملكوت..
جسور بيكى .. ومستغنى .. ومستكفى وعالى الصوت..
تعيشى يا مصر ..

ندى الحرية يسقيكى بروح العصر..
إيديه شابكة فى إيديكى ليوم النصر..
جموع الشعب تحميكى وتروى للأبد شجرك.!



(*) من ديوان (وردة على خد موسكو).

على شط نهر الدون

تسلم عيوتك يا (مها) لبنان .. ياإنسانية مصورة فى صبيه
تسلم .. ويسلم شعبك الإنسان .. وتشوفى ويا حبيبك الحرية..

...

لو كنت (جنى) كنت ابنى قصور
وازرع جناين عشق من غير سور
لصبايا (صيدا) .. وصيادين من (صور)
زرعوا غنايا ع الشواطى زهور..
فتحوا لى طاقة فى الظلام من نور ..
يا شعب قدره يفدى البشرية..

...

ياما نفسى يا (لبنان) أزيح الخوف..
واخذك فى حضنى ف كل أرض نطوف..
وليل (بعلبك) يضوى فى (روستوف..
ميجانا وعتابا .. وليل يا عين .. يا بهية ..

...

ياما نفسى لكن كيف وأنا عصفور..
مكسور جناحه فى غربته مأسور
على شطكم لما رمتى الريح .. صرت الشهيد اللى عليه الدور..
وعرفت بلسم جراحى .. يا أشرف المجاريح

يا من صبحتم حقيقة عصرنا الجافى..
هزيتو قلب الوطن .. صارت بلادى منافى..
امتى يا نيلى توافى .. صافى .. متعافى..
تعديل مسار الزمن .. وتعديل الموازين..
تطلق طيور الصباح من كافة الزنازين..
وتجمع الشغاليين .. من كافة الميادين..
يشفوا جراح الوطن بالبلسم الشافى!.



مدينة العمال

يا حلاوتك على قدك يا أمه .. يا أم الكادحين .. شهداء وينا
أنا بستك على خدك لما .. شفت الميادين .. ملايين وغنا
وقطفتك من وردك ضمه .. دانا واد فلاح .. واخوالى هنا..
لنا فيكى نصيب .. رفقه وسلاح .. يا شفا وطبيب .. يا دوا لجراح
الدرب صعب .. ولقانا صباح .. والوعد قريب .. والآتى هنا!.

...

جدى الشقيان .. كان حظه قليل .. كان واد إنسان
غاوى المواويل .. ييحب الليل .. غنوه وحنان
أسره الخوان .. وسقاه الويل ..
والقدر جبان .. والظلم عويل..
وده جدى وكان .. عامل وأصيل ..

وصانى أكون .. زما هو ما كان..
لو مات عطشان.. يفضل عشان.. فى ورود النيل..
ومع الشقيان.. فى كل مكان .. عمره ما ح يميل
وأنا أصلى سليل .. لأعز ضنا..
...

طالع م الطين فارس خيال
صحرا وبساتين .. علما وعمال..
ملو الميادين .. أطفال وخيال..
وأنا كنت عليل .. وشفيت فى الحال..
ومشيت فى هواك .. ميت ألف سنة!.



إحنا العمال المصريين

إحنا العمال المصريين.. م النيل راضعين.. م الطين طالعين
على فجر العدل الجاى رايعين.. ع الشوك ماشيين.. لكن قادرين
صاحيين صابرين
علشان يضحك وش بهية .. ويقوم من قبر القهر ياسين..

احنا العمال المصريين
جدعان فى الفرحة وفى الأحزان..
وإن طال الجرح احنا الانسان
عايشينها دموع .. الخوف والجوع

لكن.. لا نذل ولا نتهان .. وايماننا شموع لجموع جايبين..

احنا العمال المصريين

ياما شيلنا الهم جبال وسطوح

تراحيل بيكيها حمام الدوح

غربة وجروح .. وحمول بتزيد بين نار وحديد

تسبقنا وتلحقنا المواعيد .. مطرح ما نروح

الوجه صبح .. أشواقنا ل بكره ترد الروح..

الغربة أجل وأكيد راجعين..

احنا العمال المصريين

إن غابت شمس الحق يا ناس.. الظلم عويل.. ومالهش أساس..

بشاكوش وقادوم وبأجنة وفاس.. ويقلب سليم بيدق حماس

وبوجه بشوش .. وضمير حساس..

ح نعدى بحور الموت والويل..

نشق بسيف الحق الليل .. بالدم نقيد شمس الملايين

احنا العمال المصريين

إحنا الفرسان فى الفابريكا.. وحدتنا سوياً عواصف ريح

لا تقول صهيون ولا أمريكا.. قلبنا بالعري سلاحه فصيح

على كل سجون الظلم نقوم.. ما حيقسمناش إسلام ومسيح..

جمعتنا آهات الأرض هموم.. وخذتنا الفرحة لحلم صريح

يا اولاد الأرض يا مصريين .. يا إيدى قـادريـن
وقلوب صاحيين .. زبحوا القضبان .. هدوا الزنازين..
خلوها غيطان ورد وياسمين .. بساتين للشمس ومزيكا..
عدل وحريّة.. لفلسطين..
احنا العمال المصريين!



المنصورة(*)

اللى نشاكي يا منصوره .. رسمك على كسمك صورة
خلا فرنسا المأسورة .. تشهد وتبصم بالعشرين

...

حطك على النيل يتباهى .. ع الدنيا .. وما فيش إلهها
أستغفر المولى - إلهه .. من صنع إيد رب العالمين

...

الورد فوق الوش حدود .. على كافة النسوان موجود
إلا فى بناتك مالو حدود .. ألوان واشكال صلاع الزين

...

يا عيون غسل على برسيمى .. حالف أتوه ما ترسني
أنا أمى عاشت تَوْصيني .. ما اتويش عن ذنب العاشقين

...

كبرت وأنا بحرى صغير .. وشبت ما قدرت اتغير
عشقك فى قلبى ومتحير .. أخبى وإلا أخزى العين ..

...

من صغرى خايلنى خيالك .. بلبلى بلبلى بلبالك
حملنى أحمال أحوالك .. طَبْ ليه ما يكملش الحلوين

...

(*) من ديوان (مواويل لميت سلسيل).

تاريخ قديم هنا يشهدك .. تفرق الظلم بعدك
عز وغنى وفقير يجادلک .. فتبعترينا يسار ويمين
...

شيوخ وفقها اشتراكية .. مصر الفتاه على وفديہ
متعصبين بيك وطنية .. شهود ملك على وطنيين
...

والمنزلة غير الفروسات .. وأجا ما تشبهش البجلات
ولا ميت مرجا وويش اخوات .. دا كل واحد فيك اتين
...

لذا قلبي حسرتنى عليكى .. حببت وما قدرت ارضيكى
فيه إنه لابده ف اراضيكى .. وداء مسلسل م الفراعين
...

وما اشبه المنصورة بمصر .. عشه وكشك على باب القصر
بدقن عيرة تهزّ العصر .. والنصر غنوة يا منهزمين
...

بايتين ننطق فى الكورة .. يانحك فى الحاجر القورة
تسألنى نفسى مكسورة .. يا عُمرميت سليل راح فين؟!



الحلزونة الدقهلاوية

لأهل بلدى شوقى نده لى..
أنا المتيمم.. فنان دقهلى
من صغر سننى صاحبت جنّى..
بقى طرح فننى من فرح أهلى..
...

ورد الدقهلية.. عطر أشمه
وقمرها شهرى.. بالفن أتمه..
ولما منية سلسيل.. جابتنى
خطفنى (شربين) وشلت همه..
...

فافهم يا ولدى.. واياك تبسبس
صحّصح وفتح واوعى توسوس
خلى فؤادك للحق شمعة..
تتول مرادك.. والليل مدّخمس..
...

(أشمون) هدانى لerman (جديلة)..
قصّينا (ميت ضافر) (الطويلة)
كانت (الرميلة) (الصفاء) (نقيطة)
(نوسا) (البلاقسة)..
غلبت (وليلة)..
...

بركت جمالنا م (الحاكمية)..
(الريدانية) عطف علىه
النيل أمرنى فى السر أقرأ..
ورّد (العصافرة) ع (الشيخ عطية)..
...

قامت (العجيرة) على (كفر لاطرش)..
لما (الطوايزة) طلبت نغطرش
روحنا نصلى القضا ف (دميرة)..
(الطاهرى) حظه (الربيع) منقرش..
...

(عصفور) (تفهنا) غنى (لسماحه)..
لكن دموع (الشهيد) فى (بطرة)
عملت فى (كفر العرب) مناحة
على (كومها لاحمر) (نجير) ندائى..
يا (حاج شربينى) يا فدائى
أبدا .. لا يمكن (بهببيت) ح تفرق
...

(طرانيس) طيورها حمت سمائى..
(شنهاب) هواها فى (ميت سودانى)
(ميت غمر) جانى .. جالى الصوانى..
...

(كرم) (الجعافرة) عزموا (الجليلة) ..

خبزوا رغيف (السميط) (شومانى) ..

...

(بلقاس) وعدنا (شنباس) أخذنا ..

و(طناح) (جناح) الحماس بلدنا

لكن اختلفنا (حجاز) (شوامى) ..

سنيت (حسامى) أمل ولادنا ..

...

وبذلت جهدى عشم فى (بذله) ..

(سنجيد) دى حقى على المنازلة

ساوموا (الحجايزة) .. تجار (فشالك)

(سحارة) تاكل .. طالعة ونازله

...

(دنديط) و(بلجاي) فى ليله (مالحه)

سرقوا (القرىعى) من (الفرايحة)

قلوب (سنشنا) نبضت (خضيرى)

(بالخمسة) جايه .. م (السبعة) رايحة ..

...

ومن (اللطايفة) (النسايمة) شاعر

قلبه (لقولا نجيل) مشاعر

من عشق (بشّلين) (للأحمدية)
بالمأمورية) .. طار ع (الجزاير) ..

...

قالت (مليجي) .. يا (كومي يا اخضر)
قلبي خطفني على (كفر لا عَجْر)
لو كل فارس (ظفر) بحبه
كان (شيخ سليم) اکتفی (بلا حمر) ..

...

وكان سيوفى اللى (ميت حديد)
كسرت سلاسل (بنى عبید)
و(ابوطه) عدى لـ (أبو ماضى) يكتب
(لميت كِنانة) تاريخ جديد ..

...

وكان (البهاتى) غلب سكاتى
من (كفر غابها) لك (باجلاتى)
لـ (دموه) لـ (سرسُق) .. لـ (شبرا هور) ..
ذنوبى تغفرها (صالحاتى)

...

دى (الأورمة) خرجت من ألف نكسة
عتبت على (البوها) و(الدراكسة) ..

قالت إحنا يا للى (للنصر منيه)
ليه (النظارة) (الشبول) معاكسة

...

دا (غراب) و(غازى) بلبل لى.. بالى..
ما عرفت (جمصة) م (الشيخ هلالى)
(ميت بدر) شافنا والد (كفر) ضلمة
(الربيع) قادللى (كوم نور) يلالى..

...

قالت (المسيرى) (دهتورة) حرّة
(الحصوة) صرّت (دماص) فى صرة
(إخطاب) يا (أبو دشيشة) (صاحيه) (قايمة)
و(المالحة) يا (كردى) ع (الشط) مرّة

...

حكاها شاعر (ميت غمر) عاشق
ع (القصبى) غنا (للروضة) صادق
(ميت بزّو) وزّه على (برق عزّه)..
ليه يا (قبايل) ما احناش شقايق

...

كوم (اليهودى) يا بيوت (تميدة)
لخبط لى (يزبك) على (بهيدة)..
(نعمان) فاجئنى على يم (صدقا)..
٢٨٨

قال (يا ابو خالد) (فيسكو) عنيدة..

...

(قنیش) (خليج) (الرخا) السنة دى
و(درين) ديونها شل اقتصادى
خلفت ميعادى مع (الحواشة)..
و(الدري) دريك (نعيم) بلادى..

...

أنا اللى علمنى (ميت مجاهد)
أخلص بحقى من (ميت معاند)
حزنت لما (الكرود) نكرنى
و(الروك) (بطاش) (الأليط) (مواجد)..
...

بدلت (دبوس) شلت سيف
ومن (الحصاينة) (لميت شريف)
(البيضا) نطقت (سلام) مريع
و(الفاويه) قلبت (ربيع) خريف
...

طب حاسبى م اللى (عساس) ومدمن
لو حتى عامل (ميت خولى مؤمن)..
(الدقادوسى) .. كان اسمه خنفس
ولسّه رمانا فى قهر مزمن..
...

خَجَّلْنِي خَوْفِي يَا (سَاتَا مُونِي)
أَهْل (الْجَنِينَه) مَا خَوْتُونِي..
فِي يَوْم مَا ضَيَّعْنَا حَلْم (تِيرَة)
أَهْل (السَّنِيْطَة) مَا ضَيَّعُونِي..
...

كَبِرْت (بَسْنَدِيلَه) بِالْأَصُول
شَافْت (الْوَسِيلَة) ل (طَمْبُول) تَقُول
(تَلُول بَرَارِي (سَلَكَا) (الْقَرَارِي)..
وَصَلَّيْنِي مَكْرَه شَطَط الْوَصُول..
...

(صَهْرَجْت) وَقَعْت فِي (الدَّنَابِيْق)
رَمَاد بِيْوْتَهَا نَار الْحَرِيْق
(سَعْفَان) يَقُول لَكَ مَشْ كُلْ غُلْطَة
دَا الِّي (غَازِيْهَا) أَخُوْه شَقِيْق..
...

وَأِنْ قَلْنَا غُلْطَة (طَنِيْخ) بِسَيْطَة..
(شَنْبَارَة) هَجَّتْ مِنْ الْخَرِيْطَة..
دَمَآغَهَا وَجَّتْ وَلَا (بَرْجْ نَوْر)
(غَمْرَاوِي) خَدْنَا لِعَصُوْر وَسَيْطَة..
...

وأنا جدى (عاصم) نجار زمان
(عنتر) و(فارس) حلو اللسان..
(عدلان) وبارع ولا (ميت مزارع)
مريى (لوزة) ف غيط (القنان)

...

أخذلى (مشتول) سبيل و(متوى)
وقال لى خدلك (ضهرية) فتوى
إذا (ميت تمامة) .. قلبتها (مالحة)
(نجير) يعسل تمباكها (عطوة)...

...

فى (الخيارية) .. أنا جت لى فكرة
(الترعة) تفتح على بحر بكرة..
دى (الليلة) لما (خلف) ميعادها
حمّت ولادها بميعة عكرة..

...

وأنا لوح يرضى (الحلوج) عليّه..
هوى (الطوابره) .. فى (اسكندرية)
وف بر (طلخا) (طوخ القلام)
(شبرا سندی) فى (النيسيمية)

...

لـ (طمأى زهايرة) يزيد حنينى
أحضنها نرقص (سنبلاًوينى)
على لحن شايبه فى العشق دايبه..
(لتمى) سرقت شباب سنينى

...

(تلبانه) خبزت قلبى الرهيف
على نار (حفير الشهاب) رغيف
(شبرا القبالة) قالت عداله..
زيتنا ف دقيقنا يا (نوب طريف)..
...

خرجت أززع غيط (الرياض)
تقليه (بقليّة) كله زاد
رهنت قلبى (النشا) و(فيشا)
(ديمشلت) باعتنى فى المزاد..
...

وأنا اللى خالتي (بلقاس) حويطة..
خبيتى فى حضن (ميت غريطة)
ووصلتنى (للجـهـوـريـة)
قالت جراح الفنون بسيطة..
...

غنيت صبايا (سلمون) قماشها
عشان نقشها نقشه فراشها
دا أنا ابن (بيرم) وفؤاد أبويا
على قد ما عشقنا قلبى عاشها..

...

فبلاش يا (عزّون) ما تجيش عليه
ما دمنا عيلة وأمك عليه
زجلها مالى قلبك مشاعر
ضد المسّاخر (الثعبانية)..
...

تاه منى قلبى فى ليل خسيس
و(المطريّة) كانت بصيص
(دنجاى) لحقنا ف (شها) وفكر
كيف (لا ام رزق) نصيد العريس..
...

ولو طاردنا (ميت ألف عسكر)
فى (ديسَط) لما تروق ح نسهـر
تحمينّا (سنفا) حب و(كرامة)..
و(قلْبُشُو) بكره بعيالها تكبر
...

لو حتى (طهواى) هجر غيطانه..
هدم كيانه (قَيّطون) زمانه
وخلّا سيف (ميت شرف) يتلم
يصيغ حمارته .. ويسوق جنانه..
...

ويصير فى توهة من (المقاطعة)
(بانوب) ح يفتش له سر (باتعه)
لو نورّ الفجر (ميت يعيش)
يشوفها ضلّة والشمس طالعة..
...

ساق الرزّاله عبط عناد
فات (الغزّالة) هجر البلاد..
وأما ابتدا الرقص.. قام تحنّجل
خلف (دكرنس) يوم الميعاد
...

(نبروه) فى بالى يا (ويش) يا غالى..
أنا بنا بيتى وأبو عيالى..
لكنى تهنا فى بحور (صافور)..
و(للرّحامنه) سرح خيالى..
...

حـيـرنـى (صـارم) بـلأ.. ولا!!
وطاوعته لما قال لى .. (هلا!)
لكنه جدى اللى سره بـيـر
حـذرنـى م المشى حنجله..

...

قابلى (شماسى) فى سرنجاً
سقانى قهوة محووجة
(خيرون) سبقنى على (ميت سويد)
وعطانى فيـزة أزور (أجا)

...

(شيوه) عرفتتى على (وزير)
وقالت لى لازم تـكـون كـبـيـر
(بدوای) خدتنى مقاس مقامى..
وحذرتنى أسوق حمير

...

و(أبو حـجـى) قال لى إياك تعسس
لو (سنتماى) (البسيط) يتريس
أشك فى اللى طلب السلامة..
واشبع بعرقك.. لو فول مدمس..

...

(بساط كريم) الأصول دعانى..
رطب لى ريقى م الحلم تانى..
(بدين) صديقى.. قال ده حقيقى..
بجناح حصانك ح يطير لسانى..
...

فى (كفر علام) صديق صديقى
جاء لى قماره من (الزريقى)
(بهوت) مداها وصل نداها
جعلت طريق الوطن طريقى..
...

حفظت مقامها (سنبو المقام)..
عجبت (محلة مشاق) تمام..
من صهد شعرى (برقين) تشمس
وقالت لى بكره.. ياما فيه كلام..
...

(سلنت) آخر البلاد يا خالتى..
من قمح نابت شرف.. خبزنى..
(شربين) دعانا.. بس أنت ناسى..
(ريعاتى)..
أول غوايتى
...

و(أبو داود السبّاخ) يا عامل..
فى (الْفُرْقَا) رغم (الْفَرْق) تواصل..
من أرض (فَيْشَا) .. نَقَى (الحشيشة)..
(الميهى) غنى وحكى اللى حاصل..
...

أَمْى قالت لى.. لو إن (ناصر)
فى (الْحَوْتَه) زارنا .. والا (المحاجر)..
(المعصرة) كان حفظ جميله..
أنا قلت يا أمه.. شيطانها شاطر..
...

وأنا مش معصّب .. إلا لترابها
دى (الجُبّارية) خطفت شبابها
(مسعود) ومكتوب عليه يعانى..
(بنى مراس) من ميراث عذابها..
...

عسلت ريقى .. (نحال) يا طيب
(بشبيشى) وعده (ظَفَر) قريب
و(أبو داود العنب) يعمّينى
آخذ بتارى من (الْفَرْيب)..
...

(سندوب) قالتها .. وقولتتى ..
(دقادوس) .. خدتتى وعلمتتى ..
(كفر حصّة) حكّت لى قصة ..
عن حب خلاّ القلوب ساعتتى ..

...

شئ الله يا سيدى (يا ابن التميم)
م (السّماحية) يبدأ (النعميم)
(دمسيس) و(دميانه) .. جوه قلبى ..
(دالعمدة) خبى ابن النديم

...

شاله فى قلبه (برامون) فى حارة
وف قلبه شعبه (بلامون) محارة ..
من فيكو غنى المنصورة قدى ..
وأنا لولى شعرى خمري (بسمارة)

...

بابى لبكرة قلبى السليم
فكرة وذكرى وتاريخ قديم
وأحب لما أشوف .. أحسس
على قد حسك .. تكون عظيم ..
لو كنت تعرف حقيقة قولها ..

النفس حرة حسب قبـولها ..
ولو نطقت بالحق .. زَعَق ..
دا الكذب ياما قصقص فى طولها ..
الكذب هو اللى غاوى يهمس
إكره تقول الكلام مسووس ..
على ضى واضح من شمس بكره ..
إرجع لأرضك .. إحرب ودعبس
وأعرف يا شاطر سر المهارة
العلم طبعاً نص الشطارة
لكنه يلزم فى الزنقة تغزل ..
خيوط حريرها بحافر حمارة ..
طول عمرى أعرف مين لفّ يتعب
لو مازاحمتش لابد تركب
دى بلدنا سهلة .. وتعبها أسهل ..
واسأل (دقهلة) دَ الأخت أقرب ..
النيل بيسقى كل العطاشى ..
سوا كنت عيّل .. أو كنت باشا ..
دى بلاد شطوطها بالحب وردى ..
والميه طعم الهوى بفاشه ..!

...

وإن كان عليه أنا قلبى طيب
سامحت ياما .. ومارضيتش أكذب
ووعده لازم نحضّر فرحها ..
ح تطيب جراحها فى يوم قريب ..



إنسان بسيط (*)

يا ضى العين .. يا ضمير صاحى .. يا لون القشطة الصباحى
يا نسمة فى حر الدنيا .. بتداوى بالصبر جراحى ..
..

الوالد كنت وكنا عيال .. واللقمة حلال
فين تسرى ح تمرى تزيد أفراحى ..
..

كان رزق بسيط .. لكن القلب وسيع ومحيط
فى رحابة مصر الفلاحى
..

للحق تمللى تحن تميل .. تعمرق وتشيل
تفسل ظلم الليل بصباحى
يا ضمير صاحى ..
..

(*) من ديوان (الطمى واحد والشجر ألوان) ..

فى الكرب القلب الدافى حلیم.. فى الأزيمة كريم
من شمعلك راح أقید مصباحى..

..

وإن كان السوق خداع كداب.. قلاب عياب
خضر بساتینك فى براحى

..

قبل ما یسرى الشر ونكره .. خدنا لبكره
طیر بیّه أفرد.. مد جناحى
یا ضمیر صاحى..

..

وطنى من داء الزور محتاج .. بلسم وعلاج..
وأنت لقهر الجهل سلاحى..
یا ضمیر صاحى

..

دفى لى قلوب كل الأطفال.. بصلیب وهلال
وحدثنا اللى من غیرها محال.. عاشت أجيال
مصر اللى ف قفر الدنيا خیال.. وتاریخ وآمال
فلح وعمال .. هیه لباب بکره مفتاحى..
یا ضمیر صاحى..



بكائيات أم فلاحية

قتلوك غريب بعد ما رجعت لى م الغربة
يا هلتري دول مصاروه وإلا م الغربا
النخلتين فى العلالى لسه مطرحهم
غدروك يا ولدى ومين بعدك يطرحهم
أنا كنت راقياها باسم الله ورسوله
وكيف بتسفح دماها ياللى قرئت قوله
أمانة ياللى تزور أسوان وكنايسها
دم ابني حنا كعوب رجلين عرايسها
طول عمرى ما رفعت صوتى ساعة صلاة جارى
علشان مشاركتى فى صلواته أسرارى
إمتى يا جاه النبى تنفك دى الكُربة
دا هلال ده وإلا صليب اللى على الطربة
يا ست مريم أنا ابني دمه رحمة ونور
كان بالصلاع النبى مخضّر غيطانى البور
يا ست مريم أمانة يا ستنا نفيسة
ترتلوا الفاتحة رحمة لطفه ولعيسى

هو الرصاص يا ابني فرض جديد فرضته لى
لألضم به عقد الوطن التى فرطته لى
...

أمانة يا ابني لتدعى له ما تدعى عليه
دالرب وحده اللى قادر للوطن يهديه..



الصبر قهر جميل

أنا بعث عمري لجل تزيينك
وجميع يتامى القلب عايزينك
لكن اللى قاطع خيط موازينك

مستكثر الفرحة على المحازين

جعل الأسمى تتسى هجايتها
حسرتها ما وقت خسارتها
أصبح ميزان الناس جرايتها

والقرش صار الشفعة للخائنين

الطين ما ح يضرش بالأوهام
ولا قتل أحلام الجمال إسلام
الجنة مش خلفى أكيد قدام

كاسر جناحي ليه باسم الدين

ريح الوطن رفرافة فى شرعى
وخنجر مكفروس فى أضلاعى

ح تعيش بموتى إزاي وإخضاعى
 وأنا اللي حامى العدرا بالحرمين
 واحنا اللي كنا ولسته كما كنا
 تعبنا أيوه لكن ما خنا
 لا الجهل فرض ولا الدماء سُنّه
 ومصرح ترفرف وبالجناحين
 فلمّ م الطرقات مساميرك
 ظبط على سير الوطن سيرك
 باب السما مش طرف مناخيرك
 ولا أميرك كان وصى المؤمنين
 الغدر يلبس فى المجاعة شجاعة
 والسوق يقطع نفسه للبيّاعة
 وأنت تسوقنا للندامة جماعة
 نتوه عن السّكة شمال ويمين
 تشعل جراح الوطن تُشرخ فى قلب الناس
 لجل الصّدا يغطّى القدوم والفساس
 ونهيم على وجّهنا ونكدّب الإحساس
 والجهل عيبه ولو خفى ع العين
 إتوضّأ واقرأ فى كتاب النيل
 قرآن وإنجيل نغم متوحّد الترتيل

قلبي يحس السبب والحكمة في التنزيل

دى مصر بعد النبى شفيعتنا يوم الدين!!.



تاريخك الموالم

دارى خضارك لا الحسد داير

عينهم عليكى من زمان الجوع

على رأى ما كان المثل ساير

الى اتخطف م العمر مالمو رجوع

بَعَتْ الخليفة الوالى نُوابُه

كما الفريه فى ظلام البيد

حلبوا عروقك غصب ولا سابو

إلا مواسم حزن بالمواعيد

معاوية على قلب الهرم لطالون

عسكر وحسبه وكذب وطبايع

ويوم ما عسلك قَطَر المأمون

بعتى الحصيرة ونمتى فى الجامع

تاخذ قوافلهم ولا بتجيب

والوالى يرحل بس.. لما يموت

بیربى غیره عتّه فى السرايب
ینطع الكرسي كما البرغوت

یا مسلمین : ابن مریم شب علی حجرى
أنا یاللى حورس عشقه ربانى
طول التاريخ ویا حاجى علی سّرى
دم الحسین من جهلى نجانى

ولانى عاشق للخضار والبحر
وقلبى أبيض وأمىّ فلاحه
بنیت بإیدی القلعة تحمى القصر
ووهبتهم قوتى بكل سماحة

خوفنى أبویا مکاید الفرعون
حطّیت هموم خوفى علی بابہ
أصبحت بالجبن میت وبالأمل مجنون
باحلم بجنة مین اتوعّدنى بعذابه..

أنا خدت مریم وأبنها وحمیتها
من رملة الصحراء بالآیات وبالتنزیل
ورويت بدم الحسین والشهدا نخلتها
بارکنتی بدموعها فى حضن اللیل

كفينا على فَمُ الخبرِ مواجير
مادام ميراثا العدلُ يوم الدين
رضيناها قسمة حزمة الجرجير
وللأمير القراولة والعسل والتين

خدنى فى حضنك يا تاريخ وارحل
لبكرة مع إن القديم يحلا
الصبر صابنى بجهل فى مقتل
والخوف حَبَانى بعلتى جهلاً..

أصبح لسانى بينخرس عاجز
وأنا اللى قلبى حافظ المواويل
تلسعنى دمة إيزيس افرح وأقول جايـز
ملوحة الجهل تتطهر بفيض النيل

وإن كان ح تحكم تحبكى ملايتك..
كانت أمى أجمل فى الملس والشال
وإن غل حكموا وكسّروا مرايتك
اقرى فى عينيه حكايا تاريخك الموال ١.



عشق وجنون

يا مصر حبك جننى .. وأنا بيك مفتون
ما بقيتش عارف أنا عاشق .. والا أنا مجنون..
أنا اللى قارى فى كتابك.. فضل شبابك
ودقت من صغرى عذابك.. فتاجين وصحون
فى أيام تستعتاشر كُتًا .. قَبْطُ وسُنَّه
بنواجه الموت والإِنَّه .. وتكونى.. نكون
للعدل أمَّه احتياجاتها.. قد حاجاتها
الحب بلسم جراحاتها .. والوحده تصون
وكبرت بيكى ولا صغرتش .. بس ما طلتش
لو حتى قلتى فى المشمش .. الشدَّة تهون
من شدَّتكَ أنا من شدك .. عارف قدَّك
أهد من بيدوس حدك .. فاجر أو دون
نور عقلى من جهلى حماية .. فرض كفاية
كرهنى رعى الرِّعاية .. بتوع النّاولون
لذا شلت نبوت أراجوزك .. كل ما أعوزك
تفكى بقى لاوية بوزك.. وتدقّى الهون
وتكشفي اللى خلوا بيكى .. شلوا إيديكى
ويحرضوا الأعدا عليكى .. ويربوا دقون..
الفقر حايِس فى ديارهم .. عامى بصرهم

ويقطعوا جذر شجرهم .. بيارود مجنون
لا صانوا عيشك ولا ملحك .. انكروا صالحك
واستبدلوا فضل مصالحك .. بمصالح دون
ويا الغريب خربوا مالك .. وقفوا حالك
بالفتنة قسّموا أطفالك .. بالدين واللون..
ويفرّقوك قبط وإسلام .. قسّيس وإمام
تعمى العيون ننسى الأحلام .. والخيبة تكون..
تتفرّجى عن أخلاقك .. ألفك بائك
وانتى اللى عارفه أعدائك .. من يوم فرعون..
انتى اللى علّمتى شعوبها .. تحس عيوبها
طهرتى بالحب قلوبها ... فحكمتى الكون..!.



مين اللى خنق القمر

مال الشطوط متلبشة وخايفة!
والنيل موسوس / خوف من الفيضان
مع إن أنا من زمان .. وأنتى أكيد شايفة..
بارسم صليبي ويا كل أدان..
..

وشم المسيح .. مرسوم على إيدى..
وياصلى ويا الصبح ع المصطفى..

مين اللى شعلل جمر فى جريدى..
عايزنى أطاوع علّته المجحفة..
...

طول عمرنا نشمه نسيم واحد..
ونقشة الكحك واحدة فى صاجات لأعياد
ليه جاى تربى ديدان القطن يا جاحد!..
وتمحى سَمَت الشَّبّه .. فى خلقة الأولاد!
...

من صفرى سامع أدانى - تسبيحات عصفور
وجرس كنيستى الحزين .. بيهز وجدانى
ليه يزعق الغل بينى فوق ضلوعى السور
وأزاي تقسم فرَح قلبى وأحزاني
...

ياما أمى لبست سلف طرحة جارتنا إيزيس
وكان ميشيل بيراجع لى حصة القرآن
على تختة واحدة.. وزاحمنا لبعض فى الأوتوبيس
حلفت له بست مريم.. وحلف لى بالرحمن!
...

وقرينا ع الشيخ زناى مصطفى وحنا
مع بعض قيدنا نيران الخير فى سبت النور

صلينا صومنا عشم .. نورد على الجنة ..
ولمارى جرجس ندرنا وللحسين بالدور ..
...

فى الجيش خدمنا سوا .. يونية ولاستزاف!
ويكىنا حرقة وفرح فى نهار ما عدينا
خايف عليك يا وطن م الموت مانيش خواف ..
ع الحب عيشنا التاريخ .. حيرنا أعاديننا ..
...

إيه اللى جد النهاردة لجل نتخالف ..
على ما خفاه ربنا الواحد .. فى علم الغيب
داحنا ولاد النهاردة .. الكون مش واقف ..
واللى ما يلحقش عقله بعصرنا ح يخيب ..
...

الفقر والجهل والمرض اللى عاصرنا ..
محتاج يجمع إيدنا .. عشان نواجه العصر ..
نعرف سبب غلبنا وإيه اللى كاسرنا
ونحمى من ليل العمى الحيثى .. مناير مصر ..
...

فيا خلفه الجهل رب العقل سوانى ..
على نهر م الجنة .. كلفنى بفعل الخير!

يشهد تاريخى .. مانيش فارسى باكستانى..

دانا كفى بالخضرة كم عمّر خراب الغير!

...

الدين لرب الفلق .. أما الوطن للكل..

ومصر دى اللى جعلها رينا آيتُه

برّاها كما جنته .. سواها قمح وقل..

برّاها م الغل وحفظها لنا كنانته...

...

والله محبة . يا بلدى كونى للآتى..

ما حد خنق القمر إلا عويل وغريب

والنور تاريخ . ضيه مصرى أكيد وح يواتى..

والدم مش ميه . ليك حضن الهلال يا صليب!.



مصر لكل المصريين

مين عنده القدرة يخوض الصعب؟ مين مين؟

مين يسأل ويجاوب م القلب..

..

إيه اللى يوحد هذا الشعب... مين مين؟

..

مين يهتف نبضه بكل الحب.. مصر لكل المصريين

مين عايز أرضنا ترجع جنة لكل المصريين
ويعود بالحق كيائها .. ومجد زمانها .. على العالمين..
مين يقدر يحمى الدنيا .. اللي كرمها الرب بروح الدين...
مصر لكل المصريين

...

احنا اخوات.. احنا بالذات.. من منف لديروط للبجلات
علومنا منارة.. لكل حضارة.. فنوننا سلام البنى آدمين
سوا كان إسلام أو مسيحيين..
احنا للأرض.. النبض القلب.. النور السارى فى ضى العين
مصر لكل المصريين

...

اغراب كم طمعوا فيكى اغراب وغزوكى بلوكى بموت وخراب
م البحر جايبين.. م الصحرا جايبين.. ومن تواريخ الموت طالعين..
من غرب وشرق شمال ويمين
عايزين يقسموا .. لجل يقسموا .. ويرجعوا عصر الهمجيين..
حيث الانسان.. خايف حيران.. متمزعه روحه جهول وحزين
لانتحت تمثال.. ولا بنا عمدان.. ولاكتب الشعر السحر حلال..
ورسم بالنغم الدنيا حنان.. ولا زيننا حارب الشر الشين
بسماح الحكمة فى روح الدين.. وخذنا ما بين السما والطين
مصر لكل المصريين.

مين قادر حبه يوحدھا .. ويجمعھا تعيد أمجادھا ..
تقبض روحھا ف قلب أولادھا .. وتشف دمة كل حزين
مصر لكل المصريين

لو شاء الرب لجمّعنا .. على دين واحد أو رجعنا ..
للجنة تشفى أوجاعنا .. ولنهر الكوثر والشطين
مصر لكل المصريين

...

يا جرس وكنيسة .. وحس أدان .. الطمى طرح كل الألوان ..
قال لنا هنا قلب الكون إنسان .. حضنه يساعى الدنيا والدين
مصر لكل المصريين ..



توب الحياة

يا مصر يا توب الحياه القصب
يا مضفرة بالقمح شعرك ذهب
ومكحلة عيونك بحزن إيزيس
ومعوذّه أوزيريس مقام الأدب

...

يا مصر وأنتى النيل حباكى جمال
وكفاكى شر الامتثال والغضب ..
نقرش شطوطك بالخيال فوانيس
دَفًّا الحنان حوشك وغَسَل التَّعب

لكن اعذرينى قلبى واكلىنى..
عليك وليكى عليه بعض العتب
ليه حال معاكى وكان محال الحال؟
تصيرى جاريه وانتى ستّ العرب!!

...

الوز خايف من نزول الماء .. وصبح سمارك باهت الملمح
هيه السنة دى من سنين الوباء .. وإلا التاريخ سلّم لريح الداء
صار الرمادى سيّد الأشياء..
رمى القمر فى الغربة متجرّح.. وقفل ببيانك إلّا باب الهرب..

...

هايجة الحدادى مهيّجة الغريان.. وأنتى اللى كنتى كنانة الرحمن
حُضن المسيح ومناير الإسلام .. حكموا عليك الموتى بالنّيّه
وقسّموكى رهينة بالفدان.. مجهزين الحجة قبل السبب!.

...

النيل ده عمره شطك الكوثر.. وطميك الياسمينه والعنبر
ليه الكلام مستخّ.. صبح ساكت.. غيّرتى ليه من طبعك الفنان
اللّى نصفنى من الزمن لاغبر
المشربية ليه بقت دكان.. وضلة الجميزة صابها العطب..

...

يا مصر عودى زى ما كنتى
لجلن أعود كما كنت بيك إنسان..

كان ليه رضىتى تطردى العشاق.. وتفرّى المطرح..
وتفضلى القشلاق على المسرح..
نسيتى أنك نزهة المشتاق..
ياللى نطقتى بأول الأسماء.. وحضنتى أول آخر الشهداء..
راهنتى على عطشك لحد شرقتى
ريق القلل فى الصّهد بيّملّج..
والنخل بالسوس الغريب انضرب!..
...

ح تقولى إيـه؟ الكلمة مغلومة؟
ملوئّه ليه بالكذب صدّقتى.. إن القصيدة ح تغلب الشومة..
دى الميه مسمومة وبرضه شربنى
يا هلترى من لخمتهك قومه؟
والا ارتضيتى أهالى وحكومة.. تعيشى م الحرية محرومة..
بور الخرايب عّش للبوّمة..
لا خضر بيهرب .. وأزرقك بهتان.. وسماكى على غير حالها مطفية
متعكره بالخوف وبالدخان.. وزرعك الألوان.. بيقتل حطب!..
...

قومى سوّى دينك والقطى الأنفاس..
وطهّرى قلبك من الوسواس..
عرقّ الوطا زى الخطا دسّاس..
دى البذرة محتاجة لسن الفاس..
هذا زمان العجب..

الصحرا هاجمة تقدّد الإحساس..
تقطع خلف عصافيرك الأولى
تقطع وتر مزيكك الأولى.. أشعارك الأولى..
تطلق شيطان العاصفة المجهولة..
الرمل يزحف ع النبّات والناس..
تنسى حنان صلواتك الأولى..
وتحرّمى الأزهار فى طلعة رجب!.



يا وطنى جمّعنا

زى الشجر طارج.. كم شكل وروايح
حتى الغيام واضح..
تاريخ قديم حزنك .. جمّعنا يا وطنى

...

يا حلم نيل سارج.. يعسّل المالح
نغضب ونتصالح
دى الآهه لو صحرا.. تخضّر يا وطنى

...

وإن غلّ مزّعنا.. عشقك يرجّعنا
للأصل والمعنى
من طمى طين واحد.. لوّنت يا وطنى

...

ملايين من الأزهار.. والحب والأفكار
ألحان على أوتار
غنّت نغم واحد .. يا مصر.. يا وطني



دبا عيانت ابن عبد الباقري

الدفتري الثالث. دفاتر العامة

مين اللى فاهم فى داء العشق يشفينى أنا ياللى قلبى معود إنه يرمى
بين لحظة والتانية يخطفنى الجمال منى ولا شوق بيرحم ولا شيه بتحمينى



واقف على ملقف بحور الحياة خايف وبادعى يارب منها النجاه
فجأة التقيتى وسط موجها باغنى..... وابكى وأنا فرحان بلسع المياه....



أنا كنت بين البياعين.. شارى شديت على ضلوع الأمل أوتارى
أتاريها سوء كل الساحات السوق كاشفه البراقع لكين الحق متدارى



البحر عارى الروح صريح الفواية بيعكس خبايا القلب كله مراية
سفحت عمرى على رمال الشطوط ميه شفت النهاية فى غيام البداية



الأرض تبكى إذا ما غريب يعذبها والشجرة تشكى سموم الريح لصاحبها
يامثبت العقل ليه وحديها أرض النيل أوهام غرامها هموم خافيه معايبها



سحاب ورملة بينشدوا للمى ويواقى شمس بيعزفوا للضى
أمواج بتصهل فوق شطوط الأزل وأنا فى صمتى كإنى ميت حتى..



لو كنت يا عمر شمعه بتطفى وتموت كما حلم عابر فى ليل الندل والهلفوت
أنا قلبى يوماتى بيخضر بحب جديد يعيد لشجرى العفى حلمه العصي ع الموت



اللى بنى مصر كان شاعر وكان مسكين على كل سلم رقص م الرعب دنيا ودين
وكتب عشانها القصايد سحر ريانى واتاريتها أُمِّيَّه من جرجا لرأس التين



البنت زى الوردة بتفتح مياسمها للعشق ماء الحياة تضحك مباسمها
ورا شيش سنينى لىالى الشيب بتتجسر وتفر منى قسايد شوق محاسنها



صعبت عليَّه نفسى لما انجرحت لكن فى لهب المحبة يا وطن فتحت
سامحت كافة ما جرى منك بكيت بحرقة عمرى فيك ارتحت



أنا للى طول عمرى باطح بالأمل باطه قاطع شباك يأسه ومصصح لإحباطه
لكنه غمى عيونى سهو وعمانى حين ارتضيت عجزى منذ حكمنى ظباطه



بحرك شفيف وكأنه ألف مراية شايلين لقلبى البكر ألف حكاية
أنا قلت أرحل فى رياح الهوى لقيتتى مقعد بين قلم ودواية..



قايم من النوم كئيب زهقان من قرفى ... حاسس كإن الشيطان تافف على شرفى
أنا اللى رب الفلق سوانى على صورته خايف أكسّر قدم مين داس على طرفى..



سنت سنانها أمانا الفؤولة وأصبح الشعر مهنة شبه مرذوله
عميت بصيرتك يا عديم النظر ح تموت بجهلك وتعجز تفهم الفولة



إزاي راح أنسى يا حضرة المشهور كيف التقينا فى الحروب الزور
دمايا سايله فى السجون برضايا وانت العصايا ف قبضة المأمور



عشت تحلم تملك الليل والصباح بعث قلمك سحت ضاق بيك البراح
انكسر خاطرك وشل الخوف لسانك اللى داق الدبح ما يحسش جراح...



خمسین سنة مضروب على ضلوعى موجوع بكوع أصحابى ويكوعى
واللى شبعوا ياما من لحمه كتافى لما زوروا بلعوا الكذب بدموعى



يا لى أنت فى سطوتك نايم على ودانك فرحان بنفسك وناسى مآسى حرمانك
بين قرش سهل ونسا أسهل وصيت حاكم لحظة ميلاد الندم ح تموت بخسرانك



يا عاشق البحر بيك البحر مش دريان .. حزنك ما هوش سجن أنت سقمك السجان
ولا كل من كتم الألم شاعر .. ولا كل من باح بالأمل .. فنان ..



الموت بياخذ حقه م الأحياء والرمل قادر على كافة بحور الماء
يا من شقيت شم عُرف الورد واتبسم تشوف فى ضحكة وليدك جوهر الأشياء!
حتى الحجارة يجى لها أيام وتتكلم تنزف جراح الوطن للموت ولا تسلم
يا شمس طالعة الجبل متحزمة بالدم حكمة تاريخ الأمم . م الطفل نتعلم ..



آهين عليك يا أخضر على وردى يا حسرة إلى أتفدر فى زمته الأوردى
فرش الرمادى السما فاسودت الأرحام حفظنا شعر الفراغة، نسينا ليه شهدي



مريض.. لكن قلبك سليم م المرض فلا ترتجى صحتك من ندل صاحب غرض
عمره الغيام الكذوب يكره وضوح القمر هذا اكتماله أكيد.. وده إختياله عرّض



فى الضلمة كنتم شموسى وشمعتى ونارى دليلى فى غريتى ونسى وأنا ف دارى
كنتم أمانى.. وشهد لسانى سيرتكو صبحت مسيرتكو همى وعلتى وعارى



نيلك جراحى فى غيطى وهمى فى بيتى ليلك قليل البراح من طول ما واليتى
بشوق أهات العطش صليت . لتبرينى آيات صلاتى دمايا حروف . ولاقريتى..



نحت الفراغة قبرهم فى ضلوعى عجنوا رغيف الآلهة.. بدموعى
وياسمى حكموا الأرض رسموا الدين ملكونى دنيا وآخره . بخضوعى



يا ساقية الحب دورى وارفقى بحالى صمتك حرمنى الهوى بلبل هدوء بالى
لو مره عن شط بحرك يرحلوا العسكر ح أقنع بحالى وأشبع من قليل ما لى



لا الفرس رحموا امتالى ولا نصفنى الروم... يوم عيروكى بجوعى.. أنا ابتديت الصوم
وقلت خيرها فى غيرها . حقى برقيتى هجم العرب جردونى وحرموا عينى النوم

عرب الهرب اينعت فيهم رؤوس للسيف وكل جبار عتل ف بيته أصبح ضيف
قاتل فى يوم مقتله عاتب على المقتول على عرش من ذلته باع عزته برغيف



بزق خمره وبغير إمتلكتوا حق رقبته وحكمتوا سحت وريا وعسكر بلقمتها
تاريخ قديم يا عرب والحرب بنت السوق بين سمسرة ومسخرة مزعتوا عفتها



الجثة ع المشرحة وجميعنا مدعوين يا شعر جهز سكاكينك شمال ويمين
من أول المدبحة ع الحق ح نساوم وكذب آخر قصيده يفسل السكاكين



يا وطنى مالك ارتضيت بالزور ورخيت لجام الطاعة للمأمور
قال لى لو أنت يا ولدى صادق النية لكسرت صمت الحجارة الى أتبت لك سور



يا لى أنت عشقك وعدنى بحلم عز لقاءه قلبى انكسر م اللوع وهواكى لم نجاه
عاشقك بكيفك وعشت أسير تخاريفك يسلم لى ريفك خريفه رد موتى حياه



لا الأرض تشكى من خطا الضفدعه ولا السحاب م الرعد والفرقة
أنت اللى جبن قديم قتل أمك فانشق فنجانك من الزوبعه



متعلقة فى رقبتي طوق ورحاية ما شفعرش ليّه فى هواكى قرايه
حمكتى هرم الظالمين على كتفى وكيف راح أهرب وإننى علّتى خطايا

خمس دقائق والا دول ميت سنة بصيت فى عينك شفت عمرى أنا
فتحت حوش قلبى لرياح الفرح حزنك قتل فيه اشتياق الهنا



الشمس مش راح تدرى بجروحك حتى وغناك آهة أنين روحك
ياللى طلبت التين من الجميز رقصت ليه والدخنة فى سطوحك



يأسى محجّر دمعى فى عيونى يا مفكرينى بالهموم.. إنسونى
أنا ح امشى بكره لوحدى.. فى جنازتى والعنكو.. لو جيتم تعزوتى!



حجة لكسر الإيقاع

مالك يا أبو الهم داير تبكى على حالك
وتشكى طبع البشر واللؤم والنكران
طب قول لى إمتى يا صاحبي زرت بيت خالك
جبرت خاطر اليتامى شفقت ع النسوان

عمال تحمّل سواك الذنب وتعاتبه
وكل من داس على طرفك بتيجى عليه
حتى اللى شايل همومك عمّر بتحاسبه
حين نخ كتفه بحموله أنت عملت له إيه؟..

بحلق وحقّق ح تلقى الهم متفارق
على كل من كان، نصيبك وأنت مختاره
فاتعلم العوم وخف وإلا راح تفارق
الغلّ طوفان حذارى تضيع فى تياره

وقبل ما تفتري تدشّش قزاز غيرك
تمسك على الواحدة للتعبان وللمقهور
إنظر لنفسك ودقق فى خطوط سيرك
عمّ الزمام بالوجيعه الكل صابه الدور..

باحلم يا بلدى تكونى ساحة للانصاف
وأموت وأنا كلمة حرة فى مواويلك
يقولها شاعر سليم القلب مش خواف
تقيد أغانيه نجوم الصبح فى ليك
وأظل خُضره ولو ورقه ف شجر صفصاف..
شايه لآخر مداها وعمرها جميلك
أنا الذى كرهُونى ف عيشتك الأسلاف..
باحلم أعود تانى بكره موجه فى نيلك..
أنا الذى عشت شبعان من رغيفى الحاف..
ح أعيش لآخر مدى بشراكى ودليلك..
وأنا الذى كنت ف هزيمتك طينة الجرجاف..
يغنيينى يوم انتصارك.. أرضى بقليلك



واويـات

دشـدشت كل المـرايا من رعب أشـوف فى مـرايتى
وشـئى بينـكر قـفايا أتـوه فى آخر حكايتى



خـجلان تبص ف عيـونى خايف أبص فى عينيك
يا للى أنت حـقك جنونى أنا حـقى ضاع بين أيديك



أنا العـجوز اللى قلبه مشاع لكل الصبايا
حبيبتـه قاتلاه بذنبه مستخسـراه فى الهداية



قلـبى برغم السـن عصفورة فرح بيغنى رغم الأغـبيا وسوء الظروف
من بعد خمسين عمر بالعـشق انـجرح سالت لـياليه ع الورق دم وحروف



الأرض بشـمت بالـدما والقلب تعبان م السفر
بادفـن أهاتى فى السـما يخـضر جرحى مع المطر



الميه ما بتطلعش العـالى مع إنها فى الأصل سحابه
فطمـتنى الأحزان بحـلالى نهشـتنى بحرامها دبابه



يا قلبى كن فى صدرى إهرب م الظنون صبحت آهات الحزن من باب الترف
قول للى دلك كدبه على سكك الجنون هذا زمن مقتل أساطير الشرف



أنا نديم الملك لو قط أبس بس له كان عقلى ميزه واكته فانكسر قلبى
السبع فى دولته حزمى أرقص له والفار حكم بعد منه قام حلق شنبى



إسمح لى أفش غليلى واكره قوى الشعر أصبح من فنون الدفاع
فاخرس فى حلقى يا لسان واتلوى كافة قضايا العشق صبحت خداع



قرقصت جسدى زى عود ناشف م الخوف باستر نفسى بين اخواتى
رعبى عمانى بضعفى مش شايف إن الشرر شابط فى خلجاتى..



قالوا لى لىلى مريضه فى العراق يا طبيب لكن اللى عنده الشفا هاجر ولا جانى
أنا أسير الوطن عايش فى أرضى غريب وكيف راح أعرف جريح القلب م الجانى



الملايكة وزوا عقلى على جنونى والشياطين وسوسوا لى بالجنون
يا للى بين البين على عيبى خدونى دى الهباله نعمه يا رب الفنون



على فين يا فارس والسكك عوجه راخى لجام المهره ع الفارب
فاكر صحيح السوق بقت هوجه دا ملك يابا وربّه صبه ع القالب!



كل الى أحييت مواتهم وشيلتهم فى الحشا
عصرونى خمره ف كاساتهم مزوا بى بعد العشا ..



لما اصطفتك بحبى وعدتى بدنيا جنّه
أيه ذنبى بتهد قلبى والحب طول عمره بناً



كرهت الشعر وكرهتِك وعمرك واننت إلهامى
قتلنى الصّدق سامحتك يا كدبه بحجم أيامى



بتلومنى وعايزنى أتحمّل وأنا شايل حملين م الحاصل
وبحجة حبك أتحمّل وأنت على دى بتفاصيل؟



طول عمرك صاحب الواجب قاسم قلبك .. نصّين
عينهم تعلا على الحاجب وانت تروح فى الرجلين!!



عشت بصاحبك مفتون بتضيع لو غاب أو هاجر
والسوق فيه المجنون هو اللى بيعشق تاجر



رقصت فى الزفة يا مجدع استأثرو فىنا التلاميذ
النيل كفّر هجر المنبع كل السّجر طلع جميز..



طولنا كتيّر على وش الأرض والخوف حاكمنا عصا ونبوت
بنسِن سيوف الخوف على بعض لا الأزيمة اتحلّت ولا بنموت



حكيت له ضعفى فازور عنى ساتر معايبه ومقاسمه فيها
أكم حميته بحسن ظنى شكيت همومى فزاد عليها



كم من عيالك خوف كم من رجالك قش
اتسمموا بالحروف فشيب عودهم هَش



اتهنئى فى غفلتك وغنى ما قد جرى
ح تزيد كما قلتك وح تمشى بس لورا



متعود ترقص ع السلام متشعبط فى ديول حكامها
جه يومك تركع يا معلم إذ كل ضرورة بأحكامها



قلبي عليكى إنقطر يا مخالفة مواعيدى
وطن أنتى والا حجر؟ تنسينى يوم عيدى!!



الليل خرابيشه فى الحارة أرابيسك بلاستيك موزايك
يا تخلف من صنّع حضاره هرّسوها الترك المماليك



يا صحبة الورد ليه شوكم بيجرحنى ولعطرکم جوہ قلبی یاما وشویات
شجر الوطن للفرح کان قصده یطرحنى على نول جدودى جراحه غزلتها غنوات



بیئتک قزاز.. لیه یا شاعر مالى حجرک طوب؟ دایر تطوح وتیطح من شمال لیمین
شجر الحسک عمره ماراح یطرح الخروب فحف إیدک علینا دى الهموم کافیین



ده غلب إیه اللى بیکم عشت منقوع فیه سلوايتى صبر الحمیر حلوايتى سم العسل
خرايش کلامکم بتهش جرح موجوع بیه وعجیبه شایل لکم فى القلب بعض الأمل



أفتح لى قلبک یا عز الناس وصارحنى لیه تلوى بوزک إذا غنیت بحریة
هو أنت یا توزنى ع الموت یا تدبحنى یا تدوسنى أول ما تضوى فرحه فى عینیہ!



یوم فى یوم مقهور بتبعد ع المنصة بعد ما قریت منها .. وافتریت
أوعى تزعل کل حصه . ولیها قصه فأبلغ الفصّه .. نهیتک ما انتهیت!



مین غیرى رصّ الکراسى لَوْن زهور المفارش
هَلّ الزعیم السیاسى نهشت فى ضهرى القوايش



حط بیها السلم ع الفقر ذکر حرب قامت قلنا یا حُسن الختام
لجلّها شرینا المرار حر ومطر النهاردة عَشَقْنَا ترابها اتهام



خيرك قُفَّفَ.. أحزاب على بقالين حره وموانيكى بتشغى بالحماس
الرقاصين أفواج راحين جايين والحزن أمواج زوابع فى قلوب الناس



رضيت انى اكون لك فى صعبك ركوبه..... وفى أيام رخاكي ارتضيت الخرس
فقّع قلبى هذ التاريخ الأروبه..... كاتبنى ف دفاتر الخدم يا الحرس



على قد ما جُنبِتْنى الحرايق على قد ماالسُوعَتَى أَلَم
وعاشت تخفف مرار الحقايق قتلنى رضايا بقمايا.. ندم..



عطيت ياما كم ما جَمَعْتَش ديونى وخابت فَسايلى فى غيط اللئام
أنا اللى احتميت فى هواكى بجنونى عقلت التقيت حَبْلَ عشقِك لجام



يخيّل إلى كَأْنى عشقتك كما صَوَّرَك فى الخيال النديم
يا طول المسافة خرافة حقيقتك يا ريتنى اكتفيت بالفرام القديم



نفسى أن راحت للتفاح ريقى بيجرى على خدودك
وأن عزت اتونس وارتاح أتنشّق دمي على حدودك



ولساكى قادرة تزرعى قمح الصغار رغم الجراد والخوف وعسكر التتر
وتجمعى برد الشتا وعرق النهار تخلقيه فى الصيف عناقيد ع الشجر



أنا لمسة من حر مصر أقرّ تشرحنى من لومها ليّه ف غريتي باتدفى
لذا لا تلومنى إذا م جفاها فرّحنى..... با خاف تخفّف حملها عنى.. انكفى!..



تطلبينى ما اتوهش عنك تهجرينى ما أقولش آه..
داللى ما لى القلب منك مُوت واعدنى بالحياة..



مُر السنين صرّك هنا وانتى الفرح صنعة أيديك
لا شوفتى مره يوم هنا ولا دمعتك فارقت عينيك..



ع البر فاتتى القمر قلقان على بدرى وضيه كان لى دليلى فى ظلام الليل
سألت يا بحر حبى جاش مَلا بدرى..... قال لى سلامة النظر جفّت منابع النيل



يوم انتصارها تلاقى الكل عشاقها ويوم الهزيمة يصيروا بالجراح معاليك
لو طرّحتِ الفُل يفتى الكل على زوقها وأن شربت الذل كله للبراح.. يافكيك



يا ريتنى أقدر أنسلخ من جلدى أصفى دمي وامزّع صك مواريش
وانتمى لجِد غيرك حتى لو هندى ولا بيتلينى تراثك بالعمى الحيثى



عدّت عليها العصور وحدك ومتّحاكم عاكم رقاب أهلها كالهمّ حتى طالون
فى الضى فى الضلمه مد وجزّر ميت حاكم..... منذ الأزل مطرقه وللأبد راس هون



الفقرا زهقوا من الطعام الفقرومن العطش غرقوا فى رمل وطن
والأغنياء شرقوا بماء البحر والنيل عليل علته من علة الاتيين



كل ما سيادتك تلعلع المنصه شعرى يرّجف من حاجات بتأزمه
وان سألت القلب حاسسٍ ليه بغصّة فى الميدان صوّرك حيطان بتقرّمه..



مين اللى قهرّك يا يتيم الأم قال بلدى طهقت من آهات أحزاني
خوف رضعتى فى حليبها السُّم وعلى رغيّف الغريه فاطماني



مين اللى غدرّك يا كسيف الأب قال سيف أبويا قَط لي لسانى
قربان قمسنى وهبنى للشيطان والرّب ونكّر صلاتى عشان أسياده ناكرانى



مين اللى قَبْرَك يا عديم العم والنفط باع أطفاله لضباعه
النيل فايّتا فى السراب والهم والدم صار ميه رهنّ الندل وطباعه



مين اللى حَسَرَكَ يا أسيف الخال قال فاتتى خالى واكتفى برّيه
حصّرنى بين اللقمه والزّلزال أساوم اللى كفّرونى بذنبه



ذوات السعاده ساداتِ العقول مشايخ الطريق كاملين المدارك
مسالك سياده مواهب وصول إلى كل دار غير مدار المعارك



قد ما خوفتم أمريكا قد ما خوفتموا الجماهير
فى العيد تلبسوا مزينة للحرب ركبتمو حمير



خلاص نهيتوا المهمة حرقتموا غيطانها فرسان خيال الماته على الحصان لأبيض
دهّوستوا خيرها ودهّستوا نبض وجدانها سوقتموها زُلفى وجمال للبيت الأبيض



القنّاه الأولى قالت أربعة ماتوا . وكانوا فى الحقيقة ألف
غلطه مردودة تملأ المطبعة والحروف تتسلى على عاشوا رغم أنف!



طبع السياسه الحماسه قردة تقدر تؤكد م النملة فيل
ورّتينى على خد موسكو وردة واتاريها كانت دموع قتيل !..



غيم السما خيب رجّا العشمانين الشمس غابت ضلّت البشرية
قلبت مقاديف اليسار لليمين فمرّرت غنيونى.. للحرية!



لو كان يصحّ الصحيح ولا يبقى غير الأكيد
كم كنت تكس يا ربح شعراء وحكام عبيد



الإنسانية الدوام حية العدل شوقها والشرف سعدها
أنا شفت فيها طبع الحيه مع كل حين تخلع قديم جلدها..



عاهدت بلادي على لحن الأغاني وشرع الجهل يستعفى بغباوته
سنين القلب رحلت في ثواني وضاع العمر محروم من جرايته!



كل ما توطى تعلّى شأنك شاطر بس لئين وحويط
زمر مهمما خبيت دقنك لازم آخر زمرك طيط!



بتضحكوا سخرة منى علشان قليل الحيل
بكورة ح تبكوا أمّا أغنى أناشيد رحيل الليل



الأجزاء العصرية

شبه شعبية شبه رسمية
الدفترا الرابع من دفاتر العامية

القرين

لكل شخص.. قرين أراجوز.. فرحان حزين.. مولود ويا..
عاقلة؟ يجوز.. ويجوز نرفوز.. يعدل له.. أو يقلب له قفاه
ساعات عيل.. ولا فرقع لوز.. ينسى الحقيقة.. وهيه معاه..
وساعات عجوز.. لو يضرب بوز.. ولا وزير.. وأكلنا عشاء!



عاشق ولهان

أراجوز فقير.. كلج وفلاح.. حزني.. منسب لجودى
قلبي اتملا فى العشق جراح.. والحظ.. ضيق لى حدودى
ضحكت.. ع التركى السفاح.. فتل لى من شنبه.. قيودى..
رميت حمولى.. على الفتاح.. حبيبتي.. لهفت مجهودى!



المفلس

أنا اللى زاد بيه.. هوايا.. عن الفلوس.. اللى ف جيبى
داير طاحونة ورحاية.. ولا مرة كسبت.. يانا صيبى..
يا حبيبتي.. لوراضية.. كفاية.. تقولى مرسية يا حبيبى..
قومى إشوى قلبى.. لعشايا.. بس استرى ف عرضك.. عيبى!



عاجز وفنان

أنا أسطى نجار.. فصلنى.. بإيدين طوال.. من غير قدمين..
جننى بالفن.. هبلنى.. أنا شلت أحزان.. العاشقين
وغلبته فى الحب.. فصلنى.. وفاتنى ألق.. ف جهل وطين..
وفاق سبق.. قال حصلنى.. وعارف أنى.. ماليش.. رجلين!



المدمن

أنا مش غراب.. أنا أبو القردان.. ممنوع قانوناً.. تصطادنى..
طرطور وصوت.. ملكوت فنان.. بس الفلس متقصصدى
رأسى برأس.. أجدع سلطان.. ملوك وزعما.. بتحسدنى..
لذا ف جميع.. كافة أوطان.. زنزان سجونها.. اتعودنى!



إنسان عادى

أنا لما أحتار.. ما أختار شى.. ويوم ما أختار.. حيرتى بتطول..
لا أنا الفاجومى.. الجمرشى.. ولا كنت عمرى.. زعيم مسئول..
ليه لما باسمع.. ما أفهمشى.. وافهم ساعات.. ما أقدرش أقول..
ياهلترى.. العيش ماخمرشى.. والا خمر فى نافوخى.. الفول!



الصحفجى

أنا ناقد عملونى.. مؤلف.. كنت حمار.. والفن شطارة
وأنا مخى مرتب ومكلف.. أمدح أو أدبع بعبارة
أنا أسطى.. ف قالب متأيف.. شيلنى.. أشيلك بجدارة..
ماتلومشى.. دا عالم متخلف.. وصحافة.. مكسيها خسارة!.



شاعر

أنا النهاردة قرئت.. جريدة.. صباحى يمكن.. يجوز مسائى
حسيتها مايصة، كما عصيدة.. طابهاها تلميذه فى إبتدائى..
وقالوا لى مودة.. أفكار جديدة.. بنقول دوائى.. فى أصل دائى
أنا رحت أشكى.. لمدام فريدة.. طلعت قصيدتى مرض وبائى!.



هلفوت

ياحبيبتي ياهلفوته أنا زيك هلفوت
طول عمرنا حدوته فى لسان الكتكوت..
لقمتنا الفرفوته يادوب بالسححتوت
على قدنا مزبوبة لو زادت.. ح نموت!.



أمير مخازن

أن أصلاً أسطى نجار.. أراجوز.. خشب الجوز والورد
تسكرنى روايح الأشجار.. آخذ الدنيا.. ف حضنى بجد
واطلع وانزل بالمنشار.. ويمسمار عمريت الأرض
واتجنن من بصيوص نار وخصوصا فى شهر الجرد.!



بهلوان

أنا بيع الفرحة عمومى.. نكتتى وصفة.. لوجع الراس..
عشت هموم الخلق همومى ماقدرش أهرب منها احتاس..
علشانهم.. أنا بيعت هدومى ولجرجا أمشى ويلقاس..
وبلدنا ح تعوم على عمومى.. أول ما أفوق م الوسواس..!



المكحك

يا حبيبى يا عود قرنفل.. وعيون برسيم نجيل
ليل الشَّعر المفلفل.. ع العاشقين طويل
فى ساعات مخك يقفل.. فى الحب يصير بخيل.
نفسى.. ريك يسهل.. واصحصح بيك قتيل..!



العبقري

أنا مخرج عبقري متواضع خلجاتي بكل الألوان..
على رأسى طرطورى الرائع موهبة من صنع الرحمن..
أنا واقع فى الأمر الواقع.. وأنا سابق عصرى بزمان..
وباتكتك واهجم وادافع.. بس يا حسرة.. بنص لسان..



بعد فوات الآوان

يا حبيبى يا عكروت يا شارينى بفلوسك..
من قرصة برغوت يتوسوس وسووسك..
يا غريبة بسكوت أنا مرعوبة أبوسك!
أخذك حزن تموت.. قطر شبابى.. يدوسك..!



ماريونيت

شاعر ربطوا دماغى بخيط.. بيشدوه لو حبوا اتعتر
قطعوه غدر رمونى فى البيت على مجد الماضى با تحسّر..
فين أيام الفول بالزيت كان شعري سمنة على سكر
قلت يا ريتى قالوا يا ريت.. صبوا النفط.. أنا فقت. وح اسكرا!



الذكريات

دلوقتى.. أنا مهدود الحيل ياما صحفكم حكيت عنى..
كنت زمان عنترع الخيل.. مجد الحرب زمانى الفنّى
دلوقتى متوهنى الليل.. طلع الصبح هريتم منى..
فى اليسرى سيقتونى الويل.. فى العسرى.. خيتم ظنى..



الجاهز

مخرج خبير ومدير مسرح فاهم مدرب وفلاتى..
كان روميو خايب ومُزَيَّلج ثورى وشعبى وحكاواتى..
يرطن حسب ما الريح تشطح ينطق صعيدى خواجاتى..
وكل ما يقبض ينطح.. من كتر رعبه من الآتى..!



اليأس

أنا فتان عامل أراجوز مع انى الأراجوز الأصلى
أقدر أغنى كل ما اعوز الخوف عمره مافك مفاصلى..
قلت اتوظف عاملة يجوز.. الحظ يروق ويبصّ بصلى..!



التحويلات

أديب وخوَجة على قد حالى
دارس مدارس.. فن وفلس
كان عشمى بكرة تُقرج يا خالى..
حصّة فى حصّة تهدا النفوس..
أتارى سوق الحقيقة غالى..
بالكذب يشغى جديان تيوس..
نسوى كل اللى كان فى بالى..
وبدمى نسخو.. آخر الدروس..!

●

الفاهم

فن العبط شادد حيله.. كفر سؤالى من ردّى..
يا حاكمنى ولا بارم ديلهُ.. أناديلى مبروم على قدّى
لخفّنى فنّى ف تباديله حكم باني الزم حدى
أسمع لأشعار دلاديله أفزع اصتقف على خدى..!

●

النكدى

سياسى أنا علّمنى الحزب إنى أكون حزب بشعرى
ماليس مجلّه شلّه وعِب.. ولا فى جهاز يرفع سعرى
عشان كده. عاشق وباحِب.. ونكدى غضبان طول عمرى
اشب بعصايتى وألبّ لذا.. محيّرهم أمرى..!

آخر الأصدقاء

صديق صَنَعْتُهُ بِشَكْلِ فَنَى
وعطيته لقمة كان نفسى فيها
وهبته روحى صار حَتَّه مَنَى..
ورسمنا دنيا حلمنا بيها..
زادت همومى إِزْوَرَّ عَنَى..
شكيت مشاكلى فزاد عليها..
يا صُنْعَ إِيدى خَيَّبَتْ ظَنَى
قال لى شكاية الضعيف كريمة!..



الريفى

أنا الأراجوز القابض ع الجمر مش قابض مصاريف
ان كنت مرّ.. مانيش حامض ولا باعوم ع الموج يا خفيف..
مانيش مزبلح ولا حايض جدورى مادّه فى طين الريف
لذا عمر خيرى زايد - فايض حتى وانا.. مش لاقى رغيّف!..



المعلم

ما تفتَح يا ابنى فتحّ.. شوف مين بيكلمك
مهما تعمل مدردح أنا برضه معلّمك..
التوب عليك مرحرح والكذب مأزَمَك
لو كان شووكك ح يجرح.. نقدر ونقلّمك!..

كشف المستور

عالم تسمع منه تنوه وتصدّقه على ايها حاجة..
طيبّ ليه أصحابه فاتوه.. نكروا مواهبه بكل فجاجة..
فى سوق الأكاذيب أخفوه.. مع إن المرحلة محتاجة..
قال لى خلاص.. الوهم باعوه.. فى عبّوه محلّى.. يا خواجة!!



المرتد

عاشق باروكته بيضا مرافق بنت هايفة
لذا أفكاره سودا ومرازى فى المناكفة
لو قلت الحالة عيضة والبقرة حاشفة ناشفة..
يعمل له قُصّه مُودة ويشتم فى البلاشفة!!



الرايح

أستاذ سليل الفلاسفة وقعر مجلس مصطبّ..
ساعات يحب البلاشفة.. وساعات وجودى مقطبّ
تبرد. يشعلل مناكفة تولع.. يماين يرطبّ..
ويشاء رب المصادفة.. الطازة معاه يعطبّ!



الأونطجى

عجوز وراه التاريخ منذ العصور الأوائل
فاهم فنون الطبّيح من كل جامد وسایل..
م الشهد يعمل فسیخ فى الدّوغرى.. معوج ومایل
يصغر ويكبر يشیخ ويموت یخلف فسایل!



المعتقد

صاحبى.. معلّم ويكيفه.. ماشى على كيف الناس
كان نفسه ينوّر ريفه.. ويشعل ليله حماس..
الموج كسّر مقاديفه.. انسدتّ نفسه إحساس..
وديونه كلّتّ مصاريفه.. إيمانه قلبّ وسّواس!



فى غير آوانه

كان لى معلّم والعلم نور.... بفتّه نورّ لنا البداية..
نزل بهمة والأرض بور.. فهّمنا إنّه ابتدا الحكاية..
أتاريها طينة من كذب زور.. بالملح.. مضروبة للنهاية..
ومُصرّ يحلب وإن قلتّ طور.. يصفغنى كفّه.. حجر راحة!



كبرياء

فنان مفلس مع إني أغنى ما فى الكون
جعان ومرفود ولكنى شبعان ميت لـون
الدنيا لما تجننى أعمل مجنون..
وافتح بسيف مسنون فتى لا مخاخ الدون!

●

فنان وفلاح

أنا فنان أراجوز.... فلاح مش عرياوى..
عايق.. مش عنطوز.... رايق.. مش سمّاوى
طفل.. جرىء وعجوز.... بازرع غيطى حكاوى..
مش نفط يا على لوز.... نبض الحب غناوى..!

●

آخرة النفط

يا عبلة.. فين راح عنترك... يا لبنى.. آخرس ليه قيسك
الخيمة صار لها زمبلك ... ولبستى.. من بدع باريك
بادعى.. ان رينا يسترك... وتلاقى صنعة لمريسك!
إذ بكرة يخلص دفترك.. وارا مكو!! تعلن تفليـسك

●

كذاب الذئبة

بختك يا ابو بخيت جننى... باحسب وأقلب باطلع خايب
الى عطالك واخذ منى... زاد فى منابك.. وبقيت نايب
قرشى قرش ضيع فنى.. قرشك ريش ترميه جايب..
حظك نصفك تكبر عنى!... لكن رغم حضورك غايب!!



العدوانى

أراجوز شاعر بيته قزاز... طب ليه مالى حجّره حجاره؟
عيشته متاهة ف بيت أفاض... قضّاها.. مقالب وشطارة
قلت له ريحة كمك جاز... مكسب كدبك كله خسارة..
قال أنا.. عنتيل الإنجاز.. سنّه كمان والهدف لى وزارة!!



الرايق

أنا رايق آخر روقان والعهد على الراوى بتاعى..
ماليش فى أمور التوهان أنا اشيل العالم بصباعى..
سنّيت ع القهر الأسنان خبيّيت أوجاعى ف أضلاعى
وح اسوقها على الفقر جنان.. لحد ما اعدّل أوضاعى!.



المتوهم

مسمار بطنى رغيف الفول بيثبت خطوتى ع الأرض..
بيعدى بى من المجهول..! حاسس إنى اتتين على بعض..
واحد منهم عرض بطول والتانى طوله بالعرض!
بيحرّضنى أحارب الفول ويفلّ أما يدوق العض..!



الفاهم

زعيم وراكبنا بلاشى لإنه من سلسال تركى..
سألت عنه البكبّاشى.. اللى ورثا على السركى..
قال لى السياسة ماجايباشى.. أصل انتهى اللعب الحركى..
دلوقتى لعبة ماتحلاشى غير وانت راكب ياكاوركى



جواز عرفى

الهدمة خبّث وش العذارى... حسرة عليهم يا رب خلّى
بين الدقون والديون حيارى... يا ميت خسارة على اللى حصل لى
لو عندى شقة شقّين فى حارة... مش كنا طلنا ساعة تجلّى؟!
نقضّى سهرة على استمارة... نبات سكارى ونتوب نصلى!



الخباب

مرازي وأهبل ما قبضتتش... علشان مانيش حرّيف فوري..
لسانى قالت مارحمتش... كل اللي خدعك يا مغاوري..
عملت كوميدى ماضحككتش.... حزنت.. ما نفعتش ثورى..
وعشان نكشت.. وما كتمتش... شطبونى.. من كشف الدورى..!



المريد

ديك الجن ركبته براق.. طار بى قد ما سمح الحال..
ربيتته بشعر العشاق.. عرفنى على راس المال
علمنى.. الأسواق أخلاق كهّانها أصحاب الأموال..
تتعبدل حسب الأرزاق فتدّ بل وزن الموال..!



شئ عادى

مغنى.. اشمعنى وإيه يعنى.. حين يغلط بيزفلط روحه
اخترته زرعته فقلعنى.. وطابت له فساوم بجروحه..
شربته خسارة قام باعنى يوم فرحى نقطنى بنوحه..
حفظت مقامه فضيّعنى.. وطلّعنى سلّم لطموحه!!



القومجى

أنا أراجوز النوز العربى قولى رجال ومش نسوان..
الدنيا عارفانى بأدبى من عصر الشعرا.. الخرفان..
أنا سيبت السيف لأخوى شلبى وسكتت جزيرة البريطان
النفط شَرَم بَرَم شنبى.. وظفنى ف سلك الفرسان!..

●

بالزمبلك

بورمجى.. طول النخلة وهاف!.. موسم ورا موسم ما طرحش..
بيبرق عينه ومش شايف من كتر ما برطع بقى جحش..
نص دماغه لسان وشفاف.. شفته فى الجلسة ما نطقش
أتاريه كان متزرجن خايف علشان من مدّه ماقبضش

●

غرام يائس

نص حقيقتى معايا... نص خيالى معاك..
لذا خايف لهوايا... يخالفنى فى هواك
ما التفكيش ورايا... حين تعوزنى وراك..
ويضيع فيكى غنايا... ولا اقدرشى انساك!..

●

ثورجى

متمرس بالحلف الثورى يا صامولة مسامير الجبهة
عارف مين راح يقبض فورى! أول ما يخلع أبوابها
ومين ح يبيعها شكك يا مغاورى ومين على حبله ح يلعبها..
ومين ح يهف الكأس والدورى.. ويسيبها.. كلابها على ديابها!



الماصل

أراجوز بواقى عصر الملوك.. عصر الألاجة المحفطين.
ومازلت ملزم حُسن السلوك طباع جدوى المحبطين..
للظلم قالوا. ملعون أبوك.. وبسرعة غنوا متأسفين!!
والقمح لما يخاف الهالوك.. يعجن رغيه الحلال.. بطين!.



قلّة وعى

أبوك ماداقش لحمه من يوم ما كان صفار
فرح بالدنيا زحمة.. وحبّ الناس كُتار!
كان قلبه رقيق ورحمة.. وذنوبه كانت كبار
ياما قال: ع الضلعة فحمة.. وعلى النهار.. نهار!



الفوريجى

ياما نفسى ف أراجوز ماوصلش فى السابق..
مش من نوع نرفوز لأ.. متمدّن رايق
علشان لما أعوز أساهركم وانا فايق
واضريكم مهموز يجمعكم فى دقايق.!



بعد إيه؟

حمار ركوبه.. من حقى اركب ... ياسياسة ضاع العمر بلاش..
الكل باع وكله مكسب وانا خسرت عملت طنناش
ورجعت لما بقى المذهب ... لبانة فى البق البكاش
قالوا لى مش مسموح يركب اللى بجهله مالايمهاش.!



تستاهل

طرطورى الميت لون.. الحلزونى الطاغى..
قد بلاوى الكون الحاطه على دماغى..
حالف لى المجنون إنه ح يجيب داغى..
قلت العمر يهون.. قام رقع لى صداغى.!



مواهب للزعامة

رسمال التاج طرطور وعصا

أراجوز مهزوز قزعة وطايل

ومكير وخبير فى البصّ بصّ بصه ... عريان الإيه! لكن خايل..

إستاذ ممتاز هبش ولصّ لصه ذو خبره بيسّوى هوايل..

علشان يكحلها ... يقول خصّ خصه

يعميهها .. ويقول أنا هايل!.



عالم كورة

رغم جنونى أنا مش مجنون... مع إنى فى العادة هلهى..

خمسة سياسة على سته فتون... ولا عنديش فى البنك الأهلى.

مش ح ازعل لو هدوا الكون... أو ولعت حرب ما بين أهلى..

ما كفاية ازعل.. ساعة الجون.... فى زمالك يدخل أو أهلى!.



عايش فى حاله

عبيط، يعيط على بكره!... مع إنه ما سترش امبارح.

أيامه مفتوله ف بكره... منقوعة بين مر ومالح..

يا ماشى على جمر الفكرة.. بتفنى للطير السارح

إعشق... لو الناس راح تكره.. والعصْفُرُه تبقى جوارح!.



عبد المعين

أكمنى مثقف.. فنان.. ع الریق لازم أقرأ جريدة
نشرة مجلة أو جرنان عثمان ألقى حكاية سعيدة
تنسل عن قلبى الأحزان. وتبشرنى بحاجة جديدة
أتارها.. دنيا مورستان! وانا محكوم فيها بتأبيدة..



أرزاق

رئيس ادارة كلمنجى.. من طرح ايام الفـمة
فى السوق طلع حنّ حنّجى.. فى الزاوية متواضع.. ذمّه
يكسب هوا شنجى برنجى.. يرمى الخسارة على القمة
ولد مهذب ولومانجى.. منخبى مدفع فى العمه.!



جواز

ياحببى ياشارينى.. ولاففى ف سلوفان
يامجنن مجانينى مناخيرك شكمان..
تعزف ولا (بجانينى) ترقص ولا (شريهان)!!
قَبْضْنى دفينى.. عايز اتغطى.. وانا!!



اللى شاف

شاعر بعيد النظر لكن غشيم القلب
حذرنا يوم الخطر قوانا يوم الصعب
لكنه وقع انكسر على بوزه طب وحب..
حين سحره ضى القمر.. تقولشى عضة كلب!

●

عكس عكيس

والد وخلف خلف خلافه... وخلفه ولّف على الخلاف
يحس مُر اللظى ف خشافه... ولما يطلب رضاه يخاف!
ليه مافتحشى قلبه اما شافه؟... كان مد رجله قدّ اللحاف
وقنع بجبه ساعة اكتشافه... ورضى برغيفه لو حتى حاف!

●

صوت سيده

فصيح لسان وسط الطرشان... همومه ع القلب زكايب
فتان فى دكان.. صاحبه جبان!... فاجومى.. ما يحفظ واجب
يسوقه فى السوق كالرهبان.. يعمل على حسه عجائب
ويروّحه خيبان ندمان.. يريط صامول بطنه السايب!

●

عودة الوعي

قائد .. نص زعيم .. بلسان .. يطلع طوله ..
يفتى كإنه حكيم ونصدق ما يقوله ...
طبع الندل لئيم .. بيزوق مفعوله ..
ياخية المظالم .. حين - خانهم .. هتقوا له !



دوبان

حبيبي بلا رحمة فصلنى - وكنا .. على درجة حبيبين
عيشى انقطع ما وصلنى .. وشبرى كان وياه مترين
يارب يفطس وانا اصلى وأدفنه فى رموش العين
أو أموت أنا ويحصلنى .. وقبر أبرك من قبرين !



متودك

عمده مرتاح مرحرح ... عمره .. ما يقولش لأه !
يفتى يهندز يصحح ... فى هايفة ومستحقة
له كرسى .. ف كل مطرح ... وف كل لجنة - لازقه ..
لكن فى الجد يرمح - ويزوغ بكل رقعة



رئيس تحرير

حفلة زفلة عجينة... خبره ف رقص الحبال
على طول عقله يزينه... ولو زفوه.. عيال..
من خوف يخلص خزينه... بقى يخاف م الخيال..
وصبح شماله يمينه... وكان يمينه شمال!.



زعيم سابق

صاحب موقف سياسى... أبيض - وساعات هباب
ويقول كلام حماسى... لما يزوروه شباب
ربى كاللو.. فى راسى... قتعنى نكون صحاب!
أنا جعت لقيته ناسى.. عشان معاه.. كباب..



إذا كان الغراب

أنا عمى لاسطى فصكتنى.. لكن ماقالش السكة منين!
قال - لو مكسح
حصكتنى.. وسابنى أحجل بعكازين..
أمانة لوح توصكتنى.. لقبرى.. يا صاحبى يا حسين..
اكتب عليه اللى.. كسرنى.. إنى ما كان لياش لسانين!



المرعوب

يا أهل المروءة ح ادور عليكم ح ادعيس واعسوس فى سلقط فى ملقط..
ولو أنى مرعوب لو التقيكم أتوه لما أشوفكم وانجنّ الخبط..
واشارك ندالة.. سفاله تعاديكم اسوق الهبالة عليكم واعبط
أشوفكم تضيعوا ولا افتديكم.. حسب سلو هذا الزمان المجليط



قصرديل

يامصر.. أنا نفسى اشكى لك.. كافة ولاد يوم خلّفتى..
دول اللى عكروا ماء نيلك.. ودول فاتوكى اتخلّفتى..
ودول نسوا يعدلوا ميلك.. ودول باعوكى اتسلفتى..
وانا اللى حافظ مواويلك.. كل اللى حيلتى.. اشتهم وافتى..!



من دفتر أحوال الدنيا

صهلا

الواد الواقف بببع مناديل ع الناصية، كانت عينه يوماتى بتستى
البنت اللى بتعدى، ببلوزه منقطة على أسود، والحبية نبىتى، وإشارب
على أحمر .. مشغول على طرفه المتدلل فوق صدرها، قلبين .. نفس
البنت اللى كانت لما بتشتري منه باكو المناديل، يقف له الشارع على رجل
مزقط وياه، وهو بيغنى (محمد فوزى)، واللى كانت يوم ما تعدى وما
تلاحظوش، يبقى الشارع سرداب .. إسود ومضلم .. فاضى عليه، زى
المرشوش بمبيد الإنسانية !

والراجل ابو الواد القاعد بببع مناديل ع الناصيه .. واللى على
الناصية التانية، بببع دره مشوى .. كانت عينه النص العامشه، على
الست البيضاء القبطيه اللى يوماتى بتكى على خشب البلكونه، بالفستان
الأسود أو الروب المنقوش المرفوع من خلف كما القبه ومرووش .. واللى
عمرها ما طلبت منه ولاكوز دره مشوى .. لكنها كانت لما بتحدف
للباعين المقاطيع حبل سبتها وتدلل وياه جمارها الهبر الملبن م الياقة
وم الأكمام .. كان يكبش نار الفحم المتصهرج ماتلسوعهوش .. واللى
كانت لما بتقفل شيشها الكالنج .. بتبظ وراها عينيه، اللى شبه القرش
الماسح زى حبابى القوطه الحمضانه .. ويفضل ينفخ مش طايق نفسه
.. وعلى أهون علّه يسب الدنيا واللى عايشينها، والعيشه واللى طايقينها
.. ويلعن أم ابنه، اللى بببع مناديل ع الناصية التانية، ومزقط وياه
الشارع ومصهلل بيغنى (محمد فوزى) !



إيد الشنطة

الحاجة اللى تبّت فيها الواد ساعة ما اتيتّم فجأة .. كانت إيد
الشنطة لما العربيه الملاكى زعقت جنبه لزم وهى بتحدف ابوه ع
الأسفلت يفرفر ..

من وهله كانت كل الدنيا بحالها ف إيده، وهمه بيعدوا بالعرض نفق
شبرا ..

كان الراجل يخرج يومياً .. يجرى .. ويا آدان الضهر عشان يلحق
ابنه الطفل على باب المدرسة فى القللى .. ويتمشى معاه للبيت ..
الراجل لما قرب على سن الستين واولاده اتجوزوا وبناته اتستروا ..
ولله الحمد، باس إيده وش وضهر لغاية ماقالوله اللى بيّفهموا فى الدنيا
أكثر منه :

- هات لك عيل لمعاشك .. ح تسبيه لمين ؟ للدوله وليبيت المال، وانت
ما عندكش عيال، دى بلد حراميه .. عمال بتكّع لهم شهرياً م اللحم
الحى ومن قوت اولادك لسنين وسنين .. والآخر ح تموت وتسببهم
ياكلوك .. عيني عينك وبالقانون .. لأ .. مالهاش حل إلا ده ..

وعملها الراجل .. جاب عيل مع إن مراته قالت له وهيه بتدلع :

- اختشى على دمك هو احنا لسه ح نعيده .. ح تخلف

وانت ف سنك .. يا عجوز ..

قال لها :

- عيب يا وليه .. انا لسه شباب .. وده حق اولادك بس انت ماتقاطعيش
واتكلى على الله .. ياما لسه ح يطلع ريش ياما .. وياما ح نعيش ..

والعيشه الفارغة ملتها شقاوة الواد، اللي جه على آخر العمر
بقشيش..

ويقت للأيام فرحة وطعم واحلو الزاد الآخر

- وضمنا ماحدث يسرقنا ولا الدولة .. احنا فلوسنا .. حلال ..

وصبح أول ما الضهر بيدن يخرج م البيت مستعجل .. فرحان حالق
دقته ومتزوق علشان يرجع بالواد م القللى .. يحميه من لبش السكه
وزحمة سرة شبرا وهوجة أحمد حلمى ..

كان الراجل اكتر من ابنه بيزقطط م المشوار لما بيستاه ويتمشى معاه
فى أمان الله .. الأيد فى الأيد ياكلوا دره مشوى، شيبسى، بطاطا ..
يتسلوا مع بعض وهو سعيد والدنيا مش ساعياه .. ضامن ان الواد راح
يتربى ويكبر .. والمستقبل صار مضمون بمعاش شهرى !

كان بينط ويحجل زى الواد واكثر منه ويبضحك زيه ويتمعيل ..
ويقلد حركاته وصوته وهو بيحكى له عى الأستاذ الأهمم اللي دماغه
قلقاسه نص سوى .. ماتعرفش إزاي

كان المشوار ده هو الدنيا، لحد زعقت فيه الملاكى اللي مشفهاش
زى السهم تفرق بينهم .. هو على بعد ثلاث أمتار بيوفرر جنب الشنطة
.. وابنه الواقف مستغرب وايديه متشنجه على ودن الشنطة!!



إلهام

قاعد على القهوة، قدامه طفاية السجاير المشروخة بتاعة كل يوم ..
الى بتفضى وبتتملى باعقاب هليووت منفوخة .. أو باعقاب كليوبطرة
وتمباك مستورد .. فجأة يجيله مزاجه يحط صباعه فى الدخان
المحروق ويشخبط بيه أول القصيدة الجديدة.

النهاردة سرقت الجرسون فى حساب المشاريب لتالت مرة .. وأنا
عارف ان هو عارف .. ورميت الأعقاب ع الأرض الوسخة قدامى ..
متغاض منك طول الوقت وبافكر فيكى .. وأنا بارضع ساعة الفجرية
البيرة من برك الشمال ..

قلت لنفسى ثوانى وأكد راح تطلع لى من شق الأسفلت الميت فجأة
شجرة دخان مليانه وطارحه سجاير اسطوانية مفاجأة ..
لكنى حسيت إنى لوحدى جداً والجرسون مش راح يسمح لى اغالطه
للمره الرابعة ..

اتحشرت صنابى البنصر بالصدفه فى مناخيرى فاتأكدت ان
مافيش ع القهوة من اكتر من خمسين سنة فاتت ولا فى الخمسين
الجايين شاعر غيرى يفهم معنى .. سبارس مطفيه ومرميه بقسوة على
الأسفلت وفيها بواقى دخان فى مدينة ماتت فى اللحظة اللى طلعت من
البلاعة سمكة بياض قد القط بتشرب بايب !



حد للعشق

البنت لما شالوها ..

كانت تشبه السكينة اللي لقوها متلغمطة بالدم ف إيدها ..

نفس العود المفروود القد واللحم الأبيض اللي حياكله الدود ..

نفس العينين السود بتوع الواد المرمى جوارها ونفس القبضة
الأبنوس أم صوابع عصبية .. وعلى خدودها نفس الحمرة اللي بتخجل
على أى خدود لسه مادخلتش الدنيا ولا باست حد ..

كانت السكينة بتهشد إنها تشبه ليها بجد ومع ذلك ..

ولاحد من اللي شافوهم ساعة ماشهق الواد بالآه .. واتسرقت منه
الفرحه بشبابه اللي ف لون الأشجار .. ولا واحد ..

كان قادر يفهم سر العشق اللي اتخلق بين الاتنين الفايرين فى نفس
اللحظة اللي فرق بينهم حد السكين وما بين ملكوت الحياه بالموت اللي
ما بيرحم حد !.



فى أول مايو

كانت الأخت الثورية الدورية، بتقلب فى سريرها فصحيت م النوم
شافت جوزها ؟ المهموم بهموم العالم .. خبير التنظيمات السريه ورياية
التركييات العلنية وذات الشرعيه الكامله .. عاقد ميه واحداشر على
قورته .. بيسمع موجز أنباء نص الليل من راديو فرموزا الحره ..

سألته قلقانه عن حال الطبقة العاملة ..

حظت نفسه عليه يناغشها ويقول لها نامى يا هبله .. لكنه قدر
موقفها كمثال للأنثى الكامله ..

وقال لها عال العال :

إضراب عمال الحصر ف بهتيم سمع فى سينما الكورسال هتف
صبيان الميكانيكيه بتوع السبتيه لناصر سته وخمسين .. وجنوب ألبانيا
مولع ضد المرتدين والتوتسى .. والثوريين احتجوا فى بلجيكا على فوز
الحزب القومى ف مرسيليا ..

وف موسكو اكتشفوا بمحض الصدفة إن جرينوفسكى كان ياور
لستالين.

وف بكين لسه الملايين مجروحه .. تبكى حوالين جثمان بنج
ورافضين دفنه وظهرت روح جيشارا ف غزه وانتقدت عرفات على
مشروع الدولة ..

قالت :

واحنا مافيش حاجه على أوله .. ١٩

قال لها :

لا .. فى التايـمـز تقرير منشور بـيـأكـد إن المـصـرـيـيـن القـدماء كانوا أول
من دَخَل أساسيات الشطرنج ف لعب الطاولة ..

نامت صاحبـتـا بكل إطمئنان راحت فى النوم .. لـجـل تهيأله الجو
لإتمام الجوله ..

والصبح اتسلت من تحت لحافها وقامت نزلت ع السوبر ماركت
جابت ا(لكايزر والكورن فليكس) اللى بيعـبه وجابت (هوت دوج وإجر
وميلك) عشان الأولاد ومانسيتش تقوت على عبد العال، بيع الفول
والطعميه أخذت منه المطلوب من أجل استكمال الفورمه الشعبيه وتأكيد
الحلف .. عشان رايحه ح تخطب باسم التنظيم النسوى فى عيد العمال

..



شغل نسوان

البت الخدامة اللّونه اللى كانت شايله شغل البيت فوق راسها، وشايله على الصدر جنينه فاكهه، لحست عقل البيه الأستاذ، اللى مراته الناشفه زى جُذول القطن وعائشه بتستغفر من ذنب إنها حملت منه ست بطون، ومن ست سنين ماسمحتش ليه أنه يلمسها، وطول اليوم قاعدة على السجادة تدعى لربنا يقبل توبتها، ويغفر ليه طيشه كل ما حاله يشد عليه ..

البيه قال للبنت :

- أنا غلبان، ست سنين من يوم ما اتجوز آخر اولادى وانا ضهرى بيشد عليه ! أعمل إيه ؟ إيه ذنبى إذا كان (ز ..) لسه فيه حيل ومعبى .. البنت تكركر فى سرها وتلف بخفه وتقلت نفسها من إيده .. ينجن، يسمع دعوة وصلاة أم اولاده وهيه بتتعبد ع السجادة، تضرب شواكيش فى نافوخه تغيظه، يلعن أم العيشه، اللى وقعها ثلاثين سنه فى أرابيزه . شويه شويه .. البت بقت تسمح له يتمسح فيها ويجس الفاكهه، يريح راسه اللى والعه على شط كفوفها الرطبين .. بقى يتسامح فى بواقى الفكه وف حسابات البقال والخضره .. قلت لها جوز من فساتين الست اللى ماعدتتش بتلبسهم من عهد ما تابت وأنابت، وعطى لها جزم اولاده المخزونة فى البلكونه من أيام ماهمه صفار ..

والبت اللونه ف مكر شكت له هم عيالها وأحوال جوزها .. اللى قانيها مع بنتين بتربيهن من جوزها الثانى .. واللى كل ما يلقى معاها فلوس يضربها ويلهفهم ويكت .. وعدها الأستاذ إنه يشغلها فى وظيفة بمعاش، سمحت له بيوستها فى المطبخ.

ويوميها الراجل فك النشا والتكشيره على الآخر .. وحضنها من
القفا لحد ما حاله اتدهول .. زى ما قالت له وهيه مكسوفه بصوت
مبحوث وهيه بتقلت منه على آخر موجة نيل ..

يوميها وهيه مروح بيتها عطاها عشرة جنيه فوق أجرتها، البت
باست إيد الست القاعدة على السجاده وباست إيده على الباب ..
باسها وهو بيتلفت على قد ما طال خدها ع السلم ..

فى اليوم ده .. كان زايد الحنيه على مراته وده زود شكها جداً ..
وخصوصى لما عطاها حبوب الروماتيزم وعمل لها لموناده سخنه ..
نامت بعد دقيقتين فى مكانها .. وخيل ليها إن ورا الباب فيه دوشة وحد
صغير بيعيط م الضرب ولما زحفت على حيلها وفتحت ورّب الباب لمحت
جوزها متكوم واربم وعساكر من فرق الأمن بتهرى طيظه العريانه بالشوم
الميرى ..

زحفت تانى للسجاده وضميرها مرتاح ..

البية صن شويه مفنس فوق البت المفزوعه لحد مامرتة رجعت راحت
فى النوم .. رفس الباب اللى مابيناتهم على مدة رجله ورجع كمل ..
خلص وسأل البت ف شك وهو قلقان :

- مش مبسوطه .. ؟

قالت له :- بعد الشر .. أنا أصلى فزعت ..

- أمال مالك ماسمعتش منك حاجة ؟ ..

- يا حبيب قلبى هو احنا ح نفنى .. اسم الله عليك.

كان نايم على ضهره متمدد وبينهج جنبها ع الأرض .. قامت صلبت

عدوها وقعدت جنبه تريط ضفايرها .. بص على فصين ضهرها، ملس
بكفوفه على كسم العود العفى وبلع ريقه بصعويه وقال لها : - مبسوطه؟

قالت له : - يخليك ليّه ..

- أنا والا المتثيل جوزك ؟

شهقت من جوه وقالت :

- يا اخويا .. ايش جاب ده لده .. جوزى تور مش متعلم ولا متكلم
زيك .. تور .. وضحكت لكن هو اتخض ..

- تور !؟ .. اشمعنى تور يعنى ؟

- جاموسة .. همه على الأكل وبس .. ويبضرينى شكه فى دراعه ..
شوف .. عض ضوافره ف لحمى ..

شافت نظرة عينه فالقت تضحك واتلفتت .. لوحت عودها ونامت
فوقه وقعدت زى اللبوه تبوس فيه ..

كان ح يعيط لما حس ف ملمسها الكذب وف طبطبت الأيد على راسه
الشايب وكأنها بتطلع له لسانها .. وعايظه تصالحه وتتأسف له ..

جه يحضنها شدت روحها من دراعاته وقامت .. شدت طرف
قمصيتها الدايب من إيده وقالت :

- كفاياك بقى .. ورايا شغل كثير .. وأنا خايفه الست لتصحى .. قوم
وماتبقاش طماع يا شقى ..

حس فى لهجتها مسخرة زى السكينه

جرجر نفسه على الحمام ..

خد دش وفاق .. واما كمل لبس خرج بص على البت اللى كانت لسه
فى قميص النوم اللى بيكشف فى بجاحه كافة تضاريسها .. عملت

روحها اتخذت شهقت فى دلح، تفت فى صدرها، ضحكت له ..
ماردش ..

إصفرت فجأة على وشه كل هموم العله، قعد فى الصاله مسهم . لما
شطبت المطبخ خرجت للصاله .. شخط فيها وقال :

- إلبسى جلابيتك، ماشيه فى البيت كده ليه ؟

البت اتخذت جريت لبست جلابيتها ورجعت قالت :

- خلصت يا بيه تأمرنى بحاجة ..

عطاها اللى فيه القسمة .. وزودها الطاق اتتين

قالت له وهى عايزه تصالحه ويتحاول تقعد جنبه فى دلح :

- تأمرنى بجاجة تانيه ؟

فز .. نظر نفسه وهو بيشخط فيها :

- لأ .. يا للا .. وما تجيش هنا تانى ..

البت المخضوضه شهقت محتجه .. وهى يتطرقع بلبانتها وشفافها

ويتطرقع بالشبشب فى الصاله .. وقالت له وهى بتخرج :

- هقه .. ما يحكمش الرزق على الله ..

واترزع الباب بينهم .. وهو مازال قاعد مرمى على الكرسي .. ساعة

والشقة اسكت هس .. مافيش غير همهمه متعوده ودنه عليها ورا الباب

.. قام .. بشويش .. زق الباب .. واربه وبص كانت زى ماهيه ام ولاده

الناشفه العيانه على السجادة قاعدة بتدعى ربنا يهديه ..

قفل الباب ساكت ودعالتها إن المولى يتقبل منها ١



انتخابات

اتخاقت مع مراتى إمبارح بالليل .. بسبب الانتخابات اللى ح تحصل
بكره ..

وأنا نازل ع السلم، جارى القبطى رزع الباب، هبده ف وشى، فشتمت
البواب علشان ماغسلش السلم ..

عديت الشارع اللى كان ساعتها مش طابق نفسه متفلفص من
رصفانه .. ودكاكينه تقه عليه زباله أكوام ومطبات صناعيه وطبيعيه
ويفظ أشكال وألوان ..

ولما ركبت الأوتوبيس بالعافيه، نزلنى الكمسارى بسبب الفكه ..
واما وصلت (الأتيليه) قالوا لى فيه ندوه عن (رضوى) وسقوط
(غرناطه) .. لكى ..
لما بصيت حوالينى .. ماشفتش حد !



طعم الشاى

الناس دى غريبه جداً .. على قد ما يبقوا متعلمين وفاهمين يبقوا بهائم .. الكل دايرين فى سواقى زى المجانين .. خارج من بيتنا مافيش فى جيوبى ملين .. طب اخش إزاي على زملائي فى المكتب وإزاي .. رايح اقضى اليوم من غير شاى .. وبلاش من دى .. ح اتحمل شخط الهلف مديرى وملاعيه إزاي؟!

على بال ماقعدت وقدرت اكنتم قهرتى .. حسيت انى ماليش أيها حيثيه وكنت ح أعيط، قالوا فيه كشف مكافآت نزل الخزنه، كنت ح اطيرم الفرحة ..

وجريت اسأل وانا قلبى ح يفظ فى صدرى وطعم الشاى فى لسانى .. وفعلاً كان فيه كشف مهول، وكأنه فيه كل أسامى الشعب المصرى فرحت .. وبدون أى حساسيات رحى اسأل .. كان اسمى مش فيه ؟ .. وقال لى اللص المسئول عن توزيع العطف الميرى الشهرى :

- بقمارة إيه ؟ .. ومكافأة على إيه ؟! انت بذمة أهلك حاسس ان ده من حقك؟!

قلت له :

- يا سعادة البيه .. اشمعنى فلان وفلان .. زايددين عنى ف إيه ؟ ..

قال :

- شىء ما يخصكش .. ومش انت اللى تقدر مجهود الناس مافيناش اشمعنى وما اشمعناش .. وافهموا بقى يا بهائم .. فيه ناس بتاخذ

مكافآت نعرفها عن مجهودات إحنا ما نعرفهاش ..

وصن شويه وقال لى :

- فهمت ؟

ورغم إني حاولت ما اكونش بهيم .. إلا إني مادقتش طعم الشاى !.



كولونيا

لما نزل عربية الزلط لوحده بكل همّه .. عطاء الأفتدى صاحب البيت
هدية .. حبة كولونيا كانوا فى قعر القزازة اللى عجبتة ..
شم الكولونيا بفرح وهو مش مصدق انه بكره لما يحلق ح يحط منها
ويتكلين لصلاة الجمعة ..

تانى يوم ..

رجع وهو حزان متضايق ورجله مربوطة، بسبب مسمار مصدى
شقها لما داس على لوح خشب قديم وراح بسببها المستشفى ..
الأفتدى بض لدقته المحلوقة جديد وحب يخفّف عنه ويهزر معاه:
- يا سيدى .. مش مهم .. مش حلقنا واتكلينا تمام .. مبوز ليه
بقى ..

مصمص الرجل شفتيه وزام حزناً وهو مغموم مهموم .. وحسس على
دقته ف حسرة .. وقال وهو بيبص لرجله المربوطة بالشاش :
- ماحصلش .. الدكتور بعد ما خيط الجرح وطلع المسمار .. ربط
الجرح وحذرني من استعمال الكولونيا نهائى !!



إنشغال

أول ما نزل من قطر الصعيد، طلع جرى على مكتب التلغراف يضرب تلفون.

ولما الست بتاعة السنترال .. بعد ما قعدت تبص له من فوق لتحت بقرف وهيه بتطلب الرقم نمرة نمرة .. ولرايع مرة فضلت مستحمله محايلاته الذليلة الرزله .. وخايلته الكدابة - فى الآخر شخبطت فيه وقالت :

- قلت لك مشغوله .. كل الخطوط لبلدكم وللصعيد مشغولة .. أعمل لك إيه ؟ .. كلها مش بترد على أوله .. مافيش ولاخط فاضى !.

قرفص فى ركن بعيد على الرصيف مهزوماً ولم رُكِّبه ويكى من القهر وتقلت الغريه على قلبه زى الرسخه وبقي مش عارف يعمل إيه ؟ .. مش قادر يتصور إزاي كافة أهله انشغلوا عنه ونسيوه بالسرعة دى .. وقفلوا كل خطوط الرجعه عليه.



شغل قرود

فى أول يوم له فى السجن ..

كان قلب الكاتب الكبير ح ينشق م الغيظ والكمد .

كان ح ينجن كل ما يشوف الحراس رايعين جاينين بيصوا عليه من بين
حديد الزنزانة وهمّه بيضحكوا وكأنهم بيتمسخروا عليه أو شمتانين فيه ..
كان بيزوم من الغضب ويدور وشه للحيط يكتم نفسه وهو شاعر
بالإهانة .. ويرجع يزمجر لحد ما انفجر زاعق فى المعتقلين اللى معاه :

- إيه ده ؟ .. بيتفرجوا علينا .. كأننا قرود فى جنينه حيوانات !!

قهقهه فى وشه العامل الأمّى اللى كان بيزامله فى الزنزانة ضحكه
عاليه عريضه وقال له ببساطة شديدة جداً كأنه بيقول معجزه :

- بالعكس يا أستاذ .. احنا اللى بنتفرج عليهم المهم انت حاسس

بنفسك فى اى ناحية ؟

وبيقولوا بعض العالمين بأسرار النفس البشرية، إنه بسبب الكلمتين

البساط دول، خرج الكاتب من سجنه سليم العقل ..

وفضل مصمم على الاحتفاظ بعقله عشان فضل الوحيد بين زمايله

الى قضى عمره بعد كده يتفرج على الدنيا .. وهو محدد بالضبط إن

كان جوه والابّره ..

عملا بنصيحة الأمى الوحيد اللى كان من حظه يقضى معاه يومه

الأول فى السجن !.



خَفِيَّة

- مالك يا محمد ؟ .. ربك قادر ومغيث

- ولا حاجه يا خال ..

- يا ابنى اتجمل واتحمل .. ماكانتش يا ولدى من ليله وعدت فى
المركز ..

- أمر الله واتحكم ..

- قوم اتجدعن .. سامح .. وكريم ربك قادر يبليهم كل اللى اتبلّوا
عليك .. قوم واسعى على رزقك .. الرزق يحب الخفيه يا ولدى وعندك
كوم لحم ..

ماردش .. لكن قال له ف سره .. ومين فى الدنيا عاش عمره مسامح
قدى .. خايف من ضل خياله يا خال ؟ مين فى الدنيا أخف واهون منى
.. كنت ف ايدهم أضعف من غاب الريح .. الهدمه خفيه مش طايقه
الأسفلت البرد وقلبي خفيف م الرعب وهمه على البعد .. طول عمري
باشوف العسكرى باتفرفر وافر ولا العصفورة المنتوفة الريش .. واما
صاحب القهوة ييزعق فيّه باهرّ .. أول مرة يا خال ادخل مركز بالزور ..
إيه فاضل ليه أخف .. دانا يادوب ريشه ف ريح .. ملعونة العيشة ..
الرزق يا خال بيحب التقل والقعه الشرحه والعِبّ المليون .. اللى يحوش
عن جسدك رفسة جزم الخلق ١.

- مالك يا محمد .. بتسخر ليه ؟

- مش عارف .. مش حاسس طراطيفى ..

يا نهار أزرق .. رد عليه ..

ماردش .. لكن قال له ف سره .. يا خال رتّج بالك .. خليك انت ف
هم عيالك .. الخفيّه ح تيجى ف مواعيدها .. ساعتها الواحد لا ح
يحتاج حشو الكرش ولا ح يهمه عسكرى ولا قرش .. أنا دلوقتى أخف
المخاليق .. لاحاسس خوف ولا جوع ولا ضيق ..

وفر يا خالى كلامك وارحمنى من مر ملامك .. أنا خفيت حتى لو
اجتمعت كل كعوب جزم الأرض .. أشبع بيهم انت مادام لسه بتستطعم
مر أيامك .. يا ااه .. ما احلاها الخفيه اللى مش ورا عصافير الرزق
.. ولا قدام جزم العسكر .. يا ااه ..

- قوم يا محمد ..

ماردش .. ماحطش منطق .. كان جسده تقل الرسخه ونفسه

مافيش!



لارنج

كان الشاعر عينه طالعه ورا كلمة على وزن (لارنج) علشان يختم بيها قصيده كتبها فى نفس واحد وكأنه بيتملأها .. إلا كلمه مكوره حرّشه لها ريحه وطعم يمرر حلق اللى ح يقرأها ..

سوّد اكثر من عشرين ورقة وقطعها .. وقصف ست أقلام ورمأها ولا هل هلال الكلمة .. وفضل العالم حواليه أخرس وكأنه لسه ماعرفش كلام ..

والشاعر شاعر اكثر ما بيبأس لما يخف لسانه ويبيس .. يحس كيانه ولا الطوبه المنسيه جنب الحيط المهذوم .. لسانه يبقى على طرف شفايفه زى الهلاهيل اللى ماتستترش .. لما ما يقدرش بيوح بمشاعره ..

الشاعر عقدت قدام وشه جبال صبره من مجاميعه، قطع كل الأوراق .. اتمدّد الفرشه كأنه ف قبره .. وف عز ربيعه، الكون بقى اسود فى أسود .. ساكت وكأنه على العرش ولسه سديم الكون فى الضلمه. قلبه بيتمرجح على كف الصمت .. ومافيش أى دليل يثبت له وجود الوقت .

لسه ما اتخلقتش الكلمة والعالم اسكت هس ..

لسه ماعرفش الشمس ولا النجمة .

من شدة يأسه سلم نفسه لليأس ..

وفجأة .. أشرقت الأنوار .. زى ما بيوج البرق، اتفجر جوه دماغه زلال الينابيع كلمات - نقى على كيفك واختار - الشاعر حس ان كيانه الإنسانى بيتخلق تانى من حمأ الطين قام وخرج خف الريشه وطاير ياخذ العالم فى أحضانه .. ما اتلفتش لكوم الورق المتقطع ولا للأقلام

المقصوفه .. حتى قصيدته نسيها .. والدنيا صبحت عنده بكل ما فيها
من كلمات .. كلمه .. كلمه مكوره حرشه على وزن (لارنج) لها ريحه
وطعم الشفه المرّة على طرف لسانه ..
مشى فرحان بيها يلعب ويلحنها ويفنيها .. حتى قصيدته بحالها
أصبح مش فاكر امتى نسيها !



حرب أظاليا

فى نفس اليوم اللى اعلنوا فيه الحرب على بعض، اتفق الملك الأزرق مع الملك الأخضر إن ماحدش فيهم يأذى الثانى فى صحته أو عافيته أو أهل بيته، وفى اللحظة اللى اندفعت جيوش الاتين للقتال حتى الموت استبدل الملك الأزرق والملك الأخضر رصاص بنادقهم (الدم دم) برصاص فشينك، وعملوا سفينتهم من خشب الكافور بدل من الصلب احتياطاً من أى مواجهة شخصية بينهم .. وإن كانوا اتجنبوها فى كل الأحوال .. فما التقوش مباشرة أبداً إلا فى ساحات الأسواق وحدائق المفاوضات ومنصات التشريفة أو الكلام ..

ويوم بعد يوم كانت المعركة بتشتد وتولع، وغطت سموات المملكتين دخنة الحريقه فى البيوت الصفيح والعشش على طراطيف المدينتين.

وارتج العالم من صوت المدافع واهتز مع برق الصواريخ واتزلزل من فرقة القنابل على خطوط التماس.. اللى التحم فيها الأتباع جسد لجسد ودراع بدراع ..

وغطت صور الشهدا من الطرفين حيطان المدينتين على الناحيتين، صور ملونه لها عيون غضبانه وملامح حزينه.

واترملت النسوان..

وياما أسلاك البرق ولعت من سخونة انذارات التهديد وفرقت الراديوهاث بأغانى التمجيد والأناشيد .. واتسودت صفحات الجرايد وغرقت فى سيول الأخبار والأنباء المفجعة والأحداث المفزعة والمعارك الحقيقية والمعارك الجعجعه اللى ياما فيها من الصدق المتساوى ..

والكذب المساوى ..

ومع ذلك .. ما بطلش واحد منهم تقشير البرتقان فى هدوء ولا مداعبة الأطفال فى السوق ولا مغازلة الصبايا فى البساتين الخضرة الى حوالين قصر كل واحد منهم واللى ما عرفتش شكل النار بره المناقد والمدافى ولا سمعت صوت الرصاص إلا فى المواكب والاحتفالات ..

وفى القاعات المحصنة المعزولة اللى كانوا بيعتكفوا فيها علشان يفكروا فى الخطط الجديدة ويدبروا الوسائل التكتيكية ولاستراتيجيه لتجديد روح القتال على الجنبيين وتطوير أساليب الحرب بين الشعبين لا كان فيه راديو ولا تلفون، حتى لا تفسد انباء الحرب تكتيكاتهم .. ولا تأثر الأحوال الكرب على أفكارهم ..

ومع ذلك اتملت الشوارع وصفائح الزياله بورق منشورات التحريض والعداء لدرجة اصبحت مشكله التخلص منها مسألة مربكة وملعبة لا وقت لحلها لأن كل الجهود كانت موجهه للمعركة المقدسة ..

وف عز حمى الحرب والقتال ومن كثرة لانشغال بمشاكل النضال، نسى كل واحد منهم بالتدريج أطفاله وبيته ومراته ..

واحد منهم غضبت وراحت بيت ابوها فى المملكة المجاوره تشكى الوحدة والاهمال .. فوقعته فى غرام ولد حليوه مش بطل ساكن قصادهم فعينته فى ديوان مظالم أبوها .. وبطلت بسببه تبكى على صدر أمها لدرجة نسيت معاها سيرة جوزها وحرية اللى ما بتخلصش وملت قصر أبوها لعب وأطفال ..

أما الثانية فماكانش حظ جوزها أقل من حظ جوز الأولانيه لأن مراته فضلت لازقه له ..

لكنها فضلت أنها تخوض المعركة بنفسها، فنزلت للميادين تشجع
العساكر والمجندين بكل عواطفها الملهبة .. وأحساسها المرفه
وجسمها الفاير، فاختارت ترفه عن التعبانين من القتال والمجروحين فى
المعارك والمحرومين من الأهل وخاصة صفار السن ..

وكانت تصريحاتها اليومية الرسميه لوكالات الأنباء وللراديو القومى
بتعلن فخرها واعتزازها بشباب مدينتها اللى بيخوضوا المعركة المقدسة
بكل رجولة بزعامة جوزها اللى وقفت معاه كتف بكتف وايد بإيد ..
تتحمل بعض أعباء القتال ومتاعبه !

ومرت سنين وراها سنين ..

اتغيرت حدود المدينتين، مره ورا مرّه .. لكنها كانت بترجع تانى زى
أول مره بدون أى تعديل فى الخرائط الرسميه أو فى مقررات
المدارس ..

وأبيض شعر الأولانى وشاب ..

وسقط شعر التانى واتحل وبره ..

واتشلت إيد الأولانى الشمال .. وتاهت نظرة التانى واعتلت
صحته ..

ووصلوا الاثنين لدرجة أنهم كانوا بيحتاجوا لمساعدة الياوران علشان
يقضوا حاجتهم فى الحمام .. لكنهم فضِّلُ ملتزمين تمام بالاتفاق
الأولانى .. الأولانى ..

ماحدش منهم يقتل التانى .. ولا يؤذيه فى بيته أو عافيته أو حتى
يجرح شعوره حتى بعد ما بقى مستحيل يتقابلوا ف أى مكان ..

لكن لما سقط لاثنين ميتين بحكم السن ويسبب المصايب اللى عملوها

والهموم اللى سببوها للخلق عمداً ويقصد انتهت الحرب بدون أى
قصد ..

لكن فى ذكرى الاتفاق الأولانى ..

كان المنكوبين من الناحيتين بيזורوا ف نفس اليوم القبرين فى
احتفال رسمى مهيب علشان يقرأوا الفاتحة احتفالاً بانتصار كل واحد
منهم على التانى !.



موت السيد أفندى

كان فيه واحد اسمه السيد أفندى
اتحصل على رتبة (سيد) أول ما الداية لقت راسه .
وكبر سى السيد فى شكله وسنه ومقاسه ..
وكبر وياه إحساسه قد ماكترم حواليه ناسه .. اللى اتعودوا يقولوا له
يا سيد افندى .
والسيد افندى - افندى زى وزيك، وان كان أحياناً بعض سعاة الهيئة
العامة يقولوا له يا سيد بيه .. لما يطولوا منه بعض البقشيش ..
ما أطولش عليكم - السيد بيه واحد منيكم .. بياكل يشرب زيكم
واحيانا بيروح المسرح لما يتحصل على بون مجانى ..
السيد افندى مزنوق على درجة بقى له سنين ياما .. وبيتخانق شهرياً
على حقه فى حوافز الساعات الاضافيه اللى ماحدش مننا أو منكوم
بقضيتها فعلاً فى الشغل ..
السيد افندى لذلك سيد عادى .. م اللى بيروحوا الشغل يوماتى ..
واذا تأخر يتودر .. ويبركب أوتوبيس زحمة فى الراجعه والرايحه .. وأول
ما زنقت وياه بطل تدخين .
تانى ما زنقت بطل أكل اللحمه .. وبعدها بطل فسحة .. يعنى السيد
سيد عادى .. موظف مصرى من ملايين زى السيد أفندى .. وف يوم
من ذات الأيام .. يوم كان عادى .
قام السيد افندى من نومه لقى نفسه بيبتسم فى سعادته ويبصفر ..
فتح الشباك شاف عصافير .

فقعد يلعب سويدى بنشاط غير عادى ..

شويه ومراته راحت داخله عليه وكأنا فى مسلسل أفرنجى .. حلوه
ومسرحة شعرها ومهندمه والأدهى من ده ومن ده شايه له فطار إنما
إيه ٩.. فول بالزیده وبیضه وكوبایة شای بحلیب..

سید أفندی استغریها لأول وهله .. استغرب إنه مش مستغرب..
فاستقرب كرسى وراح قاعد واكل وكان ممكن يفضل قاعد لكن بص
ف ساعته فقام مع إنه لقی قدامه كثير .. لأول مره حس بأنه مالك
وقته مع إنه صاحى بدرى مرتاح ..

دخلوا عليه اولاده وبناته الستة شرحين لابسین فاطرین الدم الصحه
ح بیک على خدودهم لازکام ولاکحة ولا عماص فى عیونهم..
قالوا ف صوت زى ملايكة مزیکه وعصافیر ..

يا صباح الخير.. سألهم .. عایزین المصروف؟ يا سلام يستاهلوا
اولاد وبنات زى الورد وكأنه بيشوفهم أول مره .. باسهم واحده واحده ..
وواحد واحد .. ومد ايديه فى جيوبه التقى فكه .. زى مافكر بالضبط
.. الاولاد شكروه وباسوه بطريقه عادیه غریبه وقالوا باى باى ..
بالافرنجى .. بحلق فيهم مش مستغرب .. ابدأ شىء عادى .. زى
الأفلام .. قال .. باى باى .. وفط فى صدره قلبه الأخضر..

قام يحلق دقته.. ما شاء الله.. فيه ميه فى الحنفية.. ولقى موس
لنح وجاله صوت مرته من آخر الشقة بتدنن ولا لیلی مراد بتقول له
نعيماً يا حبيبى يا منايأ..

سید أفندی كان عنده مرايه طبعاً زى بقية الناس..

شاف نفسه كأنه حسين صدقى أو فهمى.. وليلى مراد أو يمكن كانت
زى سعاد حسنى بتقول له حاسب على دقنك يا ولد يا تقيل..
قال اللهم اخزيك يا شيطان.. وراح لابس..
التقى قدامه قميصه مكوى ومطبق جاهز.. وشراب مفسول مطوى
على بعضه فرده شبه التانيه تمام..
ولقى الجزمه بتلمع.. راح متقمع واتقدم مفروود فى قلاطه وغمز
لمراته وباسها زى الأفلام..
كانت ريحتها عاديه.. لا صابون ولا جاز ولا تقليه.. ريحة ست
صحيح قال لها باى باى .. أنا مش ح اتأخر.. مسافة السكه وجاى..
سيد أفندى نزل السلم زى المعزه البكر.. قصدى خفيف بيحجل على
رجل ونص ويأخذ أحياناً كل درجتين فى المره الواحده.. شقاوة وكأنه
لسه ماخذش الثانويه..
وصل الحوش التقى بير السلم والعتبه بتاع البيت مفسوله..
والشارع مافيهاوش أى زباله .. أو أحجار.
لقى رصيف ممدود راح ماشى عليه .. والناس رايعه وجايه حواليه
.. عماله بتتبسم ويتضحك وتصبح على بعض..
سيد أفندى بقى يرمى سلامه شمال ويمين.. ع اللى يقابله سوا
عارفه أو مش عارفه.. كان فرحان ولأول مره من مدة اشترى جرنان..
التقى صورته بتضحك فى الصفحة الأولى ومانشيت عليها بيقول ان
الجو جميل اليوم..
وجه الاوتوبيس فى ميعاده .. السيد أفندى ركب الأوتوبيس بالراحه

.. إيه ده .. كرس وجنب الشباك ؟ .. لا .. دامت داعيالك يا ابو السيد،
الكمسارى ابتسم له وهو بيعطيه الباقي، فكه ؟

وف غمضة عين أو أقل كان الاوتوبيس واقف فى محطته عند
الشغل. كأنه بيقول له اتفضل ..

السيد أفندى العادى، شاف الأمر الغير عادى .. عادى جداً ..
كان الشارع أصلاً فاضى .. والعرييات بتوصل بعضها والباصات
بتحود جنب الرصفان حدا كل محطه بدون أى مغالطه ..
والإشارات وكأنها مضبوطة بالثانيه .. والنازل نازل والراكب يركب ..
شئ مش معقول لكن كان عادى.

نزل السيد أفندى وعدى الشارع بعد العسكرى ماشاور له وخلقى
العرييات تستنى وصل الباب .. التقى بعض زميله هاديين طعمين ردوا
تحيته فى بشاشه وود وزوق ..

وجه المصعد فوراً ركبوا بالدور - الجو جميل حتى جوه المصعد من
غير دخان ولا ريحه وصل المكتب أسكت هس .. المكتب هادى .. كلن
جد ف جد ..

كان الشغل كثير مستنى .. لكن ما حسش بيه حد .. اشتغلوا ..
شربوا شاي طبعاً لكن من غير زيتيه .. وماجابوش سيره للكور .. أو
يمكن جابوا سيرتها من باب جبر الخاطر .. بطريقة عاديه ممكن
تساها .. من غير ما تتخاف مع حد ..

السيد أفندى فى اليوم ده خلص ميت ورقه كانت مركونه ..
السيد أفندى بقى مستغرب من نفسه مع ان زميله نادوا عليه أكثر
من مره بإسمه السيد أفندى وأحياناً السيد بيه ..

وقرص نفسه لما الشك ملاه .. فعلا هو السيد أفندى .. وده مكتبه
فى الدور السابع .. بس ده مدهون ابيض فى ابيض .. وف ركن شويه
زرع اخضر مادين ع الحيط أول مره يلاحظه .. غريبه .. لكن سيد
أفندى ما اتغريش كثير .. استغرب حبه بسيطه لأنه على قد ما ذاكرته
ضعيفه لكن فاكر ان الركن ده بالذات كان الواد الساعى بيعمل فيه
القهوه والنعناع ..

السيد أفندى قال سبحان اللى بيغير ولايتغير ..
وخلص وقت السيد أفندى .. قام فى ميعاده .. وحيا زمايله وبعد ما
رتب دوسيهاته وأوراقه وقفل ادراجه اتوكل ..
كان مشتاق لمراته .. اللى وعدھا يرجع بعد مسافه السكه ..
زى العاده فى ميعاده البدرى ..
ونزل سيد أفندى ع السلم رغم بأن الكهريا ما انقطعتش والمصعد
جاهز لكنه قال دى رياضة ..

ووصل الشارع التقى اوتوبيسه وكأنه كان مزبوط على وقته ..
راح طالع بهدوء وقعد لكن مش جنب الشباك .. ما يهمش برضك
حلو هو احنا حنهب - هووه هووه ده جميل ..
الأوتوبيس عند الموقف بالضبط وراح واقف .. نزل السيد أفندى ..
اشتري ٢ كيلو موز مغربى واما لقي سعره مناسب جاب كيلو فراوله
.. وقال .. خليههم ياكلوا .. هو احنا ح نحوش ..
وحناخد ايه م الدنيا لو حوشتنا ؟ .. متر ف متر .. واقل ..
وعلى واحد من رصفان الشارع .. راجع سيد أفندى .. وبعض الناس
بتحبيه والبعض بيتأخر ويعديه ..

جری آیه ؟ .. الناس دى اتهلبلت يا اما مجنونه ..
مزیکه هادیه طالعه من البلكونه ..
بشاشة ف وش الناس .. حتى البواب رحب بیه .. لیه ؟
طلع السلم فى هدوء وبشاشه ..
وقدام الباب دق الجرس .. مع ان معاه المفتاح .. لكن كان عایزها
تفتح له .. حبیبته أم عیاله .. فتحت. ! إیه ده ؟ ..
موز وفراولة ..
وكانت شایله المغرفة لكن لابسه مریله على فستان البيت اللی بیحبیه
وكانت متسرحة ونظیفه بتبرق حتى وهیة بتطبخ ..
قال لها إیه ؟ ..
قالت : لحمه .. شم الریحه اتبنج ..
قالت له وهیه بتدلح .. ارتاح لك حبه .. یا دوب ربع الساعة وكله
حیکون جاهز یا سید افندی ..
باسها فى شقاوه وسابها تروح المطبخ .. قال لها :
- راح امدد طولی شویه لا انا من کتر الفرحة تعبان ..
ضحکت من عند البوتاجاز .. وقلع هوه هدومه وعلقها ..
ومدد جسمه وهو بیتهد فى غایة الراحة على سریره
واتبسّم من قلبه .. ومات !!



كابوس ليلة سفر..

شفت نفسى كأنى راكب قطر مفتخر ..

ومع إنى كنت متأكد بأنى مش مسافر أى حتّه، كنت مستعجل
وباجرى متكدّر، ومهموم، لاوى بوز، قد يجوز عايز أودع حد أعرفه،
جايز إبنى أو يجوز قريب، بأوصله، أو صديق، صاحب قديم باستقبله،
كنت يا دوبك طريقى ف أوّله .. إنما إحساسى قال لى - الوقت فات ..
من زمان الوقت فات.. وأنا القلقان عجوز فى لهفة الطفل الصّغير
باستعجله.

رغم أنه لا الزمن ماشى، ولا ماشى العجل !.

ولاحد منا عارف القطر ده جاى منين ولا رايح بينا فين؟

إنما بهمه وشوق قلت أحجز له مكان .. أول ما يجى عندى يستريح،
أو ينام.. أو لما يركب جنبى زى ما قلبى قال لى..

لحد ما نوصل سوا من غير مشاكل، التذاكر جوه جيبي.. الزمن كان
زى ما يكون توت عجوز، نخل خايخ، المسافات مش مهمّه وإنه العمر
بيعدى عمدان الخشب أو يفرط.. زى رأى هزيل وبايخ، أو قصيدة
هبله، أو وَرّة شيطان أهطل وشايخ.

أرض محصودة بقمح متفحم متعفن مكانه.. أو زى ما نقول مش
أوانه .. الغيطان راقدة تتنفس بصوت مألوف لودنى.

كوبرى مش واقف مكانه، وش طفل ساكت فى خجل مُر .. يطاردنى.
عينين وسيعة لبنت تشبه أخت ليه .. إبتسامة حنيّنة فى ميعادها ..
بتحضّن عليه .. زى ما يكون وش بنتى المشمشة أو حفيدتى الللى راح

تكبر فى بلد تانيه ومش راح اشوفها تانى، وماهيّاش عارفه اسمى ..
ونفسى كنت أقضى بواقى عمرى وأنا يومى إوصلها لباب المدرسة ..

كشك فيه بنت بشفايف مستوية بنفسجية، جنب حيط (الملعب
البلدى) فى (بيروت) العرب قبل ما يخشو اليهود !..

بلكونة شقة (العوا) القديمة فى (السويس) جنب قسم الاربعين فى ٥
يونيه، دكة (الكابتن غزالى) وققص مانجه هديه (لمحسنة) بتاع السياسة
.. دخنة (السّخنة) وحريق (شط الزيتيّة) يوم ميلاد ابنى الوحيد اللي
واحشنى !..

انت مين ؟

فجأة شفته ورايا بيضحك، رغم إنى مالتفتش ناحيته .. شفته
بصحيح .. «يااااه .. هو انت ؟.. لسه فاكرنى برغم الموت يا صاحبى !...» .
جاي بنفسه أيوه (أمين) – (ابن محرم) اللي راح ضحية قتل حمّله،
صوت غنا لاولاد كإنه زى ما كتّا زمان تمام .. حنّه سويسى وصقفه
واحدة .. وكأنه كان معايا من البداية قبل ما يعرف يموت .. بعد مالعن
السياسة ..

أيوه هوّ !! والغريبة شفت جنبه (الليثى) أيوه قصدى بالضبط الولد
ده اللي انت عارفه .. اللي مات من مدة فجأة بعد ما صوّر جميع
المسؤولين والمطلوبين .. والضحايا !!

كنت شايفه وكان شايفنى . ولأنه عارفنى وعارف كل حاجة عن
حياتى كان معاه الكاميرا بيتسحب ورايا وسط صف ميتين رايعين
جايبين .. إبتسامته الهادية كانت بتناقنى زى عادته، وشه مليون فرحة

خائفة وكلام ميت على لسانه بينشف فوق شفائفه .. خفت جداً ..
ارتعشت ف قلب منى، «هوّه يقدر ميتين يصوروا .. ناس ميتين؟ والأ بعد
ما متنا .. لسه محتاجين صورناليه؟»

إنت مين؟

فجأة يسألنى وهو أكيد عارفنى ..

اشتريت البدله إمتى ؟ واللى جاى أقابله مين؟

وهو عارف المسافة بين سريرى وبين لاطوغلى !

والمسافة بين قصايدى وبين بواكى الأوبرا وقهاوى الحسين!

الصدى اتمدّ وتاه «اسكت هس» .. سراديب الزمن ..

وساعتها عرفت إنى لوحدى نايم .. وحدى ومأحش معايا !

السكون راقد عليه ليل غطيس ..

ولا صريخ ابن يوم .. جوّه بيتى اللى بنيته بنفسى طوبه جنب طوبه
بعد ست تسع سنين من المناهدة .. فسألته فى ارتباك، لما شفته فى
ملابس المخبرين .. وكأنه بيضلّلنى لجل ما اعرفوش !!

«اوعى يا (ليثى) تكون جاى تتادينى أروح معاك .. لسه بدرى ولسه
ياما ورايا .. ياما ..».

ابتسم لى (ابن محرم) ابتسامه ميتين .. وشفت (ابويا) وراه بيطمّن
عليه .. وقال وهوّه كانه بيضطرب عليه ..

زى عادتك .. انت واحشنا وكنا جايين نشوفك .. يا زميل أنا ماشفتش
ولادك من زمان .. لسه بدرى .. لما تعقل !!

قلت «لستَ ورايا شغل كتير يا صاحبي» (يا ابن محرم!) الرصاص
فى (خالدة) سمّع فى (الجنانين). الرصاص نفسه فى (ديروط
الشريف). وابن عمك ضاع فى (أرض الخافجى) ماعرفنا له جَره ..
وأبويا كإنه عارفنى ولكن ناسى إسمى !.

قام غمز لى بعينه قال «يبقى اتفقنا .. بس تبقى الحقنا دوغرى لما
ح يؤون الألوان .. واوعى تنسى دى .. (السويس) لسه بخيرها ..»
واتملا وشه فجأة بالغضب .. وماقالش حاجة .. إنما قال كل حاجة!
بدون كلام ..

وساعتها بس شفته على حقيقته لحظة بعديها اختفى، هو والقطر
الى أنا مستتى على شوق لحظة وصوله .. والكراسى الفاضية ياما ف
ضلمة الدهليز .. وشمع الميتين .. وهدوم المخبرين والعساكر خوص نخيل
ولقيتنى ف وش حيطه سد عالية .. فى الامام الشافعى كان فقها
بيقروا .. جنب قبر قديم دخلته مع إنى ماعرفوش .. إنما أشبه بشقّه
كان سكنها فؤاد حداد زمان.

وحده كان (الليثى) بيغمزلى ف شماته وهو بيمد ذراعاته بالضوافر
ناحيتى .. الفراغ حوالته بيضيق سنّه سنّه وكنت متأكد بإنه لو لمسنى ح
أموت فى لحظة لمستّه ..

ألتقيتنى وحدى على سلم بناية ف بيت قديم .. وفجأة قطعوا
الكهريا .. صوت كإنه وكيل وزاره ولبله حمرا وعيل فى الضلمة بيبكى ..
مكروفون مشروخ وصوت انفجار باللاسلكى باين ان الحرب قامت ..
وسارينة طالبة من أهل (الغريب) نقل دم .. للى ماتوا بينزفوا .. وسبيل
مهدوم فى ديروط الشريف إترعبت. صرخت .. وجريت فى النفق ..

ضربوا جامع (الاربعين) خزانات الجاز بتولع فى الزيتيه .. صوت
مراتى فى عنبر المستشفى بتولد ابعدوا عنى وغوروا يا غجر .. لسه
ياما حاجات كتير ما عملتهاش .. وده أول فرحتى ..

اتخنق صوتى فى حلقى واتحسرت .. شفت نفسى عند (قسم
الازيكية) زى ما يكون لسه رايح للمحطة .. خلق (م القللى) على الجرحى
بتبكي .. عسكرى مبهدل وراجع م الميدان .. أم بتعيط على اولادها
التلامذه الميتين .. بعد ما انفجرت على سهوة الشطابا ..

«مش ح اموت سُكَّيتى.. لأ .. مش ح اموت فوق سريرى كإنى فار..
لأ .. لأ .. يا غجر ..»
فجأة..

قمت ادعيس فى الظلام لاسود على ورقة وقلم لجل افوق اكتب ..
اسجل احتجاجى ورفضى إنى أموت وحيد .. قلمى ماهواش فى إيدى..
باتخنق، حواليه الضلمه خرّمس ولا صندوق من حديد، اتفزعت، لسه
جوه بطن أمى ؟ ما اتولدتش ؟ انا طالب القلم .. الورق .. لو كتبت يجوز
اعيش لولقيتهم؟ مش ح اموت.. إلحقونى.. فجأة.. حسيتهم فى إيدى..
التقيتهم .. فاهتديت بالله (أبويا) قال :
- هديت.. قال لى اقرأ .. اكتب ..

قرئت.. واما حسيت العرق سيل فوق جبينى.. استريحت.. كان
الكلام فوق لسانى على الورق بيتهجّى بعضه.. سلسيل..

ولما لقطت نفسى.. قمت على رجليه فقت.. صحيت مكرمش.. زى
جلابيه ف غسيل «ياااه».. كنت وحدى .. الصاله هوّ.. وبرد.. موت!!
ومن بعيد بعيد.. بلدى ميت سلسيل بتبعد عنى والسويس بتغير

التوب القديم بالعسكرية.. والزيتيه عند باب المينا بتبيع أنتيكات
ومرايات حواليه مزحومة بعيون صفرا ودقون.. ورشاشات.. عرفت ان
ابويا مات..

ومن جديد سمعته العسكرية ماسك عصايه مشعبه بينده لى
بصفارته الطويلة المربعة.. زى قطر عويل بيسخر منى ويبصفر
وبيترقص سعيد.

قطر الصعيد بيعدى فوق حديد مصدى ا.
ووأنا زى اللى شايف نفسى راكب قطر مفتخر وأنا متأكد بإن
مافيش ورايا ولا قدامى أى سكة سفر..



ثرثرة فى منشور انتخابى

ممکن نعمل خاطر للعیش والملح وأحياناً بنمیل لى بیشاركنا الأحزان
والفرح .. ونجامل مین یجاملنا أحياناً رد جمیل أو نراعى اللى خفف
عنا آهات الجرح أو لى حمانا من أزمه أو راعى خاطرنا بدون لازمه .

البنى آدم من طبعه یراعى قبیلته وبلدیاته ویحامى عن عیلته ..
یضعف قدام أصحاب الشله والقعهه والمدرسة أو زملاء العمر أو
الحزب ..

یحن على أصحاب العله .. أو القله لكن .. عار کاتب والشاعر إنه
ف ساعة ما یحق له یختار - یستسلم للکذبه، أو للغرض العرض الذله ..
أو یحتار فیسلم نفسه للتيار .. أیها تیار

وینسى المیزه الأولى للفنان، إنه إنسان عنده القدره یبدع ساعة
الحق .. بكل الحریه ویرفض ان إرادته تبقى لبانه ف بق مقاول أنفار ..
وف يوم ما یتخیر ما بین الخوف والصدق .. یقدر لکرامته .. یختار ..
فى لحظة لا اختیار .

اللى بتشبه للحظه اللى بتملك فیها موهبتك وهج الفکره - ست
الأفکار - فتشکل فیک أشواق الحب

أو تشعل فیک جمر الحزن والنار فتتطق بالحق أو بالأشعار
فایک تتركها فریسه للکذب أو الضعف أو الکره أو الخوف ..
إغسلها بالندى أو بمياه الأمطار - طهرها بالصدق احميها م
الاستصغار .. کبرها - کبر نفسك بیها، اوعى تصغرها . م الاستئثار
حررها ..

اجعل ألم التجربة وحده، بطعمه الحلو أو المر هو الذى يملأ لوحده
على قلمك، يؤكد لك إنك تستاهل روعة ألمك.. وانك مسئول.. قادر..
حر وانسان مالك روحك ويتخارا
أيوه.. الكاتب لازم إنسان حر
والشاعر أدرى الناس باللى سقانا المر
فاعطى بنفسك للدنيا الفرصة للتغيير، العمر قصير.. بيمر، واللى
ما يقدرش يغير.. مش لازم عن عمد يضر
ويالى عارفينى من ٥٠ سنه واكثر، أنا هو انا ما اتغيرتش، وان جت
لك قدرة وما خفتش تختارنى مش ح اسمح للكذب يغيرنى ولا للإفساد
يقهرنى ولا للرأى الواحد أو للضعف اللى بيحاصر الواحد، سوا كان
انسانى بحكم السن، أو عدوانى بحكم التبعية والعيشة المر.. مش ح
اسمح له - إلا على جتنى - مهما اتقرعن - إنه يمر ل.



الخرابيش

وكان جميع الشعراء مخدرات ريش.. وأنا وحدي اللي بخرابيش علشان
خريشت عساكر ولصوص ياما

بقدر ما غنيت وكتبت نصوص، وهبشت الكدبة من الكتاب الكتبة ومن
السياسيين المنتفعين من كل ملة ودين.. سوا م اليسار أو م اليمين..
لذلك باعذر وباسامح كتاب التقارير الأدبية والشعرية ونقاد المقالات
الأمنية اللي بينسوا يذكروا إسمي وشعري عمداً في كتاباتهم وكتبهم
العلنية أو تصريحاتهم الصحفية.. وكفايه عليه فاكريني (بالخير) في
(مقالاتهم) السرية! وعلى فكرة أنا أطيب من شعري كثير.. ولذلك
حبسنى عبد الناصر (الوطني) وشعراوى (الاشتراكي) والسادات
(الديمقراطي)، وبكل غباوة المنحوس المتعوس ضيعت بكل بساطة ميزة
إنى كنت في يوم م الأيام محبوس، وماحولتش أيام سجنى في بنوك
الأنظمة والأجهزة لشيكات وفلوس!! وأهى الفرصة الظاهر ضاعت ولا
حد عاد بيفكر يحبسنى الآن!.

يمكن لجل ما عايش عندي اللي اخسره إلا حبي للوطن اللي حتى
الآن ماكرهنيش! مع إنى ضلي تقيل..

لكن وحياة العيش والملح يا صاحبي أنا شعري حنين على كل شريف
ونبيل.. عمرى ماخريشت غير كل جبان وغبي وكذاب وعويل.. صدقتى..
وحاول تسمع لحنى الطيب تحت النغم العدوانى.. لأنه ماكانش ف إمكانى
بعد اللي انا عشته وشفته من الكانى والمانى.. غير إنى ودفاعا عن ذات
نفسى كيانى.. وعن وطنى اللي ادانى كافة ما أحيانى بيه ويلانى من ناس
وأصحاب وأغانى - انى أتحامى بخرابيش الشعر الإنسانى.

من دفتر أحوال الدين

القتل على الهويّة

عبالعال ..

العسكري فلاح النفر الدرجة الثانية ما أخذش الفرصة يفك الخط
ولا يدخل مسرح ولا يدخل دنيا، كل الفرصة اللي سمحوا له بيها الأمرا
إنه يموت قبل ما يلحق ينطق باسم الله..

أما برزى النحال

فطبيب أطفال.. مصرى قبطى وفنان.. فى قلبه ملاك متصور على
صورة إنسان.. عمر ما إيده مسكت غير سماعة وفرشة ألوان.. مع ذلك
قتلوه الأمرا فى عيادته.. ما عطوهش الفرصة يكمل وقته.. ويخفف
حرقة آه الطفل اللي كان وياه.. بيحاول يشفيه باسم الله..

ويوم ما قتلوا عبد العال.. ماكنتش عاطى خوانة مش علشان رايق
الخطر أو خالى البال.. لأ.. علشان أنا عايش متدهول متوغوش
محتر، بين مصاريف سترة بيتى والخوف من لبن الأطفال.

- هية الريح دى بتهب منين؟ الشباك ده له شيش واحد والا اثنين؟
العصفورة قالت لى العهد على النجار.. يا هتلى ح تكفى علاوة والا
علاوتين.

وح اقدر تانى اتحمل نظرة بنتى وانا باتعذر ليها لتالت مرة؟ وإلا
اضربها طبنجة واتخن مخى زى ما جلدى تخين! طب يمكن تتحل
العقدة لو ابطل تدخين.. أو أحرم على نفسى قعاد القهوة.. بتسهينى
العقدة وتتط قصاد المنشار !!

يبقى خلاص ..

لازم افكر فى السير البطال ! راح تفرق إيه ؟ .. كل الخلق على دى الحال .. واهو قتلوا قدام نن عينيّه عبد العال وأنا ملهى على عيني، ملخوم غرقان فى همومى باروح الشغل وبارجع فى نص هدومى، باسرق يومى من قوت يومى .. مزنوق فى زحام الشارع، محروق فى زحام الشغل .. مخنوق فى زحام البيت المدروز نسوان وعيال .. ويوم ما قتلوا برزى النحال ..

الى عمره ما نطق العيبة واللى كانت فرشته ما بترسمش إلاّ وجوه بنى آدمين نص ملايكة بالألوان .. ما كنتش يومها واخذ بالى مش علشان راضى عن حالى أو خالى الذهن وهادى البال .. لأ .. لكن علشان كنت محير متعتر خايف خايب مش فاهم محتار، بين صواريخ ولد العم اللى بتحرق بترول أولاد الخال ! وضوافر العريى اللى بتتهش فى الجلد العريى ..

ويافكر مش فاهم باسأل والجرنان قدامى طلاس مش قادر يجاوينى على أى سؤال ! يا هتلى ليه أم الدنيا بتزنّ على خرابها مطلوقة دياها على كلابها، ليه اتحرقت فى العيد أبوابها ليه باشت فى النظرة أحزابها أو شابت فى عز صباها وشبابها ؟ ليه ؟ .. وليه أعادياها بتحرق بإيديها هلالها وصلبيها ؟ كنت ف قهرتى قاعد وشى للحيطه .. زهقان م الشارع، طهقان م الشغل .. قرقان م البيت ..

يا هتلى اخرج من جلدى .. أحرق جبّة جدّى ؟ حتفرق إيه ؟ وأنا حدّى على قدّى ! وذل حدودى من قلة ذات يدى .. وقدام نن عينيّه قتل الأمرا طبيب الأطفال برزى النحال .. وأنا ملهى على عيني .. من قومة

قومى على قومى متسريع طول يومى، متقطع فى صحيانى متفرّع ساعة
نومى، متمزّق عَ الجنبيين متوزّع بين البَيّنين ما بين الحسرة يمين
والكسرة شمال ..

ويوم ما قتلونى الأمرأ الأبطال ..

برضه ما كنتش رايق البال ولا عاطى خوانة.. لأنى ما كنتش فاكرا ان
الدنيا ما بتاخدش ف بالها لما تكون طهقانه.. وانه لما الخلق بتبقى لهدى
الدرجة زهقانة من ناس شبعانة بتاكل فى خلق جعانة.. بتبقى لهدى
الدرجة جبانة..

ولما وصلت الجبانة..

قابلى صديقى فرج فودة وسألنى عن الأحوال.. يا هتلى بعد
الإخوة ما دبحونى راقت فى مصر الأحوال؟ وبقى الإسلام أبقى
وأعظم.. زادت فى البوسنة بيوت الله؟.. رجعت أموال اليتما م الريان..
إتبني كام مسجد أو زاوية فى الهند؟.. اتصلح الحال فى كابول
وبيشاور.. طب حتى فى تبريز وما خلف النهرين؟.. والجزية وفّت بيت
المال؟ والا الحال زى ما هو فى الباهاما وألمانيا وباريز !! والأّ إتحددر
اكتر واكتر م الغل وم العند فاتسدت نفس الوالى - واتفتحت نفس الغولة
لدم الأطفال .. والخلق انجنوا؟..

من كتر كسوفى منه.. ما قدرتش ارد عليه..

خجلت.. وحتى من خجلي خجلت.. لأنى ساعتها اتذكرت ازاي انا ملهى
ف هم رغيف العيش واولادى مسروقين منى ومشغولين عنى بالفوازير
والنينجا واتذكرت الحيرة اللى لخمت أمى ما بين البرقع والشال.. وحيرتها
إن كانت خطوتها ف بيتها حلال والا حرام زى ما بتقال..

وغرقت ف حزن أبويا وخوفه من الدنيا الموحوسة المدعوسة بشطارة
روس الأموال ..

.....واتذكرتني قبل ما اموت مدبوح على إيد الأمرا الأبطال..
عايش ملهى ملخوم مش عاطى خوانة.. مشغول مهموم برغيف اليوم..
وسموم اللحمه ولبن الأطفال.. متحير متعتر مغمى عليه، متغمى
بهمومى طهقان مخنوق عريان حتى من نص هدومى.. من يوم ما قتلوا
النفر الفلاح الدرجة الثانية مجنّد / عبد العال.



ربنا رحمن رحيم

ربنا خفف عنا .. لأنه رحمن ورحيم جعل الصلا خمسة بدال
الخمسين .. ربنا خفف عنى .. وقال لى ما دام معذور صليها قضا وف
اى مكان ميسور .. لو فاتك الوقت !

ربنا خفف عنى وقال :

صليها لوحذك لو مالحقتش أى جماعة .. ربنا خفف عنى وقال : لو
مالقيتش الميه . أو لو كانت الميه شحيحة وبور .. اتييم أى صعيد فى
الأرض طهور .. ربنا خفف عنى وجعل اللى بيندهنى لفرض الله
ويفكرنى بمواعيد الصلا .. سيدنا بلال .. صوت الليل والعصفور ..

وانت! آاه .. بتدى لنفسك حق علينا .. ربنا رفضه ، تفتح حلق
الميكروفونات (الكافره) ف صرصور ودنى وانا عيان .. أو راجع من شغلى
زهقان تعبان ، بتخلى آدان الدعوه الطاهر لرحاب الله ولا سوق العتبه
كله بيشوش على كله .. لا أنا فاهم ما بتقوله . ولا حاسس مدلوله ..
وبصوت أبسط ما يتقال عنه أعوذ بالله الغفار .
أنكر ما فى الدنيا صوتك يا حمار .

فأرحمنى ربنا يرحم والدك .. الرب رحيم وكريم ستار وانا باكشف
راسى وباشكيك للرب ، يا قلة وفاضى .. متفرغ دوناً عن خلق الله .. مع
أن مافيش نبى أو مرسل إلا وكان يكسب عيشه من عرقه وشقاه .. زارع
غارس راعى نجار بيعمر وجه الأرض حياة ..

وانت منصّب نفسك متولى وقاضى تحاكمنى لو أعارضك أو أجادلك
فيما بتعمله باسم الله .. فارض نفسك كاتم نفس الحاره ..

مع ان المولى خفف ع العيان والتعبان والطفل الباكي والشيخ
الكبارة.. سمح له يصلى بشفايفه أو بجفونه وان ما قدرش

لاسمح الله له يصلى بقلبه.. ويتوب .. لكن انت مش عايز ده.. ولا
كل تاريخ الإيمان فى دماغاك.. أنا عارف انت عايز إيه وح تتكر طبعاً.
لكن أنا متأكد سامع شايف اللى لسانك ناكره وعينيك ناكراه.. لكن
أعمالك فاضحاه كشفاه .. عايز السلطة.. القوة.. الجاه ..

تحكمنى وتحكم فى بدال اللى متحكم فيه وفيك.. تحاكمنى وتملكنى
دنيا وآخره باسم الله.. تقعد ع الكرسي وتمد فى وش الدنيا وف وشى
رجليك.

لكن لأ .. انت عايزنى اسمع واطاوع يا أموت .. امشئ جنب الحيط
مرعوب م الفلكه والتبوت .. يا أموت..

لا .. أنا مش خايف منك.. رينا خفف عنى غفر لى ذنوبى وعذرني وسبب
لى الأسليب وانت عايز تخنق روحى اللى وهبلى الوهاب.. لكن لأ .. انا ما
باخافش غير المولى.. وعمري ماركعت لحد سواه.. وظل لى الشكوى لغيره
مذله ولذلك ما حدش يملك يحاسبني على اللى ف قلبى، إلآه..!

رينا خفف عنى وقال لى حجة وحيدة تكفى للى ح يقدر من ماله
الحر.. حلاله بلاله.. مش سحت ولا غلوّ وفرده ولا حيله.. وعافى
المحتاج واللى عنده عيال أو عيله.. عافى المأزوم والمحروم والمزنوق
والمسروق المال..

وكان مفروض إنك يا حر العقل وحامى الدين .. إنك تقف ويايا ضد
اللى حجوا بفلوسى أكثر من مره .. مش بس لكه ولكن لبلاد بره ..
لباريس وليون وانجلترا .. واللى اتجوزوا للمتعه ميت مرّة .. واستحلوا

فلوسى اللى شقيت بيها فى أيام الغربة المرّة وخلطوا ما بين جوه وبين بره .. ما فاتوا لى حتى البصله الحاف الحارّه .. يوم ما خدعونى ببركاتك للسعد وللريان .. يوم ما راهنوا برقبتي وعرقى فى صالات البورص الكافره بالذهب الكافر .. ورمونى أنا وأولادى بعد رجوعنا من الصحرا للجوع الكافر . وجاى دلوقتى تقول لى الدنيا دى كافره وأنا كافر ..

الجوع هوه الكافر والكذب على الفقرا هو الكُفر الكافر .. قلة ذمم أصحاب الأموال الهاربين من حق ضرايب الوطن الشعب بكل الحجج الزور الكافره .. هيه الكافره .. الغدر اللى ما يعرفش يفرق بين الذنب وصاحبه أو بين المذنب وبرئ الزمة هو الكافر .. الرعب اللا إنسانى المتخفى تحت السيارات أو فى الأركان هو الكافر ..

رعب الإنسان المحصور بالنار (سامع صوت الآااه) رعب الطفل اللى اتيتم فى رمضان واللى غدره رصاصك فى حضن أبوه
(سامع حَسّ بكاه)

فى شهر الحرمة يا راجل ..

شهور الحرمة اللى احترموا حُرمتها حتى الكفار الجهال شهور الحرمة ما سلمت فيها منك نفس ولا سلم المال وجاى تقول لى باسم الإسلام .. والله حرام لو كنت بتقهم أو تقدر تفتح باب العقل وتقهم ..

فينك يا سيدنا عمر .. فينك .. لجل تشوف اللى جرى لنا بعينك، وتبدد سحب الشك الأسود عن دينك .. عن أنصارك ومريدنيك .. فقرا الأمصار اللى قروا أحكام العدل على جيبينك فينك تحكم ما بينى وبين اللى جاينين يتحكموا فيه ويحكموا بالشبهه عليه .. ويعاملوا خلق الله زى الفرس وزى الروم .. عايزين السلطة باسم الإسلام .. والسلطة

مداهنه وسياسة وتأويل .. عايزين السلطه باسم الإسلام .. تفويض
كامل تنزيل .. تفويض كامل .. والرب ما اعطاهش لإنسان كان ولا
للأنبيا

بالعكس خلى الأنبيا تدخل تجربة بعد التجربة .. وتعانى أمور الدنيا
وتغير لجل الناس تتعلم تختار تتخير

عايزينها الوقتى وفى آخر القرن العشرين ورث ملوك .. من غير دم
أزرق حتى ولا أنساب .. هو يقول .. واحنا آمين ..

لا .. يا أمير اسمح لى أقول لك .. لأ .. الناس مش فاهمين .. لكن
بالفطره حاسين .. ح تقالط مين .. أنا بقى مش خايف منك ..
مباخافش غير المولى وعمرى ماركت لحد سواء ..

أنا عارف أن تاريخ الغدر طويل .. وايدى الارهاب أطول .. من أيام
قتلة عثمان وعمر وعلى باسم الإسلام ورجعة بيت أبو سفيان للحكم
باسم الإسلام ..

يرحم أهلك يا ابن أبو طالب .. اندبحت أطفالكم فى الكوفه باسم
الإسلام .. اتهدمت جدران الكعبه بالمجانيق على أيدى الحجاج باسم
الإسلام، مات أبو ذر غريب مقهور باسم الإسلام .. لما غرقتوا ف
حريكو وفودكو سعدكو ويزيدكو على العرش مسلح بالفشمية والجهل
وبفلوسنا باسم الإسلام .. وعلى باب كيسان انصلب الطاهر غيلان
باسم الإسلام .. وعلى ايدىكو وقدامكو قتلوا بعض فى أفغانستان باسم
الإسلام. واتقدر الشيخ الدهبى باسم الإسلام .. وف إيران اندبحوا كل
اللى مخالفينك فى رأى باسم الإسلام ..

يا أخى ادعى لسبيل ربك بالحكمة والموعظة .. بالكلمة الحلوة النور،
حتى فرج فوده اللى عمر ما عرف الحمقه ولا اتزرزرو ولا بات غضبان
على إنسان كل اللى كان فى ايديه .. محض كلام .. وعلى لسانه وف
قلبه .. محض كلام .. دبحته باسم الإسلام .. يا سبحان الله .. وكأن
التاريخ ما اتقدمش لقدام .. نفس اللى سلح أبو ملجم ويزيد والحجاج
أيامها مسلحكم .. واللى عطاهم حق القتل عطاكم هذى الأيام ..
مين وحياة أولادك لو صادق قول .. مين ؟؟

البيت له رب بيحميه وكذلك للدين .. اياك .. ما تدخلش الدين بيتنا
.. الدين مش موتنا الدين مهموم بحياتنا .. وحياتنا غاليه جدا كل
الأديان لو شاء الرحمن وحدنا على عبادته .. منذ وجدنا خلقنا على
الأرض ومنذ بداية الأكوان ..

وكان خلا الناس صوت واحد بيوحد باسم الرحمن .. لكن ربك له
حكمه أننا نختار بين العقل وبين الجهل ونتخير بين الجنة .. وبين النار
.. نتخير بين الغلطه وبين الصح .. لأنك إنسان صاحب عقل وصاحب
روح ومخير ولذا بيحاسبك .. مادمت لا مجنون ولا ناقص أهليته .. حتى
وانت ظلوم وجهول، لكننا ولحكمه ربانية قبلت المسئولية .. اللى رفضتها
السموات والأرض ورفضتها الأنهار وقبلها الإنسان بإرادة الرحمن .. من
أول ما قال له الكلمة الأولى من القرآن ..

اقرأ باسم الرزاق الخالق .. فى البدء كانت كلمه .. لا سيف ولا
مدفع .. إسمع الكلمة أمارة .. نواره .. شمس وبيارق .. الكلمة سر
خلود البشرية ف مغارب ومشارق .. ممكن أيوه نخليها بنادق .. لكن
أمتى ؟ .. لما يكون مرهون بيها تدافع عن شرف الإنسان تحارب الظلم

وتتصدى للعدوان والطفيان .. لحماية الناس البسطاء .. والعرض
الوطن الأرض .. ما تبقاش فى الضلمه خنجر جاهل .. علشان كرسى
إماره وهميه .. ووزاره عصرية .. وداء كله غوايه وغيه إسمه السلطه /
الملك ودين الله منها براء ..

لا حول الله .. يوم ما حتحكمنى وتتحكم فيه .. أنا يا لى رينا خفف
عنى وحكمنى فى الأشياء .. وحرم إنى أنسى أن أنا إنسان وخليفة لله
فى الأرض، سخرها لى أمش ف مناكبها، اتأمل حكمته وأختار سكته
بإرادتى الحره .. فمهما كنت ضعيف وصغير فأنا مش معدوم العقل ..
رينا علمنى أقرأ وحذرنى من الجهل .. نورنى بالضوء واللون واللحن
اللى فى قلب الكون معزوف .. حمانى من جمر فحيح الصحرا وكهوف
الخوف .. سكتنى على شط النيل .. بالذات .. ووهبنى ووهب لى مصر
كنانته فى الأرض وقال .. ادخلوا بسلام آمنين ..

ووصانى أحميها من ريح الخماسين وغبار الصحرا وملح البحر ومن
اللى بيتاجروا ف عرقى وقوتى وف الدين ومن الفاصبين - أهل وأغراب
وأحميها من كل عذاب غدار وانتقلها بالعقل وبالعرق الإنسانى .. ورده
مفتحه بالعلم وبالفن وبالنور مش بالنار .. زينه للعنق الإنسانى ..
لأن ما فيش فى الدنيا إلا واحده وحيدة .. اسمها مصر !!



بأمانة إليه ؟

بأمانة إليه ؟ تعطى لنفسك حق ما هواش ليك .. ولا ليه عليك ! ربنا خالقنى على صورته ومشرفنى بعقلى ولسانى وقال : إقرا .. فكر وعطانى الحق اختار .. واخترت ..

بأمانة إليه ؟ وانت لحكمة ربنا إنسان زى وضعيف وبحكم طبيعته البشرية غلاط، كلنا أولاد تسعة يا خال .. من طين خالقنا المولى .. وانت مش من نور ولا من نار، علشان تعطى لنفسك حق تجادلنى باسم السما أو اسم النبى أو باسم الإسلام .. وبتنزع منى الحق إنى أرد عليك واجادلك بالحق .. لا .. عايز تتكلم وأنا أخرس ساكت ..
والله حرام ..

يا أخى دا نبينا كان ابن لأم غدية من خلق الله .. بتاكل عيش ناشف ويتلبس صوف .. تحزن تقرح وكانت تعرف معنى الخوف .. وبتمشى فى السوق ويا الناس ع الحصى والشوك .. وكذلك بنته وبقية آل البيت ماركبوش باسم الإسلام (خنازير ولا أشباح ..) زى ما عملوا (آل) اللى سرقوا عرق البسطاء اللى اتشدوا فى بلاد الرمل بسبب الفقر .. وحلموا بالمال الطيب بيقى حلال .. اتخدعوا فى الجلاية البيضاء والशल.

بأمانة إليه ؟ تتباهى عليه يا خال .. والأصل ف دين الله متواضع .. ليه عايز تتحكم فيه وتحكمنى وتحاكمنى بنفسك مع إنك بتقول ما حكم إلا لله .. يغفر ربنا لك .. هو أنت وكيله والا - استغفر وأعوذ بالله أنت وليه وبديله، لا حول الله .. هو شايفنا وسامع، خاف من ويله .. قادر يسخط من يتعدى حدوده ويخسف بيه الأرض ..

بأمانة إيه؟ تعطى لنفسك حق ان انت بتفهم عنى وتتعرف حتى فى
الى أنا عارفه أكثر منى.. وبتفتى ف كل كبيرة وصغيرة.. بتحدد لى
خطوط السير وحدود الفعل .. وكأنك فاهم كل مذاهب ديناً ومدارسه..
انت لوحدهك دارس كل أمور الدين والدنيا والنبي حارسك زى ما
حارسه.. يا أخى دا رسول الله نفسه قال انتم بأمور دنياكم أدرى.. وما
فاتش خليفه وراه.. ولا ورث حد من الأصحاب ولا وصى لحد من
الأولاد ولا حتى عطاهم ميزة على غيرهم .. لا بالدم ولا بالأنساب..
غير ميزة العمل الصالح ومعاملة خلق الله بحدود الله..

بأمانة إيه ؟ تلغى عقلى الى وهينى رينا لجل أفهم دنيايا ودينى..
وتلغينى.. واسيبك ترسم لى حسب أما انت يا محدود العقل ومحدود
العلم تشوف.. وتحدد لى بالرعب وبالخوف حدود دنيايا ودينى..

بأمانة إيه ؟ مين أعطاك الحق أنك تحكم بالكفر عليه.. امتى كشف
المولى ليك الغيب والمجهول.. امتى شقيت عن قلبى قرئت فيه ما
بتقول.. ما عرفتش إن رسول الله أنب واحد من أعز أصحابه لأنه قتل
المشرك بعد ما قال لا إله إلا الله.. فى الحرب قصاد تهديد الموت..
وأما دافع عن نفسه وقال ده منافق قالها وهُو مرعوب خايف ليموت..
قال له منين تعرف.. انت شقيت عن قلبه.. ياااه.. اتعلموا يا خلق الله..

مين فيكو زى أبو بكر.. مين فيكو زى عمر.. مين فيكو زى أبو عوف
وهب الثروة بتاعته خالصة للفقرا نهار الجوع .. مين ؟ .. مين فيكم
بآهات الناس موجوع مين؟.. مين فيكم بعد ما تاب وأناب وعرف مصدر
ماله السحت اتخلص منه .. مين؟ .. ما عرفتش منكم إلا واحد من بين
اثنين؟ ..

واحد مرتاح ومريح بالعيشة المرتاحة .. فى قصور مرتاحة .. أكل
شارب نايم النومه المرتاحة .. حتى أيام ما كان فى السجن .. إمام ..
كان الباقي له حتى زملاؤه خدام .. أيام الواحه .. وده عمره لا شال
خنجر .. ولا سيف .. ولا ولع قنبلة ..

بالعكس .. ده رقيق مبتسم متواضع .. رائع لابس أبيض ف أبيض
قلبه رهيف وخفيف .. وإن كانت الدنيا بتلمع فى عيونه المرتاحة .. لأن
جيويه العمرانه بتزيد سماحه .. للأتباع أو للمريدين .. أو للضيف !

اما التانى فزى حالاتى مأزوم .. أو عاطل محروم أيامه قتيله على
كفوفه . نفسه يوهب نفسه لقبيلته أو عزوة عيله .. مالوش ضرر وعازر
من خوفه يتغطى بأهل وصحبه .. وسهل يكون مشحون ضد العالم
بالحق .. وأسهل ما يكون يمكن شحنه بالباطل .. لما تعريد جوه دماغه
ظروفه .. تشوفه كاره فقره وجهله وقلة حيلته قدام ظلم زمانه ومش
عارف السكة منين ..

وما دام الأمر مؤمرات وسياسة ولعبة قط وفار، سلطة وحكم وأمر
وأفكار مخلوطة بوعد الجنة وعذاب النار فأسهل ما فى الدنيا تمسك
إنسان من أزمته تعرف مفاتيح ضعفه ومتاريس قوته .
(هذا عالم كافر وجهول .. احنا والدين فى عصر الفرية ..

الجنة آخرة كل شهيد !)

وتحاصر قلبه الشياطين من كل مكان من شاشات التليفزيون .. فى
صورة اللحم الأبيض عريان بالألوان .. م الكتب الصفرا وأهوال القبر
وعذاب الملكين وهموم اليأس النابع من سم الإحباط، مسدوده كل
الأبواب محدوده بحدود القدره الوطنيه وقلة حيل الأحزاب .. وسط

جنون صالات الرقص المزيكه .. وصباح.

كله للشيطان أرض براح) (هو اللى رماك ع الفقر ومحاصرك
بالحرمان .. وبشريهان وصدور النسوان وانت وحيد غلبان مافيش أمل
ان الحال يتغير - ما بقاش لا ضمير عند الخلق ولا باقى فى الأرض
إيمان .. فاخرج ع الدنيا شاهر سيفك .. انزع خوفك .. فجّرها تتول
الرضا والعفو وتدخل فى الملكوت !).

وساعتها يموت طفل صغير فى حضن أبوه الضابط وتموت بنت
بنوت كانت بالصدفة رايحة المدرسة ويتضحك فاجئها الموت .. ويموت
عسكرى فلاح مجهول الاسم وكان قاعد يفطر فول فى رمضان .. أو
كاتب أرشيف أو شاعر غلبان كان قاعد يرتاح من كرّشة يومه على
القهوة .. أو سايح جاى يتفرج على أجدادنا اللى فاتولنا المجد الغابر
لحضارة الإنسان

وف بعض الأحيان لما يموت هوه كمان، نتيجة جهله بالنار اللى بيلعب
بيها .. بيموت يا عينى مرتاح لأنه أمير الحى العارف بالله .. المكشوف
عنه حجاب الغيب .. مولاه .. اللى زمانه الأغبر ولاه على خلق الله
فورثنا متاع بالفرمان الريانى .. أفتاه وشهد له أنه شهيد .. الجنة ليه
ولأولاده .. يا ولداه .. كان بيحارب الكفره بسلاح الكفره وإيمانه لم
نجاه ..

بينما كان فى نفس الوقت أمير الفبرا اللى حكّمه زمانه الأعوج فى
رقابنا .. يا اما بيتلقى عزاه فى بيت من ضمن بيوت حريماته
الشرعيات .. يا قاعد يحسب فى دكانه حساباته .. الشرعيات .. اللى
وهبا له زمانه من بركة سعده وريانه وينوكه .. الشرعيات

أو يمكن والعلم حدا العلم بيقدم تفسير موته لآخوانه .. وصوته
بيتهج من شدة أحزانه .. أو .. واستغفر ربنا من سوء الظن - هو
الأعلم - كان بيقدم تقريره .. للى بيدبروا دبح وتخریب أوطانه، كذباً
باسم الإسلام !



كنانة الرب

الإسلام ما عرفش كهانه ولا عمره كان فيه كهان.

هذا أول درس اتعلمناه عن دين الله الديان

مين يحكم إنك مؤمن أكثر منى.. أو إنك أكثر اسلام أو أقرب منى
لله الرحمن

أنا بينى وبين الرب عمار أكثر منك .. لأنى باشوفه رحيم وكريم أكثر
منه جبار. رحمن غفار ملكوته الفردوس وف ضله الجنة تساع جميع
الإنسان أكثر من النار

وأنا بينى وبين الرب عمار لأنى ما دستش ورده مفتحه على كلمه
حب، ما حرقتش زرع أخضر بعرق الإنسان، ما منتش بحسنه على
إنسان ما أزهدتش روح من غير ما نزل ربنا من سلطان. ما فرضتش
على حد آرائى ولا جرحتش راحة وأمان خلق الله .. ما قتلتش عزل
ساعة إفطار ما عبستش فى وش الأطفال أربهم فى السن الأخضر
بالنار والتعبان الأقرع والسلسة ذات السبعين وجهنم وعذاب القبر ..
يا أخى دا الرب حلیم وكريم وعليم غفار .. والطفل ملاك واحنا كلنا
ابناؤه وشفيعنا لضله - رسول الله ..

أنا جدى منسب لأهل البيت.. ما أتلستش بفلوس الزيت.. ولا ليه
فى لندن ولا كوت دازور ولا هونولولو.. ولا فارنا ولا شوتسى ولا كان ولا
كيت على قد ما ربنا قدرنى صمت وزكيت - صليت .. ع الحج صحيح ما
قدرتش وان كنت .. ماكتش ونيت .. لكنى راعيت ربنا فى كلامى
وسلوكى مع خلق الله .. ما جمعتش أموال السحت .. ما اتجوزتش سرأ

من يتيمات قصّر .. ما أحلتش الرشو باسم البركه ماستحلتش خداع
أهل الله السذج.

عمري ما بصيت للمرأة إلا واتذكرت الأم والأخت الزوجة البنت
حبيبة القلب الروح مش جارية ولا فرش سرير..

ما حالفتش على وطنى الأعداء.. ما شكرتش ربنا علشان اعداءنا
استولوا على أرضى وقتلوا وسفحوا دم أولادى على الشيطان.. ما
فرطش فى الأوطان ولا صغرتش اسم بلادى ما عيشتش بالوشين.. وش
امام قدام الخلق ووشى التانى فى الضلة اعوذ بالله هو الأدرى
بالأسرار..

طول عمري فهمت الإسلام إنه دين الفطرة .. لا خدعة ولا تقيّة ولا
إهدار المؤمن للمؤمن بنيان .. قلب وايد ولسان لكرامة الأوطان وسعادة
الإنسان .. والناس أحرار .. ما مسكتش سكينه باسم الإسلام أو خنجر
زى ما انت عملت ..

وجاى تحاكمنى وتدى لنفسك حق الحكم وتفتيزه.. تدبحنى غدر
وتهدر دمي عشان ما قبلتش فهم الاسلام على عقلك.. رسمه على كسمك
حدّه على حدودك وكأنه وكأنى ميراث مكتوب لك من عهد جدودك..

لا .. وأنا مش فظ غليظ القلب .. ولا غلاط وصحيح أنا عارف ان
على الأرض بلاوى وخطايا وأغلاط وملانه ظلم وإظلام .. وياما فى
السوق من أصنام ..

واكثر من ده يا ما حطت فوق روسنا الأيام جهل وفقر، وقلة ذمة
وقهر، وإجرام، السفاح والحجاج ويزيد وسليم عثمان .. فرس وآروام ..
حتى نابليون يوم جالنا يملك حالنا ومالنا باسم الإسلام يا سلاام ..

ولولا العقل لكان حتى الوقتى هو وأحفاده علينا امام ..

ولذلك يا حضرة افهم.. قفل العقل وقتل العلم وسد أبواب الفن النور
مش ح يزيل الظلم.. ولا راح ينهى الفقر أو الجهل.. لكن ح يزيده.. لأنه
ح يزود فى عبيده..

أيوه.. للجهل عبيد لما يطفى العقل يزدوا .. لأنه مش ح يزيل الظلم
إلا العدل.. ومعاها الرحمة .. الضلمه هى الضلمه كل ما تطفى شموع ح
تزيد.. والبشرية للجبروت والشر وقيد.. واللقمة السحت اللى ادامها
حرام مطرح ما بتسرى حتهرى مهما كبرت عليها وسميت.. مش راح
تغنى من جوع..

جمع ونهب فلوس الناس بالزور وتجارة العملة ومضاريات السوق
السودا وقطع أرزاق الناس وتجارة قوت الشعب.. مهما زيتت يفظها
بآيات القرآن مش حيباركها الرحمن.. حتى لو أنت صليت على كشف
البركه مافيش بركه..

الكذب مش سكة عشان ننهى الفقر إزاي تقضى على عدم الذمة
بعدم الذمه.. إزاي حنزىل القهر بقهر اللى يخالف فى رأى.. أو
بالاستعلاء.. تقسيم الناس لساده وعبيد.. البيض والسود الحكام
الأشراف والذمييين..

لو شاء الرب لخلانا جميعاً على مله مش اتين .. الدين انزله
لكرامة الناس كل الناس .. ولتحرير الخلق جميع الخلق من الذل ..
إزاي تبقى نصرته قائمه على إذلال النصرانية .. وإزاي النصرانية تقوم
على كره الأنصار ..

وإزاي تبقى حكمة ربنا فى تأمل إبداعه وخلقه وانت بتسعى لاذلال

المبدع والفنان ..

ما سمعتش مزيكه فى ألحان الطير فى هسيس الأغصان
للأغصان.. ولأزهارها .. فى هب الريح ع الموج .. فى سكون النسمة
وسفرها ..

ليه عايز تحرمنى من المزيكه اللى هدانى إليها عشق جمال الله ..
ماشفتش ألوان بتتاغم وتحاكل وتلاغى الألوان.. يتفجر فيها إبداع
الإنسان فيغنى.. يكتب شعر.. يرسم.. ينحت.. تنطق فى ايديه الصخره
والطين بالألحان الحره .. ضد الطغيان والأصنام

ويمثل فيضحك ويبكى ويذكر قلب الناس بالعدل والحب .. ويحب
فيرقص على إيقاع الفلك الدوار .. والطير الرحال .. والتيار الجارف
على شطآن البحر وبين شطآن الأنهار متاخذ مسحور بالإبداع الريانى
اللى ف لون ورق الأشجار .. ونعومة ورق الأزهار .. واللى يخلى الروح
تعلا وتشف والجسد الفانى يخف .. يهيم فى ملكوت الله بمحبه وسلام
مزيكه وحركة وإيقاع وكلام..

يا أخى دى الجنة بذاتها وعد بسحر الألوان والأنغام واحنا يا للى
وهبنا الرب الأرض نعمرها .. وننورها ونخضر بورها نعلى جسورها
نمشى فى مناكبها بنى خرابها .. ونتمتع بجميع خيراتها مسراتها
ونكشف كافة أسرارها .. ولا انت عايزها صحارى .. بور وحصى وخيام
.. حراشيف وحشايش وجلافة .. فقر خيال زى جحور وكهوف
افغانستان .. يا دوبك نرعى حشيش الأرض ونتغطى بوبر الأبل الكفران
الى يا دوب طابيلينه ف قفر باكستان ..

عابزها برارى زى جبالها الى ما عرفت ابداع الكف الفنان والا
عابزها كئيبان زى رمال الصحرا الى بتتحسر على ماء النيل .. والى
قتل روحها الفنان، طول عهدا بالصهد وبالحرمان فلا عرفت خضره
ولا داقت ألوان .. ولا نقشت اسمها ع الصخر صور وحروف ..

وهزمها الخوف م البحر فلا قدرت تغلب موجه بمركب قد الكف ..
وقتلها يأس الفقر وعدم الشوف فلا حلمت بخلود ولا علّت أهرام ..
لاعملت طيبة ولا منف ولا قامت فيها معابد ومساجد وجنائن تشهد
للبنى آدم انه ف قلبه نفحه من روح الرحمن .. تأكد ايمانه دنيا وآخره
بخلود الروح والإنسان ..

مش زى بلاد تانيه بتحكمها عقد النقص لان تاريخها مالوش فى
ذاكرة الدنيا ايها ذكرى ..

بلاد خايفة من بكره فورثت اولادها من خوفها، وجوعها، عتامه
وقتامه وجهل، حطت على أم قلوبهم ضله وغمامه وعلى العقل كمامه
وظلام ..

ولذلك ماخرجوش لسه من عصر الجاهلية والقبلية ولازم تحسم كل
خلاف بالدم .. مالمقيتش الوقت ما بين الحرب وبين الحرب .. عشان
ترسم صوره .. أو لجل تشد الأوتار أو تفهم سر غرام القمر السهران
بفصوص الأشجار ..

ولا قامت ضهرها م القهر وم الضلمة فزرعت قمح وقته وشعير
واهدت للانسانية حساب ورياضة وفلك وفنون .. وضمير وديانه
حواديت وقصايد ومدارس ومعابد .. وقانون ..

لجل تأكد حكمة رب الكون فى ان الإنسان سيد نفسه ومالك لاراته
وحر ويقدر يختار / بين العقل الحرية الجنة - وبين الجهل القهر النار !
بين مصر كنانة الرحمن فى الأرض .. وبين الأوطان الأوكار ..



من دفن أحوال السَّامِ

هطرسة لإصدار بيان رسمى

ذنبهم على جنبهم!

أيوه ذنبهم وستين ذنبهم على ستميت جنبهم، إيه اللى خرجهم أصلاً
من بيوتهم وإيه اللى ركبهم القطر.. أى قطر، الراكب والمركوب مع
بعض، طول عمرنا بندايع عمال على بطال عن الشعب وعن العمال مش
بس أنا.. والحق يتقال والحكومة نفسها من يوم ما طردنا الملك..
والأحزاب كتبناها.. باسمهم.. عملنا معونة الشتا لمين! وبطاقات الزيت
والتموين.. فرقنا الأرض على مين؟

أمننا الزيت المصانع بنينا الكبارى وسفلتنا الطرق وزفتنا الشوارع
لمين؟

والكنال مين اللى خد خيرها.. بورسعيد مين اللى نهب وهرب
البضايع منها ووجع قلبنا بجمارك ورسوم وأهانات.. هه. مين؟
نقدر نقول لى؟ العيب مننا فينا..

أهه.. وادى مترو الانفاق كان زى الفل حيطان وارصفه بتلمع شوف
دلوقتي.. المداخل الخريانه والتراب اللى مبحترينه ع البلاط..
والبراطيش اللى بتجرح الرخام.. هه ما ترد..

العيب مننا فينا؟

خدنا ع الدلع .. المنحه يا ريس ؟ العلاوه يا اسمك إيه؟.. الحقوا
الميه مش عارف فيها إيه؟

معكره.. ليه؟ الرز بقى بالشىء الفلانى.. السكر فين؟ وكإننا
خلفناهم ونسيناهم ؟

والواحد لما يشرب كوياية شاي.. يحط بالعشر معالق سكر وكانها
آخر كوياية ف عمره !

ويجب عيل كل ربع ساعة؟ وعايظنا نجوزه ونجهزه ونجيب له شقة
وشغلانه وهو قاعد ع القهوة يتف فى الأرض..

ويزوغ من الشغل أول ما يمضى؟ وقاعد متبيل طول الشهر ويقول
لك الحوافز !! حاجة تقرف وناس بالغلط عايشيين.

مين اللى بيزور أذن الصرف ويغير فى المواصفات وويفبرك
المناقصات ؟.. مين اللى بيدى الشلن للعسكرى مين اللى بيدى دروس
خصوصية ومن بياخدها ؟ لأ وعينهم مفنجله وسع كده.. تندب فيها
رصاصه..

لما نجيب سلاح عشان ندافع عنهم يقولولك ولزمته إيه؟.. هو احنا
مش اصطلاحنا؟.. إيه بقى لزمته وجع القلب ؟ وهمه ولا همه هنا.. بس
فالحين يقولولك السمسره .. والعموله..

طب ليه بقى بتهربوه من المعسكرات وتسرقوه من المخازن.. عشان
كل بأف يحطه على كتفه لزوم الفشخره.. ويعمل لى فيها أبو على.. ولما
نلمه منهم حفظاً على الأمن.. ينهبوه تانى ويسرقوه.. ويعملوا إرهاب..

ولما نبنى مدن سياحية لزوم المستقبل والعمله الصعبة مانخلصش من
الكلام.. ح تلوث البحر.. لازمتها إيه ؟ دى فاضيه طول السنه. مش كان
أهم نبنى بيوت على قد عيالنا .. ومستقبلنا.

طب بتجروا عليها ليه زى النمل تبنوا وتجروا.. وتتهبوا وتكسبوا
الشيئ الفلانى.. لولاها.. كان جحافل الصعايده دول كلوا منين؟

واشتروا أرض وبقى منهم مقاولين يسدوا عين الشمس..

وزيطه بطرمببطة.. الحرية والديمقراطية.. عملنا لهم انتخابات
ماحصلتش وجابوا اللي جابوه ونجحوا اللي نجحوه. وبعد ما يقطعوا
هدوم بعض.. ويسيحوا دم بعض.. ويقفلوا على بعض يقولوك تزوير
ويلطجة ودم.. من اللي عمل كده احنا والا انتم ؟..

والنهاردة طبعاً.. حيقولوك إهمال.. وقلة تنظيم.. وكأن بلدنا بس
اللى بتحصل فيها حوادث قطورات.. أو حوادث خالص.. عايزينها كده
جنه من غير عضم..

حاجة يا أخى ما وردتش .. هو احنا اللي عملنا النيله الشبوره .. والا
احنا اللي عطلنا الجزره .. والا احنا اللي قلنا للسواق سوق بسرعة..
والا احنا اللي قلنا لهم انزلوا من بيوتهم فى الدغميشه دى وعرضوا
انفسكم للخطر..

دى حاجة بقت ما ينسكتش عليها .. طبعاً ما هم لاقين حكومة هبله
يرموا بلاويهم عليها .. لكن وحياتك هيه فاقساهم ولذلك هيه ولا هيه
هنا .. اديها الطرشة وريح نافوخك ! واطلع عليهم بكلمتين وريحهم !.



مميزات طبيعيتك للزعامة العصرية

ميزة التي ربنا خلقه زعيم، بعض الشطارة الفطرية تمكنه يفهم بالطبيعة في السياسة، وانها فن المهارة في معاملة لاحصنة وان عنده القدره على حسن الإدارة. وشم ريحة الأزمنة..

وانه من باب الكياسه التي تلزم للوزارة ما يحتارش بين المخالفة والإتباع، عينه دايمًا وسط راسه، ودايمًا وسط ناسه ع المشاع.. وعارف انه لو ح يون لحظة يبقى ضاع.. أو أقل ما فيها ف غفله ح تضيع الوديعه. وإنه لو يغفل ولو بحسن نيه عن هموم المسئولية، أو ح تسمح نفسه ليه يبقى ضحية، مرة، للخديعة أو الخداع.. يبقى سلم روحة قطعاً للضياع.. والبتاع، التي يوم وهبها ليه.. يسحبها منه ل. في هدوء بارد طموحاً أو جسارة..

أو جموحاً في أساليب الصراع.. زى ومضة برق في الضلمة تبشر بالمطر أو تحذر من وجيعه.. أو كرعشة لذه تقلب فجأة حسرة أو فجيعه، مرة، في لحظة جماع ل.

يستحيل وياها تتقبل خطاياك الفظيعة، مطلقاً. إلا لما تكون زعيم بالفطرة عاجناك الطبيعة، بابتسامة صفرا واحدة للقا.. زى الوداع ل.



حالة طوارئ

صحى الزعيم النهاردة نفسه مقبوضه، وغمّه عليه، خافوا عليه
يخرج من الأوده، جابو له طشت الخضة إتوضى .. وبعد ما صلى ركعة
ركعتين لله .. دخل استحمى وحلق دقته ولبس موضة ..

وخطى فوق البخور والجاوى رايح جاى ..
ولسه برضه قرفته مش هيّه ..

اتجمع الوزراء فى الصالة .. ومسئولين الأمن بكل سرية وصلوا
لبعض واتشاوروا، والسفرا شمو الخبر فاتسرسبوا فى السر من ورا
بعض من أجل أن يسألوا عن صحة الحاله ..

لكن الزعيم اللى كان قلقان ومتاخذ .. طلب ثلاثه من صحاب الرأى
فى الدولة .. رجب .. وعثمان .. والمستشار الثقافى، الصافى جاد
المولى .. فتحوا الكتاب وابتدوا يقرأوا له فى الفنجان ..
ويكبروا ف ودنه

قرأوا له سورة البقرة بالمقلوب .. والكرسى والرحمن .. ومنعوا عنه
بتاتاً قرأية القرآن، وبرضه لسه مغيمة الصورة، فطلبوا عقد المجلس
الأعلى لدراسة الحاله .. ومراقبة ردود الفعل والنفسية مكسورة ..

وطلعوا بعد اللت والتحليل .. بدليل يؤكد دليل على ضرورة الحزم
فى الدورى، ونقل خمسة من الأقاليم للأهلى .. إبعاد ثلاثه من المنصورة
خط هجوم لجمهورية شبين أو إسكو وكفر الشيخ .. والقبض على
عشرين من الفيوم، مالهمش فى الكورة. من - ثم - إصدار بيان تطمين
إلى الأمة - من المحيط للخليج - إن الإدارة الحديثة ف خدمة

الجماهير. والشرطة والشعب كله جنود لعز الوطن.

وخرج سيادته مبتسم للناس على الشاشة .. وقابل السفراء والوزراء
وأهل الرأي ببشاشة .. توحى بقدرة نظامه الحرع الأزمات، وهكذا بعد
لأى انكشفت الغمة ..

وف مؤتمر صحفى ضاحك بدد الإشاعات .. واعطى دفعه ومبرر
راقى للإستمرار حسب المسيرة اللى نابغة من تقاليدنا .. ضحك الزعيم
السعيد ع الشاشة واتبسم وهو يقول :

- الدورى ممكن .. قوى .. اللعبة ديمقراطية مية فى المية، دى
عوايدنا .. لكن حدود الأدب وأصول قانون اللعب .. تمنع ضياع الكاس
من إيدنا .. !



مؤتمر صحفى

صحى الزعيم من نومه مستعجل ومسرور الفؤاد .. حلق لأول مرة منذ الحرب دقته بنفسه .. والبذله والكرافته لبسهم لنفسه .. بنفسه واختار ونقى شرابه برضه بنفسه على زوقه لأول مرة منذ الطلقة الأولى ..

كان فى انتظار النهارده ضيف عزيز ومهم من خبرا علم العالم التالت فى النظام الجديد .. جاى له بنفسه يناقش الأزمة على أرضها .. وفى الواقع .. كان الزعيم جاهز محضر نفسه .. ازاي لآخر مره ح نفوتها من اجل ازدهار قضية الحريه ونموتها .. كى تستمر إلى السلام المسيرة الى بسبب الغباوه اتعترت خطوتها ..

كان البيان واضح شديد اللهجة :

من أجل تأكيد ارادتنا ف ردود الفعل !

فى المؤتمر .. صحفى من إياهم - وهمه عارفينه - لقطت عينونه - بخبائه - سر الشراب الملون .. شكل غير الشكل .. سأل سؤال الكل منتظرينه ومجهزين له الإجابة .. لكن أشار فى خبث متعمد إلى إختلاف الشراب .. فردده غير فردة ..

لذا بسبب المفاجأة .. ساد الهرج والمرج وكاد الأمر يتطور ..

كاد الزعيم يتهور ..

لولا رئيس الديوان اللى متودك .. تخطى الحرج .. وشوش فى وذن الزعيم اللى ضحك واستدار .. ورفع حواجبه على عادة ولاد البلد .. ورفع طروف البنطلون ببساطة ..

وقال بكل قلاطة ..

- ده مش خطأ .. إنما طموح إلى التجديد ورغبة متأكده دايماً إلى الإبداع .. ودليل على رفضنا لكافة مبررات الخداع .. لا بحجة التقليد ولا بخضوع لاتباع .. ويا ريت كلامنا يكون خفيف ع المعارضه !
إحمر وش الصحفى واتبعتر ..

سندوه رجال الديوان لحد ما خد نفسه .

ولتانى تالت يوم .. فى كافة النشرات قوميه أو خاصة والتعليقات مانشيت أول صفحة .. كافة صحاب الراى والأعمدة .. قدموا بكل حريه وثبات رأيهم فى قضية الشرابات .

- الموضه يا جهلا ميزة دوله عصريه .. داخله على القرن الجديد محتاجه جراه زعيم مؤمن بكل مفيد .. وعنده قدرة وإمكان إنه يكسبها بالقاضية فى أى جوله .. لأنه قادر تمللى يبدأ بنفسه أى محاوله للتجديد !



مؤتمرقمة

عقد الزعيم.. قمة ثلاثية، وياه حفيد الملك وچوكر الكوتشينه الى
دايما فى الورق بيقش..

وقفوا التلاته الفراوده يضحكوا على بعض.. وجنيهم كان ديب بديل
مقطوع..

وعلى الجوانب جموع من صحافة لاقترا والجوع.. طمن حفيد الملك
أصحابنا ع الموضوع.. وطمنّا..

شرح ظروفه المتعبه الغامضة.. تلك اللى خلت شعبه يتقدم بكل قدره
على الرحمة وراحة البال وكيف استفاد من دروس المرحلة يعلمنا فى
ابتداع المفاوضة فى عز عز الحرب..

وازاي يكون الخروج من أى كرب.. من دون أذى أو ضرب.. وازاي
وحسب الطلب م الخوف شفاه الرب.

ضحك الزعيم أمّن على قوله واشئى عليه..

قال : صلاة الزين، برضه الملوك مهما دبلت تفضل الريحه، انت
وجدك عمركم رواد.. صنعتوا المجد بفضيحه، ملعون تاريخ الهرب فى
الأزمه، الناس جريحه.. ومن مظاهر سعدنا ووعدنا القدرى.. ان ابتدينا
نملك سوا بيدنا الفالت من أمرنا.. ونحكم زمام أرضنا.. واحنا ما
احناش سطحية .. عز العرب قصدنا والسلم ماله بديل طبعاً بدون
مانهون ولا ننذل ولا نخون زى ما عمل زمان بعضنا وعمرنا ما نميل..
كل العقد لها حل بالتساهيل..

الچوكر الألعبان لعيب وباله طويل.. فى اللعب عَ الحبلين ياما كتب

فى مثل هذا الاجتماع مواويل.. وقف وحيا الحفيد الأمين على سيرة
الأجداد.. وأشاد بجهد الزعيم الريفى فى خدمة الأسىاد.. وقال له :
- اوعى تقرط ولا بطياره فى حمارك..

وكون وفى زى ما اتعلمنا واتطمئن على جارك.. هذا تراب شعبنا
مدفونه فيها عضام جدودنا كلنا.. هذا تراث ووصية الأنبياء.. لذا علينا
نحافظ على الصحة ونمد فى عمرنا.. مين بعدنا وزينا ح يكمل
المشوار.. أحرار حنفضل وحتى آخر لحظه م الثوار.. مين غيرنا ح
يواصل.. قيمه وقمه وخبره واستثمار.. النصر أصبح عند مد الأيد بس
نتمسك بحبل الصبر وطول البال حتى نهد لآخر مره لاستعمار..
وباسوا بعض التلاته.. بوسه ثلاثيه.. واتواعدوا واودعوا وكل واحد
مشى يلعن أبو الثانى.. ويمنى نفسه يشوف فيهم قريب يوم.. وهو
بيدعى فى سره :

- يا رب خلصنى كان وقعه سوده، ومازق سخن تاريخى ..
وقعنا فيه اللى جرسنى وبلبصنى. وناوى ما يفلصنى، ودول مالىهم
آمان، واللى يطول ريشى منهم راح يقصقصنى .. لذا .. وقبل ما يفتروا
على نيتى وضميرى .. الزنبجيه المدلوقين على بعض علانية .. وكل
واحد منهم مشى وناوى على نيه ..

يبقى عليه ان أبلغ سيدنا عن سيرى .. أضمن قصاصهم مصيرى ..
واكتب بنفسى لصاحب الأمر تقريرى !.



الوصايا العشر للإحتفاظ بالزعامة حتى يوم الحشر

ما دام صبرت ونلتها ..

أصبحت مسئؤل عنها .. عن فنها ولعبها وأمنها .. لازم تمارس
صنعة السلطة وحرفته الوصول، ح تطول معاك على قد ما تصحصح ..

فتشوف مغمض أقوى مما تفتح ..

وتقصر القامه حبّه كل ما تطول ..

ولما تركب تلها .. تسمع بوندك شتمتك .. تتّح، ومارس الكذب جهراً

كى تصون السر ..

ومهما كنت جعر أو شملول .. لا بد تهوى الحياة وتعيشها عرض

وطول .. تفهم ضرورة ما رماك ع المر .. لو حر .. تفطر بقسماط أو

فول ..

تتغذى لحمه أرانب والا عيش مبلول .. مش ح يضر .. لكن المهم ان

تتعشى بست عقول .. المسئولية تحب بعضا من ظروف العلم .. بعضا

من هموم الفكر .. والصبر فى مواجهة تقبل الحمل .. لكن ضرورى

من إتقان فنون القول.

إحذر من اللى تقرا له .. ما تفهمهوش أو اللى يكشف سر انت ما

تعرفهوش أو م اللى يجرى ويتطط ما تلحقهوش ..

وم اللى يلبس قصادك لكل حاله وشوش ..

وم اللى قدامك م الخجل بيبوش ..

وم اللى يوزن رضاك السامى عليه .. بقروش ويقول أخوك الصغير
حين تقول له يا جحش .. الرايحة متصدقش
ويوم ما تطلع بفائدة بسيطه ما تفرحش ..
وإذا غلط ابن أمك فيك ما ترحموش ..
الضعف والإنسانية الهبله ماح تنفكش العدل عمره ما كان علامة
لقوة السلطان ..
الإنسانية مش سبيل للحكم ولا عمرها السلطة حسب الظروف أو
يحسن النيه ..
الصح طول عمره صحيح معروف .. والغلط معروف لكن الصراحة
شرك والصدق باب للموت ..
ويا تفهم الفرق بين الملك والملكوت يا تحل لغز البيضة والكتكوت ..
تعيش معزز تحت سيف القلق .. لو يهنالك موال فمايهمكش .. ولو
يروق لك بال .. فما يفرکش .. حتى تتم الطبيعه فعل قوانينها .. ويحل
أجل الحكومة واللى حاكمينها .. يحق قول اللى قال .. قلع جناينها ..
على رقاب اللى بع - باعها .. لداينينها .. علشان ينولها اللى جع -
جاع شوقه لعاكمينها، يمكن عليها يطاع .. تطلع ملايينها متعه ومتاع
لأتباع أصحاب ملايينها .. طبع وطبيعة ضباع، طاعه لطباع دينها ..
يتفسر الحلم تفضل وردة على جبينها !
ويظل أمرك .. مطاع !.

●

خرافات عصریة عن
مصطفیٰ امین وزمانه

حتى آخر نفس

كان ياما كان، فيه راجل إسمه مصطفى أمين.
غريب ويتيم ووحيدانى بيعيش فى عصر بيسمّوه عصر
الديمقراطية..

وهى فترة من الزمان بيقولوا إن الإنسان فيها مهما كانت أحواله،
يقدر يتكلم زى ما يحالاله !
عن كافة شىء يخطر على باله.. ممكن يزعق أو يودّود.. يهتف أو
يوشوش..

حتى فى وش المسئولين وعينى عينك يقول ما بدا له!
بشرط يتعلم أنه بقدر ما يتكلم ما يسمعش إلا اللى يعوزه وما يفهمش
إلا اللى يحبّه.. وما يردّش إلا بمزاجه وما يشوفش غير اللى يهمه..
زيه زى اللى بيتكلم عنهم أو معاهم! علشان الأمور تمشى والحال
يتزيط وإلا يتفك الرّبط ويبوظ الطبط! والدنيا تبقى سداح مداح
وتخلط بين البيه العسكرى والفلاح..

العجيب إن الراجل مصطفى أمين بعد ما قعد عشر سنين محروم
من الحرية، خرج يتكلم بكل حماس عن الحرية.
لكن علشان كان فاهم اللعبة وكان لقيب عمره ما اتكلم عن الطريقة
الوحيدة اللى الناس ممكن تطول بيها الحرية !



كاريكاتير

فى يوم من الأيام..

دخل علينا مصطفى أمين وهو بيضحك ضحكته اللى كان مشهور
ببها لما يكون خايف وقال :

- فيه رسام كاريكاتير مشاغب.. متعود يدخل مكتبى بدون إذن
فى نفس الساعة من نفس اليوم كل أسبوع فى اللحظة اللى ابتدى فيها
أكتب أفكارى.. ويقول لى بنفس الطريقة نفس الكلام اللى قاله الاسبوع
اللى فات واللى قبله وقبل قبله !

- لا مؤاخذه يا باشا ضرورى آجى عشان اتأكد بنفسى أن نمر تليفونك
هى ٥ سبغات وإنها مش نكته بايخه زى ما بيحصل فى الأفلام !..

وكل مره أسأله وأنا عيني ح تطلع م الدهشة..

- طب ما تطلب النمرة وتريح نفسك!

يسكت هسة ويضحك مستغرب ويبص لى كأنه مش عايز يصدق إن
الكاتب الفعل ده ساذج للدرجة دى ويقول :

- يا باشا ومنين اتأكد إن اللى رد عليّه مش حد تانى.. وانك مش
راجل وهمى زى رقم تليفونك !

أرفع أنا حواجبى من الدهشه.. واسكت.. يحيينى باحترام ويرجع
بضهره ويخرج زى ما دخل.. ويسيبنى أسبوع بحاله قلقان مستتبه فى
نفس الميعاد عشان يأكد لى إن أنا على مكتبى وباكتب أفكارى بنفسى..
وساكت وقدامى نفس التليفون الأخرس الوهمى ..



طاقة القدر

الرواة أكدوا ان مصطفى أمين فتح بنفسه فى الجرنان اللى كان بتاعه فى يوم من الأيام.. شباك مسحور بيطل على الجنة مباشرة.. وبيقولوا إن ماحدث كان يقدر يبص منه إلا الناس الفقرا وأصحاب العاهات والأرامل والمساكين من مهلوكات عصر الذرة والعلم وزمان التكنولوجيا والبنك الدولى والسلام العادل !

كان فيه بعض الاستثناءات طبعاً، لكن الكل بياكد إن الموعودين كانوا بيقدروا من الشباك ده يشكوا لرينا مباشرة دون أى وسيطٍ كان.. وكان من حقهم يزعموا بملو الحس وبالصوت والصورة ويكشفوا عن كافة أحزانهم السرية ويطلبوا بدون خجل أو كسوف طلباتهم المشروعة.. وف بعض الأحيان بقله حيا أو أدب وعلى المكشوف حتى الطلبات اللى تكسف..

ومن العجايب أن أصوات المظالم دول ماكانش حد بيسمعها إطلاقاً فى البلاد الأمية المليانة جرايد وجرانين إلا قدام الشباك ده.. اللى بتوصل منه للسما فعلاً.. بجد..

والأعجب الأغرب ان رينا كان بيستجيب لهم فى معظم الأحيان وكأنهم شافوا ليلة القدر فعلاً.. فكانوا بيحمدوا رينا ويدوقوا طعم حلاوة الإيمان ونعمة الرضا والطاعة للى فى أيديهم مفاتيح الرزق وأبواب الحظ.. ويزدادوا فقر.. وأحزان !



بين السطور

صديقى المتسيخ شخبط شخطة كبيره جداً فيّه وهو بيجادلنى فى
الراجل مصطفى أمين علشان أنا اعتبرته شاهد على قرن بحاله.. وقال:
- يعنى انت بكل سذاجه مصدق تخاريفه عن الحرية وانه مؤمن
بحقوق الناس، هو انت ماعاصرتش زيه كتير كدابيين زفّه حطوا الشوك
فى طريق الشعب وملوه يأس وقلة حيلة..
قلت لصاحبى وانا تعبان على الآخر من كثر المناقرة والمقاوچه اللى
مالهاش نهاية.. واللى اتعودنا عليها، لما يولع النار بينا علشان يفضل
كلامنا مالوش فايده :
- إسمع يا صاحبى..

أنا عشت عمرى لابس عمة القاضى ومفتح عين واحد افتش بيها
بين السطور، وأدورع اللى ورا الكلام واللى تحت الحروف والمستخبي
فى النوايا .. لحد أحلامى البسيطة ما مزعتها سكاكين التكفير
وسيوف التجريم والتحریم سواء من اليسار أو من اليمين.. علشان كده
قررت اترك منصة الاتهام والأحكام وأبطل التفتيش فى الضماير والبت
والإبرام فى النوايا والسراير..

ولذا اتعودت أقرا فكرته كل يوم وأنا متفائل جداً لأن اللى زيه بينام
ليلاتى حزين ومتشائم .. لأن العالم حواليه خالى من شعرا زى چيڤارا
وعبد الناصر .. وچاهين !!



خباثة

صاحبي الخبيث، مدمن التعامل مع أجهزة الأمن العربية والمحلية سألتى وهو يمارس هوايته العلنية فى النعمة وإدمانه السرى لحواذيت النسوان العوانس على رصفان قهاوى المثقفين. سؤال زى شكة الابرة تحت الباط وقال وعلى وشه ابتسامته المليانه شر وحنيه :

- قصدك يعنى بتخاريفك دى.. إن ما فيش فرق بقى ما بين مصطفى أمين ورفعت السعيد!!

السؤال لدعنى ولسعنى وفور دى، لكن أنا ما جاوبتش على طول زى أيام شبابى الأولانية.. إحتमित بظروف السن ومرض السكر العصبى واكتفيت بالصمت.. لكن أول ما روحت رجعت قرئت كتب الثورات والانقلابات وبحوث العلماء عن الشخصيات الكاريزمية السوية واللى مش سوية.. وغصت فى كتب التاريخ القديم والحديث والسير الذاتية والخطط والإعترافات والتجليات والمذكرات.. ودورت فى القواميس والروايات وكتب جهابذة التأليف والنقد والصحافة.. وخبراء إنشاء وتحرير الصحف السرية والعلنية ودرست من أول الأول أسباب ظهور الأحزاب الطبيعية والطبقية وظروف وفاتها غير الطبيعية سواء كانت شرعية أو غير شرعية .. لحد ما تعبت وزهقت ومع ذلك .. مالتيش إجابة شافيه كافية للسؤال اللى شكى بيه صديقى الخبيث خبير اللطم فى الجنازات السياسية، لكن حسيت بدمى على طرف الإبرة !



تنبؤات

سألتني صاحبي اللي بحبه واللى أنا متأكد إنه بيحبني لأنه عارف إن
انا لسه مؤمن باللى آمنت له وآمنت بيه فى سنين الصبا الأولانية،
وحبى الأولانى أيام ميت سلسيل الأولانية، وزنزانتي الأولانية، وقصيدتى
الأولانية.. وهزيمتى الأولى وجنونى الأول.. سألتنى.. وهو بيعاتبنى للمرة
الألف:

- إزاي واحد زيك يكتب تخاريف زى دى عن كاتب زى ده.. وف
ظروف زى دى مع إن انت هتفت بسقوطه فى مظاهرتك الأولانية، والا
انت نسيته؟

وعشان أنا متأكد إن صاحبي ده بيحبني زى ما باحبه وإنه مش
شرير للدرجة اللي بيصور نفسه بيها ولا يقصد شى يتهمنى إنه ظبطنى
متلبس بخيانتي الوهمية الأولانية.. بالعكس طول عمره بيراهن على
غباوتى الأولانية واستعدادى انى اموت على نفس مبادئ الأولانية..
لذلك أنا اهتميت جداً إنى أرد عليه وبكل بساطة سمحت لنفسى
أتمسخر يمكن للمرة الأولى فى كلامى معاه وأقول :

- يا صاحبي.. إحنا فى زمن العجايب العجيبه الناس لسه بتموت م
الجوع لكن الأسماك ماعدتش بتشرب قهوة.. زمن اتحققت فيه
بالضبط كل تمنيات مصطفى أمين للنظام الاشتراكى فى نفس الوقت
اللى خابت فيه أمنيات لينين عن النظام الرأسمالى.. وسكتت !!



فصل في مقامات

المستشار الثقافي عنكب الخرافى

المستشار الثقافى (عنكب) الخرافى.. فتح على قلب الميدان دكان
وحطّ فيه من كل فكره ملفّ..

زهور للإستبليات، وكروت معايدات، ودفاتر ملوّنة لكافة المناسبات
وأغانى شعبية!

وأحاديث صحفيه كثيره.. بالألوان

وعينّ (جلف) لكل تفكيره..

واحد عشان يحسبها بالمليم وبالسنتى.. والتانى يحلبها كل ما ح يعوزوه
يفتى.. أمّا تالتهم فكان للأبّه الرسمية.. والمهرجان! وواحد طبعاً من
ثقات البنات علشان ترتب له أفكاره على الأرفف وهيه لابسه الجوانتى!

المستشار الثقافى شغلته مش سهله فلا بد يعرف (طنبشا) من
(دقهله) وإن (شبرا) البلد غد (شبرا) سندنهور!

ولا بد يعرف لغات وازاى يحلّل مفرّخات التطرف على كافة
الجبّهات.. وإمتى بدأ الرقص تحت الهرم.. وإيه تواريخ المناسبات اللى
رفعوا على ساريها العلم.. وليه (ام سيد) بتحب كلّ ست شهور وإمتى
(ابو السيد) يحب السكات ويشغل الشنيور!

ومنين يجيبوا اللورا وتحبيشة المغات!

علشان كده مش كلّ واحد يشاور.. ولا كل واحد يشير.. لابد تبقى
المشوره وسّرها فى البير فلا كل من وقّع باسمه الثلاثى مدير.. ولا كلّ
شاعر سمير ولا كل من توقّعه له ع المسؤولين تأثير..

ده سرّ من عهد الفراعنه يحفظوه إثنين - الأمن والكهنه - بيقسّم

الخلق حسب النية والتدبير هذا خبير.. هذا غفير ..

وهذا يا دوب تأمن ساعة العوزه وتشاركه لقمة فطير! ..

المستشار الثقافى لكل شىء جاهز.. حداه تقدير.. يحس إمتى يوافق
أو يقول جايز.. وإمتى يقول مكروه وسكّ عليه.. ويفطّمك للإثنه
وللأسافين ولعلّة العلّه ومقالب القلّه.. وإمتى يحمى الضهر لو مكشوف
وإمتى يحمى السيوف.. أو يقسمك ع الضيوف !.

وإمتى أو عند مين تكتب أو إمتى تملأ أو تصفّى الكشوف، من أجل
شرعية قرار الجوايز !

وبجوزك عصفوره لو عايز..

يريشك لو كنت رايد تطير.. ما انت الكبير والأمير..

المستشار الثقافى لابد يبقى فقير.. علشان يوفر للمستشير المقام..
يعمل حساب المسافة.. وعشان يراعى الفرص والخطوه على قدام..
وبيكتسب بالخبره والتوديك.. إمتى نفر يبقى فرخه.. وإمتى يعمل فى
الرُسبشن ديك !

يفتيك وهو بين حدود الاحترام والخوف فالمستشير الأصل / طبق
الأصل.. صاحب القرار الفصل مهما يكون أصلاً هَفِيّه وفَسَل..
والمستشار مهمّن أشار خدّام.. لابد يعرف يحسب الأفضل لأهل الفضل..
ويدهوك الظلم شرعيّا بلون العدل.. من أجل مصلحة الوطن والنظام!.

المستشار الثقافى مبتسم على طول ومحترم على عرض، عقدة لسانه
ما تنطق العيبة، ووشّه ينضح سهته وطيبه، يفرق الشارده عن الوارده..
 ويفصل الفالحه عن الخبيه.. ويبص دايمًا لفوق لكن عينيه فى الأرض

وتملأى يحلف على النعمة.. ويرحمه الوالده اللى ماتت وماسابت سنن أو
فرض..

مع إن أمّه - ربنا خليها - ع الناصيه لسنّه ف عزية أمّ رغيف.. بتبيع
لمون على فجل.. ويتستغفر من البولوييف.. لكنّها بتدعى له ليالاتى..
يعلىّ أسياده الكرام فى مراتبه، وعمرها ما أرسلت له تعاتبه، بالعكس
نادره لو يزورها ف يوم ح تدبج عجل.. وهىّ قادره على قولها تتكفل له
بالمصاريف.. ده كلّ من خيره جمعاه قرش يسند قرش من غيره.. تعمل
عزومته بكلّ رسمالها.. وتكمل المشوار على الموتورجل !

المستشار الثقافى فدائى ما تقوليش.. على كفّه شايل قلبه.. كلّ
المكاتب مكاتبه.. مالوش فى دفتر الانصراف والحضور.. كافة مواقيت
العمل أوقاته.. لأنه عاصر نفسه طول اليوم.. واهب شغله كل إمكاناته..
من صالة الاجتماع لحد أودة النوم.. لدورة الميه الخصوصيه.. أصل
الثقافة شمول.. فالمستشار شملول يفهم بدون ما يبص.. فى الطب
وعلوم البحار والفلسفة والفلو.. والفن واللموصيه وفى الدروس العامة
والخصوصيه.. لو طب فى البحر يطلعلك ماهوش مبلول !.

وإن صام سنّه يسنّ يزيد النص ..

وإن صاب جميعهم خرس خوف م الغلط أو حسب أوامر الحرس..
هوّه لوحده اللى مصروف له ساعتها يقول.. لأنه بحماية الخفى المخفى
أكيد مشمول !

فخذ كلامه جدّ لو هزّر.. وهزاره برضه جدّ يا فالج فلكل دقّه
سوانح.. سيادته قادر نمته والقبر.. وقرصته مالهاش دوا علنى ولا
مجهول !.

قابلى مره سألنى عن أحوالى.. رديت فى سرى يا عم مالك ومالى..
سيبنى أرى عيالى ..

وقلت أنا ف حالى دايماً ماضى فى الدفتر !
ضحك وقال لى الوطن محتاج إليك اكثر..
ليه أنت واخذ جنب ليه بتفكر.. العركة ع الأبواب.. أنا قلت : يا
ستار..

وف سرى قلت أكيد انا ناسى وعامل ذنب مكشوف له ! وقلت له ف
دهشة / مش كنتو قتلوا خلصتوا م المعركة ؟ ..
وح نبتدى من الأول على ميه بيضا.. والسلام مكتوب.. واكثر من
المطلوب..

قال لى بنظره محكمه وأبويه..
- المعركة حضاريه.. الغرب بيسن لنا لسه أسنانه.. وللأسف إحنا
شعبنا مراهق والخوف عليه أن يتوه يسكر بملاعيه..
مايخدش باله غفله من عيبه وألاعيه..
وإنه كافر ومادى ماهواش زيناً مؤمن..

وعندهم قدرة ع الغلط يداروه.. والابن يقتل ابوه.. والبنت تكره أمها
م البلوغ.. وكل شىء بالمال بيتسعر.. شفت اللى عمله / ريدج والآفاليين
الحظ دايماً حداهم بيتسم للأشطر !

تلقى الصغير يضيع فى خدمة الأكبر.. ومالهش إلا بالنفاق مستقبل!
وشعبنا الأهل.. يحب دايماً.. يجرى ع الرايحه غاوى موالد رقص
بالألوان.. ودى مهمتنا . فى أخطر لحظة تاريخيه..

نملا عينيه ونسد فراغتها.. برقص تنوره ولحم أبيض وهلس

صريح.. زَعَلَّه.. تفاريج.. ماتسيبش فيه رَغْبَه إِلَّا وهِيَه مقرونه بأمل
وبعجز.. ينام ويحلم أكيد ييجى يوم وراح تُفْرَج.. أكيد بكره.. وبكره
بيجره على بوزه إلى بكره فيتمنى لحظه م اللى راح منه.. وهكذا
دوايك.. إديَه ،خد منه.. يفضل مطاوعك وراضى.. بالأمل عنك تديَه
وتأخذ منه.. يخفّ عنك بيأسُه فتلحقه بالممكن.. تصبيره ومُسْكَن..
فيدعى لك.. وهَلَمْ جراً ..

أنا قلت له - قرفان وبابّلع قرفى :

- وبرضه يدعى عليك من زهقه.. ومن قرفه..

ضحك وعلى طول حلف لى بأمه وبشرفه..

يا عمى هِيَه الدعوه راح تلزق.. أهم حاجه انه يكون مشغول.. على
ودنه، يقرف ويرضى.. يتحرم ويطول.. يبكى ويضحك بصوت عالى..
لكن.. مايحزنش ولا يفرح.. الفرحة والحزن همه مولّدات التطرف !

أنا قلت : والجهل برضه والفساد والتخلف ..

قال / ده كلام شعراء.. أسرى الشباك القديمه، الجهل نعمه ف شعب
متخلف.. واللى أنت تقوله حايبه من بطون الكتب.. وخلص.. نظره
أحاديّه.. فاقده احتمال التحقق.. الرّك فى بلادنا على الإخلاص..
والعمل م القلب.. نيّه سليمه ف بلدنا تبقى عين العقل.. تقدر تقول لى
يعنى إيه الجهل.. ومين اللى قال إنه جاهل.. بقى شعبنا اللى اتقن
التصوير وبنى المعابد والهرم آلافاً وزرع وحارب.. وحنط جثث إزاي
نقول إنه جاهل.. ده ابن حنّيت مرازى.. إوعى تقول أصله أمى.. النبى
كان أمى.. لكنه حرر أمم.. الرّك ع الطاعه.. صفاء الروح حب الوطن
والأرض هوّ الأساس.. وجاى تقول لى جهل وتخلف.. انت اللى مش

فاهم.. هذا الكلام هو بداية التطرف ..

أنا اتأخدت.. لحقت وقلت بتطرف : يا عمّ سيبك انتم دماغكم كبير!
الله فى عونكم على النظام الجديد ..

ضحك وقال لى / سذاجه !

هذا كلام يبدو علمى.. لكنه مش مضبوط.. يا ابنى الجديد فى
القديم، هذا قانون الجدل والا أنت برضه نسيت.. قانون طبيعى قديم
من قبل ما العالم يعرف التقسيم.. إيه اللى جدّ جديد علينا.. كشعب
وكأمة.. إحنا زى ما احنا.. وهمّه زىّ ما همّه.. طول عمرنا مستهدفين
م الشرق زىّ الغرب !

لانا مصر.. عزّه وهلمّه.. وموحددين مسلمين وقبل ذات نفس
لاشتراكيه بزمان.. إحنا اللى كنا لاشتراكيين.. حتى بحكم مكانا فى
العالم فى سرّة الدنيا.. بين اليسار واليمين !!

خير الأمور الوسط.. واحنا الوسط.. السوق ده لعبتنا.. والعدل
شريعتنا.. من قبل أوروبا ماتعرف يعنى ايه التجارة.. إحنا اللى علمنا
البحار البحاره.. والبياعين السمسره والتجاره.. فيه ميت قماره.. إحنا
اللى صكينا أول ما اخترعنا.. العمله.. الصنعيه والسّهله.. العلم أثبت
وأثبت قبله بالقرآن.. ﴿فرعون ذى الأوتاد﴾ إحنا الفراعنة وصلنا
الكهريا والذره.. والكارتون.. أجدادنا قسموا الذره واستخدموا قوه ولا
النيوترون، فى عصر بذر القطن والكمون.. انت فى نومه.. أكيد ! طب
ليه نروح لبعيد إحنا تاجرنا مع الصومال والهند.. وبلاد تركب الأفيال
لحد السّد.. من عهد حتشبسوت لأيام محمد على.. احنا بنينا القناطر
قبل أمريكا.. وكان عندنا بيوت تحت سطح البحر.. ياك إنت فاكّر

الأهرامات طريقه ٦.. لا.. دول حطوا الجثث فيها لجلن يخدموا
الخوجات.. والحفارين واللصوص.. اللى نهبونا منذ الأزل !.

ما أخذتش نفسه ولا مره ..

وانا فى الحقيقة تهت واستغريت.. ياه.. على طول المسافات اللى
واخدانا.. حسيت فى قوله مكيد مالهش حلّ.. واتكدت.. من
معلوماته الموسوعيّه (الأكيده !) اللى بالتأكيد حتبقى مفيدة وخبره
للأجيال.. اللى مازالوا عيال لهم مستقبل.. واللى ما تعلموش إن الألف
عود دره.. واليه طواله بقر وتحتها زلطه !

وحلمت بالكشرى وبالسطة - وهو بيحضنى بضى إبتسامه ثقافيه..
وفيه عزة نفس خرافيه.. وقال لى فوق - يا ابنى الزمان اتغير ..

تعالى زورنى ف مكتبى المتواضع.. وراح تشوف كل شىء على أصله
وحيرضيك.. احنا النهارده ابتدينا نخش عهد جديد.. جعل الثقافة فى
بؤرة الإهتمام.. وأدى انت شايف كل يوم مهرجان.. فبص على قدام..
ماتسيش روحك كده لليأس والتشكيك.. مع السلامه.. وخلى عندك
أمل.. أنا قلت.. شكراً.. لا بأس.. ملعون أبوه الأمس.. وانت ربنا
يخليك.. ويقدرك / معاليك على كل هم عليك.. قادر كريم يعطينا طولة
الأجل... لحد مانشوف خفّ الجمل فى الإبرة.. بفضل خبرة إيديك..

ولقيتتى ماسك الطبلّة والمدرة ومدوزن القدره على القدره ومقلّوظ
الطرطور وداخل دورى.. بارقص على الواحد.. بأغنى ل بكره.. مددلا يا
شيخ العتبه يا عصفورى :

حال الثقافة مأزمتى.. وحال رجالها محزنتى..
أشكيها لمن؟
لسان طويل كلامنجيه.. ح يقنعوك بالحرية..
جوّه الزنازين..
رمونا من محنه لمحنه.. وفرحانين باللى جارحنا..
وحطنا فى الطين..
ألفين لسان لبلب يكذب.. بخساره أو مكسب يحلب..
يكسب ملايين..
وكل منهم على زوقه.. نقى اللى تحته من فوقه
حظ المساكين..
ألفين جريده ومجلّه.. لكلّ معلول.. علّاه
شلّه ودكاكين..
كلّ الفضايح منشورة.. بالصّوت وأحيان بالصّوره
والمسئول مين؟
اللى انفتح أثاره مفتوح.. والسّرع البهلى ومفضوح
قبل السبعين..
من يوم ما صاحبك زبطها.. وهب الثقافة لظباطها
لحساب عابدين..
عكموا لجانها ونقاباتها.. حلقوا شنابات اتحاداتها
ودقوا الأسافين..

إذ لخبطوا الرّسمى ف شعبي.. تفانين بدع شقت قلبي
 من غير سكاكين..
 والجته فاحت روايحها.. لاقادره تخفى فضايحها
 ولا تخزى العين..
 قالوا لنا إحنا عالم تال.. مانستاهلش غير النابت
 والتوم والتين..
 وشعب جاهل ما ترقاش.. على طبل بلدى ماحيصعاش
 والغفلة نعيم..
 إذ لو فهم يطلب نايب.. وتبقى كارثة ومصايب
 ح نجيب له منين..
 عشان كده شغل باللو.. من توب هيافته وافتل له
 وارعبه بالدين..
 ثقافة وفنون غيمها.. تتربى أجيال نيمها
 من غير تفهيم..
 وانخ و قول ياما بنينا.. من عهد مينا لافندينا
 لابوعنخ أمين..
 البيضة حق اللى سلقها.. واهم منه اللى لحقها
 همّ ف بقين..
 من حسرتى غصبن عنى.. الخيبة منك أو منى
 حتعاتب مين؟..

خذ حكمه عن ابن الفارض.. أتايرك مريض يا متمادض
كان عقلك فين؟..
ما فيش خلاص ولا فيه منجا.. النينجا بتبيع الرنجة
ف سوق التين..
والكل داقق عصافيره.. أسير غبي لدماع غيره
ويساره يمين..
ما في حدّ منّا إلّا وشارك.. يا في الطنّاش راقد بارك
وعامل لى حزين..
الكل مـرايات تتلمع.. بالونات ولازم تفرقع
قادر يا كريم!!



البعجورى رئيس تحرير الحنجورى

الأستاذ البعجورى.. آخر تلاميذ مدرسة الحنجورى.. الابتدائية التى اتقفلت أول ما اتقلمت نكستنا لهزيمة تاريخيه، بعد الصبر ما طال إتعين بالصدفه رئيس تحرير الجرنال التى أنا مش باقراه .. وأصبح صاحب عزوه وصاحب جاه ..

أول ما يخش عليهم من ايها باب يضربوا فى استقباله بروجى ويفنوا أناشيد الترحاب. وأول ما يخرج يكسروا ميت قلّه وراه ..

الأستاذ البعجورى كان جمهورى. ف أيام الملكيه ودى عاطياه.. اكتر من ميزه مخليه عند الضباط الأحرار من خبراء التحليلات السياسيه ومن صفوه كتاب الداخليه الأبرار.. ولذا بيتصدى ليل ونهار لجميع المنحرفين سوا كانوا من أهل الحظوه اليسار أو من أهل الخطوه اليمين. ولانه بيقول الكلمه المتقيه التى هيه بتعجب صاحب الشأن ولا يقبل التأويل ولا التعديل ولا تسمحش بأيهها تحليل.. ميزه اكتسبها ومش بالساهل ولا حسب التسهيل، خصوصاً وهو من أبناء البرجوازيه التافهه فى الفتره التى ميزت العاقل من الجاهل والواعى من المتساهل، ودى خبره من كتر ما كان بيلمح بعيون الخبرة أساتذته فى المدرسه إياها.. واحد بعد التانى بيتخطفوا للعبره ورا عين الشمس، على كلمه أو على نكته أو على سكتة أو على منشور ..

ولذا الاستاذ البعجورى عمره ما صابه الدور.. لا نام على برش.. ولا بات فى زنتانه ويوم ما اول مره راح يعمل فيها بطاقة صحفى.. سكه العسكرية على سهوه على أم قفاه، فوّتها من باب الحب وعقدت ما

بينهم فى الأيام الصعبة صداقة .. ولذلك لما بيتكلم عن أحوال المعتقلين يحكى وكأنه عاش الاوردى مع الشيوعيين ..
أو كان فى طره أيام مع الإخوان القطبيين أو حتى ضمن بتوع مايو الطلابيين.

والأستاذ البعجورى عصامى .. علم نفسه بنفسه .. من يوم ما كانت ألف الهمزة بتشبه كوز الدرة أو الشومه والشنطة لسه قماش لكن لما جت له فرصة عمره ما فاتهاش .. فأكل نصف رغيف السلطة لحين يخمر .. فعطوله النص الثانى بلاش .. ودرس على مهله المسافات واللى مناسب منها بين أى محطة ومحطة لا أقل ولا أكثر لذا أصبح أسطى، قبل ما يتعرف بالإسم أو يتخصص فى كل مالا يقبل التخصص .. واعى واروية للساقطة .. ومحافظ على اللاقطه، من موسكو قد باريس أعلنها واضحه يطمئن من بيديه الأمر .. بأن طموحاته على قدمه .. ولذلك طبطب كل أصحاب الفضل بكل حنان على خده .. فى ساعة الجد الأزمه زى ف سهرات التهليس.

وخصوصى لأنه بيان متفاهم .. وحكيم .. فاهم ..
وتمللى حويط وشديد التهذيب متفاهم، دايم البسمة ويا الموجه السايده وعاهيم، فاستخدموه الجميع مع انه مستخدمهم ..
واستأمنوه الكل طبعاً بعد ما استأمنهم ..
مافاتش فى أى حته علامة أستفهام ؟
ولا اختلف فى يوم من الأيام مع المعارضه الشرعى ولا الاعلام !
الأستاذ البعجورى الحنجورى التمام التمام .. من عيلة زى حالاتنا ..

على قد حالهم وعاشوا العمر فى حالهم.. وماكانش يخطر صدفه على
بالهم إن ابنهم حيقب.. ويكمل التعليم.. فإذ به ينفذ بجلده من قرار
الجب ويصير على سهوه من الأقدار رئيس تحرير.. صاحب أفكار وله
فى صنع القرار ويبسافر بلاد بره فى ديل الرئيس ..

ويكلم الوزرا مباشرة وبالتليفون. وله هلمه ف مجلس الأمة كل البلد
بتسمعه وتشوفه راديو وتليفزيون.. م الساعة سبعة الصبح ف صباح
الخير.. لحد آخر نشره فى الأخبار لما بيطلع فى دورى القناة الثالثة
لجل يقدم الجرنان بتاع بكره.. فاتعودوا يكتبوا له رسائل ياما وشكاوى..
طلبات على قد ما يشيل فوق كتفه، معظمها بيببّ فى كيس الزياله،
بلاوى.. لكنه والحق يتقال قدها وحمال.. ماكسرش خاطر حد بهزار
ساعات أو بجد.. ركب كتير منهم فى قطر الميرى مخبرين ومدرسين
وسعاه، علشان مهم ان الجريده يوماتى تتملى.. عزوه وجاه، موكب وراه
فى الرايحه والجايه.. واهو كله عند الحزب وف عرف النظام
جماهير.. بتشجع الكبرا على زيارته.. ويكلمه عنهم الرئيس فى طيارته..
مصدر خزين المطبخ العمران.. والبركه والدخان ومكافأة المهرجان
وكل ما تقبله حدة لسانه الفصيح، ويزكوا اسمه ف قائمة الترشيح لما
يحين وقته..

السيد البعجورى رئيس تحرير صريح القلم وإن كان بيان مش فاهم
ردود الفعل وحدود النغم، لذا يبقى كلامه شئ مختلف، ودى مهارة
الملهم المحترف..

يعرف يفرق ما بين الأصلى.. والمتحوّل..

ما بين أسير العطايا العاطى.. والمتسول..

ويحس اتجاه الريح سوا ف سنين الرخا.. أو فى السنين الكبيسة
ولذا بتضطبط معاه وتطول الترويسه.. وكل ريس بيركب يتبسبط منه.. وده
طبيعى.. والأدهى منه.. انه يوصى الجميع يتعلموا منه..

لأنه حتى فى عز الأزمه.. متفائل..

ماشى على شعره بيضا فى سواد الليل..

وما فيش فى أى مكان بوجه البسيطة بلاد بتشبه بلادنا.. فاحنا
أحسن ناس.. ونظامنا رغم النقد أجدع نظام.. ولمنع أى إلتباس احنا
المعارضه مننا فينا.. مالناش فى داء التطرف رغم علاته.. ده كل ده
مؤقت.. الأصل فى الأصل إن المصرى أليف وحنون ومالوش فى صدف
الجنون ويحب الاستقرار طول ما ولاة الأمر من أولاده.. يحبوا
الاستمرار.. ودى طبيعة اللى صنعوا الحضارة على مدار الزمن، وهمه
رغم الغزو والحمورية والسخره والعبودية ومخاوف الحاجة والتبعيه..
متمسكين بمخاطر التنمية.. وبالبتسامة النديه بكل حرية وبلا عصبية
يواجهوا الاستعمار ويشطبوهم القاموس.. ويقتلوه بالحيا ويكسفوه
بالخجل ما احنا كمان زيكم.. مش قدكم أيوه لكن منكم ولنا ف بنوك
الغرب أى عندكم.. ياما واكم أسرار..

الأستاذ البعجورى يمكن ما يياش عليه.. فهو كثير متواضع وبيرضى
يكون لو زنت - فى البروتوكول - بعد الرابع.. ولذا يعتبرونه وسط
زمايله الولد الرائع.. والريس ذات نفسه قال لكل بكل صراحة اتعلموا
منه ما انتم كنتم قبله وما زلتم.. لكن هو اللى مريح قلبى.. ومريحنى
مع الكل ومش بيبعب ولا بيعبى.. وبافهم قصده من أول كلمه أقرأها
لآخر كلمه..

لا بيلف ولا بيدور.. ولا بيزاحم فى الدور.. ولا خايف من لايحه ولا
دستور.. علشان بيعيش الخطوه الشبر غير المتر.. والأمر ماهوش
مرهون بالمأمور اللى تحبه، لكن باللى تعوزه تلاقيه..
جايلك عامل مابدالك قبل ما حتى تفكر فيه..
شايل عنك همك..

عارف ايه اللى يهكم م اللى يعكر دمك م اللى.. يحقق دعوة أمك..
ودى على فكرة موهبه مش تعليم.. خبره وبركه مش مفاهيم..
ولذلك لا سمير ولاسعدده ولا مكرم ولا ابراهيم ولا ولا دول ولا دول
فاهمين هو بس اللى فاهمنى.. ولذلك أنا باطمئن له.. لأنه مطمئنى..
أنا والحق يقال.. ارتج عليه واتخلبط ويايا مفهوم العاميه
بالفصحى.. ودورة الميه على الفسحه.. وقلت يا واد قضيت العمر بحاله
بتحلم.. اتعلم بقى واصحى.. دقيت الطبله وشلت الطار وهتقت ليسقط
الاستعمار وليحيا الثوريين خدام الضباط الأحرار.. الزمن اندار.. وشه
لقفاه ومع كل ده ماشيه معاه فالعب يا طرطورى.. وحزمنى يابابا
ودخلنى ف دورى.. شئ الله يا آخر عنقود المريدين يا بعجورى..

...

فهمت ايه أنا مش فاهم.. الحسرة خلت فهمى تقيل
أنا لا ابن عيسى ولا العالم.. دانا يا دوب من ميت سلسيل
م الجرن للسجن صده رده.. يرضعونى جهل السماجه
الجهل.. غطى على السذاجة.. ولا حد فاهم فى أى حاجة
الشيخ خفاجه ورثها شرعى.. سرقها ميرى من غير ديباجه

أنا كنت والى على إدارة.. شريت مر القرف عكارة
أتارى نص الشرف شطارة.. والدنيا رحلة وراد استمارة
لو تتختم لك ح تبقى حاجه
بعديها تطلع ع الشاشة تتخع.. لو يومه خابت يومه تفرقع
إديها زومبه فى ابن المقفع.. طبع البهايم الخرس تسمع
ولو بدت بالنهيق حمارة.. القط يلعب بيض الدجاجة
بقى مش مهم أنت تبقى مين.. سوا يسارى أوم اليمين
أو حزبى أصلا بلوك أمين.. هزيل مرمرى مخك تخين
مادمت طيب وناوى تدفع.. نجمك ح يلعب آخر الأجه
هذا قانون الشرم مزيلج.. على قد ما توطى لها تفلح
ولو مكسح حظك ح يسمح.. مادمت ناوى للون متفتح
وغاوى هاوى وأروب مدردح.. قبطى ح تفتى للمسلمين
وإمام بعّمه تصبح خواجه



حالة شعريّة

لما كتبت قصيدة وطنية سخنة قلت لنفسى .. (ما فيش غيره رئيس التحرير الوطنى ح ينشرها لى) وكتمت شكوكى الطفولية ورحت عطيتها له بكل بشاشة وتفاؤل

الراجل رحّب بيّه .. كأننا كنا مع بعض إمبراح، ودق الجرس استدعى الساعى ف لحظة، أمره يجيب لى قهوه مطبوعة .. وحاجة ساقعة ..

قلت يا واد الكون اتغير يبقى الناس ما تتغيرش ١٩

انت اللى طول عمرك واخذ العالم قفش ونكدى وشكاك .. وأهّهُ !
قدامك كل ما تيجى عينه فى عينك بيتسم لك فى مودة وترحيب .. مع إنه مشغول جداً حتى مع دبان وشة .. ساعة بحالها وماجتش القهوه ..
ولا الساقع !

قلت لنفسى (مالوش لازمة) ! واستئذنت ومه إنه ماكانش حداه فرصة يسمح لى عشان بيتكلم فى التليفون .. شاور ناحيتى يأذن لى ..
فخرجت ..

أسبوع عدى والتانى وراه .. بعد الأسبوع التالت كلمته فى التليفون بعد عذاب، فكرته بنفسى فشقق شهقه طويلة .. اتخيلته معاها بيدعك قورته وهو بيقول ... يا ا ا ا ا م ..

اسم الله عليه اذكرنى بسرعة .. رغم المشغوليات والوقت الضيق
قال لى :

- يا راجل ! دا حنا اخوات وزمايل .. من ثلاثين سنة واكثر، بس اطمئن وما تقلقش .. ابعت لى نسخه من (القصة) بتاعتك أصلى نسيت الأوراق

كلها فى الدرج إمبارح..

قلت له :

- أنا مش قلقان بالعكس.. بس انت اللى ما تقلقش، رينا وياك.. انت اكيد قصدك أبعت نسخة من الشعر بتاعى.. أخ.. وضحك ضحكة طويلة متغمة من قلبه وقال لى :

- طب وأنا بس أعمل إيه؟.. انت ما بتبطلش كتابة وبتاع كله.. شعر ومسرح وقصص.. موسوعة متحركة روايات وأطفال.. معلش يا سيدى إبعثها واعذرنى.. إحنا بتوعك !!

وضحك تانى قبل ما أقول له.. داحنا اللى بتوعك.. واتفائلت وقلت.. - أنا عاذرك.. من قلبى وعارف عذرك وحياة أمى رينا فى العون بكره الصبح تكون عندك هو الكون اتهد!

وفات أسبوع والتانى وراه.. بعد الأسبوع التالت.. كلمته بالعافيه فى التليفون تانى وفكرته باسمى واسم قصيدتى..

اسم الله عليه اذكركنى على طول.. وفضل يعتذر لى وقال لى.. يا راجل.. دى حدايا كإنها فعلاً زى قصيدتى الشخصية، دا احنا كنا ف زنزانة واحدة وعنبر واحد وأكلنا من نفس القروانة..

وضحك ضحكة أطول م الضحكة بتاع المره الأولانيه وهو يقول : ودقنا نفس الخرزانة !! ها.. نكتة مش كده؟ وكمل لما ما ضحككش على نكتته، وقال..

- معلش أصل الواد الجاهل ابن الكلب الساعى بتاعى ما بيفهمش العامية من الفصحى ويدال ما يودبها الجمع زى ما أمرته.. دشتها فى

الأرشيـف.. وحياتك عندى خصمته لأمه يومين.. ده كلام ؟.. يعنى ما يعلمهاش إلا مع الشاعر اللى احنا عايشين على حسه وبأنفاسه.. فى حب مصر يا راجل.. انت نسيت.. ابن الكلب الأمى بهدلته خصوصاً لما ما عرفكش..

وأدى يا سيدى اللى احنا فيه واللى بناخده منهم.. صحافة القرن الواحد والعشرين وادى ساعاتها.. شفت الهنا اللى أنا فيه.. على كل معلش.. ابعت لى النسخة.. وأنا.. قطعت كلامه وأنا متكرر وف نص همومى قلت له :

- أرجوك.. مايهمكش يا خال.. كل قصايدى فداك بس بلاش موضوع الخصم بلاش تأذى الساعى.. (أبدا) قالها بعنف وإصرار.. قلت له (حتكون عندك م الفجر).. وخطيت السماعة.. وبقطنه وحبـة يود على زعلى كتمته.. وفكرت ف نفسى وقلت لها ..

- الحق.. يا واد يا سمير قصيدتك سخنه شويه والظرف ما يستحملهاش والساعى أكيد له حق.. مش ممكن.. دى برضه جريدة قومية وماهيش قد كلامك الدبش وتلميحاتك الواضحة عن سينا والأسرى وصندوق الدين.

وتلميحاتك المكشوفه عن العسكر دانت عليك أحوال.. ويتحببـكها.. وعامل لى فيها شجيع السيمـا.. وكإنك ياما هنا ياما هناك.. فلايمها وبلاش إحراج.. غير !

وفعلأ.. قلت ابعت له بدالها قصيده جديده واحلى بكثير وأرق.. قصيدة رومانتيكى عن المنصورة وأيام الحب الأول.. والبنت التلميذه اللى كنت باموت فيها وراحت غدر ف غارة سته وخمسين.. وحنية إيد

الذكريات وأيام الصبا ع المساجين..

وقلت لنفسى أوفر نص السكه عليه وح يفهم إنى مقدر أعذاره
وظروفه وفاهم.. وبالعكس يمكن يتظمن لى اكتر م الأول.. كده يا ابو
سمرة ما تحجرش دماغاك.. فوت حبة.. الدنيا ما طارتش !

وعلى طول صورت قصيدة المنصورة صورتين وقلت علشان لوضاع
الأصل مع الساعى تسد اختها.. ورحت وسلمتها.. وأنا باتشكر له
وبأتأسف ع الإزعاج.. وما استيتش القهوة.. وقلت (إديله فرصة يقرأها
لوحدة).

وفات الأسبوع الأول والثانى وبعد الأسبوع الثالث برضه.. كلمته فى
التليفون واسم الله عليه أول ما سمع صوتى عرفنى وماعطانيش أيها
فرسه لحظة أفكر أو أسأل..

على طول.. وبخ نفسه بشدة على قلة ذوقه.. لدرجة كان ح بيبكى
وهو بيشتم ويعلن ابنه الطفل الندل واللى جايوه.. واللى يا دوب سنه
ست سنين لكن معجون بعصير العفاريت الزرق وازاى بل وقطع كل
قصايد شعر العاميه والفصحى.. اللى كان واخدها معاه علشان يقرأها
فى البيت للعدد الجاى.. وضحك من قلبه بكل افتعال.. فضحكى وهو
بيقول :

الواد عامل ناقد.. جيل عفاريت مالوش فى الشعر!

والمرة دى - ان جيتو للحق أنا صدقته وعذرتة.. مش بس لأنى
ضعيف جداً قدام الأطفال.. لكن علشان هو كان فاكرها تمام وانها
أصل وصورة وفجأة سألتى وهو بيدعى ربنا يا رب يسامحة.. ويارب
يكون عندك صورة تانية.. أكيد..

قلت له :

- ما يهكمش.. طبعاً عندي.. اصورك منها صورتين تعطى واحدة
للمحروس ابنك.. ينقدها.. وضحكت.. لكن هو ماضحكش.. فقلت له
معتذراً :

- وحياة ابني أنا فاهم جداً..

وكإنه لسعه عود الكبريت الى سمعته يبشطه جنب السماعه وقال
زى الملسوع :

- فاهم.. ؟! فاهم إيه ؟..

قلت له :

- عذرك.. فاهم عذرك وظروفك الصعبة قصدي ظروف الشغل
الصعبة.. وما تقلقش ح تكون عندك نسخة جديدة الصبح ولا يهكم (..)
ساعتها قال لى بجديه :
- طيب.. بس بسرعة.. علشان تلحق عدد الأسبوع ده بإذن
الله..

وقفل السماعه قبل ما أقول حاضر..

وعداه العيب كان الله فى العون.. رئيس تحرير مش أى كلام.. شايل
هم كبير.. وعرضه لكل هفيه من الشعرا الكتاب.. مسئولية كبيرة..
ولذلك وقبل ما اروح له تانى يوم فكرت فى فكرة تريح وترضى كل
الأطراف.. وتتك اللعابيك اللى حوالين الموضوع..

عملت من القصيدة ثلاث نسخات.. بعث الأولانيه مسوجره للأمن
العام.. والثانيه لمباحث أمن الدولة.. والثالثة حظيتها ف ظرف سيبتة

ف مكتبه لما قالوا لى إنه لسه ماجاش والحق الراجل كان سايب عند
سكرتيرته أوامر انها تاخذ منى النسخه فوراً.. أول ما أوصل..

قلبى ارتاح.. وقلت أهو كده يبقى عملت معاه الصبح يا سمره..
وماحدث راح يزعل منه، لأن الدولة بنفسها راح تقهم بالتأكد أن
قصيدتى مجرد أشعار فى الحب العادى جداً.. حب مرهقة عن واحد
ضاع منه حبه الأول.. لما سجنوه وضاعت منه أيام السجن لما خدعوه
فماقدرش لقلة حيلته يفسر سر الخدعة المخفية لا ف يونيه بتاع سينا
ولا يونيه بتاع بيروت..

شئ عادى ورومانسى جداً.. صحيح فيها بعض كلام مش هو.. لكن
معقول.. همه احياناً ييجبوا حاجات من دى حتى من الشعرا بتوعهم..
يعنى بهارات بعض مشاعر مرّة.. لكن.. ضرورة وكلها مع ذلك إيمان
بالناس والأرض ومصر الحره.. والحاجات اللى بتدى للشعر الوطنى
مبهر ..

مر الأسبوع.. وصدر العدد الموعد.. وقصيدتى ما اتشرتتش..
سألت عليه فى التليفون بعد تعب ومحاييله قالوا لى مسافر.. بيحاضر
عن أحلام شعراء الوطن العربى فى باريس ..
اتظمنت وقلت الصبر لحد ما يرجع ! ..

بعد يومين.. وصلتنى رساله من الأمن القومى.. فيها قصيدتى
وعليها تأشيرة بتقول.. بعد ملاحظات ع الوزن وع الفكرة (لا مانع تنشر
دون حذف بشرط التخفيف من روح الاحباط وتحسين الخط (١).

نكتة ظريفة من اللى مآشر ومحاوله لإثبات حسن النيه لإزالة حيط
الخوف والشك ما بين شاعر فلتان طول عمره، وما بين رجاله الدولة

وأهل الزيت وأصحاب التواقيع.. كده اتهيألى.. ويمكن اكون غلطان
كالعادة ..

ومر الأسبوع الثانى وبعده التالت.. والأيام لساها لحد الوقتى بتمر
وصاحبنا رئيس التحرير القومى رجع بسلامة الله.. م الغربة.. وبعد ما
قدم لباريس وأوروبا صورة حيه وحقيقية ومشرفه عن حال الشعر
العربى زى ما نشرها وقالوا..

وأكد ان ده عذر كفاية يخلينى مش زعلان منه، لأن قصيدة خيبانه
لشاعر نكدى ما اتشرتتش لحد الآن.. مش ح تقلل من دور واحد زيه
فى خدمة عقل ووجدان الأمة.

ولأن الدّوا مّر ما اقدرتش اقتنع كدبت نفسى عشان ما اكذبوش..
ونشفت عرقى قبل ما طرطورى بيبوش وفتحت ع السيكاف.
يمكن قافيتها تفسر لى سر الفيرس اللى بيخلينى أصدق كل
تلكيكه..

وزعقت قلت - ح اتوب م الشعر.. وأغسل سنانى وضوافرى
أقطع سنون أقلامى وأقر.. أكسر وراه قلّه فواخرى

أدفن فى بير الصمت السّر.. أشوف بقى نفسى كمصرى
له فى التاريخ شىء وشويات.. ودار ولف وشاب بدرى

وكتب من الدواوين عشرات.. إحتار بها الخلق ف أمرى
أنا قلت أتفرغ للبر.. فى الباقي من فتافيت عمري

أهتك حجاب الفن وافر.. للى يعوض طول صبرى
أشوف بقى سبوبة تبر.. وأقب م الجبّ الفقرى

لقيتتى عريان شكلى يعر.. ولا ليّه سعر ولا استجرى
قال الجنون - أعقل يا جعر.. هو أنت إيه؟ من غير شعرى؟



السلفيّة في التحولات العربيّة

حلاً بين المعزّ رعيان الجمال.. صبحوا صحاب الحيثيّة وصحابات
راسى المال.. استبدلوا خيم الليف والتمر الناشف والأسمال بالقبيلات
السيراميك.. والبان كيك والبنطلونات الرجال..

سبحانه اللى ما بتغيّر ويغيّر كل الأحوال..

بعد قرون التيه فى الصحرا وعصور الترحال.. إنقلب الحال..
طبخوا المنسف بالهامبورجر والبيف وبيوض الأشبال، مزوا عرق البلح
الحامض بالبلوبيف، سكنوا قصور الريف فى اوروبا وجزر الماليف.

رحلات الشتا والصيف.. صبحت للزحلقة فى سويسرا على التلج أو
للبحلقة فى ركب النسوان.. ما بين الهونولولو والباهاما وحوارى
البيجال.. وبعد الجرى ورا اليربوع والتعبان أصبحوا خبرة فى صيد
التعلب الاسكتلندى والأفيال..

سبحانه من لا يتغير أبداً.. ويغيّر كل الأحوال..

الهلة الشحته وصدقه اللى اتربوا عليها أطفال وشيوخ وعيال..
بنكها النفط البركة فى البورصة دولارات وريالات م الذهب الحر.. تلال
من فوق تلال.. اللحم المتقدد فى الشمس من العام للعام بقى يحضر
بإشارة وطاظة - الطقة بطقتها - من مكسيم والسانت رويال..

سبحانه من لا يتغير أبداً.. ويغيّر كل الأحوال..

الخنسا اللى عاشت أجيال على شط رمال الواحة مقطوعة تغزل
صوف النعجة العارجة وتقتل للصبر حبال وتعد الحصى فى شوال..

تحسب أيام عمرها من شق هلال لهلال.. واللى فاكده الدنيا كانت منذ
البدء وما تزال حتى يوم الحشر رمال فى رمال.. واللى عاشت تحلم
تمسك قبل ما تنزل قبرها نص ريال.. صار عندها كيف ومزاج بطل..
بطلت الشعر حماسة وصبحت تسهر فى بلاد الخواجات الحرّة
للفجر.. قلعت توب الخيش الأغبر عرفت دانتيلاً القمصان وكاوتش
السوتيان.. وفنون نغمشة الطرحة والشال.. وليلاتى ويا الأقمار
الصناعية بتسهر حتى نهاية الإرسال..

سبحانه من لا يتغير أبداً.. ويغير كل الأحوال ..

سبحانك ما أعظم شأنك.. كل ده من رحمة قلبك يا كبير، من صنع
بنانك، أبدعت وسخرت لنا السلكى واللاسلكى.. دليت العقل البرى
الحسكى على الحاسوب والمحمول والفاكس علّمته يستبدل ظهر البغل
بأحضان التاكس.

هديته للنجدين وللنهرين وللشطين وللبنكين.. رويته بعد حليب
الناقه الحامض للأسكوتش وللماكس ..

أو حيت له بيدل حجرية عقل شيوخ المنسر بالهيبه الملكى.. والساكن
بالحركى.. سبحانك.. لك حكمة تختار مريدنك وتميز خلانك..
سبحانك.. قاطع طرق الحج ف سالف ليّام أصبح وبفضلك للأمن أمير
وامام.. النفط الأسود هياً له المتوى.. بالتوب البفته الأبيض يقعد على
كرسى الفتوى يقسم أحوال الدنيا وأموالها.. حلال وحرام ..

وأنا.. أضعف من إنى اعترض الحكمه الرئانيه أو اقاوح ويا الأحكام
الشرعية.. وبفضلك أعقل من انى أحاول أفهم وأفرق بين المدنى
والمكى.. أو أحكم ما بين بنى هاشم وابو سفيان..

عفوك إغفر لى.. سبحانه.. انت اللى منحت التوبة وسعت أبوابه
الفقران..

أبحت لكل الخلق الحق فى غفرانك.. ووعدتى بالأمن ف ضلك وف
أحضانك..

سبحانك يا قادر.. إغفر لى..

إزاي اتجرأ أقول لك، وانت الأعلى والأعلم إن التوبه فى بعض
الأحيان مش خالصه لوجهك تشهد على قولى كل غوانى أوروبا.. وكل
بنات الإعلان والإعلام..

وباتمرغ واتمزق م القلب وباشهق م الرعب، وزى بيشهق كل الأطفال
المنقوعين فى الفقر وفى القهر.. اللى فرضه عليه وعليهم خادم بنك
المال..

حادى الرحلات والسفريات القرشية - صيفاً وشتاءً - ما بين الكازينو
الشرعى فى السّان رينو والمكروه المنكر فى اللاس فيجاس.. الراحل
طول السنه خلف الدوه والآس.. والماس والقد المياس.. على فين ما
بتودى طيارات أساس والعال..

سبحانه من لا يتغير ولحكمه يغير كل الأحوال..

الأمى الجاهل أبو دلمه ودلق وسكسوكه أصبح بفلوسه المبروكه..
رئيس تحرير كافة جرانين الشرق الأوسط من قاموس الانترنت
للبعكوكه.. أمى - لكن الخبراء كتبوا له مقالات روايات وقصايد..
جاهل.. لكن الموهوبين نسجوا على نوله.. اتأخروا له.. أصبح مخرج
سيما ومسرح ومؤلف تليفزيون ومدرّب رقصات فوايزر، غطوه بعباية
الفن وقلعوا له..

اتخرج من كباريه هوليود فنان.. ألف قصص الأطفال.. جنيات
ومغامرات وخيال علمى وأبطال..

التأليف عمره ما كان كيميا يا خال.. حبة حيوانات على حبة
تخاريف وخيال.. رسموا له..

بقى شاعر يشتري أجده ناقد دكتور، يوزع باسمه شهادات الخبرة
يومية أو شهرياً أو سنوياً.. جايزه ونيشان.. ويلف قصايد الشعر ف
سلوفان.. غطسان فى بحور النسوان.. يفتى فى الفن وفى الفلسفة
والأحزان..

يتأأس كافة ما تتشكل بالعربى أو بالعبرى لجان، يقعد قعر المجلس
يفرك فى صواب رجله وعقله ويندغ ورق الدخان.. يتمتأ بلبان الأونكل
سام.. ويكل ميراث الكرم البدوى يوزع أكياس الفضه على الأزلام والحكام..
شهدوا له الكل على الحق وع الباطل ..

وف كل الأحوال.. ما بتتهزّش شعره من دقته لصريخ الجوعى
الموتى.. فى الصومال أو فى أفغانستان ولا للقتلى فى غزه.. ولا للأيتام
فى منشية ناصر أو فى غابات السودان..

وإن كان من أجل الكاميرا يبيكى بدموع التماسيح، على موت
البسطاء العواجيز تحت الأقدام وهمّه بيرموا بحجارة الحلم الشيطان،
ويحلّموا بالجنه اللى مؤكّد ح تعوضهم بيها أيام المر وسنوات الحرمان
فى كافة مدن الإسلام..

سبحانك يا عالم باللى فى قلوب الناس..

وعشان كده سلطت علينا وفيينا الوسواس الخناس، اللى من دقته

وبتفتل له أجهزة تفتى له ..

فبقى الإعلام لعبته حرفه وهواية .. وهو بالفطره خبير والمال عزوته
فى كفه عصاية .. وهو عن الحق ضرير ..

والسلطة غوايه وميراث وكفايه يهش بها عن سلطانه الوارف كافة ما
ابدعه قلب الفنان، زى مابيهش الدبان ..

وزى ما كانت امه بقحف النخله زمان .. بتهش عن التمر الناشف
قطعان الأغنام!

واتذكرت أنا يا فلاح مركب تايهه على سطح النيل .. فى عز الليل
حته من ضى الشمس .. وفيها ما فيها ..
اتأملت احوالنا من فوقها، اتأملت ..

مسحت دموعى فى طرطورى .. واتهيا لى انى ندمت، علشان أنا
نفسى كنت عليها وضحكت .. أثارها :

الشيخ صاّد .. كاف .. عامل .. عشوه وعازم كل الناس
الى جونله واللى بلوزة .. واللى لعوزه لابسه لباس
والمتفردة والمتمرد .. واللى متعدد لاجناس
سهرة هلمه لحكما الأمة .. لّمه أمية على العباس ..

قال لك خيبنا زراعه صناعة .. لكن طز .. معنا الآس
داحنا الأمة اللى حَ نورثها .. من هيروهييتو لأركتساس
عندنا علما جيوش وقبايل .. فى الزردة وضرب الأنفاس
سر النفط يا شحط يا غاوى .. خلا الكسلان يغلى حماس

داحنا اللى بناكل بإيدينا .. فتّ العنزة والبسباس
شرعى وقرع كبرنا درينا .. إن الدنيا تدوب فى الكاس
لنا فى الشعر تاريخ وحضارة .. خمرك أمريا أبو النواس
رينا خلق العالم جتّه .. واحنا العمه وشال الراس ..

عمّك كافّ صادّ .. ناصح .. قال بفصاحة القول الفصل
والمعازيم ويكل نصاحة .. أخذوا الحقنة وبلعوا المصل
هذا عصر النفط أولاده .. صبحوا سياده وفوسّ الفصل
خلطوا اليخنّى بالهامبورجر .. رضعوا العصر بلبن الأصل
واللى ماهوش عاجبه يهّونا .. وح يوصل له جواب الفصل!



الأخلاقية الى هيته فى الوكسة النسوية

المومس مابقتش الست النايمة فى سرير الأعراب ولا الفسالة الى
بيبادلها ف ليل الفقر الطلبة العزّاب ولا هيّه الواقفة على ناصية بتحلم
بمفلّس يعزمها على ربيع كباب ..

ولا شايبه بتحلم باللى يفكر جسمها إنه لسه شباب ..

التصنيف دا قديم.. رجعى كان على أيام القرش الأبيض.. واللمبة الجاز
والفرن المتلفط بهبابه.. أيام الساقية وعود الكبريت وأغانى عبد الوهّاب..
الزمن اتغير واختلّت أحاسيسه.. وبنفسه عدلّ نوايمه وبدل معنى
مواميسه، فى الواقع.. وف قواميسه الراجل نفسه ماعادش يعيبه غير
كيسه، لا قلة تسييسه ولا اتكسكيسه ولا عاد هم رجولته تبريم لاشناب
ربك بيسبب لاسباب

ويا محالها القعدة على القهوة تمزمز فى الشيشه وتمز بلحم الوطن
المسكين أو لحم الغاييين م الأصحاب !

الزمن اتغير واتقدم.. واتغيرت الأسباب بالأسباب..

والمومس (٢٠٠٠) شفتها قاعدة على مكتب فخم، على بابها ساعى
وحارس مفتول الجته وضخم، بتوزع رضا أمن الدولة على الكتّاب..
شفتها فى الاحتفالية الكبرى لتوزيع الأسلاب.. شفتها فى اللجنة العليا
لتزييت الأبواب.. فى المؤتمر الدولى.. والبورصة وف لجنة تحضير
الشرق الأوسط منطقة خاليه من الثورة ومن الإرهاب ..

شفتها بتسأسأ ميه فى شفايف الوطن المغمى عليه عطشان.. بتعشم
بالحرية العجزة والنسوان.. وتقسّم شيك السوق المشتركه وكشوف
البركة على الغلمان.. وتزور أذونات الحركة وشيكات الصرف فى لجان
كل الأحزاب ..

شفتها بعينيّه اللي ح ياكلهم دود الحقد وجمر الغيرة، فنانه قديرة
ومديرة وسفيرة بعد الظهر وطول الليل كماريرة لباشا من عصر
الانترنت، عديم الإنجاب.. والصبح غفيرة.. على مخزن كانتو القيم
العيرة.. وسكرتيرة.. بترتب مواعيده رئيس التحرير الكداب متحجيه
مش يتسلّم على أغراب ..

يا سبحانه مغير لاحوال وكافينا شر الغرض البطال.. شفتها بعينيّه
اللى أكلها تراب الأضابير، قاعدة ف صالة التحرير بتنم تدرش فى
كافة مالا يهم الغير، وتكتب تقارير فى السر لكافة من بيهمه الأمر..
ضد الشعر وضد الفن وتخطب من أجل حقوق الناس.. بحماس البنت
البكر وتدعو للإضراب ..

إيه يا عصر الكتبه الكتاب والأنبيا الأغبيا الكذبة.. والرجاله اللي
بتدارى انوثتها الطبيعية ورا صلعة أو صنعة أو تكشيرة أنياب ..

ملعون ابو أم قصيدة الشعر الناعمة.. والفتة النايمة والطيبة العيبة
اللى تخلقى البنى آدم يا جرذ يا دحلاب.. يتعلّم هز الديل على كبر
السن، فاكر إن الغابه الفاغه بتليل بالمواويل والزحمة هوجة خيل
وصهيل.. فتنام أودانه مرتاحه.. على الجنب اللي مرتحها.. والساحه
بتشغى بطول الليل.. سحالييل وكلاب !

واكتشفت فجأة انها فكرة مجنونة ما تليقش على أدباتى سمعته
مضمونه..

فخلعت طرطورى وطلبت البورى.. وقعدت أشد واكتم نفسى وأنا من
الزعل بأنّ فى نفسى.. الملوّيه عليه ولا الحلزونة..

يا أبو دماغ نص لمونة.. كان عيبها إيه ؛لجنّونه؟
أيام ما كانت بتلاعبك.. على لقمه حاف مش مضمونة
وبالهوى تعصر قلبك.. على سكك مش مأمونة
وزى ما تحب تواعدك.. العشق ماكانش معونه
حتى الدموع كان بتمنها.. فى شبرا والامزغونه

ساعة تعاتبك أحزانها.. تبات بحبك مجنونة
دلوقتى ليه سنّه سنانها.. واقفه الغيلان فى البلكونة
والضفدعة سايقه المركب.. والفار قرض عقد الشونه
يا ترى البلاد جف لبنها.. من كتر خرابيش الشومة
ورخص من الذل تمنها.. والّا العقول فيها عفونه!



آخر التاريخ آخرة صبرى

العدو ماجاناش خوانة، من زمان عايش معانا .. عيني عينك ..
مشاركنا ضلّة التوته، لىالى القمره، غيط البلهارسيا ونور الفوانيس لنا
ف ألعاب صباننا .. حقنوه لى تحت جلدى الطفل ويا مشرط الجدرى
اللى عمدأ بيه بلانا ..

ياما ساهرنا ف لىالى السيرة سايرنا ف طوابير المدارس .. شفته
بيخلق فى عيني من شبايك خالتى يوم جدى قبل حكم المهانة ..
فى اغتياالات السجون الزنزانات الأولى والهجرة إلى خيام المنافى
واتفاقات الإعانه .. فى الأغانى والأناشيد البليدة الكذب بيانات
التصدى بالإدانة ..

فى دفاتر حرس الجامعة ومظاهرات الفتوات الجبانه .. فى خطابات
الجلوس ع العرش صناديق انتخابات القرى خطب التحدى لجل تبرير
الخيانه ..

العدو كان بعض حبر الشعر فُرش الرسم والألوان وفواتير الصيانة
والحصانة .. والتردى .. فى البحوث الزايفة عن أسباب عيوبنا .. فى
جرايم صمتنا رضانا بذنوبنا ..

فى المجالات والجرانين اللقيطة اللى بتحامى بحماس عن حقوق
الناس وعائشه على حليب السحت ومعونة عصابات التريص والتعدى ..
العدو بيخمش فى قلبى بقصايد ميتة ف وهم الحداثة بتسرق الأحلام
وتغرز خنجر الأوهام فى جنبى ..

فى الرغيف الحاف وف سينيى العجاف، سبعة زى ما قالت الحدوته

كانوا.. والا كانوا سبع تلاف.. شفته بعنيّه مهيب الطلعة فى زمن الهزيمة
بيبرم الأشناب معدى، تحت تاج الملك من كاهن وجندى.. تحت طربوش
الأفندى.. وعمّة الباشا والى خليفة الممالك..

وف لُجان ائتلاف أحزاب مجالس حسرة الأمة، اللى لا جابت ولا
كانت ح تدّى..

فى قلقنا كل ما نحس إختلاف أو يصيينا الشك فى المأمون فترهن
حلمنا العادى البسيط قهراً عشان طمس الخلاف.. رعب من كشف
الحجاب عن سر خيانات الأمانة..

العدو ماجاناش خوانة.. طول حياتى حسه بين جلدى وبين قطن
اللحاف.. غصب عنى بُخطرى كان راقد فى حضنى وجوّه دارى..

فى الشتا يشاركنى نارى فى الربيع ياكل خضارى.. يقاسمنى حصّتى فى
الزيت وفى الغاز والمجارى.. فى مواسم فرحتى وحزنى يواجبنى..

واما يستقوى يحاسبنى ع اللبن رضعته لابنى.. ويسنّ لى قوانين
حصارى.. ويشاركنى تراث ميراث الوهم تاريخى الحضارى.. من كرم
أفضاله ييست شجرة الابداع يمينى أو يسارى.. يا مرارى..

فيرسُه الايدزى بيسرى من زمان فى عروق دمانا..

العدو ماجاناش خوانة.. ماكانتشى صدفه بيفاجئنا غدر يلف طوقه
على قفانا. العدو من أول الحدوده كان بيدق على أوتار غرايزنا وهوانا.
منذ أيام الفتوحات كان يبراقبنى..

منذ خيبر وبنى قتيقاع لزحف حجاقل الطالبان وفرسان البقاع،
وفوايد حلت البركه، مصالح إمّتى المشتركة، ياخذنى على كفوف راحة

الدولار يجيبينى..

من شاشات الرقص فى النيل سات لشرع الجات ومانشيتات جرايد
إعلانات النفط حتى ومن قصايد الفصحى والعامية.. على خيبتى
يعاتبنى وعلى العقل يعاقبى، قصده فى مقتل خفيف الدم والآلام
يصيبينى.. ندخل القرن الجديد بالهم وقديم الجهل، مكسورين حزانى ..
العدو ماجاناش خوانة.. شيخى فى الكتاب زمان حذرنى منه وخذ
جرايته من خروفه.. وعلى لوح اردواز البسط قرأنى حروفه.. والجُباه
بعد الجباه والولاه بعد الولاه ... فطمونى جيل ورا جيل على خوفهم
أشب أسير لخوفه.

ينقصف قلمى اتوه من نفسى أشوف بكره ف ميعاده، منذ صاحب
الحسبة مصمص عضمى شرب دمي.. وجهز من جهاز أُمى عتاده.. ريا
لحم كتافه من خير ريفى ومواسم حصاده..
صاحب العزه وقائد ثورة الأحرار وملهم هذه الأمة يصفّرنى..
أهون.. واصفر قصاده..

صاحب العصمة زعيم الشعب فى إخلاص قطم وسطى عشان..
يكبر بيرطع فى غيطان ضعفى ولاده.. جوعى أحوجنى لعيش سحت
الخنوع فرضيت وداده..

جهلى من فقرى حرمنى احتمالات الطلوع.. فعملت، وبكىفى مراده..
زايدة أحمالى ولكن علتى جمالى عودنى على قبول الإهانة..

العدو ماجاناش خوانة.. وليس من مجرم سواك يا سيدى الحاكم
بأمر الله من البحر المحيط حتى الأبد - أبدا - سوانا.. عشت من
خمسین سنة ألف تعاقبى.. وعلى سلسال هزايمك وتكاليف انتصار

حفلات هزايك.. بتحاسبني ..

وأنا لوحدي اللي متعلق من العرقوب بتلعب بي على الحبلين معاه..
بين جحيم كرهى وجنات النعيم بساتين هواه.. عمر بتصيف فى كان
وتشتى فى أسوان معاه.. تحشى نافوخ الخلايق والشعوب الحره
بسفاسف غناه.. تتفق وياه.. واذا قبلت اتفاقك حتى من باب المجاملة
بتعاتبني ..

تملى بطنك صيفى بطيخ من بواقى سموم عشاءه.. واذا اتشهيته حبا
فيك.. على موتى تعاقبنى.. توهبه أرضى وعلى القشه تحاسبني.. وكل
ماتهرب من العركه تحاربني.. اذ هزيمتى عمرها الحلم الجدير عندك
بكل الانتباه.. واللى منذ الوعد حق وكذب كانت مبتغاه ..

اتحالفت معاه عليه.. فى العلوم.. فى الفن.. وف سيما الرعاة..
اتقاسمتوا نسبة السمسمار فى سوق غزه وعوايد المنطقة الحرة ومذبحة
المظلات والمشاه.. وف مصاريف الضيافة.. وفروق عمله فى بنوك
الصرافة..

وحقوق السمسمرة الكبرى ف تصاريف الحياه.. فى عشا القمه اللي
طول عمره بقله ذمه مسروق من عشاننا ..

العدو ماجاناش خوانه.. وليس من مجرم سواك يا سيدى الكابس
على نفس الجماهير الفقيرة الملهمة الحلوه - سوانا ..

فاعطنى منديل أمانك واهف عن جهلى وعنى.. ولوجه الله سيادتك
خدها منى.. زى لبن الأم صافيه صريحه وافيه.. خدها منى نصيحه لو
ح تجيب لى كافيه.. أو فضيحة..

امتى حرسك يا فريد عصرك حمانى.. والأغص الطرف عنى.. ياما
دست ف قسوه بيه قلبى على كل الحواجز.. رهن باللون والهوية..
والجوايز.. فى السجون اغتالنى عذبنى على ايديك العفيه.. مره على
حس القضية.. وألف مره كذب لحساب العداله الإنسانية.. وانت فى
الحالتين بعطف جناحه فايز.. تخسره وتطلع كسبته تكسبه يبيعك سكرتو..
وعلى اجناب السلوك الشايكه ياما سكرتو من عرقى ودمى.. وكل ما
فوقتا الثوانى شربتوا تانى.. وسوا وف غاية الفوقان بخمر الإستكانة..
إتبادلوا النخب بدلتوا الخرايط.. حسب ما أمرت شريعة الغصب
والاذعان وقانون لاستهانه ..

العدو ماجاناش خيانه.. وانت عارف سيدي وماكفيتتى أمره أو
حميتتى مره واحده.. من شروره.. إنت بيه عليت مراتبك.. وانا بيك
غرفت مراكبى.. فى بحوره.. وكل ما تكبر مواكبك.. يصغر الحق اللى
ليه فى حضوره.. بيتدى يعذبنى ذنبى.. اقوم بواجبى.. انت فى اخلاص
وعشق تقوم بدوره.. أرتضى وارضى بهوانك.. أنسلخ من جلدى ابقى
هجين فى بلدى..

نص فلاح أمى فى بدلة أفندى.. نص عرى.. نص قبطى.. نص
افريقى لاوندى.. مالى فى حسابك ولا حسابهم مكانه.. خدعه من عهد
الهاجاناه.. للهجاناه ..

يوم سوا ضحكتم عليه.. ويكيتونى.. واتفقتوا باسم سوق العوله ح
تبكتونى.. كعب داير دين ودنيا وتكبتونى.. تسرقوا آخر خيالاتى
وجنونى.. عزتى فقرى.. وشعرى وتقتلوا السحر ف فتونى.. شبر شبر
وتاكلوا أرضى.. استيطان داخلى وخارجى.. كافة الشطآن سياحه..

حته حته تغلبونى.. جته جته سلبتوا أرضى وعليتونى.. وصلبتونى
على نخل الإباحة - غميتونى.. وسرقتوا نور عيونى.. وغميتونى حمرى
جمرى كلتوا زى العتة عمرى، وحبل صبرى وعريتونى وعلى الجنبيين بنار
الغل والعار سويتونى..

ومن بواقى ورقة التوت اللى سترت أمنا حوا وآدم عريتونى واستويتم
فوق عروشكم شلّيتونى كل من هابب ودابب له فى لحمى نصيب ونايب،
يعملوا ليكم كرامه ويشلّتونى.. وانتو ولا عز الحبايب.. نطقكو يربرب
كروشكم، قحطوا ينعم جيوشكم ومدفعه المحشى بقروشكم يدك فوق
راسى التواريخ القديمة - قلعتى آخر حصونى..

وانتو م الأول - من الأول كما انتم، زى طول العمر كنتم، علّه وعواله
وحاله فريده من صهين لأشكم. جيبتوا قدامنا ورانا وما نكرتم.. إنتو
همه.. همه انتم. خيمه والا سرايه كتاب أو جراية.. صقر منتوف ريشه
أو حدايه.. سيف على الرايه أو ع العملة والجدران رسمتم، افّ ستاشر
وميج وميراج وفانتوم..

اخوه واوولاد عم كنتك من زمان للآن.. ودمتم.. فى كتافى المهدودين
بالامثال.. وحيطانى المهدومين بالاختيال.. بلهارسيا والا عسكر..
السلام زى القتال.. انقلاب زى انتخاب زى اغتيال.. كل شىء سهل
ومحال مادام ركبتم.. تثبتوا وتاخذوا راحتكم ..

وعلى الآخر لآخر العمر راحة بال.. نعمتم وانا عبر التاريخ رب
التحمل وإله الاحتمال.. منذ قسّمتونى ما بينكم قسمتم كل احلامنا
ومصمصتم عضامنا وما شبعتم..

حتى قعر الحله لما حلبتوا ليل خوفنا وجوعنا، وعجنتم كحكة الصلح

بدموعنا وختمتم يوم ركوعنا صك مواجعنا بدمانا حرام
حلال..

وفق ما قالت خرايطكم خرايطهم سوا.. تستوطنوني.. تملكونى من
لباليب التاريخ تملكونى.. حكمة الجغرافيا صحه وعافيه من معبد
لحانه، ليس من مجرم سواك.. يا سيدى المهزوم سوانا ..

كل ما تغالطنى تغلط.. وانا اتلخبط فى لغز سلامة النية واصدق،
ادعى رب وخادم الكعبه عشان بعض الهداية للى ضاقت به المضايق
واللى معدوم المدارك.. يعفو عنى مره ما ابقاش جثه للغريان.. حطب
بالزوفه والمجان عشان وهم المعارك.. فى وطن أصبح له فى البورصة
معادل أو معامل.. يوطى يعلا ويا سعر عمله والسندات وخسران
الفيبارك..

فى المزاد معروض ما بين هالك ومالك.. طالعه فيه نازله مناشير
المهالك.. من كوينهاجن لأوسلو لطابا دى.. فرقوه بين الممالك ..
وانتو فوق القمه زى ماكنتو بالذمه الهلمه، يطرودك من جنة المعونات
مهارشه أو مناغشه.. تطلع الشومه الغشيمه بدون مناقشه تضرب
المربوط يكن الشارد النمرود يبارك.

عقل هذى الأمة فى كفك أمانه صار لبانة، وبعض من شعر الإدانة
وبعض من فكر الحصافه يزيد سيادتكم حصانه وجلالتكم مكانه..

طيبتو يا مولاي ودومت، الملوك الأقدمين حسدوا هيبتكم والجمال لا
يخفى عن فطنتكو تحت الخيبه بارك.. كلنا رايحين قريب فى
الكازوزه.. إلا انتم.. كلما اتعصبتو.. عيبتم.. كل ما يشتد فى الساحة
الهرج ع الحق صهيتم ونتمتم، الكلام يحلا ويعلو أما قلتتم..

قولوا ما بدالكُم واحنا كلنا سميعه طول اليوم ودان.. السلام حق
لسيادتكم تمام اذ ليه حاريتم يوم ماحل الجوع شبعتم، فى الطوفان على
كدبه عومتكم، واما كان الموت هريتكم.. فاكتبوا الأشعار فقد طال انتظار
الذبح يا شعراها وابكم ..

لسه ياما تحت جلد الخلق دم.. لسه فى عيون الأرامل واليتامى فيه
دموع، لسه فيه خلف الجثث صمت وخشوع.. الصحارى أدمنت طعم
الضحايا والخضوع..

مش كفاية تخرجوا يا شعرا من أسر المراية مش كفاية.. تدبوا سن
اقلامكو فى بركة دمايا. مش كفاية تعكروا بحر الأكاذيب القديمة
والجديدة.. مش كفاية.. لسه ياما فى الحكاية.. لسه ياما عنعنات
قادرة على وزن القصايد بانتصار وعلى عقد الرواية بالانتحار.. إحنا
خدنا الريح فى بحر العصر دوخنا فاتلبخنا.. بالجراية والسقاية
وحماية البيت كإنا لسه فى بدء البداية..

آدى عبد القحط فوق النفط عايم، والجهول الشحط والمحط الهبول
ع العرش دايم، وعديم الحس والأريحية تايه فى بحور غسل الزعامة
ولسه نايم..

والشماشرجى الحلنجى.. فارش السجادة جوه الخيمة مترهين
وعامل نص صايم، إلا عن كامل نصيبه من المعونه وم الغنايم.. واحنا
خلفه نصلى أحفاد القبيلة للنهاية.. ندفن الجثث النبيلة والعويلة ..

إحنا أبطال الحواديت القتيلة.. راجعه أحلامنا لعصافير الأسباطير
الهزيلة.. الغزاله شعشت فىنا التقاليد البديلة.. النداله - للنجاه خير
الوسيلة ودناوة النفس - حيلة حجة ما بين الحياه والموت لتبرير
الخيانة.. العدو ماجاناش خوانة ..

فَاعْقِلِيهَا وَزَغْرَطِي يَا لَلِي مَعَانَا .. مَزْعَى شَال الصبَا وَتَوْبِ الحَصَانَةِ،
إِلْسَى تَوْبِ الكَهَانَةِ، وَاسْأَلِي اخْتِكَ قَوْلِي لَهَا يَا لِيَانَهُ .. لَسَهُ لِينَا يَا اخْتِي
تَحْتَ الشَّمْسِ فِي حَسَابِهِمْ مَكَانَهُ ٩ ..

وَمَكَانٌ أَوْسَعُ وَأَعْرَأُ ١١١١ ض ٩ بَايْنَهُ لَبْتَهَا وَعَلَى كَافَةِ شَاشَاتِ الضَّادِ
خِلَاصٌ .. إِنْطَلَقَ قَمَرُ النِّهَايَةِ مِ المحيطِ حَتَّى الخَلِيجِ كُلِّ الشَّاشَاتِ أَبْيَضُ
فِي أَيْلِ ١١١١ ض. وَالزَّعِيمُ لَوْ بَيْتُهُ أَبْيَضُ قَلْبُهُ أَيْلِ ١١١١ ض. .. مِنْذُ يَوْمِ
خَدْنَا لَشَطِّ البَحْرِ عَطَشْنَا سَنِينَ المَرُوفِ حَنِيه رَجَعْنَا وَشَبَعْنَا مَوَاجِعُ ..
أَلْفَ وَجْهِ وَوَجْهِ شَايِفُهُ بَعِينِي رَاجِعُ .. لَجْلٍ يَجْعَلُ قَدْسَكُمْ صَبْرًا
وَيَغْدَادَكُمْ شَاتِيلاً .. حَسَبَ مَا بَتَقْبَلُ تَقَالِيدَ الجُدُودِ شَرَعَ القَبِيلَةِ .. فِي
حَوَادِثِ الهَزَائِمِ يَلْفَى فِي مَوْتِنَا الحُدُودِ .. وَيَكُلُ حِيلُهُ يَحَاصِرُنَا بِالجَرَائِدِ
وَالْجَنُودِ .. لَجْلٍ تَتَفَرَّقُ مَا بَيْنَاتِ الدُّوَلِ وَتَضِيعُ دِمَانَا .. يَوْمَ (قَنَا) .. تَصْبِحُ
بِفَضْلِهِ وَعَدْلِهِ (قَنَا) .. !!

سَيِّدِي الْفَاخِرُ لَكَ الْعَفْوُ الْجَمِيلُ وَالصَّفْحُ مِنْكَ .. خَلَى عَنْ قَلْبِكَ
وَعَنْكَ .. لَيْسَ مِنْ مُجْرِمٍ سِوَاكَ .. يَا سَيِّدِي الْفَاجِرُ - سَوَانَا !!
لِذَا ظَبَّطْتَ نَفْسِي بِنَفْسِي .. مِنْ أَجْلِ عِ الأَرْغُولِ .. أَقُولُ :

أَنَا خَائِفٌ أَكْفُرُ بِالْإِنْسَانِ .. الَّتِي عَشَقْتُهُ بِعَبْلِهِ زَمَانِ
أَيَّامٍ مَا كَانَ فَلَاحَ الرِّيفِ .. وَابْنِ الْبَلَدِ عَتْرَهُ وَجَدْعَانِ
أَنَا ابْتَدَيْتُ أَنْسَى مَلَامَحَهُ .. مَا فَرَقَشَ حَزْنُهُ مِنْ فَرَحِهِ
بِلَابِلِهِ قَتَلْتَهَا جَوَارِحَهُ .. وَالْعَلَّةُ شَرَخْتُ فِي الْوُجْدَانِ

الماضى عَت على الحاضر.. طلعت له خرايش وضوافر
الفهلوى غلب الشاطر.. والنورى بقى ريس جرنان
وسوا أنت راكب أو ماشى.. شاعر فقير أو امباشى
وزير غفير تورجى فاشى.. تباع نفر أو عضو لجان
صورتك ماهيش طالعه برسمك.. الكل ساركك يامقاسمك
يكروهك حتى ف اسمك.. رجاله لها طبع النسوان
الكذب بقى شرف الكداب.. لحد ما صار الدحلاب
أمين على كل الأحزاب.. والوفد دخلوه الإخوان
ميتين جريدة ومجلة.. بيلحسوا ف قعر الحلة
صبيان عوالم - على قلّه.. يتخانقوا والنيل كان مليان
شاشات إذاعة ميت موجه.. خلق جهولة ومعووجة
دكاتره بتصنع نوجه.. وتبيع سموم تشفى العيان
الجامعة مابقتش الجامعة.. طرشة وعاملة أنها سامعة
بترمى ع الدرجة السابعة.. علماء فى ألعاب الكونكان
الغولة تحكى لنا الحواديت.. وتمضع الأطفال كتناكيت
تفكرك لو مرة نسيت.. بذلتك لأبو القردان
بقى الوطن محض مساحة.. لا دار ولا حوش ولا ساحة
كلّه صالات رقص سياحة.. وشيوخ تتاجر فى الخرفان

وكل شعب.. بحكامه.. شبه اللى مظلوم ظلّامه
واللى انقطع عزّم قيامه.. مالهش ينفخ لو طهقان
ضعف الخرع خلق الجبار.. طفى فى عقله النور والنار
ويرقصه بطبله ومزمار.. يرجعه م النيل عطشان
احترت فيكم وف امرى.. على آخرة العمر الفقري
بدأت اشمكو ف شعري.. وانتو اللى كنتم ليّه زمان
درع الحماية ف ليل الخوف.. سندی الأكيد فى أى ظروف
فين روحتوا؟ والا عدت الشوف.. والا انقرض جنس الإنسان؟



صنع الله فى الزنزانة

المنظر خارجى..

على ضل باهت من بواقى نهار قاهرى بلا طعم ولا ألوان. زهرة البستان، قهوة بلدى ما يعرفش طريقها اولاد البلد ومشهورة جداً فى بلاد الفرنسيس والفرنجه واولاد العم..

والإسم على غير مسمى.. وهى عادة مصرية من قديم الزمان زى ما تلاقى اللى اسمه حسام فى العادة ولد خريان أو تلاقى اللى اسمه معروف حتى هو نفسه بوجوده مش دريان.. ومصطفى منبوذ من أمه وابوه وميت حلاوة بلد تقرف كلاب السكك..

لكن كل ده مش مهم.. ودى عادة مصرية برضة.. المهم ان الجو كان عادى ..

بكل ما يميز أواخر النهار فى وسط البلد.. وخصوصاً مثلث الرعب الثقافى – الواقع ما بين لوكاندة الاوديون ومطعم البيرة فى الجريون.. والمستقع وما بينهم الأتيليه وحزب التجمع – ملتقى الأعداء والأحباب من الكتاب والكتبه وبياعين الكتب ولصوصها.. وبياعين الكلام وبتوع جرايد النفط وما إلى ذلك ..

على الرصيف والكراسى مترصصة الغريان، من حدادى وجوارح وديابه وسطهم بعض من مخبرين بعض اللجان الثقافية أو مندوبين بعض النجوم الثقافية والفنية.. على شوية شعراء غلبة ..

وبعض الأدباء الشبان المحبطين الوجدان من فراكة هرس الزمان فى بنى الإنسان.. وكذلك بعض معتادى الكتابة من فترة زمان الونسه

والأنس والاتحاد الاشتراكي العربي ..

زهزه حجرع الشيثة جاب دخان ..

سخت الطاسه حبتين، عليت حبه حبه بحّة الأصوات في كريشندو
مش محسوب، مزوا بسيرة البنات الكاتبات وحرشوا المعده الفاضيه
بحكايات العجز والنسوان ..

مزيكه تيتّر البداية.. في إيقاع رتيب يليق بعصر الكآبة وقلة
الحيله..

واحد قال فجأة..

. صنع الله سرق رواية الراجل الغلبان يا اولاد.. يا نهار مطين
والأكادة انه اعترف آه.. شرف.. ومستعد يعوض الراجل قال ..

- ويحط اسمه على العنوان ..

- طبعاً والنص بالنص ..

- قصدك النص بالنص.. هاها ..

- يا عم ما تهزرش قول كلام غير ده ..

- والله ما انت فاهم حاجه.. ماكله من ده ..

- هو فيه حد بيألف ..

- يا عم وانت الصادق.. ده حصل ومالك عليه يمين ..

- ولا يسار.. ها.. ها ..

- هو بنفسه قال إنه مش عارف عمل كده ليه ..

- يا عم روّق كلهم حرامية.. مش فاكّر الحرافيش واللص والكلاب..

والاشقة الحرية ..

- لأ.. يا اخوانا بلاش خلط.. دى غير دى ..

- السرقة غير التناص.. غير التشابه غير التماس غير الاقتباس..
دى.. بقى الحافر على الحافر كل سطر بسطرة.. القسم والتحقيق
وعرييه المساجين ودورة الميه والخرا والبرشام والمحكمة والشاويشيه
لأ.. لأه.. ما تقوليش.. أنا شفته بعينه ..

- شفته وهو بينقل .. ؟

- لأ.. شفت الكلام وقارنته ..

واتمددت جثة صنع الله عَ الطاولة عريانه.. مسكين لا حول الله..
بك الدم اللى فى عروقه على هدومهم وما بين أسنانهم.
مخبر راح حادف جمرة قد الشجرة ف قلب النار ولعها.. صهرجها..
وأديب برئ الملامح.. طيب المحتد قال فى صوت محتد ..
- دى بقت حاجة مقرفة.. ولا بد من موقف..

كركر خبير البصمات بالجوزه وقال كلام تفهمه لوعزت تفهم..
وماتقهموش أحسن.

- السن لها ارهاصات متعبة - السن المتأخرة.. ولا بد انه يا شاخ أو
عقله اختل ..

- يا ابنى والمصبيه أن الكهين الفيطانى كان مدبرها

- ده شغل كبير بقى ؟

- شغل دوله ومؤسسات.. إحنا مالنا ..

- لأ بقى كل ده عشان عبد المجيد فاز بالجائزة ومرفضهاش..

وميرال اتعملت لها ندوه فى الهناجر عسل.. ماينامش.. ده واد أنانى
بيكره حتى نفسه ..

ودب واحد صباعه ف ن عین الحقیقة وقال ..

- یا اخوانا بكل صراحة.. الحال مابقاش ينسكت عليها.. دى مهزله
وانهيار وقباحه.. لازم ناخذ موقف.. و

ومد ايده استقرب الملاحه.. رش شويه فلفل وشطه على ساندوتش
الطعميه والتانى.. حط الكوبايه بعد مالغ واتكرع.. وقال ..

- دى مرحلة بالتأكيد بيمر بيها الكاتب المرتاح.. لما يبقى من السياح..
رايح جاى من مؤتمر لاجتماع لندوه ..

- لبيزنس !

- يقلق لما بيتدى بيدع.. يتعب ..

وقال فى وقار الخبير اللى بيقرا تمللى بالأفرنجى وعنده إطلاع

- طول عمرى أقول ان القرايه لدول ضياع للوقت لأن كله ينقل عن
أصول أجنبيه ..

- بس الراجل بتاع الزنزانه ده عمره ما راح شبرا ..

- كله على كلّه ومن كله واكل.. والواد ده بالذات طالع فيها.. وعمره
ما نزل لى من زور قط.. ولا بلغت شغله.. ولا حتى قرئت له.. مغرور
وعامل نفسه سوارس والاثورن كروفت..

ودور الشوكه فى الجرح لهف حته موزه.. وخذ نفس م الجوزه وقال
وهو بيمعن الدخان :

- فعلاً.. أنا رفضت أقرا له ..

ساذج من الشباب لما سمعها ماصدقش اودانه لكن لما أعادها
خرمتها فسأله مندهشاً :

- ولا الروايه الأخيرة دى ؟ ..

قال بقلاطه وهو بيتمتاً ويتف الى ما بين أسنانه

- واقراها ليه ؟ ما انا عارف هو بيكتب ايه ؟

وأكيد مسروقه وحيقع الأصل ف ايدى بالتاكيد ..

- ع الأصل دور

وضحك الكل بدون نفس لكن قالوا :

- كنا ح نقولها قرا ما قرا كله خرا ..

- كرياج ورا ..

- يا ابنى لا تقرا ولا تكتب.. لكن قول كلمتك ما دمت شايف الحق ..

لاحول الله ..

كل الأسنان انسنت فجأة.. والغل اتمخطر على وش الجرنان الى
فتحوه يتسلوا.. والا يحلو ..

اكتف صنع الله على المديح.. وشمر دراعاته وقلمه السيد عبد الله
امام.. بقى له زمان محروم يدبج.. بعد زوال النعمه أو صعوبتها.. ولكن
فرصه ح ترضى المولى سلطان العصر الماضى والمستقبل والقطب
الواحد يمكن تفلح فى لفت أنظار المريدين.

لا حول الله يا صنع الله ..

أحفاد الحزب الأزلى الواحد.. قرررو إنك مش من صنع الله.. الى
عرفناه.. واللى اتسمعنا فى الغريه خطاه.. واتونسنا بأحلامه الابسط

من أحلام الأطفال ..

يا خلق الله ..

خارج من جحر العلة.. نمل الإنه والقلة.. اللي دمانا لسه على قرون
استشعارهم نقش الحنه ..

صنع الوسواس الشيطان والجنه ..
الى بتلفوش ع الاحساس ..

لجل ما ياكل الناس.. الناس.. واللى من صنع معسكر تجهيز العسكر
على صورة أدباء فى تياب مدنيّه أو العكس ..
وأهالى ف صورة حراس والعكس ..

لجل ما يتحكم بعض الناس فى الناس ويتسلط قله من الناس ع
الناس ..

الدليل طلع فى الراس.. والعمه تصبح لخراب الذمة مداس. والكلمة
تعد ف عصر الحرية على الأدباء والناس الأنفاس ..

والأرض اللي اتخلقت روحها من سن الفاس تبقى على عينك يا تاجر
رهن لقرش وقلب نحاس.. ويجزمة كل عويل وعميل، المبدع اللي
ماقرفش لحد الموت واتوقف.. ينداس ..

آه.. ده مش صنع الله.. يا شاويش عبد الله.. ده صنع الماضى اللي
فرّع فى طين القبّه ودماع القاضى. وزهر فى الأوردى على إيد السفاح
رشدى ..

وغايظنا عشان كافى خيره شره إلا ساعة الإبداع ومازال بيقول..
رغم الخرّس اللي مفجر روس مصر كلام فى كلام مالوش صوت ولا

معنى.. وعامل غاغه ف غاية الإجرام.. فتجيبو دماغه الأرض، صنع
الله - النيل.. والمواويل.. صحه وعافيه وطمى وفيضان ونخيل.. قبل ما
يتلوت يا صاحب الفضل ويبقى بخيل وقليل الحيل ..

غرقان فى شبر الكدبه أم ميتين ديل ..

لا حول الله.. م الغول إياه ..

الشعر على القهوة اتدهول.. بين الكدبه وبين الشهوة، بيلف ف ورق
البفره قصايد تكريم الأنجاس ..

وبيهرى ف كبد وغيبة أحلا الناس ..

العهد ما بقتش على الراوى ..

العهد ف دفتر تسليم العقل لأسباب الجهل السهل، للأمية.. لرضا
الحجاب والحراس والحرامية.. تلاميذ التدريب المهنى فى أنابيب
الأجهزة وف دهاليز النقابات العاجزة والأحزاب العيرة.. وثقافة الدى
على اللودان.. وجنون الغيره.. لا حول الله ..

قاطع فيه عتاب الإنسان الغلبان ..

لكنى بقصد.. ح اسيح دم العرق الحساس.. واسأل والخنجر فى
ضلوعى.. وشموعى.. بتطفئها دموعى.. إيه الحدوته يا بتوع البستان؟..
كل اللى طبل طينه.. وعجز عن أيها طرح إلا المر وغير الملح.. وقادر
لجل يزود فوق الطبلية سم منابئه، يسمح قلبه بكل بساطة بدون ما
يتقصى ولا يفكر للكذب وداه وجابه.. فيشيخ على اصحابه.. ويهين
شيخوخه أبوه بشبابه.. ويفتل حبل الكدبه على رقبة أخوه.. علشان
يتبروز فى إطار مكسور، ويسلم صنع الله للشيطان.. ولحكمة التفتيش

الهبلة اللى ما بتفرقش معاها .. ليلى من عبلة ..
فازعق يا لسان الجهل وزيط .. واتسنّى يا سكينه النّم يا تلمه على
أقرب حيط .. قطى من اللحم الحى قطيط ..
من أجل اولاد الهرمه ماتلاقى فرصة تتشفى وتزيط وتحل الفتوى
لزعيط ومعيط ..
لكن رغم ده كله .. دق طرمبيط الكدبة ح يطلع فى الآخر طيط ..
وح يفضل صنع الله .. كافى شره بخيره .. وشارى دماغه بإبداعه ..
وح يكتب من غير ما يخريش بضوافره رقبة غيره !!
ولقيتني باكبس طرطورى على عينيه ما اشوفش الناس .. وناديت
دوزان الصبا من كتر زعلى يئست .. لولاه عليه الناي .. لكنت خرسست !

إيه كان رمانى على الغابات وأنا فلاح
ماليش خرابيش ولا أنياب أمان وسلاح
ولا عمى تعلب ولا خالى البعيد تمساح
انا يا دويك صبى رمى حملة ع الفتاح
باحبى يا دويك على شط البدع ملاح
باترجى ألقى لقلمى نص شبر براح
ليه لما غنيت لها من قلبى عقرونى
هبت نمورها فى وشى وعضنى دياها
وأنا كنت راسمها فى بالى مشاتل قل
نحبنى على حجرها بالحضن تاخذ الكل

حنان وخضره وأمل من غير زعل ولا ذل
إيش لون زهورها تفتح كل صبح يطل
وخيرها يوصل مشارقها لمغاريها
يا اسيدنا إيه كان جرى فى الدنيا شقلبيها
سارحه الديدان غولت تقحت سراديبها
والسوس نخر فى الشجر خرم مراكيها
لأفئال بكيفها تتخ لقرد يركبها
والنمرع الحبل ماشى يسلى أرنبيها
واللى وعى أو فهم ايه سر مصاييها
راح اشتغل ماشطة عند اللى معيبيها
بيلحن الدحليه خوف م اللى دحليها
وحلل السرقة للص اللى غاصبها
أنا كنت فاكر اجابه لشكوتى عنده
هذا الذى كان ولد.. لا قبله ولا بعده
وكانت له زعقه ولا طرزان يشيبيها
أتاريه صبح بهلوان يوم نال رضا سعدُه
وبقى له فى المهرجان أرزاق يقلبها
من خيبتى قلت الزعل ماعدش يجى منه
الفن صار سفسطه.. كله ف غنى عنه
والشعر بقى همبكه غنوه.. كمنننه

دبحوا فنون الأدب واتشطفوا بدمه
وايه ح يبقى إذا القلب اختلف ظنه
والمضحكات أصبحت مش من عجايها
نامت (نواطيرُها) هاصت تعالبيها
وتيرانها من قهرها ورمت محالبيها
حتى حمير السباخ طلعت مخالبيها
وف ليلها هاج القلط برمت شواربيها
وفراخها سهرت تغنى البُرده لكلابيها
صار حقها اللبوه تتباهى بمعايبيها
ترقص الكل على كيفها فى ملعبها
مادام فسيخ البصل صنعوا غسل منه
السبع لو شخَّ بركه.. الكل يشربها !



آخر حدود الزجل

إنت فين يا مبدع اللحن القديم
ليه رقصت نخاسة فى سيرك السياسة
كنت حاصرني على صراط مستقيم
وأنت متوضّي من إبريق النجاسة

بزيوز

من كتر تأميزُهُ.. عَرَى الهوا .. ط ..
هريوا تلاميذه.. من سجن أراييزه
رمى الكتاب واكتفى.. بالوش يصبح قفا
يوم الشهادة اختفى.. وغرق فى لزاليزه
لا حوجة بتحزُّنه.. ولا هوجة بتغيظه
عجينة قَطْ ويرد.. ما خَمَرش لخبيزه
مصمص عضام الوطن وشرق ببهريزه..
ما فانش غيره اللبش تجرحنا بزاييزه!!



أراجوز أول

أنا شاعر وشجيع فى السِّمَا .. قرداتى.. أفكارى حكيمة
أراجوز من أصل سَتقراطى ... دماغى خارماه برّيمة
أنا عالم.. جاهل ومقاوح ... ما أعرفش الآتى من الرّايح
ياما ليّه مباحث وفضايح لو كُتبت ع الريح السارح
واتعبت راح تملا صفايح.... ترصّص أرفف بلا قيمة
أنا كاتب من صنّع الحالة من قصة سيناريو لمقالة
رقّصت المسرح فى الصالة ... لّيت الدلائير بالبالة
أصبحت زعيم علّة وعالة ... ومراتى على النسّوه زعيمة
أنا حارس على ورث ميراثى ... فهلوتى شطارتى على مقاسى

وبكل إرادتى وإحساسى ... ولّعت حماسى عشان ناسى
وطاطيت رضا راسى القلقاسى ... قلعت بكيف كيفى لباسى
فى حب صديقى التكساسى .. فضرينى ميت جزمة قديمة
أنا حاكم .. نص ديمقراطى ... رجّالتى من الصّنف الواطى
يمسحوا جوخ ليّه ولمراتى ... دولتى دوسيه تحت بطاطى
وعشانها بناضل وباهاتى ... يوماتى أواصل وليلاتى
من رحلة لحفلة لوليمة

أنا عربى؟.. جايزا!.. مش باين ... أنا مصرى؟ لأ .. أنا مُتباين
متبرمج للدين والدّايين ... باتفرنج لو عُزت أمان ...
أتمهّرج بين أوبرا وسيما

أنا عايش؟ ميت؟.. أنا كاين ... الموت من رعبى صبح هاتين
لميت الكداب ع الخاين ... نزرعها مبانى ومداين
خطتنا ومش عايزة زباين ... داحنا اللى خرّمتنا التخريمة
فى سوق متدنّى ومتمادى ... لو حبّه القبه .. ماهوش باين
لخبطها كمان فى كباين ... وخصمها من السعر العادى
عصفورى والسيد راضى ... وشربها أبو نيّة سليمة
دى سياسة على فهمك صعبة ... خلّطة من الغلطة التاريخية
محسوبة وملعوبة اللّعبة .. من يوم ما استعمرنا أوروبا
شوف أيام بيرم يا سيادى ... خرّيمة .. قبض حقه زيادى
درّبكة همبكة حادى بادى باللو .. جوّزنا حسّب اللّو لريما

هَرش

أنا شاعر وشجيع فى السَّيما
أهرش مخك.. أهرش جيبك
كل اللى ح تحتاجه حبيبك
واللى الكرسى مش بمقاسه
تلقى حماسه فضح انفاسه
لو فرأش الست قريك



كاتب زميلك

مش عايزك تنتخبني لو شاعر زميلك
ولا عايزك تنتخبني لو كاتب ميكروباص
تهتف للجمهوريه وتبوس رجل الملك
ويوم تلبد فى كرسى تضرينا بالمداس
مش عايزك تنتخبني صوتك ما يهمني
مرمطه فضحته ياما مرمفته فى التراب
نسيت شرف الكتابة ورضيت تكون شاويش
وما عادش معاك بتفرق الجزمة من الكتاب
يا خفيف العقل أصلا رغم الجسم السمين
وتخين العقل فاهم إن الأدب حظوظ
وإن الكتابة وحمّة والشعر.. يا محسنين
والفن أمن دولة.. لولاها.. كان يبوظ

مش عيب عليك يا راجل عصر الجوارى راح
قوم استحمى واغسل جَلْخَ الجلد القديم
وكفاية عَمَّر تحشى كرشك سحت وسفاح
يطفح على جلد وشك غضب المولى الكريم
وما دام البلية ماشية قصيدتك ع المقاس..



نجم مكشوف

بختى رمانى على ملقف بلانى الشعر
فى عصر صبح الشرف تهمة ومالوش سعر
والكلمة مهرة إذا شرقت بكذبة تموت
والقول حصانك.. لسانك ليه ما خباش سر؟



الخردة

فيه ميكروباص . آى نعم أيوة وفيه زميلك
شعراء وكتبه غفر سايرة وخدمة ليل
وفنانين كعب داير.. فيه وشاهد ملك
م السجن حظّه ضرب يصبح رئيس تحليل
أو نجم سيما إذاعة ع الشاشات سَلَّ سَلِك
يزوَّق الكذب ويروَّق عليه مواويل
دهن لنا . ٥ يونية سنسيتيك ميتالك
بفنون بارومة.. كلت مخ الوطن والنيل!!

خبراء

حب كريم فوق تورته صناعي
طعم ولون الكذب جماعي
ساعة الهبر الكل يزيحه
واتلهي فيه . أنا سهل خداعي!



الخيرة بيرة

يا معصّب .. يا دق الهون يا مقلّب رزقك ميت لون
من صحف النفط القومية لقضاء عرب التلفزيون
ومن الأحزاب السّرية لعريف بغداد المجنون
بتشوط الكورة أماراتي..... في شبكة ليبيا تجيب جون
تترقص ع الطبل الغري في ميدان سليمان والاولديون
أول ما بتحزق بالعري يسندك الهلف الحلزون
قصّدك ننسى الماضي الماسخ واللحم الحى المدفون
في تراب المحاريق والأوردي والقلعة وعزّب الفيوم
والفقر الجهل المتوارث وفضايح الجيش المهزوم
فتجدّد للزعما البيعة نفتل في الحبل المبروم
نفضل في الدائرة المجنونة الى رسمها لنا الفرعون
من يوم ما بلانا بالعسكر لبس لنا عمة (قلاوون)

خوِّفنا رعب من الغولة ودبحنا بسيف (بن جوريون)
وبلانا بشرائط الفقها وثقافه باطسطة ميت لون
ننخعها في دخان الشيشة نستبدل تفانين بفنون
نصبح انفارها ولا نسوى على قلبنا يركبوا لطالون
تيران الله في برسيمه من ساقيه دايرين لطاحون
إلا من كان مخبر سيما أو زيّك في المسرح بون
أو باشا يوماتي على الشاشة يفتى في الخط الهمايون
...

يا مثقف أصلك أومباشى طول عمرك شایل الجمالون
تدّى للمفاعيص القيمة وتعد المتاعيس للنوم
تملا للخلق البزاة وتعدّل مسارات الكون
وتعبّى العالم في قزاة تشريها في حوش (الجريون)!



ثقافة الخدامين

ثقافة الخدامين هاجمه بجرادلها
تنقع تاريخ الوطن في طشت هلاهيلها
تعصرها بعد الهزائم بالديون والههم
تنقل نافوخ البشر من رأسها لديلها
سيراميك وميلامين.. لكن مطفية قناديلها

والخدامين على كل لـون جاهزين
يسار إذا شئت وان لم شئت تبقى يمين
شايلين مقشّات ترش تقش وتتفّض
تحك وتأك تعجن لتع الوشين
إذ كل ثورة.. لها ظروفها ومراحلها..

وإحنا ركوبة اللي نط وهزّ رجّليـه
حتى لو اهطل غبى حطت بنا سـتينه
نقول عليه عبقري شايف اللي ما نشوفه
مالك ظروفه مشبّرـقنا بملايينه
حتى ولو كان عماها يوم.. ماكحلها
وتعالى لو نص شاعر والأربع أديب
ح نوظفك نشطفك وننظفك م العيب
وأنت بقى وهمـتك . الموهبة أنواع
أشـطرها أتباع لكن ليها ضوافر ديب
صاينة جميل كل مين.. من نايبه.. أكـلها

كل السـلالـم يا تطلع بـيك يا تنزل بك
وعليك تضحى ولو طلبوا البعيد (ز..)
تكون ممخـمخ وجاهـز فى العلن والسـر

الكل ح يقرّ.. ليك إن بعضهم حبك
ولبدت على الخط لو قلبوها تعدلها..

فى المهرجان استعد افتح على البحرى
فى كل شىء إفتى من يقرأ وتستجرى
كل القرون وسطى ما تفكرش إيه بكرة
لا تحب لا تكره يا دويك حضرتك كوبرى
روحك چاكتة.. بيملكها اللى يفسلها

إيه يعنى إن المعارض ناس ما بتشوفها
وكل ندوة بغدوة ورهن بظروفها
ودا كله ماهوش مهم ما دامت الشاشة
والكورة ساتراها لوجت أزمة تكشفها
والخلق لو هبّلت قادرين نعقلها
وبلاش رطان جمجمة مع بعض دافنيته
رباية العسكرى وراضعين تفانينه
اللى ح تكسب به إلعب بييه ولا يهمك
قلبك عشق أرضها حتى طلع دينه
واللى اغتصبها حويط مارضاش يحبّلها

وما عادش يا ابنى وطن تبكى على جدوده
السوق فتح للجميع والمش فيه دوده

كتاب على كل لون لكن فى هون واحد
بيدقوا ميه .. يطيب القرع على عوده
والشاطرة بالفطرة رجل الجحش مغزلها ..

فخش فى اللعبة لا تحزن ولا تحمرق
ماعادش خيرة سوى تخرس يا ح تهق
إذ كل خدام ومتعلق بعرقوبه
يا تبرى قلمك وتمسك طبله وتأرق
يا أما تحرق قصايدك نار تقيد ليلها .1.



أقدار

الشعر بيغض فى قلبى بناب الشوق
بيجعل الذكريات حتى الحنونة .. حروق
ينفخ فى جمر احتراقى .. وقلبي مش ناقص
الأمس دائى .. ودوائى .. م اللى آتى .. أدوق!



فن التزلجحة..

الجهل .. غطى على السذاجة ولا حد فاهم فى أى حاجة
الشيخ خفاجة ورثها شرعى سرقها ميرى من غير ديباجة
أنا كنت والى على إدارة شربت مُر القرف عكارة

أتارى نص الشرف شطارة

والدنيا رحلة ورا استمارة لو تنختم لك ح تبقى حاجة
بعديها تطلع ع الشاشة تنزع لو بومبة خابت بومبة تفرقع
إديها زومبة فى إبن المقفع طبع البهايم الخُرس تسمع
ولو بدت بالنهيق حمارة القط ييلع بيض الدجاجة
بقى مش مهم إنت تبقى مين سوا يسارى أوم اليمين
أو حزى أصلا بلوك أمين هزيل مريرب مخك تخين
ما دمت طيب وناوى تدفع نجمك ح يلمع آخر الأاجة
هذا قانون الشرْم مُزِيلَح على قد ما تَوَطى لها تفلح
ولو مكسح حظك ح يسمح ما دمت ناوى للون مفتح
وغاوى هاوى وأروب مدرح

قبطى ح تفتى للمسلمين وإمام بعمّة تصبح خواجة



سيد بولتيكا

(سُن سن) باشا فى البولتيكا خلط السامبا السايكو بسيكا
ويّا العود والجوزة يكركر إبن الفرخة نَقَر الديكا
طبلّة ودابيرع الدكاكين حبّة يسار على حبّة يمين
لحد اسم الله على السامعين ضُرّة أمه بقت له شريكة
(سن سن) باشا واد فتان وزعيم حزى خبير نسوان
وأديب عنده ميت دكان شعر ومسرح سيما موزيكا

كل خرابه له فيها عفريت ح يتـرجم لك لو حبيت
ويودى التحاليل للبيت وإذا مقموص يقلع يضافيكا
(سن سن) باشا عمره سياسى فنان مادد جدر حماسى
لولا المخبوخ القلقاسى كان يعلن حرب يسليكا
يوم ما دخل سلك السياسـية اتلطم فى لجان وطنية
وفى كافة نُظم الحرّية إتنتطق بما لا يدريكا
ياما شال همّ وياما اتمرمط لكن عمره فى يوم ما اتخبط
كاتب صحفى أروب ح يبلبط وأكيد يرمى الذنب عليكا
إن حبكت يطلع فى مظاهرة أو فى الزفة لزوم الشهرة
جوّة الثـورة زنها برّة يطفئها ويولّع بيـكا..
مرّات يُرطنها فلسطينى مرّه باريسى.. مرّات صينى
وإذا قلت له / سبعة وستينى يشـخرلك ويقول / تكتيكة
ويبان عيبه لما بيسكر وإذا حشش حجمه بيكبر
يطلع بطرمبيطة يسحّر فرحان كنه غلب بنفيكا
فى الأزومات يطلع بحماره يعمل شقالبظات فى الحارة
ويملى الصحف السيارة صيغة المانشيت التليكة
حيرتنى لمبـّة اللقيب أرنب واكل كبدة ديب
وزعيم عايز ييقى أديب أدباتى خبير فى الأنتيكة
مرّة قابلته فى يوم.. سمحوا لى كنت ح أقع مقهور من طولى
صورة من جدة الأناضولى للثورة عمل رجل أريكة
قلت لا حول الله يا تاريخ نازل فينا عك وتلبـيخ

فن سياسة صابون وطبيخ ولا مرة الخط يقريكا
عريتنا منك.. لله عقلنا شئت بفضلك تاه
واللى عيشنا عليه.. بعناه وصبحنا قرود بنسليكا
إمتى ح عمل خير وتموت من دمي اخضر النبت
هلفوت وضمنت الملكوت حين رضيتُ عنك أمريكا..



فيران السفينة

إحنا المقاريض.. القراضة ... شفت ولهط بكل إرادة
إحنا كدة.. فيها لا تخفيها ... حتى السم نحبه زيادة..



يا كدة يا بلاش

يا سيدنا يا للى خاويت الجن، ... وغويت وبالجنونة تفن
يا تقول كلام يروش ويزن ... يا إما تتنيل.. وتكن
فن الزجل قرفته زعايب ... ما عادش مزه وشرب ربيب
لا بد تمضع كبد ديب ... وتشيل هموم وطنك بالطن
الشعر مش دروشة هبله ... ولا هرش مخ ف هوى عبلة
الغن برق غيوم حبله ... يرخ فوق الصخريرن
واللى امتلك كلمته سلطان بحرف يحكم ع الأكوان
بشرط يبقى مع الإنسان فى ضعفه وف قوته مايون

الفن مزامير الأساطير.... يصحصح الموتى بنفير
ومقتله وسمّه التبرير لو خاب بحجج الخوف والسّن
فاوعى يهْمَك م الأوباش لا زعيم ولا سلطان أو باش
كلّه يبدخل فى الإنعاش ويخِمّ من غيرك.. ويصنّ
فسنّ قلمك وابريها الدنيا إيه؟ تبكى عليها
فك لوحد اللى عاطيها قيمة وسيمة وقلب يحن!).



سوق الحلاوة

الكل أعلن إفلاسـه.... وحط رأسه فى مداسـه
واحد هرب من عار ناسـه.... قال لك أنا فى اللعب ـ الثوس
التانى حين مات إحساسـه باش جذّره فى خمرة كاسـه
خلع على الناصية لباسـه وكتب أغانى لواحدة ونص
غيره دخل عش النسوان يبيع لهم خلاخيل حلقان
وشعر فى حب الأوطان، فى الفرزة لو ما شربش يرص..
واللى ركب كرسى بعجلات بقى شيخ على مجلة وصفحات
قرعة وتباهى الأغوات تقسم مع البوهات بالنص
واللى لعب على حبل وحبل مهما يقبّح يفضل فسل
واللى جبان ربطوه مع بغل فصار رئيس تحرير بيقص
أما اللى غطّى وفاض ع الكل ذاك اللى ماشى يوزّع فل

وف عينه جوز حَيَات... بتطل يلدع قفاك وأنت بتَبص
 ماعادش من جيلك إلّاك ... حافى وماشى على الأشواك
 عريان.. ولا باب ولا شبّاك ومصر فى حَلَمك بتمصُ!



روّق يا رايق

كراسـتك قطعوها	خلاص يا عم روقـة
بندالة شخبطوها	الصفحة اللى بديتها
لو سيرتك يغسلوها	لكن انت ولا يهمك
خبراتك ح يعوزوها	فنونك ليها عوزة
دى عضمة ومصمصوها	فضّك من الوزارة
خرافات وعصروها	سرقوها آثار ومسرح
للسلم طوّعوها	ثقافة بالكنافة
تقريباً هنجروها	تجريباً فى الهناجر
للخلف جرجروها	وفنونها من قفاها
سيبها لهم يلحسوها	أنت اللى عليك عملته
أمجادك ح يدوسوها	زوّغ أنت بشبابك
بكره ح يدرّسوها	وإن كان حقبة سيادتك
كل الضرف جابوها	كيف القصور بهمة
يلقوها ويسرقوها	وأثار انتيكة لعنة

وفواتير المقاوله	على طاولة قسموها
وما بين عايده وسالومي	حلولو .. لولووها
خيبتك كانت قانونهم	لذا عيبتك أمموها
فَرُوقْ يا عم رُوقْ	كام مليون عَوْضوها
طلعت أنت بنصيبك	ناشف، من عين أبوها
بركات ست الهوانم	اللى احنا ورث أبوها
لذا خد تنورة واخلع	قبلنْ ما يتغيروها
راح تفضل ذكرى رسمك	على حيطه ينقشوها
ذكرى رقصة سعادتك	قدام اللى غزوها
إنت حفرت إسمك	فى سجل اللى.....



موت العمدة

إتيموا المخبرين يا عمدة من بعدك
 خليت بهم فجأة وأنت فى تمام مجدك
 واترملوا نسوانك الألوان بلا حماية
 ضاقت المكاتب وكانت (واسعة) على قدك..



هَبْلُ مِصْرِي

يا لالا يا فلة	إكسرى القلة	دنيا بيانوللا
فتة فى مرقعة	خمسيت حلقة	مخ مخروم
أنت م الليله	فرد م العيلة	والحلال حيلة
قِرْفَتِكَ سهلة	ولدت البغلة	لساعة النوم
فى حياه صعبة	الحجاب خبى	تأبت القحبة
قُب يا فالح	اشرب المالح	اللى جاى رايح
واللى مش عاجبه	نلزمه بواجبه	إن شطح حاسبه
لو ضمير فاقْ له	فاجئْه لَزَقْ له	سُكَّة لَفَقْ له
خُد على مشمئة	مش يجيب همّه	رجعه لأمه
راضى سَهْل له	دقته وافتل له	كَبْره وذِلّة

وإن في يوم غشك	دودُه من مشك	بعزّه ما تدوم
واللى بالى بالك	خلفته عيالك	شنيه مبروم
رخرخ الخيّة	رُوحَه بلا جيّه	فادى للحيّة
بس رقّد له	كيدُه لا تجادله	فرصة ع اليوم
يا عمّا حيّى	ليثى ما ليثى	ييقى متهوم
مخ مناخوليا	زمبرك بليه	خلفه الروم
مخبرين شرطة	عسكر (إسبرطه)	فى فئات عليا
الهبل مصرى	له سمات عصرى	خُرُم مبروم
		قسموا الخارطة
		غمّره فيوم
		نبعه كان قصرى
		ميت أبو الكوم!



طَبَعَ الكراسى

اللى يَطول ريشة يقصقصها ... واللى ينول عضمة يمصمصها
لو جالك م الباب خد منه م الشباك سرقة .. تنصصها ١.



ما بعد الخيانة

هذا زمان الفُراكة والفاجومى المخادع
والشاعر الأقرعنجى مطيَّبَاتى المواجه
صيَّت مواقيت الفلاتى العويل..
ومسكُطن الفيل بمواويل الضفادع..



الكادر

الأومباشى أبو قمصان بمبة ... عيشته السهلة الصعبة تحير
يتم بوفاته الحرامية..
وعيال الأمن القومية.... وبنات ياما ضميرها مآير
كان لها فارس للحرية ... فاشيستى ف غاية الثورة
بين لاشتراكية والسامبا.... غير قمصانه ولا اتغير
من يومه كان نمرة.. وحاله.. ... فى المسرح وف سوق البالة..
وفوق راس نقاباتنا الفنية.. زومبة صناعة الزمن الأغبر
اقتع ثقافتنا الوطنية..... تتسكج على حجر العسكر
على طبل الحرب القومية.... رقصها حتى فى العنبر..

لماذا تركت الحمار وحيداً

أَلْهَمَ شَوْشَرٌ عَلَى النَشِيدِ .. وَالْعِضْمُ فَرَّوْلُ زَى النَشَارَةِ
أَنَا شَاعِرُ الْهَجْرَةِ وَالْبَرِيدِ .. قِصَايْدِي مِنْ زُبْدَةِ الْفُبَارَةِ
هَاجَرْتُ (وَالْقُدْسُ) فِي الْوَرِيدِ .. فِي حَلْقِي زَهَّرَ شَجَرُ الْمَرَارَةِ
وَعَشْتُ كَتَى بَوَسْتَرٍ شَهِيدِ .. مَكْسَبُ رَحِيلِي صَفَى بِخَسَارَةِ
(بَيْرُوتِ) جَابِتْنَا عَلَى الْحَدِيدِ .. إْحْنَا الَّلِي عَشْنَاهَا حَارَةً حَارَةً
يَوْمَ كَانَ صَمُودُنَا الْمَجِيدَ مَجِيدِ .. مَعَ كُلِّ غَارَةٍ كَانَ لِينَا غَارَةً
كُلُّ الْكَلَامِ الْعَبِيطُ شَدِيدِ .. نَسَى الْحَوِيطُ الْغَبِي الْمَهَارَةَ
الثَّوْرَةُ مَشَّحَ حَقَّ لِلشَّرِيدِ .. وَالْغَرِيَّةُ كُورِيَّةٌ وَلَوْ جَسَارَةَ
فَلَا جَنُونَ الزَّعِيمَ أَكِيدِ .. وَلَا انْفِتَاحُ السُّدَّاحِ تَجَارَةَ
يَوْمَ سَيَبِنَا تُونُسَ قَلْنَا أَكِيدِ .. حَ نَعِيشُ فِي (بَارِي) عَيْشَةً (جِيثَارًا) !
حَظِي ابْتِلَانِي بِنِظَامٍ جَدِيدِ .. وَهَبْنَا دَوْلَةً عَلَى الْمَحَارَةِ
لِيهِ يَا بَابَا سَيَبِتَ (الْحِمَارُ) وَحِيدِ .. مَا أَنَا كُنْتُ أُولَى بِكَرْسَى الْوِزَارَةِ
وَزَى أَخُونَا رَفَعْتَ سَعِيدِ .. أَبْلَعُهَا لَحْمَةً وَأَقُولُ بِصَارَةِ !!



مع إنه .. عَمَّ الْعَمَّا

لِيهِ الْحَيَاةُ بِتَجَرُّكَ بِالذَّاتِ ..
مَعَ أَنَّهُ كَانَ فِيهَا يَامَا لَكَ صَحَابٌ وَأَخَوَاتُ
كَتَّكَ وَحِيدٌ الَّلِي عَمَاهُ الْهُوَى
مَا شَافَشَ إِلَيْهِ الَّلِي فِي قُلُوبِهِمْ مَاتَ

كادر أساسى

لنات عجان.. كل الألوان .. كان عترة زمان
وصبح ناسى..
فى العشق لبيب.. فى الهم طيب .. أبو دمع قريب
عامل قاسى
على وش الزيت.. زى العفارىت .. يا خفيف نظيت
ست كراسى
وانقلب الحال.. فاتعدل الحال.. خبرة وخيال
طير وسواسى
شاطر لقيب.. مكشوف ع الغيب .. عداك العيب
ما أنت سياسى
راكب حصانين.. فى يسار ويمين.. وحدًا الاتنين
كاذر أساسى..



شماطة العدو

خدت فى لسان الوزر فيلاً بست نجوم
ولهفت وسط المدينة ستوديو ريع التون
ومهرجان نص لبّه وأردغان للفنون
علشان لسانى دراع طبلّة وإيد للهون
وكت أيام شبابى ولا الخليفة هارون

جيش الجوارى الصبايا كان لى نَعَم العون
سواء جديدة قديمة بَكَر أو حَيَزِيون
عَمَلْنَا م الحَبَّة قَبَّة وللثقافة قانون
يجعل قلوبها وعقولها جنزِيل كَمُون
يغليه أمير الولاية فى كَنكة الينسون
يُعَكم شوارد خيولها ويلجَم المجنون
ويخلَى فالت همومها يَكُن فى المأمون
بدل هياج النقابة البيرة فى الأوديون
يسارها يصبح يمينها، ودان طوال وعيون



أنا البديع المزايا.. الشكل والمضمون
كسَّرت كل المرايا أما طلع لى قرون
وصاحبت كبش العروبة ملك زعيم أو دون
سوا كان بيْفهم سياسة أو زى غيره صابون
وكل قَومى وبعثى ونفطى له نُولون
ما دام ح يرطن ويدفع قِرْفته ح تهون
أنا عندى اسلوب حنَّين فصحى أو ملحون
نشَفَت مليون دوايَّة حبر فى المضمون
دراما سينما ومسرح ألف صنف ولون
واخذت حقى نواشف راديو تلفزيون

الحركة بركة ما دام للسري ابنى تصون
اكفيننا شر الضرايب كل خيرح يكون
إذ كل مضمون بضامن لعبة ليها فنون
السلطة وحديها بس اللى تقوله.. يكون..



وماليش فى ضعف العواطف، المزاج موزون
إفهم دراما الصراع فورا تقبّ تعوم
وادى أنت شفت الحكومة طلبنى على التليفون
أول ما أزمة تكون م الخمسينات لليوم
وطنى وقومى ويسارى شادوف بشنّف وشوم
بنيت فى شجر المعارضة اعشاش حناش للبوم
لَجَلْنْ تسود يا ابنى فرقّ.. طبع فى المحكوم
إنه قصير النظر م الذاكرة معدوم
ناسى انى فصّلت ياما لكل تَكّة قانون
وناسى أبويا الشاويش من بحرى للفيوم
من عهد (بيننا استبيننا) .. نرستأ الفرعون!



لذا ذاتى أكبر مقاس فى السوق كما البالون
وما اخافش غير من الإبر والشّعْر والمدفون
اللى على سهوة يظهر طبله فى ميكروفون

لو مرة ربحنا المواتى يقلبه شعنون
ساعتها ح تكون فضيحة ويشمتوا الصهيون
لذا سامحنى وفوت .. كل عله تهون
وانت احتملت العساكر .. جامعات وسجون
وقابلت زى كثير .. أصحاب مرض مخزون
ما حبكش تيجى النهاردة بعد موت شمشون
وتقول : دى قرعة العروسة والعريس مجنون!.



الجاهز ومش جايز

فاتة كافورى الناصرية المكسح
وعطشجى قطر (السادات) خلا الغفر زتوه
فى باص (مبارك) تشعبط كمسرى مدرج
حين هجمت العنة أكلت جلايية أبوه
خبير ثقافى خرافى من العمما مفتح
يوم يتزلق سيده فى مطلع أكيد يلاقوه
فى كل ندوة بسيرة الست يستفتح
بقوا كل غدوة على شرف الفنون يدعوه
يفتى فى كافة قضايا الكفتة للمسرح
والقرع لما استوى نسى نفسه خوف ينسوه
فوق يا جعمر .. انتبه واتلم لا تسرح

دا كل شىء بالمقاس.. واللى فيهم رقدوه
 حتى ابن حيان بذاته لو فى يوم رحرح
 وغلط وخطى العلامة الأحمرمة يَخْصُوه
 ومنين أجيب اللى عقلِ الدرس واتصحَّح
 منين أجيب والجميع اللى دا قوه.. نكروه..!.



الصعود إلى أسفل

كان يا اور لفاروق	ذو سلطان وحقوق
خد بومبه وخازوق	فى ثلاثة وعشرين
على طول قلع البدله	شال زمارة وطبله
قال لك دى بلد هبله	بتفرى الأسافين
مرة بغمزة شمال	صاحبوه العمال
زلزل راس المال	بخطب تخزى الصين
وبقى رئيس تحرير	بشرايط وغفير
حين يقضى المشاوير	للفرزة فى عابدين
واترقى الأراجوز	بالرايحة بيفوز
يقلب لما يعوز	يلعب ع الحبلين
سفروت القطقوط	طربوش أو زعبوط

على الخط المزبوط	شَتَمَ الشيوعيين
وصبح عَقْرَ وقيمة	م المسرح للسيما
عبى الفن غنيمة	رَصَصَ فى الملايين
وأما اترقى وكيل	فى وزارة المخاليل
بقى نفسه يا خليل	يبقى وزير شهرين
لكن الدنيا الصعبة	بتحاسبه على القعبة
اللى فى كل مناسبة	طالعة بوادٍ شبرين
واهو فى الآخر مات	لا خَلْفَة ولا اخوات..
وبرغم الألوفات	ماسكنش ف قبرين..!!

بين نارين

شوارع القاهرة مليانة بالحواديت ... لكنها معدومة .. القيمة ..
يا أما غرقانة ف هموم البيت ... يا أما تايهة فى العصور القديمة

قصر التظر

غرقت مراكبى ف همّ هذا البلد ... يا هلترى من غباوتى وإلا بغتّى الزفت؟
لا عرفت أربى ع البساطة الولد ... ولا فرحت أما كبرت غصّب عنى البنت

البرغوت ..

مقاوّل أمانى	فلان الفلانى
صحافة الأدب	وعازف اغانى
لينينى خومينى	يسارى يمينى
عديم النسب	ودرويش حسينى
مَوْسَطَن تمللى	ماييميلش مللى
ف قصور العرب	سوى حين يصلى
تبَيَّرت تطبَّرق	تبغدد تمشدق
فى جوق الطرب	تخندق تفندق
لها ألف علة	ترأس مجلة
بمعزف قِرب	ومالهاشى ملة
لهاتف نده له	هداه علم جهله
وبلّغ هرب	فباع فقر أهله
ومرعوب يفلّس	وهلّس وغلّس
لسِعدَه ورَجَب	فأدمن يحسس
على قد فتّه	ما أخرب مِطنّه
بقشرة ذهب	بيبرق كأنّه
وكرت مخاوفه	لكن حَرْفة خالفة
لأتفه سبب	فأنكر معارفه
بشينة نهايته	تطارده بدايته

فصبحت هوايته	يكسّر زُكُوب
ومن عرّى أمه	وكفنها همّه
يصير شَهدُه سِمّه	ومجده جرب
فلان الفلانى	وميتّ اسم تانى
بلاوى زمان	القليل الأدب.١

حبّل التجاه

قوم فيزّ يا ابنى العصر متحايز
 اخـجل على دمك يا ابن أمك
 ياما عشت عمر الصبا بالعز متمايز
 دلوقتي جنب الحيط عديم الرجا
 ولا أنت قادر تفك العقدة ولا عايز
 ما باقى إلا تعبى الماضى فى قزايز..
 وتروح لابیو الهم وتعمله عمك!

الهلفوت

أحوال الدنيا المخروبة.. راح تاكل عقل المقاديم
 الراكب عاش عمره ركوبة.. والاستاذ ناقص تعليم
 والعُمشة أن شافت بالصّدفة.. يقولو لك دا نظرها سليم
 الفن صبح ميتّ سبوبة.. والمسرح مكتب تخديم

تتجاوز من شاطرة أروبه.. تترسّتا كابتن ع التيم
حين صابت الجدر المعيوه.. فى عقولنا حصّل التويم
الطوية ما تمسكش الطوية.. والقرش مساوى المليم
البقرة اللى ركبها حلوبة.. نشّفها وفرشها كليم
إن زعلت سوسو جاب زوبة.. رجّالة على شكل حريم
كافة لا نّصاصّ الموهوبة.. وانزل فى نافوخهم تخريم
حسب التكتيكة المطلوبة.. أو خوف من شُبّهة تنظيم
كتّاب على بطنها مسحوبة.. ترضع قوانين التحريم
دا يسارى يصبح ألعوبة.. ويوفّق بين المفاهيم
يشتم فى يمينها الكركوبة.. ويساهره فّ مطعم مكسيم
وده زايد والناس منكوبة.. يطلع بجوايز التحكيم
والطوية إن جت فى المعطوبة.. العجل يموت بالتطعيم
يا عجائب مصر الأعجوبة.. للظالم هتفوا المظالم
والقاضى اللى ماقالش التوبة.. ع الفجر صبح م المتاهيم
وما دام الفصل الخيّوبة.. بقى ناظر أدب الأقاليم
فالقحبه تقول آخر نوبة.. والعسكرى راح يبقّى زعيم!.

بيضتركتكوت

مخ حلنجه.. فى المشمش عشّمنّا بمنجة
صوّر لنا أيوب المصرى.. متدروش.. ضارياء السنجة..
وكتب تاريخ مصر العصرى.. حلقات لهرقل وللينجا..
فسر سر الفقر الأزلى.. بالشعب اللى ضاربها طبنجة

واللى صبحت غاية أمله .. برشامة صليبية .. وسرنجة
 الشعب اللى خيَّب أمله .. ترمأى سايقه بغل السَّرْجَة
 واللى اختشوا ماتو من الخيبة .. واللى ارتشو قلبوها لطنجة
 لت وعجن استحلوا العيبة .. لذا ضيَّعنا بين شهقة وغنجة
 والحزب ح تكمل سياساته .. حين يوصل مندوب شبلنجه
 ديب الليل زبط حساباته .. واتجوَّز فى السر النعجة
 بعد سنين يأس استهبلها .. والسمكة ح تولد لنا رنجة
 سن اليأس ماهواش بالخلفه .. توارىخنا محتاجه سفنجة
 صدقنى افضحها وريحها .. وأحرقها على لَحْن كمنجة !



عشق التأميز

مجنون وطمعان يتجنن قبل الهبل ما يتقنن
 فزق عَجَلَه على هَبَلَه ... وطلع على الوالى يفنن

..

دخل فى أرابيز أرابيزه
 أدمن عصاية بزاييزه
 لحد ما اتفَرَّت .. ط ... ع الناصية .. قالوا له .. يحنن !



تماحيك

كل كلامك طعن عجين .. عك عواصف فى الفناجين
 حشو دماغك مالى فراغك .. فبتتمسَّح فى المساكين
 أعمى وشايف بالاثين

حلم عدالتك.. ضاع بندالتك.. من إيد خضرة وعم حسين
انتطقت صبحت أمين
عايش تحسب.. ترسم تكتب.. بالأممية قتلت ياسين
واللى ح يقرأ ويسمع مين
نُحلك خايخ.. صايص شاخ.. ضيّعت أيام الزنازين..
والداء يغلب.. تكذب تحلب.. تصبح من أهل الملايين
على حس الهبل.. التايهين
اشتراكية.. لكن بماهيّة.. صنف بلاستيك أو ميلامين..
نياشين للسادة.. العاييين!.



على ضفاف الواقعية

لكل عيب حدّه ومدا.. ..ولكل كرسى عمر افتراض
زىّ اللى كدبه عرّى وراه ... لا شاف معارضة ولا اعتراض!



على ناصية العبث

فى وهَم الانتفاخ حتى الزعيم يحيض
بالليل تقيس فراخ .. الصبح تلم بيض



أراجوز تانى

أراجوز.. لكن شكله عادى ... من طرح خيبة بلادى
يفتى ف جميع المسائل ويحلّ كافة مشاكل
أهل الحضر.. والبوادى..

زعيم لا قبله... وبعده نسانا أنور وعبد
لا بد على القمة وحده

كإنها ورث جدّه.... الكندى فيروزابادى
سهران فى خيمة بمكيّف.. يكتب تاريخنا اللى هيّف
وف دم قلبه الرهيّف... يدب قلمه يالف..
فى الذرة أو فى الزبادى..

يضرب ودع يقرأ الفنجال.... خرم نافوخ الكون بالمال
حبة يمين على حبة شمال تقولشى فولتير عبد العال
وأبو نضال البغدادى

فى نافوخه طقت أفكارها على مقاسه يحررها
أسوارها دفتت أسرارها كبيرها وحده يمسخرها
ما فى جد يشبه لهزارها جيوشها تقلب لنوادى..
غرضه يصعب مشوارها.. ينحل على مهله وبرها
فى جهلها ح يخمرها

يكتب لوحده أشعارها.. ووحدته يعمل أخبارها
وف كل عام يتّخع كتابين.. ح يقطعوا خلف أولادى



أراجوزتالت

أراجوز خفيف لكن واعر.. شاطر شاعر
وكان زمان له سمیعة.. ریف وبنادر
وكان زمان له مریدینه..
غفر وجماهیر رایدینه.. الخوف قادر..
حين داب فی دبایب الباشا
قام عوده صنف بغاشة.. اللحم أبيض یا هشاشة
سلکة ف أراییز الخوجات
فبات فی نقر الحشاشة.. طلع قمر فوق الشاشة
ساعات ببقى.. وبقى ساعات
کلامنجی فلسفة وشریعة.. على مقاس لذات الذات
تقب موازین أسافینه.. على مقاسات زراینه
فتطقه بنت بدیعة.. أم العیون سود ووسیعة
القلب بتشقّه وجیعه.. لكنه یشفی بودیعة
واکمنه کان حزب طلیعة.. قال لك کلام مش فاهمینہ
لكنه عجب السمیعة
نسى طمع فی ملایینه.. قام قال کلام ماهوش قدم
فذنیه العریف.. مدّه
وفکره بحدود حدّه.. خد لك ساتر..
وعام على موجة مطیعة.. بقى للنساوین تقلیعة
وزهزت له نجوم سعده.. ضمن بهم بكرة وبعده

فى الليل يبعزق بيمينه.. ما دام ما حدش شايفينه
وما دام ما حدش بقى فاكر.. ييجى النهار يلزم حده
لكن العويل مافيش قده.. استوعب الدرس وذاكر
يحذف يسار فوق البيعة.. فيذل نفسه على الآخر..



السرائر والمصائر

الدنيا رضيت عليك وصبحت من الحكام
فمد إيدك لآخوك اخْزى عَبل لا يام
حق اللى جَمَعَ ما بينا بُرّش قروانة
واللى فَرَّقَ بينّا برضه ساعة الإعدام.١.



نص قائد طايب

أعرف إنسان فرعون .. فنان
بشهادة ضمان م الأمن والأضيئش السلطان
له كرسى ملان كافة ألوان
وعيون فارغين
ولا يملأش حضنه غير النسوان اتين اتين.. حسب الأسعار
والأسعار نثار
والشرع أمان..
فى الطقة يدوِّزن قول قنطار
فى السهرة حساب الليل ستار

العبرة الأجرة ح توجع مين.. دى سياسة المديرين الشطار
 له قلب جرىء من نشف الريق.. وسط الأشرار المنفلتين..
 ولسانه بزيء.. ضد الأحرار المنهزمين..
 كان عيشته مرار.. كرب واكدار.. لطابور أنفار
 لكن والحق فى عز الضيق دايمًا زنهار
 جاهز ولئين.. مين يركب مين؟
 يجعل له الليل بالكذب نهار..
 والجَد يفلفلهوله هزار.. بقرون أو ديل حسب الأدوار
 علشان فهم ودماغه سليم، فى اللعب قديم.. ولا كودية زار
 تغلب مكار.. خطوة ويندار.. ويلقى اعدار الناس أسرار
 مين ضامن مين.. اختار ما اختار
 بقى م المقاديم .. وصَبَح م التَّيم
 ماسك مزمار رقاص طبال
 مع أى وزير يضرب فانفار
 وإذا فوقه مدير.. يبقى له الخال
 وجميع من تحته جَمَل أصفار
 يجمعهم له يوم ضرب النار.. أراجوز هنكار له فى العصافير
 الريش أفكار .. تطلع منشار تنزل منشار
 إذا راضية علينا ست الدار إحنا الجاهزين..
 لنا فى الأرشفة لنا فى المشاوير
 لنا فى التفتفة لنا فى التحرير

عصر التطوير محتاج تغيير

وإذا التغيير محتاج تعتير، إحنا الفناجين تنزح بنا بير
أو بحر كبير

داحنا وارثينها أصول الكارم الاستقلال حتى التمسير
ابدعنا فى كتابة التقارير من أجل النصر يوم التحرير
إذا حكم الديب.. أسلق له أبوك كسكوت أو فار
وأزرع برسيم لو هو حمار

أغزل له العار أكاليل من غار أو قيد له فى قلب التلج النار
طبع المحكوم قدر الشطار..

ما دمت ف غابة.. صحى النوم

الفرقان لو جت فرصة يعوم.. معلش اللوم

ولا حتى شماتة يا وش البوم..

بين غمضة عين أو أودة نوم الزمن الزميركى بيندار

قد يقع الكرسي بدون منشار

وساعتها عليك فوراً تتطفئ تكفى تختفى ورا أى جدار

قبلن ما راح تنتفى بالعيب

وتموت متهوم.. وبدون إنذار..

سوا كنت نقيب أو كنت حمار..!

عبر القومية

صاحبى المخبر طبعه خسيس

حاف عيشه باش م التغميس وسيجارته شحاتة وتخمس

اتمطى فى سوق الوطنية.... فتخطى كلّ المتاعيس
 لو حطوا طبالى الثورة.... يلهط ويبلط ويهيص
 يتنطط فوق كتف الشعرا..... يتسلطن شيخ للبسابيس
 وإن فتحوا السجن هجر أهله ... ليلفوصَ عرّضَ المحابيس
 إن راجت العامية تفرعن.... دللّ على حورس بإيزيس
 وإن حكموا بالفصحى استقرب واستقرب قصة ايزوريس
 فى عدن لعب على الحبل.... واحترف بسوريا التهجيض
 وببيروت سكن الحمرا..... ولبغداد ساق العيس..
 ولعين طرابلس الخضرا..... أفتى بالمجد لإبليس
 ولأسباب قد نعرفها.. ... اتقن ألعاب النسائيس
 بعثى فى حضن البعث..... ويسارى فى باريس
 وفدى.. قومي.. سرأ..... قبضى قبل فرنسيس
 علمانى يتمشيخ رعبا..... فى حزب تحت التأسيس
 بدل أحزابا أجهزة.... واستبدل (غالى) (بخميس)
 يكتنز الكتب ولا يقرأ..... ويقاوح (يوسف إدريس)
 يتقارب كى يلدغ غدرا.... ويباعد مثل الخنيس
 يفتى فى الفن فُتّى شتى..... ليطور قِدر التدميس
 ويوماتى يعلن توبته..... فيعود بريئا كعريس
 لكن القحب وما اعتاده..... وخصوصاً نسل المتاعيس
 من فزعوا من رعب السجن لرئيس تحرير البوليس
 من عاشر كلب معاوية... ليكون نقيب المناجيس!!

حرام..

قفلت باب بكرة قتلت الأمل..

نشفت دم الخجل ... قطعت حيل الأغاني

سَممت نبع المعاني قصصت ريش الكلام

العشق صار منفعة والسلطنة إعلام

وصبحوا فينا الغواني ييصدروا الأحكام

وهان عليك الوطن.. إنكسرت الأحلام

يا كــــدب..

شبه الحقيقة.. حرام..

الرحمة واجبة... حتى في الإجرام!



فضيحة على النيل

زى الجوافة الحمضانة

دلقوك فى طشت طبيخ مشموم

أو قول فى دسّ طبيخ بايت

شايط من الأول - مخروم

مهما غسّلت القروانة..

نفس سيادتك فجل وتوم!

...

هدمت بإيدك أعتابك.. من بعد نهشى بأنيابك

وهدومى قطعها كلابك

من لحمى كَبَرُوا فى منابك سمنت كالدود المحموم
 كان نص عقلك فى شراك
 لما الهوى عرّى تيابك ولاقى قدره يجى لك نوم
 وعلى المنصة فصيح القوم
 يا رب لا حسرة ولا لوم
 البلية خلّقت ويّانا .. الفؤلة قاسمتنا عشاننا
 من يوم ماخذنا على خوانة ... وصبح على عقولنا قيّوم
 نفطر على البصلة ونصوم
 ميراث قانون شرّع المرحوم ... يعدمنى روحى وأنا عايش
 كاتب وشاعر بالقايش يسلطن العرّه الرايش
 لقى الوطن سوق ومعايش فقب سُبْحان العاطى
 صبى الوليّة أم غوايش أو قول صبى بالخواجاتى
 يرمى الجاكيته الظباطى ويقب ع الموج المهزوم
 أو قول من الحيط الواطى ينطع الحيط المهدوم
 فرع العويل مادد شايع.. لا منجّة جاب ولا طارح دوم
 حسرة وليّه وريف مظلوم.. أو قول وليّة وريف دايع
 سهران ما بيدوق ريحة النوم
 مستخ شقاه زمنه الماسخ وستّره ورا غريال مخروم
 حين يغلبه الطبع الفالت
 يهرب من الفول النابت يشم قفا مساطيل الروم
 ويعشى أمّه العيانة.. على رغيف بالخوف معجون

أو قول رغيـف بالجـوع مسموم
أجبرنى أعيش مهزوم أداريك
أو قول أعيش أمضـع خيبتى وأدارى عيبتى وأسايـرك
تطلع لى صورتك م الشبايبك يطلع لى صوتك م المنور
يطلع لى عفريت م البدروم
وتخيل عليـه بشرايطك ... تهتنى بطبل ومزازيك
كتقأ سلام آه يا خرايطك ... دوختى ف مط الأساتيك
أنام على الجنب الموجوع ... أو قول على القلب المفجوع
فين ما أدور وشئ الاقـيك
أنا اليئوس المتفائل ... كادنى كابوس بختى المايل
حلقات تجرئى لسلاسل... سلسال هزيمتى المتواصل
مهموم بنص رغيـف وهموم والإنسانية فى النازل
وكان لها ف قلبى منازل
عليت وهدمتها عبايطك ... أو قول وعدمتها شرايطك
مع إنى شفتك فى الإبريق ... ومن خروم القروانة
يوم ما جعلت الزنزانة ... سبوية لجل البغل يدوق
دخل الجميع الشفـخانة
يدقوا ميـه ف قعر الهون من أجل نخرم مخ الكون
بليالى ميت ساعة وميت لون
مع أن أمك غلبانة مصر ابتدت بالتلفزيون
شقرا وعيونها سهتانة وسمرا فندق ست نجوم

من أجل ختم فريضة الصوم
 فزغرطى ياللى معانا ... جذك حلق شنبه المبروم
 ورجم واحّرم ويانا ... واتوضى بالمال السايب
 لكل جهد نصيب معلوم ... حسب التساهيل يا حبايب
 فرّدة شراع رزقها مضمون
 مركب على النيل السكران ... أو قول على النيل الخايب
 أو قول على نيل مش فايق ... على القفا بيبات مختوم
 ويشجع اللعب الرايق
 ينتف عصاقيرها لليوم ... ويميل مع الريح الغالب
 يدوس فى قلب أمه المقسوم
 ست البنات عامت قالت ... بيتنا اتخرب خُذلك قالب
 واهرب من الخرم المختوم
 طبع الكلاب السعرانة ... سلسال عبيد السجانة
 أو قول عبيد ابن القارح
 فجعانة كالضبع المحروم ... لو قريعت بحرّين مالح
 تطلع فى طين برك الفيوم!



التماسيح

الكتاب الكتبة ... وأهل الفن الكذبة.. ويتوع التمثيل
 ناقعين المناديل ... فى دموع التضايل
 لجل المخبر يصبح ... صاحب حق وعتبة

والهلف العنتيل ... يصبح بالتأويل ... زغلول الزغاليل

صاحب كرسى وكتبة

جيل الفعل الشين ... والحق أبو وشين

عكموا جدر الرقبة ... كتموا حلق الخيل.١



عسكراًفتديت

(تلات عساكر جبأبرة) من تراث برلين

عاكمين رقاب الثقافة - امبابة راس التين

مهما تزعق ح تزهب فى النهاية تلين

حين تعرف إن النافوخ جَلَط بقى له سنين

والجته فى المشرحة والمسئولين عارفين

وف كل زفة بطبلة - الفرقَ جاهزين

شعراء على رقاصين من الشمال واليمين

كى تستمر المسيرة - الهبرة بالملايين

الخبية مش عيبة وأثبت بالزبيبة الدين

ولاهية عيبة إن فى الخيبة تلاقى أمين

تسيبُه على نيته يلبُخ - وحيروح هين؟

كل المحابس فى ايدنا اختم له تغزى العين

الهبله - لو ليها ملة - للموظف دين.١

...

(ثلاث عناتر) أكابر فوق مكاتبهم
 الحرب خلصت فعملوا الفن ملعبهم
 أسروا فلول الثقافة فيران لتجارهم
 كتاب هلمة . لكن همّه واللى جايهم
 يقفوا طابور ذنب كل صباح على بابهم
 وتشبّ وتلبّ ما ح توصّلش لركبهم
 وتشكى تبكى ف دموعك.. عايمة مركبهم
 مالكين وسالكين معلّى الجهل مراتهم
 لا كتاب قروه أو قصيدة معكرة قلوبهم
 وجمر نار الثقافة.. بيكوى فى جنوبهم
 لذا فى يوم لافتتاح يكووا جلابيبهم
 لجلن بياهى الوزير بيهم على الجنبين
 (إحنا ذراعاه اليمين نحكمها ونزيط
 نفّتح ونقفّل وهو يفك ويرّيظ
 لكن خيوطها ف إيدنا اقطع له ح نخيط
 واللى يبسط معانا ينول وح يزقسط
 ح نحطه واجهة واحنا نَخِمُ فى المسقط
 فيه تضحية غير كدة يا جعريا مرفلط
 تمشى حميرى وتعقل والا راح تغلط
 تحلم؟ تلخبط.. وتتمرد.. حنستعبط

نَعْلَن بِأَنَّكَ سَرَقْتَ الكِبِدَةَ م المسمط
ومين يحاسبنا يلقي وَرَقْنَا مَترَيط
فارضى بنصيبك وفوق وانكَنَ فى المريط
وحشْ فى التبن ح تريرب وح تلعلط
فى الحفلة وسط النجوم لك قيمة ح تلعلط
وبكرة تحلا وتعلا العقدة ح تمطمط يا تشخط
ويروح وزير ييجى تانى إحنا قاعدين له
ينخع ما ينخع نسيب له الحبل عاقدين له
أول ما ح يتوب ويركع إحنا راقدين له
وسوا انتباه أو صفا إحنا اللى بنخطط
والطاعة واجبة.. المهم.. اللى ينفذ مين.!



خيبة أمل

يصعب عليه يا عم يا شاعر
تقوتسى وحدى والطريق واعر
وأنت دليلى فى قفر وادى التَّيِّه
والحلم له أوَّلُه.. لكن مالوش آخر..
بالضبط زى الكذب... والعهدة على اللى راويه



برقية للبasha حبظلم

(عفوك يا باشا .. بعدك لم تدرك!!)

إن التاريخ بيوسّع ذمّته علشان يحكم فى أمرك
والشعر البلدى بيتنازل ويلكلك فى لهجته ..
(كى يتحدث فىك يسدى لك نصحاً بالفصحى
قد يشعر جلدك حكة ظفرك.)

...

(يا باشا .. البحر عجاج .. والزبد رهين بهياج الأمواج ..
فأدفن جهرك فى سرك وارحل دون لجاج!)
سيب الزلط اللى فى إيدك يا باشا ..
عيب .. بيتك طول عمره قزاز قصدى (زجاج)
والدنيا حتحلو تمام ..
وح تمشى لقدام من غيرك (أقصد من غيرك) ..
دى الحرية جميلة والدنيا برجة ومليانة عصافير وحمام
(والعالم أجمل بكثير من شىء - يغمش ويغريش ..
فى صدرك) !!



إعتراف

أنظر بعين الرضا واروى عطش قلبي
زمن العذاب انقضى ولا فات أوان حبي
إنسى اللى مَرَّ ومضى وبوح ولا تخبي
لا كان لصوتي صدى ولا البعاد ذنبي
حبك لروحي مدى.. فأنده لها تليّ

...

من يوم ما طيفك بدا واخذنى بحر عينيك
عمرى معاك ابتدى شعرى وهبته إليك
والقلب ليك اهتدى وصبحت منك فيك
بيك وبهواك ارتضى وملكتى خوفى عليك
آمنت إنك قضا ومصيرى رهن إيديك

...

باحلم بقطرة ندا من خد ورداتك
قلمى إن كتب أو شدا ينطق بكلماتك
وحياتى رهن وفدا موهوبة لحياتك
وذااتى وهم وسُدى إن لم تكون ذاتك
أصبحت أنا مش حدا .. أنا من خرافاتك

...

إنت الضلال والهدى.. يا شيطانى.. يا ربى.



الخماسين

مارس عدّي بسرعة.. ما هدي

أنا قلت له فينك من مدة

لا عديت .. ولا هدّيت.. ولا لوّنت خدود الورد

قال أنا خايف من أمشير .. عودی ضعيف قوى ع التفسير

والعصافير لسة جناحاتها خضرا وعاجزة ترف تطير

قلت له أبريل جايّ بزفة ... كدابة وراكبة على الدفة

جـرى فى غـيـطـانـه... هـبـل اـغـصـانـه

والريح طاح بجنونه اســـــتـكفى..

آدی ربیعنا الی مسربعنا

شَتَّتْنَا وَعَمَرْنَا مَا جَمَعْنَا

نسمته من لمسته تتعفرت وکأنها بمقاس مواجعتنا!



تحويلات

أنا باعشققك ثوانى وياكرهك ساعات
روح شوف لك حد تانى يحيى العمر اللى فات
كان فيه زمان أمل وللهوى حكايات
كان حبنا الهبل غنىوة للبنات
كنا لها الأغانى واللحن.. للكلام
نشف شجر الأمانى كسف قمر الغرام
وصبحنا يا حبيبى عاهات زمن عويل
حقى أرضى بنصيبى من الماضى النبيل
الصيف حرمنى لونك تاه صوتك فى الخريف
النور زغلل عيونك مع إنك ولد ريف
وعشان ضاع الربيع طالت بنا المسافة
وأما العشاق تبيع صفو الغرام خرافة..



اللى فات ما مات

كان الوطن حاضر فى البيت.. ومعايا كان فى قلب الفصل
فى الجرن يحكى لى الحواديت.. أشطح بعيد وارجع للأصل
كان الوطن عيّل .. زيّى.. يضحك ويبكى ويتشاقى
يعند أشيل منه واخبى.. ينام فى حضنى فى براءة


وكنت لما أروح له الفيظ.. ألاقيه سريس توت وخراتي
 منين مارحت بعيد أوجيت.. كإنه فى عروقى حياتي
 ماكنتش أعرف غيره بلاد.. من سلسبيل نيل رضعتنى
 كإن مالوش غيرى أولاد.. ولا كإنه مضيعنى..
 أنا عشته زنازين ومظاهرات.. ولحقته على آخر رمقى
 انكرت فى عشقه اللذات.. كمّلت له جرايته بطبقى..
 كنت أمّا أبص فى عينه كثير.. ما اشوفش فيهم غير وشى
 عذبني ولا همّوش تفسير.. وحاسبني على قشات عشى
 حُبّة شرخ فى وجدانى.. عسكر ونفط وشعر حديث
 فرفطت له عمرى أغانى.. حرّمنى حقى فى المواريث
 وبدّل الصوت والمعنى.. قلبّ القلوب صبحت برّة
 فرقنا حتى اللى جمّعنا.. سلسلنا بإرادته الحرّة.١



عمر.. عمريّن.. ثلاثّة

بعد الخمسين .. وها نحنو
 تأسرنا الكلمة واللحنو
 يا جرح القلب متى تحنو.. لن نخضع أبداً للسنن
 سنأكل فولاً ونغنى

ونضبّش فى ليل الفن
ونحب بلادا تكرهنا .. نحميها من لؤم الزمن
سننظل صبايا وشبابا
أحرارا نمضى وصحبا
فالحر يرى المش كبابا .. والقللى من خير السكن
وعلى العكاز سنتعكز
لن نتقمّز أو نتأسّتد
وعلى الأحزان سنتلמד .. وسنسخر من مر المحن
يا مصر لقد تعب القلبُ
من كتر ما مرمطنا القلبُ
بططنا العسكر . والشعب .. لخبطة الخائن والوطنى
بقّت الحرية أسواقا
والصحف نفاقاً وشقاقا ..
والفن إلى الهبر سباقا والخلق همومها عَ البطن
فى عرضك بصّى قدامك
ورا ضهرك أرمى أوهامك
وأعرفى خلك من خَوّانك .. أو سوف يكفّننى حزنى.



دو، رى، مى

أنا جحشٌ لكن فنان .. أبدو فى صورة إنسان
ترهقنى بعض الأحزان .. فالوذ ببعض الأسفارِ
أركب أقدامى لأسيرَ وبأجنحة الحلم أطيّر
أعزف ألحان عصافير وعروق دماغى أوتار
دورى مى فاصولا دار فاصول .. دورى مى يا حمار
من يملك فى الدنيا صوتا مثلى يحسده موزار
لست أغنى عفواً شططاً عندى للمستقبل خططاً
لا أسداً أخشى أو قطعاً فدماعى نبع الأفكار ..
أنا جحش الفن العصرى .. من نسل بظاظا العربى
لى مخّ فطنٌ ذرى .. يتوهوج مثل الأقمار
فإذا ما اشتعلت أشجاني تعلو أنشودة الحانى
تملك موسيقاى كيانى تهقنى ليلا ونهار
دورى مى أنا واد جبار أوبرا تبدأ بالفانفار
كى ترفع ذوق التجار أو تكشف كل الأسرار
وأروحُ لروما اتدكُتر فأنا الأجدع وأنا الأكثر
فالنملة قد تبدو أكبر من فيل تحت المنظار !!



أحزان ٢٥ يونيو ٩٨

عفوك .. لأنصاف الرجال بأنعميك
مقهور بضعف النساء فى دولة الممالك
المعيوبين أصبحوا زهرة شباب الوطن
والفرخة لها حزب فرحها بعرف الديك
...

عتبك هديم.. فالزّم حدود قبرك
قتل المخاصى المشانق من حبال صبرك
واللى رضع من حفانك حتى عيشه الحاف
على قد ما خاف موالس الوالى على قهرك
...

يا ترى التاريخ كان كده؟ وهو كده الإنسان؟
والا البشر مش بشر والخلق دى خرفان؟
ودى مأمأة مش فرح بالعيد وبالبرسيم
والأ فرع رعب من سكىنة السجنان؟
...

شفت الزعيم اللى فاكر الدنيا دايمة له
ويّا السعيد اللى سُحّت جراته رسماله
دايسين فى قلب الشهيد اللى عصى ع الموت
وسهرانين سكرانين من دم مواله

قتلوك وبالقلب بارد كدَّب ناحوا عليك
من بعد ما مصمصوا عضمك وشلوا إيديك
عرضوك فى سوق النخاسة سياسة وتجارة
وبالخراسة باعوها جئتكَ.. أهاليك

...

وأنا شريك فى دماك لما انخرس صوتى
يوم ما قِدر كذبهم يلخِمنى فى قوتى
ورضيت على حب مصر استقوى بالموال
ضعيف واهل الندالة اتراهنوا على موتى

...

لذا باسم انصاف الرجال بانعيك
من قهر ضعف النساء فى دولة الممالك
حين شفت بعض اللى عاشوا على دما حلمك
مستخسرين حتى آهات المواجه فيك

...

فارحل إلى البحر نام يا صاحبي لا تهتم
كافة أيادى الصحاب متلوثة بالدم
والمذبحة جايّة جايّة.. عيني لامحاهما
ح تكس الشارى والبايع.. وشايلِ الهم

...

وح تنفلت منها حتماً بنت شعبونة
بكرية زى التلول.. برية.. مـجنونة
ترتب الدنيا كيف ما كنت بتريدها
وتطلق الحلم من روحنا اللى مسجونة.١



بومبـة .. ولا زومبـة

كله ح ياخذ بومبـة / زومبـة قد حياته
سوا رقاص الرؤمبا أو حاسب حساباته
المسحوب من ديله زى مخاوى مراته
اللازق على كرسى والسالف خلجاته
متصوف مترهين أو خلبوص لذاته
ليبرالى راديكالى امبريالى وناتو
أو ثورى بوليتارى منسر أو آپوكاتو
فاضى عامل قاضى أو مأزوم من ذاته
متخلف متحضّر متصدر جلساته
أسمر أبيض أصفر متمادى فى لذاته
قائد ملهم بارم على شعبه شنياته
مستعفى ديموقراطى أو خافى ديمقراطه
أو شاعر مش قادر يرضى السّت حماته

كله ح ياخذ بومبة خدها جميع من ماتو
بالونة وح تفرقع قد ما ضخم ذاته

..

شوف صاحبك كيف فلسّع آخر مهرجاناته.!

وحبيبه اللي اترفّع يوم عز انتصاراته.!!



أضعف الإيمان

تبّت في شعرة معاوية العب على الحبلين..
هذا زمان البلاستيك والكلام الجاف
وما دمت خرمان مفستك أو رغيفك حاف
دارى الحقيقة اللي غاويه تيان على وشين
وكون جبان مط أستك.. والسع الخواف.!



وأضعف منه

يا قليل الحيل وطيب.. هات الكتب تنقرا
حكم الزمان قريب.. ع الندل وابن المرة
يا دوب ح تقدر تعيب.. وترشهم بالخر
بس أوعى تانى تخيب.. تضعف.. تبص لورا.!!



تطويع

ح تنضرب وتنضرب
تحاربنا راح نحاربك
وإذا ح تناور تلاوع
ما نحيش السلامة
وما ح نخافش الندامة
ولا ح نسوق القيامة
ولو عملت يويو
مهما عليت خيولك
ومش ح نخاف نمورك
أنت لو جَمرة قايدة
بكيفنا يدور مدارنا
اللى بيمكر علينا
والأزمة لو غريبة
ما يفرکش اللى صابنا
لو جعنا حاف بناكل
هزار أيوه بنضحك
لكن أما الأمر يحكم
وإن طال الليل علينا
شايلين روسنا بكفوفنا
وحتى لو زعيمنا
فاحنا واثقين بأنه

لكن ابدًا ما نهرب
تسالنا يا ألف مرحب
حاذر ساعات بنغضب
لو السلام دا مقلب
طول عمره النصر مطلب
مهما الأمانى تصعب
ح تجهز زميلك لك..
ع الجحشة العارجة نركب
ديتّها الكلب لاجرب
قلوبنا حجر ملهلب
لكن فى الصعب نصعب
يلاقينا مخ تعلب
نلاقيها حلّ أغرب
وحالنا اللى تَلَكْ لَكْ
وعطشنا ملح نشرب
ودلع نحب نلعب
نشيل حمول ما نتعب
بالصبر الفجر يقرب
حتى لو خدنا مقلب
خدنا للبحر نشرب
لو غصب عنه ناكلك..

هِيَ مَصْر كَدَة..

هِيَ مَصْر كَدَة.. شَبِرا أَوْ سِيدَة
حَبَة مِنْ دَا.. لَدَة..
لَجَل حَبَة فَرَح.. تَتَسَى كِيدِ الْعَدَا..
هِيَ مَصْر كَدَة...

مَسْلَمِينَ أَوْ قَبِط.. فَهْلَوِيَة وَلَبِط
يَقْرَشُوا فِي الزَّلْط
وَيِيلَعُوهَا عَبِط.. وَيَقُولُوكِ رِضَا
هِيَ مَصْر كَدَة...

طَنْطَا زَى قَنَا.. مِنْ هُنَاكَ أَوْ هُنَا
كُلْ خَطْوَهُ سَنَهُ..
أَي نَطَّة قَنَا.. عَقْدَة مَتَعَقْدَة..
هِيَ مَصْر كَدَة...

نِيل وَأَرْض وَسَمَا.. خَلْقَة مَتَبَسِّمَة
وَالطَّيَابَة سِمَة ...
قِسْمَة مَتَقَسَّمَهُ خِيْبَة لِجَمَة وَسِدَا
هِيَ مَصْر كَدَة...

خلفها للأمام.. حرب والا سلام
الفنون اتهام..
والعديم المقام .. حكمته منفده..
هى مصر كدة...

الكنانة الجنان .. باع هدومها الجبان
وسقاها الهوان..
من قديم الزمان.. كل فصل .. بدا
هى مصر كدة...

فقرها يلذها.. قهرها يعزها
والغنى يذلها ...
حتى بكى ابنها .. قاضى أو كتخد؟
هى مصر كدة...

واللى قارى وكتب.. كنه علّه وقتب
أو حمار يتركب..
عاش قليل الأدب.. مات عديم الأرصدة
هى مصر كدة....

خلقه جته وراس والطاقيه المداس
فجأة تفجر حماس

وأما تلقى التباس .. تتكفى مقنفه
هى مصر كدة...

توارىخ عنطرة .. قهرها نرفزة
نصرها فنطرة
تشكر اللى غزا .. تنكر اللى افتدا
هى مصر كدة..

كل والى غبى حلى أو اجنبى
كان معصعص ربي
وبصلاع النبى .. فاتها متكدة
هى مصر كدة ...

منذ فجر الضمير .. والإله كان أمير
والوزير كان غفير
والأساتذة حمير .. مصطبة ومنتدى
هى مصر كده...

بركة الأنبيا .. جيش من الأوليا
طمن الأغبيا
الحروب سخرية .. والهزائم قضا
هى مصر كدة...

يلهفوها الكبار .. صحرا وشطوط بحار
يا ف كروت القمار
أو في شوربة خضار.. ع الفطار يا الفدا
هي مصر كده...

واللى قلبه فتى .. ولخلاصها أتى
لو بجَدَنَّ فتى
كلفته كلفتة.. يا اتختم .. يا مَضا..
هية مصر كدة..

جزية والا عشور نهشوها الصقور
من قديم العصور..
تور في ساقية تدور .. ليل مالهش غدا
هي مصر كده..

ناى حزين الآهات ربح جهول الجهات
حسرتة ع اللى فات
رعب بكرة اللى آت .. صوت مالهش صدى
هي مصر كده...

وإن بدّت معمه .. تكثر الجمععه
يركب الامعه
ويقنعوه من معّه .. كضره هو الهدى

هى مصر كده...

واللى عاش يشتري .. حقه ضاع ما درى
وإن كتب أو قرى
لما زُرط خرى .. ريتُه كان ما ابتدا
هى مصر كده...

عالمة ومعدده .. لئنة مقدده
سايبة متشده
سايقة فى البغده .. حتى آخر مدى
هى مصر كده...

من زمان الجدود خيبه مالهاش حدود
واحنا حالنا شهود..
يدهسوننا الجنود .. ده يسلم لده...
هى مصر كده...



كاسى الخيانة

يا من فقدت الكرامه بمساومتك على ناسك
وفضلت السلامة يوم ما فقدت حماسك
تفيد بيايه الزعامه مع انعدام إحساسك
يا ميت ندامة عليك.. ليلة ما تفرغ كاسك



حفظ عوالم

من حظ أمه خليفة الفراعين
إن البلاد دى محصنة بالدين
من عهد مينا لحقبة الميلايين
دايما يلاقى الخدامين جاهزين
يعلوا حس الطبل ع السامعين
ويقيسوا مللى خطوته مترين
طبيخه يتسبك بلا مواعين
وفسيخه يطلع منه شريات عجب
إذ يفتحوا له باب تاريخ وهمى
يبقى جهول إنما قوله سلاسل ذهب
وفسل لكن بأمر آمون بطل قومى
وأمى لكن بيفتى فى فنون الأدب
ما دام بكرمه التزم بالراتب اليومى
لحين يحين الأجل على المهل أو بالعجل
فيتشتم بالزجل والشعر من غير زعل
وبأمر من حلّ بعده بيقى رمز الهبل..
ويتشطب إسمه فورَ الدفن.. دنيا ودين..!



تقاليد

دول بتاكل أطفالها
وتسوق ع الكل هبلها
سيبوها تعمل ما بدا لها .. وريك شاهد
عصرية لكن نوع ملكى
لصوصها بالرقم الفلكى
إن لبسوا ميرى أو ملكى .. النوع واحد
دول اتحوَج فيها القاضى
للى اشتغل لص وقاضى
وشرعى أو عرفى تراضى .. الناقص زايد
ودى جمهوريات م الأصلى
نوعها سابت منه مفاصلى
تمَق فيَّه تفعض لى .. وأنا مهاود
الباشا أصله امباشى
والشعرا من نوع حشاشى
والوالى يديها طناشى .. ويروح قاعد
طربوش وعمه وكاسكيتيه
أظرط من اللى ببيرنيطه
خلوا الوطن محَض خريطة وبعض قصايد

عسكرها خدنى على مشمى
أموت وما الحقش أسمى
بقى الهوان سم فى دممى - ورث معاود

هريتنى مش وفول نابت
فأمنت أنه قانون ثابت
فى دولة يوم حاربت خابست جيش وجرايد

وأروح منين فى العالم دول
عجنونى هم بقيت دلدول
وعمّمونى وقالوا.. مهول.. فحل شدايد

وأنا اللى كان نيلى يوافى
أعيش به سلطان وأنا حافى
بقى رزقى ع اللهو الخافى.. ودمى فوايد

مين السبب منكم لله
عملتوا م البكباشى إله
فعشت عبد الماضى إياه.. شاكر حامد

إمتى أفوق أنا م النكسه
وفوق دماغى ميت وكسه
حتى ردودى المنعكسة.. فعل محايد

فاشرب واخرس واتنيل
ليلك ضيلم صبحك ليل
وكإن ما شففته قليل .. مخك راكد

لو جَوَزوك قحبة ح تعلا
وتروق لك السهرة وتحلا
لو بيت قزاز يصبح أغلا يجيب عائد

الرقاصات صبحم علماء
والعلماء رقصوا على استحياء
واللى كبرع الألف الحاء.. أصبح قائد

فى دولة خرفان وديابة
تشبه مغارة على بابا
عصابة تورثها عصابة وزعيم واحد

من جوعها سرقت مخزونها
باعت شكك حتى ديونها
مرعوية من شَعَر دقونها والريح شارد

تعالبها حراس عنابها
وكلابها سايبة على ديابها
واللى سسرق دُرَف ابوابها.. راكب لابد

والقلب متعب ومخبى
مش قادر اسكت من رعبى
فينك يا خال يا متنبى.. ارجع عاود

عمال ألت أعجن واعيد
زيك ولا كلمة.. بتفيد
وكل مادا العلة تزيد.. أحزق جامد
وابو نكلة أصبح فيها كافور
حاكم بأمر الله.. مأمور
لازق لحين ما يصيبه الدور.. بخازوق بارد.



سكك عوجة

يا رب كتر فضايحهم .. وفى الخلا شتت ريحهم
وذل جايبهم برايحهم .. يمكن تروق لنا الأيام
بردت دمانا فى وشوشنا .. خرينا بإيدنا عشوشنا
وغرقنا فى ديونها لشوشنا .. فعجزت فينا الأحلام
جبرونا نعيد أصنامهم .. نرعى ونعلف أغنامهم
نرقص على زمّر نغمهم .. نزرع ظنون نحصد أوهام
وف ذلة العوزه الحوجه .. ساقونا ع السكك العوجة
يا رب جملها .. بهوجة .. زهقنا لت وعجن كلام
صار كل شىء طيب بيبوظ.. واللى احتفى بشرفه ملفوظ
ما يقب غير فلسان عنطوز.. بايع وراه خسران قدام



مين قدّم السبت

نوم العوافى المريحة.. حلل ذنوبنا القبيحة
القاضى أكلوا ودانه.. خضّوه حَكَم فى الفضيحة
ولا حد دريان بحد.. ولا سَبِت مستنى حد
وبكره طَلَع لسانه.. وسحب على رقابنا حد
واللى خد العهدة فاتتا.. من بعد ما الخوف أمانتا
قلبها يعدل ميزانه.. ونام فى فرش امهاتنا
ولا حد دريان بحد.. ولا سبت مستنى حد
باضت ديوك السياسة عدم الملوك الحساسه
وكسّرى سَهْر ديوانه يسكر بماء النجاسه
ولا حد دريان بحد.. ولا سبت مستنى حد
وأنت اللى كان نيلها آيتك .. الطين مطرطش مرايتك
شب الخسيس فوق زيانه .. مزع على سهوة رايتك
ولا حد دريان بحد .. ولا سبت مستنى حد
اللى اشتراها بفلوسه .. من صفره شايخة نفوسه
لخبط زمانه ف مكانه .. إبليس بيقرف بيبوسه..
ولا حد دريان بحد .. ولا سبت مستنى حد
هذا الوطن فات أوانه.. ولا حز فى جلده حَد



سبايا آخر الحروب

حكومة عاجزه وشعب مريض .. بيحلموا بالمعزة.. تبيض
والعيبة جاييه دم صديد.. والخيبه جنت معقولها..
الفقها فتوها الأروام .. والبغل فى الأبريق عوام
وكل من كان حط لجام.. خوف الصراحة تكعبها
ما دام صبى من مصروفه .. وفك قيد نص خروفه
ظبط ظروفها على ظروفه .. بطول إيديه مترين طولها
والبيه لوحده شريف ونزيه .. يا دوب فطاره بنص جتبه
حتى الصومال حاسدنا عليه .. علشان ولايته برسمالها..
اتخضرت له على الطبطاب .. واتعسكرت له بضمير وناب
ودسترت له قانون الغاب .. حلال زلاله يحول حولها
يبششش اللي بيدعى له .. ويبقششش اللي يغنى له
فرحان قوى بسواد ليله.. يقلبها ويقول باعدلها..
آه يا وطن شاب من صفره .. وغزل بصبره خيوط قهره
أفخر ما يفخر بيه - قبره .. وزراعته برسيم لعجولها
واحنا السبايا نساء ورجال .. قاطعين خلف عادمين الخال
نبات بنشتم فى الطبال .. ونصحى نرقص لطبولها..
وح اعمل إيه؟.. قرغان شعري .. القاعدة وسعت على شبرى
عشت أما شفت هوان أمرى.. وحجز على (.....١)



الوارثين.. غدرا

من الفراعنه للأراجوز
بالقرع أو بالقوه نفوز
بكل لحم الأوز.. الموز
والمعترض ديّته مهموز
يشهد لنا التاريخ يا عجوز
إن موتنا بنموت فى الأهرام .. لكن نعيش طبعاً فى القصر
نبنى صروح المجد لمصر..

سوا بالقانون أو بالنبوت
فى المستحيل ذات نفسه نفوت
كل الشطوط بخيوط وشروط
ماسكينها من زمارة القوت
سوا أرملة أو بنت بنوت... أو جارية تصبح ست العصر
ومين ح يرضى بكده غير مصر
من شط الفيروز لما رينا
العرّض يَطوّل قوى بينا
يخت سفينة ورصيف مينا
خشب الأرابيسك التراسينة
من عضم الشهداء وبيننا... بوابة لسينا وقوس للنصر
ورقصنا ف ضله فداكى يا مصر

وشعبنا المصرى الأستاذ
يلضم جراح الشقا ألمان
فبلاش هبل يا غبى ونزناز
علشان كتبت كتاب ألمان
ح تقرّ على النعمة يا نهاز
الشعب مصرى أمير ممتاز مقطوم صبى على مرّ الصبر
ح يموت مبسوط ويفوت لنا مصر



صراع الأضداد

بتودع البحر شوق عاشق هدوء النيل
وتودع النيل هوى مشتاق لهوج البحر
متوزع القلب بينات النهار والليل
مرعيب من الضلعة خايف من طلوع الفجر



راس العجل

يا بلدنا يا سطيحه.. ليه راضيه بفضيحه
حكامك شبيحة.. ليه شعرائك هبل
جرحك سمّ روحهم.. فاتلخمو بجروحهم
مجموعهم مطروحهم.. نباشين فى الزيل

غيطك يطرح طوب .. فتقولى دا مكتوب
حالك بقى شقلوب .. راسك كعب الرجل
فنك زى طبيخك .. حلوك منه فسيخك
وبيكتب توارىخك .. ابن بتاعة الفجل
ملخومة كدة ليه .. فوقى يا بنت الإيه
داللى مقوى البيه .. زمارة وموتوسكل
كان حضنك فدان .. ركبوه الخصيان
صار ابنك غليان .. زيدتى عليه الحمل
ما اتعس أيامك .. اتسرقت احلامك
وقفاك بقى قدامك .. فوق كتفك راس عجل



حجر كوهين

عاشتنا أصبح لها لذه .. من يوم غزه
يا أمة جهلها .. عزه .. وفراغة عين
صك القفا ولا بتقاوحى .. تفقى جرحى
وخايبه تجرى تتصالحى .. مع زفت الطين
كافة ملوكك زعمائك .. وسبب دائك
عاجنين بدمك أشلائك .. برضه وقاعدین

يستبدلوا قبله بقبله .. رجّاله حُبْله
يخونوا أبوهم على زبله .. أو شقّفة طين
عفقوا الفقير من قفا قوته .. فطلب موته
وكنتموا صوته بنبّوته .. رعبوه بالدين
وكلهم ع الحق سادات .. أخوه وأخوات
طبع واسامى الحيوانات .. لكن راكبين
وعلى اللى راكب كله يهون .. بترول ولمون
ما دام تقيم ع العقل سجون .. تقلق من مين
مقاطيع غنم ويتستهبل .. هوش هبل
خمور بحور تمر معسل .. يملا السلاطين
ربك عطانا على الآخر .. دين ومساخر
سوانا صدفة وراح .. (اخر) قلنا له آمين
قدّر لنا نعيشها غلاية .. حكم دياية
عشرين حرامى وعلى بابا .. مش متفقين
غير لما فى البورصة يصلّوا .. ما بيخلوا
حتى الخرا .. بس يخلوا .. بهُبر وسمين
شرع الدولار بيوحدهم .. كتر زادهم
ويوم ما زعله يلوّدهم .. يقموا ساجدين

وكله على كله وسايح .. عبيّ صفايح
ح تدارى إيه الحال فاضح .. والناس عارفين
على قلبها لطالون قال لى .. مش ح نخلّى
ما الدولى صار شبه محلى .. ويساره يمين
بس اهدم انت يروق دمك .. يكسر سمك
اللى عماك كسّح أمك .. شال همّها مين
هبله ومسكت زماره .. طبله وطارة
فتلوّلها من دقن چيشارا .. وصلاح الدين
وقالوا لها سيبك ارتحنا .. كانت محنة
حنعش بقى ندلّع روحنا .. يا أبو مخ تخين
ودى نعمة ينكرها الجاحد .. ربك شاهد
هو اللى شاء نصيح واحد .. على حجر كوهين!!



كان وما كانشى..

رامبو وزينا هركليس نينجا .. خلّوا جوّه نافوخك رنجه
يا تمام راضى بقلب حياتك .. يا تطيح فى المخاليق بالسنجة
رامبو زمان راح الفيتّام .. قال دى شعوب ازلام أغنام
وأما أكل العلقه .. تمام .. خلع العدة وأصبح نعجة ..

قصوا ضوافره رُوحَ لأمه .. وشه قفاه مكسوف على دمه
واللى نفخه وفساه .. لمّة .. بقى سمسار فى بورصة طنجة
وعمل زينا موضوعة جديدة .. لجل الستات تبقى سعيدة
والراجل على أى حديد .. ح يصدق أساطير لافرنجة
شفتوا هرقل اللى سواء .. رب الأرباب - نص إله
عجبه فوهبه الصيت والجاه .. من نوزيلنده غلب شبلنجة
..

بقت الدنيا الكورة دى قرية .. ح ترقصها بصباح إيدك
لا عاد أوطان ولا بروتاريه .. كل عبيد الأرض عبيدك
وادی تفانين الراجل لابیض .. نساك اصلك يا انسان
كل ما تقبل وقفال يعرّض .. نسمح لك تفتح دكان
ح تبیع فيه أمجاد الماضى .. عنترزى شكوكو بقرازه
إنسى دول نفخوك ع الفاضى .. إتعلم ما تقولشى لماذا؟ ..
وما تقوليش بقى كان وما كانشى .. المخفى سرّه ما يبيانشى
كتر خيره الفول ما كالكشّى .. تيّس لها واضريها طبنجة ..



شـرـوـخ

تطل في المرآة ما تشوفش اللي أنت عارفه
مع إنك هو هو .. بحواجبه وبشفافيه
الصورة غايمة كك حجبت الأصل عنها
في مرآة كدب عمرك فات الأمر .. منها
من إيه قلقان وخايف والموت ح يسد دينها
أعمى طول عمره شايف وأطرش عازف لحونها
غمض وانسأه وخالفه ما دام قرفت منها
لكن لو كنت قادر .. يا مخضرم .. يا شاعر
فاضريها صرمة وافضح اللي عرفته عنها
دا عيبك وأنت عارفه راضع برضاه لبنها
يمكن تفصح مرايتك عن طيف عدو تناكفه.١.



في السيرك

شاعر في كستبان .. جنى في شكل إنس
قلع القناع فبان .. أراجوز نسوان وجنس



الامونيا

خيبتكم بالويبه	عيبيكم مابقاش عيبه
زارعين غيط غيركم	فايتين غيطكو دنييه
قولتولنا اشتراكية	وطلعتم حرامية
والخمسين فى الميه	من حظ الركيبه
وان كنتوا انتو نسيتم	خليتمو الدين فيتمو
ورجعتوا احتجيتو	من عُقد التركيبه
طبخه انتو طبختوها	قولتم رسملتوها
والجحشة اللى بتقرا	ح تخلّف كتّيبه
ما طلعتش الواد لامه	ولا لاقى اللى يلمّه
لو عيل جه يمه	ترموه فى التخشيه
ياسى قرد احنا زهقنا	م الكذب نشف ريقنا
عسكرها بتسرقنا	ولصوصها اصحاب هيبه
خدعوك يا أم الدنيا	خلّوكى فساكونيا
قرشك بقى الامونيا	ولبستى الزنوبه
سالخير يا حشاشها	يا كاتم نخاشيشها
ومعلم اومباشها	يفرح بها كركوبه

ضيقتم ملامحها	فرنجتم فلاحها
ورضيتو لشيخها	يرعبها بزيبه
والخطة الخمسة	لحنها الآلاتية
وحكيمها عدوية	دخنها فى البيبة
لا تقول لى ولا أقول لك	مين فينا المسئول لك
ذليت سينا بذلك	خطفوها الهليبة
ياللى أنت بالى بالك	سايق فى استهبالك
مع أن ف بال بالك	رعب منصّة قريبه



خبرات شعبية

لا تقول لى أنت مين .. ولا أبوك كان إسمه إيه؟
قول لى بتقبض منين؟ .. دوغرى أعرفك يا بيه!
لسانك الطويل .. بيزك على أى جنب
يا أبو الفورم الجليل .. بتغطى على أى ذنب..!
إدعى لرب الهيافة .. يعطيك بدون سبب
واياك تقول ثقافة .. بلاش قلة أدب..!



وحكيمها عدوية

يتدهول القرع لما الكوسة تتحكم
وتحكم الفمّة ع الإنسان ما يتعلم
معلم العصر يرضع جهل وييلم
يسلم العقل لا هبل بأف متكلم
بين اليسار واليمين يرمح على كيفه
بكيفه دهس الحضر بالجزمة رأس ريفه
اللى عريفه رهن عقله لتخاريفه
وسن سيفه لحساب الأمن برغيفه
صبح السلاح للمواكب فرجة للسياح

يجْزُر رِقَاب الأَهَالَى فِي السَّلَام دَبَاح
وَف سَاحَةِ الْحَرْب بَارِدَ الْحَدِ وَمُتَمِّمٌ
لِلْكُوسَةِ سَلَمٌ لَا يَبْقَشْتَرُ وَلَا يَقْلَمُ!..



عَالَمٌ تَالَتْ

قَلْبِي كَتَاكْتُ شَائِلٌ وَسَاكْتُ
ضَيِّعَ حَيَاتِهِ جَرَجِيرٌ وَنَابِتٌ
وَرَهْنٌ مِمَّاتِهِ لِسِيَاسَتِهِ خَابِتٌ
إِمْخَاخٌ زَلَابِيهِ أَحْزَابٌ عَكَارَتُ
وَزَرَا وَمَعَارِضَةٌ
وَتَقَافَةٌ عَارِضَةٌ .. بِأَلَا سَبْلَايِطُ
جُمْهُورِهَا عَسْكَرُ كَاتِبِهَا ظَايِبُ
عَايِبُ مَشْعِبِطٍ عَلَى كَتَفِ شَايِبُ
يَضْرِبُهَا صَرْمَةٌ يَا عَوْرُ يَا طَابِتُ
لَوْ صَدْفَةٌ طَاوَعَتْ الْحَسْبَةَ خَابِتُ
قَامَتْ قِيَامَةٌ ..

يَا مَيِّتَ نَدَامَةٍ .. الْخَلْقُ نَامَتْ
بَقْتُ الشَّرَايِعِ مِنْ غَيْرِ ضَوَايِبِطُ
فِي هَيْصَةٍ لَيْصَا وَالطَّبِيخَةُ شَاطِطُ
بُومِيَّةٌ فِي زُومِيَّةِ عَيَارِهَا فَالَتْ

والعركة فَلَنتِ عقدتها سابت

بين نعمة قائمه

ونعمة نايمة .. الحكمة قالت :

لو غاوى تركب .. يلزم تلابط

وإن كنت تحكم امسك مشارط

ولو أنت عاكم غاوى سواقط

عشان تخلد وتتول كفايتك

خلى الممّول

ينسى أنه أول .. واحنا تالت

حبك له سبك نقابات روابط

أمانات مكاتب ولجان عبايط

وأعمل معارضة بكشوف خرايط

من كل آريه خلقَ خلّايط

تليق صورهم على الحوائط

وإن جت بخيرها

أفرش حصيرها... وإملا المزايث

أعكم لجامها والا سابت

حتى أن رقبته ع الصدر مالت

سواء بكيفك أو هوجه قامت

وغصب عنك هريت كاتت

تضمن نصيبك لاقط وساقط
لا البيعه خسرت ولا زرعة خابت
وفى الكاريبي

شركة لحبيبي .. أبو حظ قالت
عاملنا تحفة .. ولو انه تالت
لا عمر راكبه .. أرابيزه شاخت
ولا ركوبته عن .. عيبها تابت
تقالينا واضحة .. فى دنيا غامت
خيبتها فاضحة .. عريانة عامت
عمك سوهارتو

طفى سيجارته .. واللّه بانته ..
وأوعى تبعبع وتقول كتاكنت
ما أنت شاي لهم فرحة وعايط
ويوم هزيمتك عبّيت شرايط
وجبرت قلبى يبلع قلايط ..
فموت كتاكنت وأنت ساكت.!



بدائل

جه الشتاف أبريل بطعم الزيف
مطر وموت يشبه هجير الصيف
من بعد مارس ما دُبًّا عذر للأشعار
عشان فى عز الربيع كانت بتعنى الريف..



فى الهلّة !.

قوم قول شى الله يا طاهره .. وأظهر بعض المهارة
ح نخش فى المظاهره .. وح نهتف بالإشارة
الكل الوقتى رافض .. الكل مع الحجارة
كله لكّله .. يعارض .. حتى جوز الحمامة
فأملأ بقك ح نهتف .. من بحر الثورة نغرف
عم التاريخ مستف .. ندوة تبّع الوزارة
فيها خبير التراضى .. ورقاص السلالم
وسمسار الأراضى .. ووكيل الست هانم
مع الواد المرازى .. ولقّيب التوازى
وزعيمة القوازى .. بالنضارة السيجارة
على خبرا الخرايط .. ونجوم الاسبلايط
واللى طبيخها شايط .. فصيحة العبارة

ما فيش بينهم مجامل .. الكل جاى يناضل
نضال جذرى وشامل .. ح نشمّع الدويارة
واللى رسماله بقّه .. أو غلبّه علينا زقّه
لو زرّجن يبقى حقّه .. مكسبنا فيه خسارة
كان اللى كان ما كانش .. الصدق كدبه يمشى
الواعى باع ما باعشى .. وإن خد الاستمارة
ناسك وهمّه همّه .. إياك تقول لى أمة
الزيطة فى الهلّة .. والخطّة فى الاستخارة
صار حكم الفتّة شرعى .. نرفض ونرضى قرعى
فين أيامك يا مرعى .. السجن طيّح بصارة
واللى مات فى الزنازن .. زى حرامى المخازن
ما دام فوق المآذن .. ينخع ليلاً نهّارا
بميراث جهل القبيلة .. فخر الخيبة الثقيلة
نسينا أنّه شاتىلا .. مصيرنا حاره حاره
والحال عمّره زَمَاهُو .. العبد وله إلهه
فقوم وادعى لنيّاهو .. يشاركنا فى التجارة
نضمن بيه كلّ مكسب .. نفط وفوسفات ومحلّب
والحال ح يبقى مقلب .. لو شن فجأة غارة..



رومانتيكا

يا ترى الأغاني مازالت ليها طعم ولون؟
مازال مشاعر بتحكم نبض هذا الكون؟
صدقني أفرد جناحك لسة فيك عصافير
خوف من جنون الخرس بتفني يا مجنون..



آخر خبر

زعيم هنكازية بلدنا المتين
خد الأيزو تسعه وكذا وأربعين
شهادة جداره .. بحسن الإدارة
ويط اليسار تحت باط اليمين
وجعل الخساره .. تبان لك شطاره
وكيف شعرة تقطع تشق العجين..
فلا يساوى بعرة كفاح السنين!.



الحساب الأخير

إيه اللي باقى لميت سلسيل سوى شعرك
وإيه باقى لك غير .. قصايدها ؟
الفريسة حكمت وغيـرها بت فى أمرك
على ملا الوش ترجع ناسى مواعيدها !.



على باب الألفيته

عصر البشوات راجع قاضى .. الأومباشى أصبح قاضى
يحكم على بكرة بالماضى .. (فى الرمل يراه وفى المنديل)
شغل راسك يا ابن بهانة .. أمك عيانه وجعانه
خدوا لقمته للهجنة .. (ويلاها العشق بواد أهبل)
حفظت آيته رفعت رايته .. من جوعها خبزت له جرايته
بات ينطح بغباوته مرايته .. (كسر قرنيه ولم يعقل)
دكتاتورى ديمقراطى .. يعلا مع الموج لما يطاوى
طالع مهما السلم واطى .. (وإذا هرب الحظ تمهل)
الحظ ضرب له .. فتحسنا .. وحبسنا ف كتمه أنفاسنا
قلعنا لباسنا لحراسنا .. (رهن لاسرائيل المغزل)
خطة رسمها له أبو ريالة .. لبسة كرافتة من البالة ..
وعمل ندوة لشرح الحالة .. (يحسمها بالحل الأسهل)
والأسهل فيه أسهل منه .. حتى البرغوت كسر سنه
وجابو الدكتور والذى منه .. (نقل الأحزاب إلى العمل)
ح تفنى فى ضل الصفصافة .. والعيان توصف له جوافة
وتصبرنا بصنف ثقافة .. (تسلبنا الروح فنتجمل)
يرمينا المر على المالح .. نتباهى بالفعل الفاضح
والآتى نسخمطه بالرايح .. (ونصدق أجهلنا الأهبل)



البكا علمنى النوح

فوت شوية لحكومتنا .. خليك بحبوح
إيه يعنى قيادة ودبحتنا .. وملتنا جروح
وباعتنا للى اشترى بينا .. أحزاب بجنية وتراسينة
دفعت فينا اللى يكفيننا .. دكان وسطوح
دينتنا للبنك المانع .. وسقيتنا من البحر المالح
الهم نعبّيه فى صفايح .. والسوق مفتوح
سنت على الكل أنيابها .. وسابت كلابها على ديابها
وأنت نصيبك فى حسابها .. البكا والنوح
يا دوب ح تنفس وتعيش .. مطحون بهمّ رغيف العيش
عمرك ما تطلع لك خرابيش غير .. بالمسموح
كدة بلادنا كدة نصيينا .. من إمتى كان فرعون سابنا
حتى اللى عصّر لباليبنا .. كان عنده طموح
فاخرس ح تطلع ليه فيها .. ويا تبقى فيها لا تخفيها
إلهف نصيب من خوافيها .. وأتوكل روح
هو احنا فاضيين ح نقرّد .. قول شعر وازعق واتمرد
جرّب كما شئت وجرّد .. تحاليل وشروح

مين اللى راح يقرا ويسمع .. دى حمير وزنقوها فى مطلع
صاحبك على التل مريع.. لطلوع الروح



(القشة والمقشّة)

عن جهل أنكرت اللى كان جارى
وراجع تغلّوش ع اللى بكرة يكون
ماسك لى ذنبى - الهفوة .. وتدارى
جريمته الفاضحة اللى تُقلّ الهون!



أمراض مستوطنة

ح تفكر تتعكر .. ومزاجك يتكدّر
فالأجدر أن تحذر .. تحلم أو تتذكر
هذى بلاد زهقانة .. لا مَبَارح هريانة
بالتاريخ عيانة .. ذاكر لها واتدكتر
أهاليك الخرفانة .. من جوعها فرحانه
لو باتت شبعانه .. على الفقر ح تتحسّر
ضاربة المخ طينجة .. شايقة المشمشة منجه
عقلها كان اسفنجة .. عصروها فاتحجر

على قد ما تديها .. ح تدوسك رجليها
وان طبطبت عليها .. ح تبيعك ع المكسر
الخوف خوَّخ راسها .. دوَّخها ف وسواسها
واللى كتم انفاسها .. تحمد له وتكبر
كدابة واصدقها .. على عيبها باعشقتها
الجعش اللي حرقها .. حمَّرقها واستحمر
صاحبة نايمة تشخَّر .. تفرق أكثر وأكثر
فاكرة الليل ح ينور .. ولوحده ح يتغيَّر
وتفوق م اللي هابلها .. وبالهيفة مبلبلها
تلقى اللي مقندلها .. فى الزفه متصدر
حامياها الـ .. حرامياها .. اللي غمَّى عينيها
على كيفها بيرميها .. تحت كعوب العسكر
وبترفع له الراية .. حدوتة بلا نهاية
ميت لون الحرباية .. والقاضى شيخ منسر
وأنت ياللى بتقرا .. فى المزامير والبقرة
خايف ليه م الفكرة .. وفى السكرة بتقشعر ..
لا هياك فى معايشها .. دنياك اللي عايشها
مع انك ورا جيشها .. متمهِّج بتهنكر ..



قلّة أصل

حبّرت باليأس كل الرسم والمكتوب
ضيّعت حلم بدما قلوبنا انكتب
عمرك ما راح تغفرها يا معيوب
سيّئناك كبريت وأنتَ واطى العتب..



قلّة حيل

يوم حظيتها ف بالى .. جنة تكون لعيالى
كان ظنى ح تتعدّل .. وتبدّل أحوالى
ضاع مالى وموالى .. مال والحال اتقندل
والداء المستعجل .. ساب الناب الفاشى
عض بلدنا وماشى .. بالخيره الحشاشى
يا ح تبقى أومباشى .. يا تكن وتستندل
وأنا شاعر متّعجل .. عقل زمانى اتبرجل
فى ساعات انسى واطنش .. وساعات تانية استقتل
لكن عيبى باسامح.. اللّبو .. لو استرجل..



بيئّة

أسروك يا نيل بالسلاسل .. وسلسلوك بالكبارى
أصبحت مكسور وعاقل .. مأسور فى شبك المجارى..



خرابيش الأصدقاء

ح يجردوك يا ابن عليّه
اللى دبح لاشتراكيه
من الوطنية
طالب دمك

ضاعت سنين الزنزانه
لاجيبت عيش للعيانه
والقروانه
ولادوا .. لامك

قاعد تلوم الناس وأنت
يا مخ نملة على جته
واكلاك عتّه
خالك عمّك

نفخت بالونات براميل
ورضيت زعامة كل عويل
رصيت مواويل
بالزوق ضمّك

وكلهم كبروا على ايديك
وبكل خسة داسوا عليك
اتمروا فيك
زودوا همك

كبرو بقت ايدهم طايلة
شيك الزعيم عدل المايلة
بطل خايله
داهية تلمك

اللى بقى هو القاضى وأبوها راضى
مليان وكب على الفاضى فاقفل فمك

لايق على رفعت سليمان للقفه ودان
فاضحك على دقن الأحزان تكسر سمك.



العرق يمد

لما سيادته أبوك صرماى .. بيلعن أم العيشة يوماتى
ح يريك على الدفع الذاتى .. لومبين حافى بخلقه ذواتى
تتشعبط على كل طريق ..

وتناضل علشان تملأها .. بشياكه ومنجهه ووجاهه ..
وعلى احبالها تقاهة سفاهه .. ترضى جميع لأطراف إياها
شرفك تمنه غيار الريق!

تلعن أم اللى عشاك .. واللى على اللى أمر رماك
كله بيتمرن فى قفاك .. حتى المختوم والهمباك
بتسليه فى ساعات الضيق

طبع الخدام سوّس روحك .. تسكر لجل تداوى جروحك
نفسك تستر عارمفضوحك .. ويعرّك سرّك بوضوحك
وتلاقى نفسك كادر رفيق

تعدل وشك تقلبه تانى .. فاحيت وتبان طالع بانى
كل وليمة بواقى صوانى .. فرّدة تبان وهبة وحلوانى

فتقص الإيد وأنت جرىء

شفتها جُرسَه شُفت ما شفتش .. كدبة وقَلتْها قلت ماقلتش
خدت الوهبة خدّت ما خدتش .. طلت ما طلتش برضه تخريش
متشعبط فى حزب غريق..

يا لسان متعبي سُلَيْمانى .. حين يقلب ع الناب الثانى
بالضحكة الحلوة الإنسانى .. يلدع زى حنش تعبانى
ويقول البغل فى لأَبْرِيق.!



إعتذار

عفواً يا با سليّم..	الجو عكرِ مغيّم..
الكذب ليل مخيّم	شاب من همّه الوليد
فى عصر الإختصاص	حزبك بقى ملك خاص
كازينو وميكروياص	للرقص وللعديد
سواقه أمير مغبى	ظبطها بشكل فنى
قولكنى غصّب عنى	ضرسنى بالحديد
كافة خيوط فى كفه	جتتنا صفوف فى رفّه
زمن أم عبده تقّه	فى وشّنا البليد
سلسال أبأ وجَدأ	باعنا عدأ ونقدأ
حين حب الثورة جدأ	على شرط من بعيد
وانا مكسور الجناح	مش بانبش فى الجراح

لكن خيمة جناح	فضحت سره الأكيد
مر الداء القديم	مافتش دماغ سليم
واسأل عبد الحليم	أو ورفعت السعيد
مين اللي جاب دُرفها	والبيضة مين خطفها
بلعها وقال حدفها	وقال هل من مزيد
للى ع الطبلة هلّوا	كلّ امّا زادوا قلو
علشان سيدنا اللي حلّه	ح يحلّه من جديد !



بحكم العادة

وما عادش فاضل سواء المناضل محمد سعيد
لبعض الولاء المؤكد أكيد .. لحلم الزعيم القديم الوحيد
وبعض القليل م الوفاء المفيد
لأسطى أمانة النظام الجديد !
..

وذاك لأنه محمد سعيد
محصن بمصل الحصانة الفريد المضاد للخيانة
وراضى بجنون الإيمان العنيد ..
..

إذا الأسطى كايد الأعادى .. يكيد
وإذا عاز يزaid صحابه - يزيد

يساند يكايد يعاند .. يعيد
ودايما محمّل مهمّة ثقيله - حماية القبيله
جميع المشاكل بسيطة وكل المسائل حديد فى حديد ..
..
وما بيده حيلة .. ضرورى يقدّم تمام كل ليلة ..
فيمنع بلاوى بتوع القهاوى .. ويرفع شكاوى
إذا كان جراية النهاردة قليله
أو المونة شحت .. وجّف الثريد ..
ويرصد بعين التاريخ اللى يحصل .. بتفصيل مفصّل ..
عشان يستمر الهدوء السديد .. مأسّل سديد
ومين اللى علا؟ ومين اللى هبل
ومين اللى حلل وهلل فبّدع .. ومين كان بليد
ومين عنده لسه مروّة يقرّع ..
ومين جذّره من غل صدره مخّل
ومين زاد حرامّة من الزاد .. ويرطّع .. ومين اللى فلسع
ومن تاه فى لغز الحلول البديله .. بقت حالته نيله
ومين لسه راكب دماغه البليد
ومين اللى فاهم ؟ حويط أو عنيد ؟
ومين اللى طالب يلاقى الوسيلة ..
فيسمح له صاحب المقام أنّه يرضع ..
ويدخل فى حضرته ولايته .. ويصم عمّا بالمبايعه ليزيد ..

فيحسب في زمرة معاوية وجيش الوليد
ونضمن حمايته ويصبح مريد
بحظوة ومكانه تميّز سيادته ف طابور العبيد
جميع اللى عارف وكاشف ذممهم .. وماسك زمامهم
أو اللى بأمانة وحس المناضل
بيحفظ مقامهم .. محمد سعيد .).

أشياء طبيعية

اكلك منين يا رفيق عمري .. والحب ما فضلش فى حاله
حتى أنا احترت ف أمرى .. لما ابن اختى قتل خاله
والشاعر اللى رضع شعرى .. خاطرى ما عادش على باله
فرجعت من آخر صبرى .. بوهم أسرنى جماله ..
لا قادر احكى ولا استجرى .. ولا حزننى يشفيه مواله ..
طب ح اعمل إيه؟ والداء مصرى .. عمر الهزائم .. رسماله ..

عدوى

النيل جنون بالطبيعة .. ومواسمه ماهيش وديعة ..
جبار عفى لحدّ .. يهمّد .. فى حضن مصر المطيعة

أشياء غير طبيعية

دمك هرب خوف من جارك .. بيّعتنا فالصو مصاغنا ..
قبلنا جهلاً .. أعدارك .. فى برك هواك اتدرّمنا
شربنا من ذل مرارك .. نقّعنا جهلك وصبغنا
نموت نعيش يخرب دارك .. عسكر غجر جابم داغنا
وسكو أمة أفكارك .. بالبلغة رقّعوا أصداغنا
فيليق عليك ألف مبارك .. والمخبرين وأهل المغنى!



مته .. فيه

الماضى بيعض قلبى بأغنيات الشوق
يلهلب الذكريات بالحق والمحقوق
جمر اشتياقى بيكوى وقلبي ينفخ فيه
أتاريه إذا ما اکتوى بماضى الهوى . بيروق!



يا قلبى لا تفرح

أبشر بطول العمر يا .. كداب
لا سلم جىاى ولا حارب ع الأبواب
ريك كريم بيسبب الاسباب
الحزب غيّر جزمته لقبقاب
والمؤتمر جىاى لك على الطبطاب

كل الكوادر ح ترقص رقصة البطة
وكل مفرم ح يلهف م الجميل قطه
تركب محطه وتتركب لك محطه
وكل شيء بالضبط زى الخطه
وان كان على الكشرى ونقص الشطة
نرفد (يقين) ونغير البواب..

لكن ح تفضل (فريدة) زعيمة الكتاب
والشباب (رفعت) يفتى فى الإرهاب
يستبى قلوب الشورى والنواب
(سمير) أمين القاهرة الدحلاب
عنده روسته ترجع كل كهل شباب
(عصام) يلم الدور بكشف حساب
كى يطمئن الزعيم ويهلل الأصحاب
كل العيال لاسياخ خلاص ح تكن
واللى ماهوش عاجباه كشوفنا يرن
ح ناخذ الأغلبية غصب عين الجن
غصن الزيتون فى إيدينا برضه له أنياب
المؤتمر راح يبقى على الطبطاب..

فليطمئن الزعيم وينام ولا يهتم
ما باقى فى وش حد من اللى بالك دم

وما عادش أحداً له صالح يشيل الهم
 بكره أكيد الحكومة تشرّع الاضراب
 وتعدل النسبة فى الشورى وفى النواب
 ساعتها فى ندهة واحدة كلنا نتلم
 نلحق هُبر حقنا فى انجر الانتخاب
 ونقى إنت اللى رايدة مننا سيادتك
 نحشد وراه الجميع فى جبهة الأحزاب
 كى يستمر التحالف بينا كيف وكَم
 نجدد البيعة ويفوق الجميع م الغم
 طنطا تفنى اشتراكى تستجيب إخطاب
 وما دام حنقدر نبیض إيه لازمته نكاكى
 دى البغلة بالعلم قادرة تواصل الانجاب.١.



تشطیب

أهل الكلام شطّبوا سوق الكلام بدرى
 لا باقى عالم ولا هلالى ولا بدرى
 الكل أصبح سعيد الحظ... مُتوافق
 أبو كيفه عافق لسان الخرس من بدرى
 أهل الكلام شطّبوا سوق الكلام وألّت
 لا عاد مناقر ولا مداقر ولا مُشتط

نام كله واتبط قول شى الله يا بيومى
مافيش لا تكتيك ولا استراتيجَه كَلَك كَت

وشيخ شبندرها .. لم أوراقه قطعها
خَلَفَ خلافاها حسب طبعه وطبعمها
واللى قَلَّت قَط لفلوغه وقطعمها
ما باقى غير موجة خرسا تابهه من غير شط

وأنا اللى حاكمنى عَجَز الحزن عن شعرى
الباقى من عمرى ما عادشي عليه بدرى
لا لاحق اشكى ولا أشتم ولا استَجْرِى
أَكْمَنَى من خيبتى بدرى إلترَمَت الخط!!



سيراميك

مبروك يا سى وىكا.. يا بتاع أمريكا

ما بلعنا لساناً.. السّت شريكه

لها مجلس رسمى يتكلم بإسمى

ويغير رسمى حسب التكتيكه

صحصح م الجوزه أمك أراجوزه

وماعاد لك عوزه مابقيت روبايكا

كان سبعة في أوده	كانت أيام سوده
دا كلام أنتيكه	ماعدتشي الموضه
وبلّع مفتاحها	جالها اللي فتحها
للأطانتىكا	وبقت فضايحها
شاشات ومجله	والفن تجلى
دقى يا مزيكا	أحزاب حسَب الله
منسَر حراميه	تسعين فى الميّه
مابقاش حاجة ليكا	فوق يا ابن عليّه
ويلدنا اتخطفت	الدنيا اختلفت
فرشت سيراميك	وأهى سينا اتشطفت
على ذمة خالها	رهنت خلخالها
راحت فى السيكا	والعصر خيالها
قفلوه المسرح	فافهم يا مزيح
إنسى البوليتيكا	وإن كنت مفتّح



لقاء قمت- متوسط القيمة

فتحية قابلت جرهوم..

إتبادلوا أشواق الثورة الحمرا فى صالة الشيراتون

هدرت فى أودانهم رغم الديسكو.. وسقوط موسكو.. أصوات الشارع
والجماهير فى الكوت دى فوار وف صالات الأسواق الحرة.. وكبار
الزوار رفّت فى أودانهم نغمات كلمات الكتب الحمرا والخضرا اتعاتبو
على بعض الأخطاء غير المقصودة بالتاكيد فى تحليل الموقف من حكام
صنعاء.. فى ظل طبيعة الفترة الحرجة.. ومن تطبيع العلاقات مع
صدام.. وموقف فتح من الحكم الذاتى وبعث الشام.. وتطويع العلاقات
الثورية بحكم الحالة الحاضره لإرادة السعودية.

ولا كلمة عن عدن الحرة أو عن شبيرا..

ولما اتعاطوا أنخاب القهوة المرة

انسابت بعض الأحلام الوردية عن بعض الأحزاب المصرية..

سوا كانت عايمة على السطح اللى مزيت.. أو تحت السطح الميت..

فاتذكروا بالخير بعض الأحداث المؤسفة والأسماء المقرفة وكذلك

بعض الأوهام.. عن بعض الأوضاع اليمنية فى القاهرة وعمان..

اتفائل هو كثيرا.. علشان التاريخ لسة بيؤكد قوانينه الحتمية.. ولسة

ما ماتش.. وبالعكس شافه بعنيه بيتتطط فى عينيها العسلية..

وبيتشعبط فى شقاوة بنت اربعتاشر على سلم ترمای السيدة زينب.

وهى كمان اتفاءلت أكثر منه

علشان شافت بعنيها نظم الستلايت، بتحط طيور الحرية تبيض فى

كهوف الزمن الراكد على سطح بيوت صنعاء .

ثم افترقوا ولا العشاق حاسين روحهم خف الريشة ..

هو.. لجلسة قات مع بعض الحكماء الخبراء فى تحليل

الموقف وردود فعل الأنباء

وهى.. لكتابة فكرة جديدة لدراما سعيدة ومفيدة.. عن تنظيم نسل
الأسرة العربية من أجل خلاص البشرية.. وخصوصا فى الأحياء
العشوائية ومجتمع الفقراء بإعادة تحليل الموقف من سلطة يوليو -
ومحمد فاضل واليونسكو وصفاء.. بعد ظهور بعض الآثار الإيجابية فى
خط المؤتمر الثانى فى كريم الدولة.. بعد إقامة مترو الأنفاق..



مرض وراثى

طلع الولد ألف مدنة .. للوطن يدن

ماسمعش صوته سواء .. لكن انتشى جداً

يكفاه يحس بهواه جمرة أهات الألم

بشّيش غناه بالأمل بقى مستحيل يحزن..!



الكاس الداير

يا أمة الأهلئ .. جالك نصرع البهلئ

راياتك الحمرا لايقة للنسا سوتيان

بشرنا صوت انتصارك فانتشكح أهلى

مع إن كافة هزايمك قابلة للنسيان
جمعوها فى السيرك صحبة قياده وقواعد
ويحتروها شقاره نجاره ع الرصفان
عاش الملك حتى مل قَرْفَنَا .. فارقنا
مات الملك حتى مل النومة عاد سجان
والرَّف غيّر ضميره الندل هزَّأنا ..
زَهَن هُدمه الفِقى واتأجّر الفنان
واحترت أنا بين فريق وفريق من جهلى
مع إن كل الفرق فى خدْمَة السلطان ..

...

وقّر دموع النكد يا قلبى .. يا غاوى
بين الأزل والأبد متقدّرة الأحزان
لا كنت كروى المزاج ولا استمعلاوى
ولا ييفرق معاك البلف م الشكمان
الدنيا لعبه ح تفرّج بيها لو ناوى
على شرط ترضى الحُكم مهما عكم أو خان
لا العبرة باللى لهفها لحْم وعكاوى
ولا باللى لَتَّ وعجن فى اللجنه والجرنان
الدورى منذ الفراعنة ورث أهلاوى ..
والناس فى كاس المرارة تعد له الأجوان .)



سلو مكاتب

ما دام يحكم موظفون، فأنت كالكاركي فى السجون
لذا لا تكون ولن تكون... إذ كلُّ عقلٍ إلى جنون..
تلوك ورقاً.. تروم ورمأ.. فإن كبرت أوصرت علماً
تموء تحت الفصام المأ.. حتى تخلل.. كما الزتون..
ولو تجاوزته المدى.. باتت فى ضهرك السيده
مهزومة أو مهددة... وأنت تشكو لها الشجون
وإن بدلت حالة بحال.. خرجت من صورة الرجال
وصرت ماءً على رمال.. تضيع فى غمضة العيون
مهما اجتهدت تعود تكدح.. وهماً جمعت أن رمت تتجح
فإن ضُربت.. فالكل يريح.. والشك يأتى من الظنون
كالريح ليست لها ظلال.. ينمو الغباء على الحبال
كشيخةٍ مستها ضلال.. صارت مديراً لبُنسيون
تطفوا إذا عُمّت فى الرياله.. وتقب لو لك تيزة خاله
تحكم وتملك حمل كسالى.. والكذبة للعبقرى حصون
توصل فتصبح وكيل وزارة.. لك خمسميت جاريه للإدارة
وربع ميت عبد ذو مهارة... لهم فى علم اللبط فنون
هذا قانون لمن أراد، من يوم قالو لنا العمل عباده
خصوصى لو عندك الشهادة

والواسطة وفهمت فى الشئون

وهذا سلو الفراعنة مصرى .. وإن كان يبيهت خيا به عصرى
لكنه قبرى ويواقى قصرى .. تشهد علينا عبر القرون
غير الموظف فى بلدنا رايش، من عهد مينا بدع المعاش
حتى أما صاروا بكاب وقايش بدون قلق بورصة . يملكون
قطاع عمومى عملوه خصوصى .. طوسون ما يفرق عن الباسوسى
كل اللوايح إبداع لصوصى .. وكله عند العرب صابون
من كل ملة .. على كل لون .. يخططون ليلاخبطون
من الحوافر حتى القرون وعلى نفسها حتى طالون
حتى اللى شعبى واللى مثقف .. لابد يبهت عليه موظف
ويا إما تشحت يا تبقى مقطف يا إما تهتف فى ميكرفون
لكن لابد إن تبقى واعى .. أنا اللى جيبتك فكون بتاعى
وف كل خطوة لازم تراعى إن اللى أعطوك يمنعون
وانت يا شاعر يا أبو الشاعر .. إيه اللى حدك على درب واعر
فيا ح تقلع وتبقى داعر .. يا أما تلبس ميت بنطلون
وعشان ما تضمن الأمر يسلم .. إضرىها صرمة والقهوة أسلم
ومن الوظيفة السجن أرحم .. صخّص لنفسك بازع عيون
ولا تأمنشى حتى لأخوكا .. لو صدفة أو قصد عيتوكا
عمك جوز امك ومش أبوكا .. أشرف لك أنك تبيع لمون ..

(ديسمبر ١٩٩٧)

تقل التصافى

طاغحة فى قلبى القوافى .. معبى من لهو خافى ..

سلسل رقابنا قوافى

يا لهوى من حزن وافى .. ومسخرة ثقافية

العيب يغيب إزاي ؟ .. وأنا شايلة رايح جاي ..

بادلت نقطى بشاي

مصمصنا تقل التصافى .. وذلى القومجية

طب قول لى يا للى حالها .. يا أبو الخوافى .. الخرافى

على أى جدول حاسبها

وبأى لغوة كاتبها .. واقراها على أى نيّة

فوق كل كرسى رزيّة .. يا عتل يا دهل .. فافى

يا سُهْن بالزوق خاربها .. فى عهدته شعب حافى

ابدع لنا نظرية

حرامية مش حرامية .. وكدابين أنبيّا

وحرب من غير عساكر .. أوهام شايفها بعينيّة

هذا الزمان الخرافى . علّمى أكيد ميه ميه ..

النيل بقى فى التصافى . وح تظهر الجنيّة

تعلن صريح اعترافى .. بعودة الملكية ..



استنجلينا

يا أيها الليل الطويل لا تتجلى .. ما دام صباحك زى وشك تمبلى
الضلمة آمن للى صابهم العمى .. يتساوى فيه الخالى باللى مش خلى
الكل بيضبش ما ييمدش خطى .. وبقي الهلهلى هو نفسه الحنبلى
واذ مافيش فايده .. فتيلها قوى .. ح تبقى حجة للمكسح .. يحجلى
قد يفضح النور قد إيه اتعفت .. جتة اللى فى العسل .. نومهم حلى ..
الظلام ستر للصوص .. والمسروقين .. يرعى فى حمايته الفاجوم والأهبل
واحنا خلق فقدنا أحلام الصبا .. نمنا فوق تل الخداع الفللى ..
كان زمان الفجر وهم .. وفيه رجا .. والزمن خيب آمال الهمل
فلتكن ضلمة وخليك فى الطناش .. وبلاش نهار .. ييجى حمار .. وترللى!



كلام قديم

لازم تبقى نضيف من جوة .. علشان تعمل فن جميل
الفنان مش نص فتوة .. ولا عُصباتجى من المخاليل
والشاعر فى حقيقته . القوة .. للناس المهوددة الحيل ..
روح الفن حنان ومروءة .. والفنان إنسان ونبيل
إزاي يكتب كدآب قصة .. للأطفال .. ويربى العقل
وإزاي كاتب أصله حرامى .. يبقى محامى وصاحب فضل
وإزاي روح الشعر ح تسكن .. قلب الندل .. قليل الأصل

وإزاي غنوة تملك قلبك .. لما يقولها خسيس وعويل
 ممكن تبقى ضعيف أو خايف .. ممكن لما تحب.. تخيب
 حتى لو أعمى أو مش شايف .. لكن مش هايف أو ديب
 اهلك فقرا أو هاى لايف .. مش فارقة.. لو كنت أديب
 ح تكون أغنى الناس لو عارف .. تعطى الدنيا حلم جميل..
 يمكن كلمة جميلة تشكك .. زى الوردة لكن ترضيك
 ممكن صورة تعصر قلبك .. زى الريح.. قصة تعريك
 ممكن بيت م الشعر يهزك .. لكن الشاعر إزاي يأذك
 عمر الشاعر ما يكون داعر .. دالفنان فى الليل قنديل
 النحلة كان أصلها دودة .. لكن الدودة ما تعطيش شهد
 والهمه الخايبة المهدودة .. قشة ف ربح ما تهمش حد
 الموهبة.. هبة.. لو محدودة .. تملأ القلب اليابس ورد
 وعلى القد تمد حدودها .. لحد النور ما يهد.. الليل.
 ياللى قبلت خصال الدود .. إرفع راسك شوف الشمس
 روح الإنسان مش محدود .. ولا موعود فى حواسه الخمس
 نبض الفن حياة ووجود .. أرحب من دهاليز النفس
 المزينة ماهيش فى العود .. ولا بطنك نبع المواويل..



كلهم صناديق

نصّهم صناديق زبالة، ونصهم صناديق ندور
صدوا من جوة ولكن يخطفوا العين بالقشور
راهنوا بالخوف ع السفالة والعمالة الشرط نور
نصهم صناديق ندور

يعشقوا النسوان سلالم .. يعشقوا الصبيان جسور
والحرام ميزة ومغانم والحلال سحت ومظالم
لو فى جنة .. أرض بور .. نصهم صناديق ندور
نصهم صناديق زبالة ..
وهمه .. همه ..

يطلع الواحد هلمه .. بعد عصره ف ميت مهمه
عقّنت فى كرشه أمّه .. وريحته بتفحفح بخور
نصهم صناديق ندور .. نصهم صناديق زبالة ..
وكانى مانى ..

كدابين زفة وغوانى .. ولحاسين قعر الصوانى
يلهطوا الملايين كماله ويطمعوا ف ملاليم كسور
نصهم صناديق زبالة .. نصهم صناديق ندور
م البواقى ..

باعوا اكفان الفدائى .. ولحنوا الكذب الفنائى
دكتوراة بالإبتدائى ..

كفنوا النصر بأغانى حفروا لاجر حى قبور
فشخره تعلل المباني .. فوقها وتقوم القصور
نصهم صناديق ندور نصهم صناديق زباله ..
والهباله ..

فى الكتابة تبقى حالة أو قبول بالاستحالة
إن مستخدم عوالة والا مستسلم يثور
نصهم صناديق ندور .. نصهم صناديق زباله ..
وبالوكالة ..

عتقوا خمر الندالة .. تقنوا فن الاستمالة
وبالتحليل المحالة .. هتكوا أسرار القوالة
والكتابة والحضور
يوم ما ترضيك المقالة تدفنك بين السطور
كلهم صناديق ندور ..

حق زور

لف حين تقصد تدور - خف عند الزنقة غور
شف رف كما الغزالة حين تطاردها الصقور
طير كمصفور العصور

ريشك المنتوف أصالة .. ديك المقطوع نبالة
كلهم صناديق زباله .. ليه يا خاله ..
كل ملة وليها دور

يوم ما حمّينا الحثالة.. آن أوان هز الخُصور
الضعيف محتاج كفاة.. والشريف دهسه الوابور
فادعى للمولى الغفور.. يوم قبول الاستقالة
يكفوا على سيرتك ماجور..
لا أنت نباش فى الزیالة.. ولا هباش م الندور.١



الفوازير

(١)

قصير وقزعة وأصله مُريب
لكين واد مخلص ولبلب لبيب
صعيب احتماله ومالوش حبيب
سوا اللى ف زربته شوالى الحليب
عطوا له أمانة فلوس الفنون
فظهرت عليه المواهب جنون
فتلعن أبوه لجل أصبح أديب



(٢)

على قد ما شكله هيّن وعادى
تخصص نيممة وسلاطين زيادى
وبالقشطة فورا من الحلة دوغرى

خبير اسطى دق الخازوق المغرّي
جميع من تولوا الفنون يكرهوه
لكين ميزته جاهز منين ما يعوزوه..
ويحتاجوا لَتَ القاموس المعادى



(٣)

معسل وملبن وسمسار حريم
واسطى قديم فى السلوك اللئيم
وفن اللى يعلا أكيد حين يطاطى
فيفشخ ببسمة خبير انحطاطى
وكان عمره ناقص وخدمه موائد
لحد أما حصلت صبح نص زائد
لأن الصبى بتاعه أصبح زعيم!



شرط نور

كل المطلوب .. يا جِعِرْ .. تردم ع السر
تهمبك للهمباك وتعاك مع العكاك
تشهد زور وتقرّر
ريحهم بيقى هواك .. يرخوا الحبل معاك
يعطوك لقمة تبرّ!



التقرير الثقافى

حضّر أمصال لاشتراكية .. سرسبها تعكر فى المية
بس احذر .. داء الحرية .. أأمن م الجوعى الأموات
لذا لم الصبيان الحمل .. الأنصاف والحشو المهمل
زوّقهم وإعملهم كمل .. يبقوا أفندية وبوّهات
عمّدهم فى اللاكاديميا .. بشهادة ولو ألامونيا
وأديهم أيّزو كفاية .. بحساب قوانين الجات..
دبلومة ودكتوروهات .. وزّعهم ع البوتيكا
دا ح يخرج ودا ح يألف .. ودا يرطن للخوجات
إسقيهم الكاس الدورى .. بمضاد الفكر الثورى
يذمّنوا ع القبّض الفورى .. خالى ضريبة المبيعات
أصبّفهم ظُرف وخفّة .. ح يشيلو معاك القفة
يقلعوا حزامات العفة .. مع ان لهم شنبات
عوّدهم ع الخمارة .. وأرّخى على الماضى ستارة
المهرة العارجة حمارة .. تندب ع البغل إن مات
وأحميهم من (العصفورى) .. من تخاريفه المندورى

وأحذر م الورد الجورى .. حين يطلع فى الخرابات
 راحت ع الديالكتيكى .. والعقدة الدرامايتيكي
 بس الحلم الأمريكى .. بكون انسانى ساعات
 فاعوى عليهم من (البى) .. والواد (وليامز) اللعبي
 من أبصر إيه متخبى .. أمريكا لها نزوات
 إعجنهم فى هزايهمم .. واكسرع المهل سمومهم
 خليههم عايشين يومهم .. واعفَقهم م الهفَوات
 دايمًا بالفُرص احميهم .. لباريس روما وديهم
 يكرهوا ريحة أهاليهم .. مش فارقة أولاد وبنات
 العالم أصبح كونى .. والفلسفة لعبة (عونى)
 الشكلى تحدى اللونى .. لُب المسرح حركات
 يَرْفعوا راية التجريبى .. والتحديثى التركيبى
 وأنا ح أرضى اتلهى بنصيبى .. أحلم بفَوازى سنباط
 مشموط فى الهم الأزلى .. بشروط الدور الهزلى
 مرطوط فى الزجل الفزلى .. المخلوط بالإحباط



شَلْتِ الْأَنْسَى

وزير خبير حوالية شله	قفّة وقله
وحمار وقفل ومانقله	وصبى غندور
وبورمجي وقزعة وعبيط	وخبير تتطيط
وبروفسيرة فى البرانيط	وشريط مكسور
ولأنهم أولاد بسطاء	عرّة وفقراء
أول ما عرفوا الألف الباء	نطوا على السور
واللى شبط فى كركوبه	واللى فى زوبه
واللى عمل أمه ركوبة	تاكسى حنطور
واللى درّس فى أكاديميا	أصول الكيميا
سحروه بدقيّة باميه	بلسان عصفور
واللى فهم امتى بيدوق	وازاى بيروق
فلخمه بالحق المحقوق	داير ما يدور
واللى اكتشف امتى يهيف	لجل يكيف
فى عز طوبه بيصيف	فى جبل الطور

واللى عمل ملشظة وحلاق	على سِلُو بولاق
يعمل فتوة أن حب خناق	أو عاز طرطور
وكلهم كانوا يا مولاي	يا غداك يا عشاي
اتمروا ويا الريح الجاي	فبقى لهم دور
واتقنوا فنون التقرير	والشرا والبيع
فنهشوا زى قطط مقاطيع	فى بواقي التور



أحقاد

سَقَمَان كَمَلِكِ الْعَجَم .. قَرْفَان كَمَدِيحِ صَنَم
 قَلْقَان كِرَاعِي غَنَم .. وَكُئِيْب كَحَافِرِ قَدَم ..
 مَخْبِرِ عَدِيْمِ الشَّهَامَةِ
 إِيْهِ اللى مَرَّرَ فِى رِيْقِكَ وَكَرْفَسَكَ فِى طَرِيْقِكَ
 مِنْ يَوْمِ مَا خَانَكَ صَدِيْقَكَ .. أَصْبَحْتَ عَلَى وَسْعِ ضَيْقِكَ
 بِتَخْبِي رَاسِ النِّعَامَةِ
 قَرَحَ عَيْوَنُكَ وَمَايْن .. حَتَّى الْوَطَنِ نَفْسُهُ هَايْن
 بِيَجْسُوا لِحِمَةِ الزِّيَايْنِ وَغَسَلَ نَافُوخُهُ اللى خَايْن
 وَلَا قَامَتَشِ الْقِيَامَةِ

لخموا شاعرها بحشيشه.. وحميرها فى اَحمال عريشه
 غفيرها قلب فى عيشه.. واللى احتمى بضل خيشة
 مستكترين له السلامة
 وأنت اللى راضى بهدمه ويتحشى زورك بلقمة
 داير كما التور بذمة قال إيه عشان تلقى كلمة
 تختم قصيدة الندامة
 يا عم اخرسها وانسى .. بطل مهاترة ومشاكسة
 الوكسة من ضهر نكسة .. روحك ما طلعتش لسة
 أشرب سموم الكرامة..
 قرفان؟.... صبحت قريية القرافة..
 سقمان؟.... بطل حشيش الثقافة..
 ع القمة ملك القيافة.. سكران بخمر الهيافه..
 ولا طفل على صدر ماما



شاعر لياالى الحشيش

زى بالونة خفيف بيطير
 ويزاحم فى سماوات الوطن المسكين . العصافير
 لكن قلبه الهايف.. منفوخ خايف م المناكير
 يلبس ماسك الواوى .. شايل مخلة حاوى
 ويبرطم بفنـاوى .. ويفبرك فى فتاوى

وعشان تافه غاوى
يمشى عشان الوهبة .. حافى على المسامير
جت له الفرصة لعنه .. بلية مشت ويام ..
لمت نجمة سعدة .. باع شيخه ومولاه
وبقى سريريه حصير

من وزة لو ظووظه .. من موزة لكلبوظة
حط الثورة فى جوزة
سبحها مع البوظة .. ويا مساء الخير
غير إنت المية! .. شد اكتم واهى جاية ..
ضحكنا الحراميه والتسعين فى الميه ويتوع الطعميه ..
وبقى الثورى غفير ..
فابرم وسطك يا اسطى .. بقت الحالة ألسطة ..
لنا دفتى رفى البوسنة
ومكافاة تزوير

مولد والولى خايب .. كلت البنات الشايب
والعايب بقى نايب
وح يترقى وزير
بلا جامعة بلا ريف .. راح عصر الأساطير

وانت يا ابو العريف.. كان حلم وتخريف
 والمصاريف مقادير..
 وشبعنا تكدير
 صوتنا ياما زلزلهم .. نسوان أو خناشير..
 خبرة.. نُص خبير
 شاعر من منازلهم.. أنزلهم أغازلهم
 وأكايدهم أيدهم.. أأمن قبضة أيدهم
 وأضمن نــــــــــــــــار مناقدهم
 أسهر مع أرازلهم ... لكتابة التقارير



الضجيج الثقافي

يكفأك ضجيج يا صبي.. وزمت علتنا
 وجعلت حتى الغبي يرثى لخببتنا
 باسم التراث شعشت في الفن تحاشيشك
 والكل طبل وزمر لجل بقاشيشك
 العلم دا اللي ادعيتـه . نقوَرَة . تنوير
 خجلان من السفسطة الراكدة في قعر الزير
 سايق عليك علتك.. اتغطى عريتنا

...

فى المجلس الأعلى تعمل كل يوم ندوه
قد الكلام الخرس قد الحرس غدوه
بين فلسفة ع المنصة شتيمة فى خناقه
جغرافيا لاغية التاريخ على سيما حراقه
عمالة تدب حالتها وتشكى فى المحمول
وتلن المسرح اللى رمانا فى المجهول..
وأنت بتقنعها تلحق ممكنات العصر
بالرقص أصل الفنون جوهر حضارتنا

بقصور ثقافة قصور (إسمُن) على مسمى
مصمص عضامها ورماها اللى مايتسمى
بعد اللى قبله ما حبّله ببذرة حرام
جعل أديبها اللى كان شرف الوطن خدام
وملا الحظاير فلاريا أوديوك بتبيض
أدباء سوارى وغفر حسب القمر بتحيض
ولصوص شريفة كما الشعرة ف عجینتنا

وبفن تليكى كله فى الغيطان نوار
له ريحة زى البراص بتعس فى الدوار
كتر المراكز يكثر نايبه ع الطاولة
كافة ورقنا سليم من عهد لمقاوله

ولكل مركز أمين له خبرة فى التأمين
فى صوبة الأمن فتح مخه ع الملامين
يا دويها بالكهريا يلعلمها ينقطنا

وأثار لها جوقة فاهمة كيف يكون التيم
حين ينكشف مكتشف حوط عليه ترميم
وهات له خبرا من المافيا وأهل العلم
تدبر الخطة ترسم لك سيناريو الفيلم
ويخته من فيه يشارك حتى لو كومبارس
واللى يتريس نلبه كل بوله بمارس
سحر ابتسامتك مخلي ديقنا فى زيتنا

مفاتيحها ف إيديك أمانه تسرقوا الصندوق
واللى دفع يتقمص هاته معانا يدوق
كله يدوب فى الشيكات والنص فيه بركه
لم الولاد والصبايا ف رقصه مشتركه
النشر محتاجنا برضه السيمما لها عوزه
نرفوزة دلعها وأرضيها اللى نزنوزة
داحنا اللى وقعت فى عشق الشاشة نينتنا

عمر الثقافة خرافة الرك ع الطلبة
دى بلاد عبيطة ابتلاها ربنا وهبله

من قلة البخت فى بيضها بتتشكل
وحين خَصوها بقت فى الراس بتتكمل
واللى فهم من ولادها الفولة لوّدها
باعها لوالى الجهالة رضاها عوّدها
تدعى له فيشد حيله بكسر رقبتنا

فَرُوق يا روقة و رُوق لسة فيها كثير
من عهد مينا لقعر الحلة للمناشير
نازلين فى نافوخها هُبش وعمره ماخوِّخ
ياما قبل منك غزوها .. عشقها يدوخ
فجأة بتنزع هدم الإنكسار وتقول ..
وتنفّض الهَبُو والعَتّة ولغّو القول ..
وإن كنت ناسى الأصول .. أقرأ حواديتنا ..

ياما قبل منكم وياما زيكم شوقنا ..
غرقوا فى طينها لكين ماحصلّوش ريفنا
وهربوا زى الفيران لما السفينة تميل
وعطشوا ساعة الحساب مارواهمش النيل ..
فوقوا .. وراجعوا حساب العقل يا قَلّه ..
ساعة القيامة لا تتفع شفعة ولا شلة ..
مايغُرْكوش إن باردة النار فى طاستنا ..١.



ديمقراطية

بان المستور .. فضحوه..

قفلوا الدستور .. وأبو نص لسان نقلوه

على رف المخزن رصّوه.. شَعْرَكَ يا معاوية حلقوه..

إنتهت الحصّة.. يا معتوه..

سبحلنه الدائم يا أبو قصّة..

يا صعيدي وتخش مناقصة.. يا منوفى وماهياش ناقصة..

بين أهله وأولاده.. نفّوه..

زنى يا نحلة على خراب عشك

انقضى هلاهيلك من قشك

طول عمرك دودك من مشك

أولى بمين غَشَك.. ياكلوه..

الكون بقى أصفّر من فنجان

والغَرْقه حصّلت اللّودان..

يا كدبة مزوقة بالألوان.. يا خرابى.. النّورى سرقوه..

كان عسكرى؟ لأ.. داما كانش زمان

على شعر فؤاد حداد سجان.. والقدرة ف بلدى على الإمكان..

حين ح يبان لك ريش نتفوه

ياما جيبتو الحق على الضباط والطبخه المدنى ريحتها شياط
فيه أبرة بتشكى من الخياط .. نطاط الدار .. للنار .. أخذوه
قريبه ومخرومة انفخ فيها .. جيت تكحلها رحت عاميها ..
حاميا مقاسم حراميا .. واللى مربيا بتلن أبوه
أقص قلمك هات م الآخر .. ولا حافر يدفته غير حافر
اللى نشاها زمان كان كافر .. أول ماركبها عبده ..
وأنا كان مالى ومال فضايحها .. اللى مفضحها .. مكسحها
لأفها فى سيجارة وسيحها .. واللى يصحصحها .. معتوة ..
عمر العهدة ماهيش ع الراوى .. القرش خرم مخ الفاوى ..
ما فهم الفولة إلا قنساوى .. الكلب ما بيعض أخوه
عبرة أجيال .. استعبرها .. البفلة راكبها مأجرها
ودماغ الحمرة نكسرها .. قلنا لكم تور برضه حلبتوه
أعمى من الأول .. وعموه .. من عام عمول .. بدكوه
إستصّر .. أسلم .. صلبوه .. وإن كش وقصّر .. يطولوه
يابو مخ يفتح .. فيترس .. وبنوك مكسبها أما تقلس
وجرايد فالحة أن تقلس .. ع الآس ساعة يا يقشوه ..
فاطفيها بجوز عتمة تنور .. أكفيها على بوزها .. تزمّر ..
كان غيرك أشطر واتشطر .. يوم غير جلدّه .. سلخوه ..

..

يوم بان المستور.. فضحوه.. من غير الدستور حكموه
والآخر زهقوا من أدبه.. فاستغنوا عنه وخصوه.!



إدمان

ألا إنى تعودت إنكسارى.. وأدمنت انحرافى عن مسارى
نهاراً تهرب العنزات منى.. وليلا يختفى عنى.. حمارى..
شموس الغابرين إلى شروق.. وشمسى حائلة ما يطلع نهارى
بنا الأجداد من عظمى فخارا.. وعشت أبيع للخبز افتخارى
إذا ما قلت صلتُ وجئتُ نخعاً.. أنا عربى ومهد العز دارى
الم تركيف ذل الأرض نفطى.. وكيف الفرب يرضع من دنيارى
جنود الأرض أذعوها تلبنى.. وحتى الجن يرغب فى حصارى
فلا تطلع لى فيها يا واد يا قندى.. وخذها منى كلمة ولا تمارى
بلاها القدس وبلاها الأراضى.. غراب وخطفها يوم عز انتصارى
وطار، صابتنى فى عقلى البارومه.. بفضل الأمن فى الحقل اليسارى
فأدمنت انحدارى عن مسارى.. وعاشت الهزائم بانكسارى
فإن فلسعت يوماً من مدارى.. فكن سدى ورداً لى اعتبارى
وخلى عنك من قصة حياتى.. فقد مسحت مرأتى نص عارى
أنا اللى كنت حوش الست عارف.. مكانى فى التاريخ حوض المجارى.!



الربيع

البنات زايدين جمال

الربيع زادهم دلال..

زى بستان فجأة يتفجر زهور

واللى ياسمين واللى نسرين واللى ورد

واللى فايج عطرها تفاح فى خد

واللى مالهاش زى ما يشبهها حد..

واللى مايسة بقدر فاق حتى الخيال

تعطى حلاوتها المعانى للسطور..

زى بستان فجأة يتفجر زهور..

اللى ماشية كأنها طيارة بجناح

واللى عز الليل تبان شمس الصباح

واللى فى رموشها سيوف تشفى الجراح

شئ ما هوش معقول ولا هوش محال

سيمفونية لون بيعزفها الشعور

زى بستان فجأة يتفجر زهور

فينو فنان عشق الألوان ببعض

مش فى أى زمان ولا هو فى أى أرض

فى سمايا الصافية مليون ألف وعد
غيمت فجأة عواصف برق.. رعد
والقصيدة عاجزة عن رد السؤال
اللى بيحاصرني فى مارس بأحوال الزهور..
وأعمل إيه؟..

البنات بيخشوا قلبى بدون خجل
عمالين رايعين جايبين شعر وزجل
أنا ياللى عشت عمرين ع الأمل
خطفوا أيامى لزمن عشق المحال
اللى سرسب منى يكوى فى الصدور
زى بستان فجأة يتفجر زهور..

البنات زايدين جمال
عينى عينك يسرقونى بالنهار
وف سكون الليل يقيدو القلب نور..
زى بستان فجأة يتفجر زهور..



راكب ومركوب

إحنا اتتين.. حلوين واصحاب .. إخلاصنا لبعضنا.. أعجوبة
واحد راكب.. ما اتغيرش.. والتانى طول عمرى ركوبة
طبعاً كان ما بينا مشاكل.. نتصالح هسه ونتشاكل
لكن الراكب.. هو الراكب.. والمركوب فاضل مركوب
لو واحد مننا بقى عاقل.. التانى دايماً.. دحلوب
ومادام حامد شاكر واكل.. ربك يا ابنى رب قلوب
لذا أرجوك إياك تجاملنى.. إنت شايلنى ولا أنا شايلك؟
طمنى أنا خايف أكلك.. خوفى أنى أغرق فى مشاكلك
ليه باسلىخ ضهرك بعصايتى.. ألاقىك راضى تتمسح فيه
ومهما سقت عليك برزالتى.. أول ما اهدى بترمح بيّه؟
ما بلاش من دى أسئلة صعبه.. بس البرسيم زوده حبه..
طول عمرنا على كدة يا حبيبى.. قلقان ليه.. ليه خايف منى؟
خايف.. ورضاك ح يجتنى.. يا عم ارضى إيه مطلوب
هذا قدر وتاريخ مطلوب.. أنا مركوب والواجب غالب
بافرح قوى لو ابات مغلوب.. لا يا حبيبى دا شىء حيوانى
صعب على الفهم الإنسانى.. سامعك فرح وحزن تنهق
أقلق صاحى طول الليل.. حبل الصبر جميل وطويل
نعمة وفضل الجهل محبة.. بس البرسيم زوده حبه
لجل اتحمل وأقدر أشيل.. شوف أودانى طبيعى طويلة

هيه كدة عشان أسمع لك .. كل ما تتقل فوقى الشيلة ..
ح اثبت أنى مازلت استاهلك .. وانفذ كل المطلوب ..
بترجىنى وتقسّحنى .. وتسّلحنى أن عزت حروب
بس الحال ده ح يجننى .. ورضاك ما بقاش بيطمنى ..
إيه هو السر الأعجوبة .. كّنك راكب وأنا ركوبة ..
ضحكتنى ليه وأنا تعبان .. يا عمى السر أنى حمار
أول ما ترخرخلى لجامك .. باشعر أنى راكبنى العار
فاوعى تخاف وتعكر دمك .. يكبر ذنبى واحس النار
زمر لى على طول أرقص لك .. وأسليك وأرمح وأرفض لك
على كيفك وأكيد أعاديك .. وعشان تكبر .. أنا أنقص لك
فاهداً ودلدهم رجلك

بس تملئ كتر نايبى .. من برسيم كرمك وشعيرك
العالم يفضل بك بمبى .. طول ما أنت شبيعت حميرك !!



المصير

فى بلاد الفقر اللى بتشتت .. مكتوب طول عمرك يا فقير
تفحت فى الصخر عشان تتحت .. بطيخ قشر الملياردير
فضلة خير الملك المَبْخَت .. يسمح لك حين تبقى خبير
إنك تتسحلب تترقى .. يا أمين مجلس ولا غفير

يا وزير زوق فى غاية الرقه .. يا نواية يسند بها زير
شرط ما ييقاش جواك إنه .. ولا تتشعبط على مواسير
لذا يلزم للشاعر منا .. لو كان عنده بواقى ضمير
يغضب سنّه ويهرب سنّه .. لأمان اللى فضلوا حمير
لحد ماربك يرضى ويبعت .. عفريت يكشف سر البير
يمكن يفهموا معنى غباوتك .. ويقولوا فقرى.. بس سمير!!



برقية تأييد للمطرودين فى مرج الزهور

يا مطرودين للخلا ذنبى بكم قاسى .. لذا أما انشد ما ح اتعداش حدودى
أنا المتعوس مدعوس المأسى .. خيبة أملى.. نسيت حكمة جدودى

...

عويل لما اشحت اللى فى إيد سوايا .. وبابنى ف ملك غير وبيتى خايخ
ولو مرة العدو اتسامح معايا .. راح اجمع بلحى صيص من نخل شاخ

...

لذا علشانكو شديت الربابه .. يا دوح أعزف مجاملة أقوم بواجب
نقوط على قدى فى فرح الحبايب .. ينوبنا من حماس العركة جانب

...

راح خطب فى اجتماع حزبي يناصركم .. فى عز البرد تتدفوا بكلامى
وإذا مات حد منكو آخذ خاطرکم .. ولو فيه فتّة ح اشارككم طعمى

وح اشجب فى غضب مين شردوكم .. وح أعلن رأيى رسميا وشعبى
أنا المحتج ع اللى أبعدوكم .. وع الأزمة اللى كشفت مستخبيّ
...

ح اسوى ندوة غُدوة ومهرجان .. ح يخطب فيه جميع زعماء نضالنا
وح نشيد اليُفَط فوق الميدان .. كلام يحلف بأن انتم فى بالنّا
...

وح نهّل .. وبعدين راح نحلّل .. ومين يملك عمود ح يسّن قلمه
كلام ساكت حزين وكلام مخلّل .. نفيظ اللى ظالمكو بحرق علّمه
...

وإذا تعبنا هتاف مدوا الأيادى .. وشدّوا على ايادينا بقوة
ح ناخذ شبرا ونروح المعادى .. يجوز فى القرية نشمر بالمرّوة
...

ح نتقابل ملوك زعماء قبائل .. ونتبوّس عشان خاطر عينيكم
نسوى بالبيانات الهوايل .. ومن امتى اتفقنا سوى عليكم
...

بلاد العُرب واحدة العمر واحد .. مجمعنا غرامها دقون شوارب
ندق الطبل لجل الحرب جامد .. فيجى النصر حتى انّ لمّ نحارب
...

وايه يعنى خيام من غير چراكن .. تاريخنا كان رحيل هجرة وزلازل
وخذنا عليها عمر ما قلنا لكن .. فأى خرابة للفرسان منازل
...

أكم دقت على روسنا بلاوى .. ولابيهمناش حالنا كما هو
نجدد كل ذكرى فى الحكاوى .. لو الكون ينسى ح نشد انتباهو
...

لأن إحنا العرب أصل الحضارة .. من الأهرام لسكان المقابر
تاريخنا كله حافظاه الحجاره .. كتبناه بالدماء قبل الحناجر
...

فَصَبْرًا رابطوا واكيد ح تصحى .. جماهيرنا وح تخرج للمسانده
تدق الأرض همّه بكل صحه .. ح تخنق فى التاريخ روح المعاهده
...

طباعنا قديمه كيف طالت إيدينا .. من البصره إلى الصومال تاريخنا
ما فيش واحد ما ذلوش حد فينا .. عشان القرب يربعهم صريخنا
...

لذا بنزعق وراكم فى حراره .. يدوى صوتنا عاصف ع الحدود
ندبب بالمسانده ف كل حاره .. نطبل حتى فى حاره اليهود...
...

فلو لايد ... موتوا صامدينا .. فكل شعوبنا جاهزه للمدافن
هنا لك أو هنا العهد علينا .. ولو عاجزه الجمال جاهزه السّفاين
...

تاخذنا لفين بلاد الله وسيعه .. ح ترمينا على شطوط مالها آخر
نُعْض ف بعض فتزيد الوجيعه .. نعيش بالهم يا نموت بالمساخر
٦٤٥

وعفوا سادتي لو قولى جارح .. ما بافهمش ف أمور التكتكادى
قرفت انى اكون زمّار مذابح .. فى إيد اللى ورث بلوش بلادى
...

فهو واسود ولاد آوى وتعالب .. فى كل مجالس الألابنده زينه
وساعة الحق يسقونى المقالب .. ويبقوا همّه والأعداء علينا
...

طب إن كان دول سيادنا إحنا مالنا .. لسانًا طويل فليه تقصّر إيدنا
يوماتى يقتلوا الأطفال قبائنا .. وخايفين نقتنع بالدور علينا
...

وندوة ف غدوة نبرى ضمير وذمة .. يا غاوى الهمة نقط باللى عندك
ما دام الأمة صبحت فى الهمة .. فجهز حفل تأبين للى بعدك
...

وحفلة للى بعده واللى بعده .. ميراث الذل صار للكل عادة
وحين ينذل سيّدك وأنت عبده .. تُحقّ على العكاريث الإبادة.



مجاملة لكن فى مكانها

على قمة الأهرام باشوف النيل
من نافذة فى الطابق العاشر ..

وانتتى فكرة زى وحى نبيل

من عقل مصر النور .. أخذتى ع الآخر ..

جريدة خضرا زى قلب الخص
قديمه زى النخيل .. جديدة روح العصر
حلفنى بيك اسم مصر أدوّن المواويل
ياليل يا عينى.. ياليل
على قمة الأهرام فى عشق أرض النيل
كما صفحة بيضا تساعى كافة التفاصيل
مرآة مصريه .. فلاحه مدنيه
بانوراما عصريه للأوتار.. يا حرية
فيها اليسار واليمين .. والقبط والمسلمين عمال وأقندية
كتاب.. ومستوظفين
مصر اللي كانت واللى عاشت هيّة
وبنات كورد الندى .. سنيورة وبهية وعقود باسمين
منورين زى فكرة بتلهم الفنّان
على صفحة الأهرام..
لما الأيدين بالنغم تعزف وبالألوان
تكتب بألف لسان وتتكلم
قبل الحروف والخُطوط .. قبل الحيطان والبيوت..
قبل المدن والشطوط قلب الوطن انسان
ينبض زمانه فى تاريخ المكان
حرب وسلام

الفرح يفيض على الأحزان..
للطفل رنة وتر .. للشاب سكة سفر
وللفتاة والفتى قصة هوى.. أو خبر
وللعجوز السليم القلب والنية
ذكرى وحنه يحيى ذكرها الوجدان
حواديت وشعر وصور.. فى قصيدة لا تنتهى
أو زهزة فنان
أو وعد للعاشقين العطشانين بالمطر
على قمة الأهرام..
يولية ويونية وتسعتاشر وأكتوبر
سجل أرض ويشر م المنزلة لكوبر
عجوزة لكن شابة مازالت .. كينت بنوت
عصية مثل الشرف
سهلة كحبة توت
نهارى ما يبتدى إلا أما أقرها
ولا يهدى قللى اليوماتى إلا إياها..
عادة ورثاها
عن الشيوخ الأفندية الحقوق مواريث
بين الألم والفرح والضحكة والآهة
تكمل مشاوير حياتى..

بين الزمان والخطر وعد اللي سوأها
بالحرف والتشكيل فهمناها..
أو بالخطوط والصور
الاقبها نفس الجريدة جديدة كالآتى
خضرا كقلب الخص... مرسومة زى النخيل
ساعة الأصيل ع النيل... تاخذنى لداها
من نافذة فى الطابق العاشر
تقتل حبال لاتزان لما النظر يختل
تخفف الأحزان عن اللي بيسافر
حرب وسلام العقل ع الآخر
العلم زى الإيمان... حفظ التاريخ م الجهل..
تحى الأصول بالأصول.. طالبة الكمال.. مش أقل..
وأما يؤوون الأوان.. وتبات أماير الفصول..
تجمع شتات الأهل
من عصر جدى لحفیدی الجای تتقدم
إذ ياما جم ياما راحوا البشر
ياما على الأهرام وأكم تعيش من صحف
وتموت ولا تعلّم
إلا حكاية بتروى إسمها.. الأهرام
إذ كل من كان جميل وأصيل ح يتقيم

لو مرة إبداعه طال صفحة من الأهرام
سواء كان وزير أو غفير أو عسكري مقدّم
أو فهلوى عبقرى فاهم... ولد... قيم
كان ياما كان كلّه كاتب قارى فى الأهرام
العمدة ع المصطبه يفتى ويتكلم
فصيح ولّبلب ولا يبقرا سوى الأهرام
ولفندى جوّه الديوان لو حب يتظلم
تلقى سلاحه براحه سطر فى الأهرام
طالب وفنان واستاذ جامعة ومعلم
ماشى يتباهى شارى جريدة الأهرام
والباحث المحترم يحزن ويندم
لو فاته مرة خلاصية فكرة فى الأهرام
زى المعاند بطبعه ان شفته بيسلم
تلاقى ماقتعه كان رأى فى الأهرام
حتى اللى غاوى خلود الذكرى بيصمم
مايموتش إلا إذا شاف نعيه فى الأهرام
أما اللى عايش بيحلم بلده تتقدم
يدفع حياته ويرسم حلمه فى الأهرام



مسح البلاط فى مدح المس بيروقراط

كماريرة قلاوون	انوّنه الحيزيون
فى نصّ بنطلون..	يا دوب شبرين وحتّة
نبت فى باروكة عيرة	ودماغ شبّه الفطيرة
صبحت بازيع عيون..	كانت صاحبة بصيرة
لا خبرة ولا مهارة	وبقت وكيل وزارة
فى شدّة السيّفون	لكن صاحبة شطارة
مثيلها حدا شاويش	لها زغرة ما تلاقيش
فى سوق الزنكلون	أو بيّاعة قريش
دماغ طقليين صغار	تمضغ ساعة الفطار
تصرّخ م القولون	لذا ف ساعة الهزار
بيشوف أحلام مخيفة	لها مخ سفنجة ليفة
بمشنة تبيع لمون	تسرح بقّد الوظيفة
خايفة ممّا جرى لها	لذا زاد بها هبلها
وعضّت الزّيون	ففاض بها احتمالها
طبع القديم غلبنى	أكلك منين يا إبنى
زلع تخليل زتون	فرعون طول عمره بينى
وبلاها بطبع قاسى	رخصها ع الكراسى
مش ممكن راح تكون	لو ماكنتش مقاسى

ومصيرك للزَّريبة	تعيش ركوبة خيبة
يا ندبر لك مصيبة	باللايحة والقانون
أنونة من خيبتها	القطر لما فاتها
طباعها لخفنتها	واللى يهين يهون
حتى نهار رحيلها	عليه شدة حيلها
هزت فى وشى ديلها	نطحنتى بالقرون..



سعد الملافظ لتحنين قلب سيادة المحافظ

سيادة محافظ بلدنا الهمام .. ورئسها م الميكروباص للترام
 قصدتك وقصدى شريف النوايا .. عشان أستجير من هموم الرّحام
 يا ريتك سعادتك تشارك همومى .. وتسمح لى أفتل حبال الكلام
 ومن غير لجاجة وديباجة وخلافه .. ماتزهقش واقرا لحد الختام
 أنا يا سيادة الوزير المحافظ .. مواطن ضعيف كل حيلتى لسان
 ومن بيتى ع الصبح أغدو لشغلى .. ومن شغلى أرجع لبيتى أنا
 مثالى ف مجالى ويشهد دوسيهى .. بأنى مسالم كفردة يمام
 وكل اللى باحلم به إنى الاقى .. لرجلى ف شارعنا أما أعدى مكان
 رصيف امشى جنبه أو اركن جواره .. بدون ما ترازنى خناقة وصدام
 فشارعنا هذا الذى كنا نمشى .. كإنّا ف جزيرة عشوش الحمام
 صبحنا التقيناه تزيلح وأصبح .. مباءة بتشفى بذاعة وسخام
 نقلتم لسوق العبور التجارة .. على دماغنا حاضر وقلنا تمام

بواقى الجيوش الى فرت أمامكو.. فى شارعنا كَرّوا بكارّو وحصان
شياشى وبوكر وبطيخ وكوسة .. مجارى مزاج على آخر انسجام
مرابط واقفاص على كل ناصية.. زفاره وغبارة عفاره ودخان
روايح صفايح حجارة ونجارة.. كيما خردة فاردة وشاغلة المكان
فتوتها خد حتّة عامل مصلى.. وصيّاعها بايعوا الفتوة إمام
يكسّر ويحضر يزمر يعفر.. فى ملك الحكومة عديمة المقام
ولا يمها واخرس وخليك فى حالك.. تقاوح تبرطم ح تتدم قوام
فهذا المرازى له عزوة جامدة.. ركوبة مباحث.. يا حدوة حصان
وهذا خبير انتخاب له جداول.. وله فى المجالس حضور واحترام
وذاك ابن عمّه رئيس فى المحلى.. وهذا عمّامته بقدر البرام
وكله علينا لهم ضهر جامد.. يا دا بتاع هدايا يا عنده مدام
تحول شارعنا ف ايدهم لورشة.. ومقلب زباله ملاريا وجزام
فأرجوك تزورنا يا رئيس فى مرة.. بدون الهلّة وبلوك النظام
على سهوة وإن كنت تقدر تعدى.. شارعنا.. راح اكُنس مقام الإمام
وأقرّ اعترف إنى ظالم سيادتك .. وإنك مثال الأصول التّمّام
وإن اللى قلته دا كلّ.. إشاعة .. واضغات حلم وكابوس انفصام
وإن ابن بدران جزيرته جنينة .. برّكها شواطىء بحور الفرام
وأقدم بكل احترام اعتذارى .. وأسحب كلامى اللّى كلّ كلام..
وابعت لمنية مرجّا وبلدنا.. وللخط كله ونضرب سلام!



كوادر ما بعد . الحداثة

الف تحية .. لصوبات الفن الأمنية .. وسلام تعظيم
ميت كلية .. فى مدارس الكادر الشرعية .. منذ التأميم
إنتاج ياما .. نقاد روايات شعر دراما .. أخذوا التطعيم
ضد الأفكار .. فى يمين فى وسط فى لبط فى يسار الفكر رچيم
وبقوا كوادر .. جيش المأمور عبد الأمر .. يلسنوا بالسّيم
مليون دكتور .. فتة وفليتوا يلتوا طابور .. خطوة بتنظيم ..
يا جراد مطلق .. سلم للسوق الرايج فوق .. باعوا بملايم
وغزوا الندوات .. شعر وسينما وسياسة وجات ... تموين .. تعليم
باعوا أبوها .. ويفكر الففرا خريوها .. فى يسار ويميم
وثقافة إية .. تخرج من إيد العبد البيه .. جحش البرسيم .!



زبليطة ريع قرن

مبروك عليك يا فارس التخطيط
الزمر كان م البداية طيلة وطرمبيط
ع البهلى تجمّعنا صُحبة ساحة الأسّاد
لحفلة الرّقص تشريفة لزعيط ومعيط
...

مبروك عليكم ريع قرن - يكاد
تبددوا ف همّة ثوزية ميراث لأولاد

بخيال مآة وواوى خلفته مساخيط
يهدّوا أجيالها تصبح مصر نص بلاد

...

يكفيننا يافطة نيون تضوى بعرض المحيط
تبكى على وهم ماضى زى بكرة عبيط
وايه بهمّك يا واد البلية ماشية معاك
واحنا بخيبتنا اللّى سلّمناك زمام الغيط

...

يا فارس الوهم دارت دورة الأفلاك
وقوة الطرد عملت فعلها وياك
عارف حقيقة إن كدبك صنّقة المحاسيب
أول ما تمجّن تطجّن يبدأ التّبطيط

...

تلت طين الحقيقة بميّة الأكاذيب
راضى لمصر البريئة تنام فى حضن الديب
والمكنة خُرْدة ومُصنّر توصل الأسلاك
وتعكّر الميّة يتعشّى الملك قراميط.١



معجزة العصر

دقرم فى عباية أستاذ .. متمكن فوناتيك ألفاظ
يملا لك بطنك بطيخ .. بمراحل خطط الإنجاز ..
ويجاوبك على أى سؤال .. برواقه ودون استفزاز
الأرنب طلع المريخ .. والتعلب ساق الأفيال
الحكم ماهواش ألفاز ..
النص خواجه ابن الشيخ .. وزن الكونشرتو بموأل ..
ووقف على سن المخراز
أسطى أرشيف التماخيخ .. وخبير تصريف الأفعال
تواليف العرق النهاز ..
بيحب الستات ع السيخ ... والعقل ضمير الرسمال ..
على سوستة وسرير هزاز
وطنى من حزب السبئية .. طش البرجر فى الملوخية
فغواه اليانكى المنحاز
يتوضئ بأخلاق القرية .. وإن حكمت يرطن بروتاريه ..
تسبيكة بير البوتاجاز ..
سنادة لدماغ الكرسي .. ووسادة للفعل العكسى ..
كلينيكسى لحشو المهماز
الخبرة عبرة وبإيدك .. كون إبرة مزيكّة سيدك

يا صوابع تحنين لابزاز
برغوت لآبد فى الضليلة .. حافظ سلسال شجر العيلة
م القارح حتى بن باز
وما دام فى إيدك الأعلام .. وثقافة كنافة قطاع عام
عدوية ح يقول فى عكاظ
والشاشة الناشئة ح تتور .. بالمستغل والمستحمر
والأحمر منه لو انماز
الناشف ح يلين والملمب .. على طرف صوابعينك يلعب
ح تحطة جوة البرواز
تبقى له الهيبة فى الخيبة .. بميزات ما تطولهاش العيبة
العادى كفيل الممتاز
...
وإن كانت العادة مابتامشى .. أكنم الغول ما ح يرحمشى
وبنيت بيت أملك بقراز
مركب لوريج كسرت قالعة .. زلزالها ح تدفكنو توابعه
والكل كليله يجيب جاز..



أسهل الفوازير

الحكاية صعبة جدا .. سهلة جدا
زى اف مالطة ح تدن .. قول قصيدك
إفتى فى اللى ماتعرفوش
واشرح اللى ماقريتوش ... مش بإيدك
خلق فرحانة بهيـلها
نخّه تحت أكوام عبلها ... وإيه يفيدك
تصحى أو عنها ما صحيت
عامية طرشة إمتى سمعت ... لن تزيدك
الظلام حاشد جيوشه
شمعتك مش راح تحوشه ... وضاع شهيدك
الوطن مخموم فى سيده
والزمن شوشر نشيده ... مات نشيدك
وصمدنا على القهـاوى
زغللت عيننا الرّغاوى ... وإيه جديدك
فينما مات عرق الحساسة
عفن الذل السياسة ... شاب وليدك
إمتى كان بدء الحكاية
والا فين فجأة النهاية ... صيد يصيدك
اقتنع شمرك بكذبك
واحنا صيرنا بواقى شعبك ... رهن إيدك

تبتلينا وتفتى.. فينا
بالجهالات.. تغتلبنا... باسم سيدك
ولذلك سهلة جدا صعبة جدا
إنت واحنا ف مالطة ندن..فى عبيدك



على سلم للصنف الأول

مبروك عليك الرضا السامى وزير وسفير
والحاشية من أول الماشطة لرئيس تحرير
مبروك رضاء الاكابر.. صفوة الأمة
اللى بلوها انعدام الهمة.. والغمة
بالذمة.. ألمك فى قلبك والاشرخ ضمير
...

زمان داريناك وقلنا الفقر له زمنه
والقرش لابيض حماية . العمر مين ضمنه
من ورطة السجن نشلك عسكرى السلطان
قسّمك بسيف لاختيار . الكذب والحرمان
اخترت حضن الأمان . الحظ له تمنه..
ونسيت ليالى النعيم السيّدة وبولاق
بالصّحبة والحلم كان دافى شتا الوراق

حَبِيتَ عَلَى حِجْرٍ دَهْ وَفَا حَبْلٌ دَهْ أَتَشْعِبُطُ
وَدَا عَطَاكَ هَدَمْتُهُ لَمَّا فِى سُتْرَةِ شَبِطُ
وَشَرَطْتَ قَبِلُوا شَرُوطَكَ تَخْلُطُ الْأَوْرَاقُ

...

كَانَ يَامَا كَانَ الْوُطَنُ وَالشَّعْرُ لَهُ هَيْبُهُ
وَكَلَمَةُ مِ الْقَلْبِ.. أَبْقَى مِنْ دِيْوَانِ رَبِّهِ
لَا السَّجْنَ كَانَ مَنَاجِيهُ وَلَا السِّيَاسَةَ شِيكَاتُ
وَالْمَجْدُ مُشْ عَنَاجِيهِ وَلَا رَحْلَةَ لِلْإِمَارَاتُ
وَلَا أَغْنِيَاتُ الْغُلَابَةِ خِيَابَةُ أَوْ عَيْبُهُ

...

اللّٰى جَلَدَنِي أَحْتَمَيْتُ بِهِ أَنْتَ لَجَأْتُ إِلَيْهِ
نَجَّرَ عِظَامِي سَلَالِمَ لَكَ طَلَعْتَ عَلَيْهِ
كَانَتْ الْقِصَايِدُ شُهُودُ فِي الْمَحْكَمَةِ بِتَكْذِبِ
وَاللّٰى انْكَسَرَ قَلْبُهُ غَلَبَهُ اللّٰى قَدَرِ يَحْسِبُ
وَالطَّبْعُ يَغْلِبُ مَا دَامَ عَجَزَ الْبَشَرُ يَحْمِيهِ

...

وَعِشَانُ كَدَهُ مَصْدَقِيْنِكَ قُلْتُ وَالَا خَرَسْتُ
وَبَقِيْتُ حِدَقٍ قَعْرُ مَجْلِسٍ وَالْأَقْعَرُ الدَّسْتُ
وَاللّٰى مَضَى مَا انْتَهَاشَ وَأكِيدُ يَحُلُ الْحِسَابُ
دَى الْخَيْبَةِ بِالْوَيْبَةِ هَانَتْ حُرْمَةُ الْغِيَابِ
مَلْعُونُ أَبْوهِ الْعِتَابِ.. بِيَقْفَهَا إِذَا قَلَسْتُ

...

وليسنقط الشعر دى السلطة لذيذ غنه
مين يعرفك يجهلك ما زوم سيبك منه
والعب ورتب باقى له (دورتين) واكثر
يدى لك التقديرية يجوز وتتدكر
هم الوطن اكبر من اللى خاب معاك ظنه
...

وان كان يزورك كلينتون بالزهور والورد
او اولبرايت تباهى وتوصل بك حبال الود
المرحلة محتاجاك فاعشق مادام حبيت
دول هممه برضه اللى قسموها عراق وكويت
والزيت بحور وانت حقك بحر قد القدا
...

وكون شاعرهم يا سيدى والفتى الأول
ربك مبارك لكم فيهم من الأول
والارض كلت العيال نصف الخرافة العلم
وانت اللى كاتب الأغانى من زمان للفيلم
وليسنقط الحلم - اهلك نفقوا عام نول.



ضياع الحق من طرح الإهانة

يهونوا الشعرا لو ضاعت حقوق الناس
ويبهت الشعراء لو غامت حدود الوطن
ياللى أنت عشت الصبا دايب غرام وحماس
مجنوب مقام الأصول مندور لقهر البدن
ما أجمله الحزن ينجد روحك الحساس
خوف من جموح الوصول يكون حرير الكفن

...

ضاعت حقوق الناس فهانوا الشعرا
غامت حدود الوطن فبهتت الأشعار
العشق أصبح وظيفه رهن بالأجرة
واتوزعوا ع البنوك والأرصفة الثوار
ومازلت عايش بتحلم بالهوى وتكره..
حذارى تنسى وتأمين بكره للتجار..

...

طول عمرهم بياعين طول عمرهم ركش
كم غيروا الأقنعة حسب النظام والسوق
كان حقهم مستحق وصدقهم بكشن
حسب الشطارة البلع ممكن يكون برقوق
واللى ابتداها ظنون يكفر مادام هبشن
فارحم فؤادك كفاياك عشت به محروق

...

ولا تبكى ولا تحزنون هذا مرض ماشى
وعشان يكون فيه نبي لزمًا يكون كفار
ولابد فرصة يمرمغ عزها الفاشى
علشان تصحح فى نار المحرقه الأفكار
هذا عفار لانكسار فى نار ماقيداشى
ليل الهزيمة ضرورى لجل يبقى نهار
...

وده قانون الجدل.. ياللى هبل نسيتوه
ومنين أجيب ناس لمعناه الكلام يتلوه
واللى خانوه حيروه.. ابن أمه والا أبوه؟
رمى حسرته من يمينه والتفت قال لى:
زمن اليتيم جاي بكره ما يقدرُوا يذلّوه!!



يا عريسنا يا قلب الخص

إنت الإنسان واحنا النملة	
إنت الفنان وإحنا الأ لاضيش	إحنا الكومبارس
ياشارينا بالآت فرد وجمله	
ح نلمّ وراك فرافيت العيش	ونقووط الرقص
وح ندعى مبارك ع الأملّة	
ح يجيبها ذرفها قزاز شيش بيش	من باب النقص

فَاعْمَلْهَا وَفِي الطَّبَقِ الْعَامِلَةَ
لَبَسَهَا الْعَمَّةُ عَلَى الطَّرَائِيشِ
وَارْعَبَهَا بِأَمْسٍ
إِحْنَا الْجَمَاهِيرَ جَاهِلَهُ وَهَبْلَهُ
عَلَى حَسَكِ فِي الدُّنْيَا نَعِيشِ
وَنَمُوتُ بِاللَّمْسِ
مَنْ غَيْرَكَ خَطَاوِينَا الْخَالَهُ
حَ تَزَكِ وَلَوْ تَطْلُعُ بِمَافِيشِ
غَيْرِ عَضِّ وَرَفْصِ
فَاتَقْدِمِ عِ الْخَطَّةِ الشَّامِلَةَ
وَاهْبِينِ لَكَ عِضْمَنَا قَرَاقِيشِ
تَتَمَصِّمُ مَصِّ
يَا أَسْرَنَا بِخِصَالِكَ الْكَامِلَةَ
مَا سَرَقَتْشِ مَا كَدَبَتْشِ لَيْشِ..
مَا طَفَيْتْشِ الشَّمْسُ؟
عَبَيْتْنَا بِحَبِّكَ هَنَّا.. وَامْلَا
أَرْوَاحَنَا زَكَايِبَ مِنْ خَيْشِ
جَاهِزِينَ لِلْقَصِّ
وَإِنْ بَعَثْنَا بِفُرُوقِ الْعَمَلِ
بِرِضِهِ حَ نَهْتَفُ لَكَ يَا شَاوَيْشِ...
يَا قَلْبَ الْخَصِّ..!



وَكِيلُ عَمُومِ الصَّعَايِدَةِ

لَا عُدْتَ مِنَ الصَّعَايِدَةِ.... وَلَا قَلْبِكَ عِ الْجَنُوبِ
دَى مَرَارَةٍ حَلَقَ زَايِدَةً.... مَا تَخْفِيشِ الْعِيُوبِ
وَحَسْرَةَ قَلْبٍ قَايِدَةً.... مِنْ حَرْقَةِ الذُّنُوبِ

الكلبة بتعوى لايدة.... لما تخاف الغروب
وطالعه بريع فايدة.... والقبر مالوش جيوب
...

لا عدت من الصعايدة.... ولا قلبك عاد فى قلبى
الخبية مش محايدة.... ولا اللى اتلط مبلى
حتى كروت المعايدة.... قالت لله ياطبلى
على غنوه قديمه بأيده.... أبدها قلبى قلبى
يوم ياابتدت المزايدة.. بيعنا حتى القلوب
...

فلا رجعنا صعايدة.... ولا فُلح عشان نتوب!



على باب ديوان المظالم

قلوبُ الظالمين لها مَخالبُ
ونابها ازرق إذا طالك لَمَزَقَك
ح تشكى لمين ورايح فين ياخايب
ماعارفش اللى خنقك م اللى خرقك
لا ليك بين الفيلان غلمان حبايب
ولاف قصر الملوك مملوك لرفقك
ومما انت إلا بغلٌ من الزرايب
قوم اغلى حسرتك واسكر بمَرَقَك
ضلوع سجنك بقت وسع الخرايب

وسيف موتك خرايبش اللي سرقك
ومقتل حضرتك وعى المطالب
فى عصر القهر لحم ودم حرقك
دى حيرة فيها حبل الخيرة سايب
ح يهرىك الرصاص على شر ورقك
فتتلقح تنام على أطرى جانب
ياتبلع ألف صرمة تعيش بعرقك
غراب البين لأمك جاب مجايب
وربح الغرب قادرة تطفى قلقك
قول إنشا الله أكيد ح ينوبنا نايب
ويوم تنجن تلحق باللى سبقك!



جنون الزجل

فن الزجل له هيبه مجنونة..
هيبه أراجوز فى ايده زقله مسنونة
وعلى لسانه شتايم شبه ملحونة
عفى يشم الخفى فى كل شى معيوب

...

فَرقْله تلسع كل من كان قفا..
أو ديل وعَوَّجْه زمانه فانتفخ واكتفى

ونسى ابوه اللي قتله ع الرصيف الحفا
وامه اللي فتلت حبال الصبر ولا أيوب
...

وإن قال لك الشعر همسة بوح بسر الذات
جمر انفجار الجسد في مجامر اللذات
بين اللقا والرؤى وزلازل الهزات
ساعة احتراق قبّة الشهوة بنار سهلوب
...

وأنا عصير الزجل في الشعر يسكرني
يرويني مزيكه ع الصحرا تخضّرني
على كل حزن الخرس والقهر تنصّرني
وكإني مولود يادوبك ما ارتكبت ذنوب
...

وأكم قالوا لى السياسه بتفسد الأشعار
وعالم كالظلم والافترا والكذب والأفكار
ومكأمن الخسه فى القلب الغبى الغدار
مالهاش مجال فى الجمال اللي يهز قلوب
...

لذا باستجير بالزجل يحيى لى أشعارى
أبرم على فتلتته.. يحمى لى أوتارى

لجلن ما تبردش ضد الظالمين نارى
وافضل وانا حى دايمآ أشبه المكتوب

...

يامبدعين الزجل أنا طفل خالى بديع
علمنى بيرم ما اشوفش الدنيا بس ربيع
وفؤاد نهانى أخون العشره خوف أو ابيع
من أجل اكون شيخ ولى لدين الزجل محسوب..



آخر آهات التسعه والتسعين

خد عوك ولاد الزواني وضيعوا صومك
وشنكلوك قالوا عنك تقلوا همومك
والفل نار فى قلوبهم يضحكوا ف وشك
ولحسوا مشك ومسحوا الصحن بهدومك..



الحيطة شاخت وشرخت من هموم وحروق
وعباية العمر دابت عته فيها خروق
وانت بلا إبره بترقع ويتخيط..
لو مره حزناً تعيط يا عجوز.. ح تروق



عزت علينا التضحيات افتقرنا
أصبحنا تركه لماهرات الطريق
لذا حين لما م الحريق استجرنا
إذا بالبريء منا محكوم في عارهم غريق



يا أيها الزعم الزعيم الزعوم
إزاي بتتقدر تطفح الدردى
وإزاي في ليل يونيه يجى لك نوم
وعلى ضواقرك بعض من شهدى



سلمت أمرى لبعض موتى النفوس
فسلمونى بشعور ميت لجلادى
وباعوا لحمى ياوطن بالفلوس
أنا اللى فى الجمر كنت العطر لبلادى



قبضت كام يا أبوشيبه ثورية..؟
كل الملايين دى - يادوبك فلوس ثلاثين
تمن خيانة يهوذا - دى قصه دورته
وإن كان حكايتك ما وردت فى كتاب الدين



طلّ في الستين

بَدَمَى رَوَيْتَهَا	إِنْ كَانَ (بَدِيع) رَمَى بَذَرْتَهَا
وَعَنَى لَى (فَوَاد)	خَمَرْنَى (بِيرَم) فَى طِينْتَهَا
مَنْ بَزْ أُمَى	رَضَعْتَهَا فَصَحَى وَعَامَى
لَوَادِمِ الْأَوْغَاد	وَعَمَّرَ مَا قَلَّتْ.. يَا عَمَى
وَفَّيْتُ دِينَى	بَنَيْتْ هَرَمَ مِنْ دَوَاوِينَى
وَبَاخَافَ لَوْ زَادَ	لَذَا حَافَ حَلَالُهَا بِيَكْفِينَى
وَلَا مَنَاخِيرَى	تَوْبَى مَا هَوُوشَ فَضْلَةَ غَيْرَى
وَمَالِيشَ أَسِيَادَ	كَسَرَهَا حَدَّ.. وَلَا الْمِيرَى
عَشَقَى وَدِينَى	غَيْرَهَا حِشَا قَلْبَى وَعِينَى
عَزَّةَ وَعَنَادَ	مَصْرَ الْوُجُودِ الِلى مَالِينَى
النَّكَدَى الْفَقْرَى	هَى الِلى عَمَلَتْ مِنْ شَعْرَى
بِيَدَقِ أَوْتَادَ	شَمْرُوخَ فَى إِيْدِ أَرَاوُزِ مِصْرَى
يَنْفُزُ يَجْرَحُ	يَفْتَحُ نَافُوخَ كُلِّ مُزِيلَحَ
أُسَّ الْإِفْسَادِ	وَيَدَاوَى بِالْفَنِّ وَيَفْضَحُ
وَلَا يَوْمَ وَطَيْتْ	عَمْرَى عَلَى السَّقْفَةِ مَا نَطَّيْتُ
بِحَجَجَ لَأَوْلَادَ	وَلَا خَلَطْتُ الْغَيْطَ فَى الْبَيْتِ
وَبَاغْنَى لَهَا..	سَتِّينَ سَنَةً هَمَّ شَايِلَهَا
مِنْ كُلِّ جَرَادَ	أَمِينَ عَلَى كِتَابِ مَوَاوِيلَهَا

وتقولوا (سين) لا (زفت الطين)	للحق عيين
أنا اللى طفلها فى الستين	بامشى لها بلاد
وإن كان (بديع) رمى بذرتها	بدمى رويتها
خمرنى (بيرم) فى طينتها	وغنى لى (فؤاد)!

الفهرس

٥	■ كلام بسيط فى الساسة
٩٣	■ أراجيز الأراجوز
١١٣	■ كلام حزين فى الفن
١٦٣	■ مواويل البال الطويل
١٧٧	■ على قد إسمى
٢٠٩	■ طوبه فى المعطوبه
٢٤٣	■ أزجال منشورة فى مجموعات شعرية
٣١٩	■ رباعيات ابن عبد الباقي
٣٤١	■ الأراجوزات العصرية
٣٦٧	■ من دفتر أحوال الدنيا
٤٠٩	■ من دفتر أحوال الدين
٤٣٣	■ من دفتر أحوال الساسة
٤٤٧	■ خرافات عصرية عن مصطفى أمين وزمانه
٤٥٥	■ قلة مقامات
٥١١	■ آخر حدود الزجل

« هاكم افراوا كتابيا »

الزجل هو ديوان العامية الحقيقي ...

هو المحيط اللي منه ويتخرج عنه كل بحار العامية .. ميتة أو حيّة .. والزجل فن مصري ميه في الميه .. رغم إن بعض القوالين (واكثرهم كلامه ماسخ) قالوا إنه ابتدا في بلاد تانية، وده كلام ساكت جابوه من اللي اتقال وانكتب، وباما اكتب اللي التسمع ولا انكتب .. مش مهم .. لأنه سوا كان إبداع رباني من خير الأرض دي وعبقريّة هذا الشعب والا وافد عليها وعليه .. فقد وافق طبعه طبعها، واتوافق هوا مع هواها وما جابش غير معاها .. فتبت جدوره .. فرع بحوره وابدع باما مزيكه وايفاعات واللوان وأشكال .. معجونه بالسخرية وطولة اللسان وخفة الدم والجرأة اللي ما يساويها ولا يقدر على بلاويها إلا الفنان حمال الهم الأدبائي الأراجوز المواويلجي الحكواتي ابو ربابه ابن النكتة القراري .. المصري بلاقافية .. القح الصعيدي والفلح وابن البلد اللي الهوى رماه واللي شاييل معاه فرقله وشومه .. مش عنطزه ولا منظره .. لا .. عشان يدش بيها راس المفتري والخاين واللص العنتري والحكومة .. بالضحكة والمسخرة .. عشان كده كان الزجل طول عمره المراهيه والوتر والقلم والتغم. والزجل زي أي فن، فيه وفيه، فيه التفاهة والنبل والعبيرة والأصيل .. فيه اللي يكتفي بالتريفة على غشمية وبساطة خلق الله بقنزحه، وفيه اللي يجرح الجحت اللي ما بتحسش ويخريش العقول اللي ما بتفهمش، ويلسوع الجيلات ويصفع القضاة .. وهو واقف في صف الغلايه مش في ديل المسئولين .. ويحلم بالعدل وبالحرية .. مش بالنكتة والصورة ويس ، لكن بالسخرية الحياتي اللي أولها بسمه وآخرها شخره اسكندراني .. وبالسخره اللي تهزأ الراجل المره والعمدة الحرامي والأقندي المصري اللي مريح على حجر الخواجه .. واللي بايع أهله وخاين العيش والملح .

الزجل آمة الجرح .. وهقيقة قبل الدبح .. وزهزعة الفرح ..

وعشان كده .. أنا فخور وفرحان باللي قلته وعملتته في ديوان الزجل المصري بعد خالي بديع وعمي بيمر .. لأنه (آخر حدود الزجل) وان التزمت فيه . بمزاجي . بأخر حدود الأدب ..

عبد الباقى
القرن العشرون

